

we



Ex Bibliotheca
majori Coll. Rom.
Societ. Jesu

49.4.28.



64

17

11/11/11
11/11/11

11/11/11

PAVLI ARESII

Derthonensis Episcopi,

DE AQUÆ

TRANSMVTATIONE

IN SACRIFICIO MISSÆ,

Biblio. Secy. HOC EST, *Coll. Rom.*

An in Sacrificio Missæ aqua mista vino in sua
substantia permaneat, vel in quid aliud,
si non maneat, conuertatur

Soc DISPUTATIO. *sest*

Item ad eandem APPENDIX.



ANTVERPIÆ

Apud MARTINVM NVTIVM

Anno M. DC. XXVIII.





ILLVSTRISSIMO

ET

REVERENDISSIMO

DOMINO

D. LVDOVICO

LVDOVISIO

S. R. E. Cardinali Amplissimo, &c.



INFANTEM ex utero
matris vix eductum,
telluri protinus ad-
mouere, mos fuit an-
tiquis; quasi eiulan-
tem puerulum, almæ parentis gre-
mio

mio commendatum solarentur, & hoc honoris testimonio, commune omnibus, ac perpetuum hospitium, tacitè venerarentur. Hucquē, opinor, alludens Salomon, *Et ego, inquit, natus accepi communem aërem, & in similiter factam decidi terram.* Sed longè felicius filius ille mulieris, quam signum magnum admiratus est in Apocalypsi S. Ioannes, ut à saeuientis draconis immanitate tutus esset, super astra ad thronum Dei translatus est. Ego autem, dum partum hunc meum in auras emergentem, & vagientē potius, quam loquentem tibi Illustrissimo Domino meo commendatum atque dicatum ambio, & vetus illud institutum imitari, & huius paruuli felicitatem quodammodo æmulari mihi videor. In te enim, & com-
mu-

munis cuiusdam parentis erga studioforū partus affectum inesse, ybi-
que volans fama testatur, & quan-
dam veluti cælestem præstantiam,
ob eam, qua præditus es, dignita-
tem, sapientiam & auctoritatem,
nemo non suspicit. Vt hunc igitur
humillimi clientis tui paruulum li-
bellum intra tuum benignè sinum
excipias, eumque à virulento in-
uidorum dente, edacisque tempo-
ris ingluvie tua benignitate atque
auctoritate tuearis, etiam atque et-
tiam rogo. Si enim Amplitudinis
tuæ, cæterorumque Ecclesiæ Pro-
cerum serenis luminibus hic meus
conspicietur partus, lætiores fortas-
se multò atque augustiores prodi-
bunt alij. Ego autem pro tua atque
patrui tui Sanctissimi Domini no-
stri GREGORII XV. incolumita-

te, proque omnium vestrorum vo-
torum felici exitu Deum Optimum
Maximum precibus fatigare non
desinam. Vale.

Amplitudinis tuæ Illustrissimæ
& Reuerendissimæ

seruus humillimus

Paulus Episcopus Derthonensis.

Bene-

Beneuolo Lectori Salutem.

PLurima laude dignos esse, qui magna volumina, & ingentes libros edentes, innumeras quæstiones agitant, & rerum tum multitudine, tum varietate lectores detinent, delectant & iuuant, nulli meritò dubium esse potest: sed neque contemnendos esse, qui paruula opuscula, vnicam tantum quæstionem, sed accurate, omnibus in id intentis viribus pertractatam complectentia exarant, æqui non denegabunt iudices. Vt enim in illis copia, ita in his studium ac diligentia allicit. In illis ad plura se oculus mentis extendit; in his attentius vnā in rem intendit. In illis mensa plurimis dapibus referta; in his ferculum vnum, sed magno sumptu, & exquisito artificio conditum apponitur. In illis veluti prælium quoddam atrox cernitur, in quo tum pedites, tum equites diuerso armorum genere inter se dimicant; in his singulare certamē, vel vnius arcis valida oppugnatio, & obstinata propugnatio spectanda proponitur: Ex illis denique plurium cognitio; ex his vnius, sed plenior & vberior scientia

* 4 hau-

hauritur. Et sanè quasdam insignes quæstiones non gregatim cum alijs tantum, sed seorsum, & integro illis addicto volumine examinari; vt quid tandem, omnibus circumspectis & perpensis, de illis statui possit, perfectiùs cognoscatur; rei publ. litterariæ interesse videtur.

Inter has autem, hanc, quana præ manibus habemus, & necessitate, & dignitate, quæ voluptate atque vtilitate non careant, id sibi postulare, nemo qui eam intropexerit, denegabit.

Necessitate, quoniam è veteribus Theologis, qui eam attigerit, nedum absoluerit, vix quemquam reperias. Ex recentioribus verò, quidam in sententiam, quam, vt communem ab alijs traditam reppererunt, vltteriùs non inquirentes, vt quondam pedarij Senatòres, abierunt. Nonnulli verò magnæ doctrinæ & auctoritatis viri à veritatis scopo (Nam & quâdoque bonus dormitat Homerus) vt mea fert opinio, aberrarunt. Alij denique non pro dignitate ac difficultate rei eam pertractasse videntur. Vt quispiam igitur, conquisitis vndique auxiliis, ex sacra Scriptura, ex Conciliis, ex Patribus, & ex omnibus

nibus alijs theologicis locis, omnibus numeris quæstionem hanc absolueret & enucleare satageret, necessarium fuit. quod ego quidem facere conatus sum, an perfecерim, aliorum erit iudicium.

Sed eius quoque dignitas id postulabat. quid enim nobilius, quid præstantius augustissimo Eucharistiæ Sacramento? quid dignius, quàm de eo verba facere, quod nobis, tamquam amoris firmissimum pignus, nostri amantiſſimus ipſonſus ad Patrem accedens, neque nos deferens reliquit? Sed plura sunt, dices, in hoc Sacramento, quæ captum nostrum nimis excedunt, ac proinde pia potiùs fide, & verecundo ſilencio veneranda, quàm curioſa diſputatione inueſtiganda ſunt. Eſto; at non huiusmodi eſt quæſtio noſtra; quæ cum hinc ex Patrum testimoniis, Conciliorum auctoritate, & Eccleſiæ ritibus; illinc verò ex lepidiſſima philoſophica diſquiſitione pendeat, ſit, vt neque tantis obruatur difficultatibus, quin commodè explicari queat, & lectori non paruam voluptatem allatura ſit.

Vtilitatem verò quis non videat? cum enim quotidie Sacrum faciamus, multa-

que in eo eueniant, quæ huius quæstionis determinatione indigent, vtilissimum profectò erit, in hac enodanda omnes nervos intendere, ne ex ipsius ignorantia, vel indignè tantum mysterium tractetur, vel superuacuis conscientia nodis & offendiculis, siue, vt aiunt, scrupulis implicemur. Quod reliquum est, te rogatum volo, prudens lector, vt qui huic disputationi tamquam arbiter præses, æquum te mihi præbeas; atque à ferenda sententia tantisper abstineas, dum omni ex parte causam cognoscas. Imò si fortè aliter sentias, meque videas firmioribus niti argumentis, & grauioribus muniri testimonijs, mihi, vel potius veritati, cedere ne recuses: memor illius numquam satis laudatæ Aristotelis sententiæ, quam cap. 6. libr. 1. Ethic. protulit: Rectius esse, & oportere, vt pro veritatis salute vnusquisque, & præsertim Philosophi, sua quoque refutent; alioqui veritatē ipsam, vt contra quosdam ait S. Paulus ad Rom. primo, in iniustitia detinere videberis, ex illisque esse, qui quamcumque opinionē ab initio mente conceperint, obstinatè retinent. Imò si quid illis in quotidiano
fer-

sermone temerè exciderit, id, quo iure, quæue iniuria, aduersus omnem humani ingenij rationem pertinaciter tuentur, dumque ab errorum vndis emergere stultissime erubescunt, in iisdem semper fluctuare non pudet: cum hoc turpissimum sit, illud non solum laudabile, sed etiam gloriosum. Quid enim gloriosius, inquit S. Augustinus in psal. 57. quam subijci, & vinci à veritate? Ego certè, si vel à S. R. E. hæc aut quæuis alia mea sententia falsitatis condemnaretur, vel docti viri erroris me arguerent, sine mora palinodiam me cantaturum profiteor. Vale.

Admo-

*Admodum Reuer. P. Domini Marcel-
lini Santagatiij Genuensis, Clerico-
rum Regularium Theologi*

Hydrophopoeia.

O *Mihi semper leuis auxa faulrix
Dulce seu flando mea terga comis,
Siue caelesti officiosa circum*

*Lumine complex,
Huc ades, nostras cupidamque laudes
Nunc inua sacris referare summas
Mille quois numen decorauit, ac me
Ditat ab auro.*

*Terret an moles, numerusue? saltem
Parca de multis, rogo, concinuntor:
Dic meis primum simul ut creata
Incubet undis.*

*Dic, ut ex undis sinibus catervas
Piscium formet, volucrumque turmas,
Dic rubescens genitas profundo
Gurgite gemmas.*

*Dic bene haerentes scopulis, & imis
Concha quos mater parit uniones:
Dic inexpletas vehat ut repandas
Vnda carinas.*

Vt.

*Vt sitim sedem, sine mēque ut agris
Feruidis nullam ferat ars medelam,
Fercla nec constent, vola nec subuclas
Sedula mundet.*

*Hac sed est laudum quota pars mearam?
Magna. Sed magnis propē nil videri
Iam queant, his si data diua tandem
Dona ferantur.*

*Me fores cali referantur, vnda
Crimen antiqui mea dum parentis
Tergit humanis animis, Deoque
Iungit amicos.*

*Quid loquor? dicam? sileamne? quidnam
Maius est rerum genitore? Iam nunc
Quid datum lymphis super hic libellus
Comprobet, audi.*

*In Deum vertor, simul ac Sacerdos
Verba deprompsit, quibus in cruorem
Vina transmutat, pare iuncta vino
Sorte fruendo.*

*In Deum vertor, comes incruentus
Est suo CHRISTVS siquidem cruori,
Semper & Christus Deus. hoc quid, oro,
Maius in orbe?*

Præsul

*Praesul id libro docet almus isto
Affatim Paulus, pia vota cuius
Enigris verum ruat ut tenebris,
Crede, fuerunt.*

*Praesul Insulbrum noua lux, recensque
Gemma Dertona, Pater atque Princeps,
Scriba, quem noster redamantem amanti
Corde salutat.*



Admo-

*Admodum Reuerendi Clementis Catanei
Sacra Theol. & Pontif. Iur. Doct.
necnon Derthonensis
Ecclesiae Decani*

Ad Auctorem Epigramma.

Remigium alarum, Iouis Ales, stemmate pendens:
Mellifluo & cantu diceris ALESIVS.
Præpetibus pennis summos discurrere montes
Fas fuit: en magni Prasulis arte nites.
Nunc aquila ductu calum stridentibus Alis
Findentem, metam stringere fata sinunt.
Ausus nemo fuit rapidum quò tendere cursum,
En noua progenies labitur Ostrifera.
Ostriferum rapiet LVDOVISA purpura factum:
Ostriferum PAVLVM sic quoque Roma canet.



Ad

Adlibrum Reuerendissimi Præ-
fulis ARESII Episcopi Derthonensis
sub auspicio Illustrissimi S. R. E. Car-
dinalis LVDOVISII prodeuntem, Ad-
modum Reuer. Iacobi Philippi Opi-
celli eiusdem Ecclesiæ Cathedralis
Theologi.

P*Rasulis Aresii liber es; te protegit umbra
Mitra: quid poterit Momus & inuidia?
Iamque, ut maiori fouearis numine, Patris
Ostro conspicui quaris adire sinum,
Inq. Ludouisij festinas brachia; tectum
Ergo etiam à Patruo, te facit esse Nepos.
Si te mitra tegit, si purpura, summa tiara,
Nì fortasse ruant astra, perennis eris.*



Admo-

Admodum Reuer. P. D. Petri Campanæ Clericor. Regular. Theologi, ad Lectorem.

IN Christi sacrum miraris abire cruorem
Lympham? per terras cum fluat, astra petat?
Miror, quin valeat lympham absorbere Lyæus,
Namque potens vinum est, gutta quid vna? nihil.
Miremur neuter. neutrum miratur Arcus:
Cum quo vina nihil, cuncta sed ipse Deus.

Admodum Reuer. Ioannis Petri Zanoni I. V. D. Epigramma.

DVCTa inter solis radios per fontis hiatus
Vnda fluens arcum picta colore facit:
Versicolôrque nitet calo Thaumantia proles,
Atque aliud, mirum, suscipit esse liquôr.
Sacra latex pariter, profert dum verba sacerdos,
Fit Christi eximius sanguis, & vnda perit.
Ars illa ingenij cunctis est cognita sacris:
Detegit hoc tandem nôster Hieron opus.

APPROBATIO.

EGO Desiderius Cornalba C.R. Congregatio-
nis Somaſchæ, & Præpoſitus Collegij Sanctę
Marię Paruę, de mandato Admodum Reuer.
Patris Fr. Iacobi Figini Generalis Inquiſitoris Ci-
uitatis & Diœceſis Derthonę, hunc Reuerendiſ-
ſimi D. D. Areſij eruditiffimique præfatę Ciui-
tatis Epifcopi librum, cui titulus eſt, De aquę
transmutatione in ſacrificio Miſſę, diligenter le-
ctum typis dignum exiſtimo, cum in eo nihil fi-
dei Cathol. contrarium animaduertatur, & ſuf-
cepto argumento à tanto Auctore quàm cumu-
latiffimè ſatiſfactum fuiſſe videatur.

Stante ſupradicta attestatione Imprimatur.

Ego Fr. Iacobus Figinus Inquiſitor.

Ant. Caluinus Archid. Vicar. Gen.

Vidit Saccus pro Excell. Senatu.

ALIA

A L I A.

VIDI hunc tractatum, quem maximè doctrinæ sanctorum Patrum, & præcipuè Angelici Doctoris, conformem esse iudico. Mediolani, 19. Maij, anno 1622.

Ita est

*Fr. de la Plana, Magist. & Prouincialis
Occitania.*

A L I A.

EGregia Reuer.^{mi} & doctissimi Episcopi Derthonensis disputatio De transmutatione aquæ in sanguinem Christi in augustissimo Missæ sacrificio, egregiaque ad illam Appendix, probabilissimam sententiam doctè, validdè, & dilucidè munit, & propugnatorum aduersantis sententiæ argumenta refellit.

Andreas Victorellus.

A L I A.

MAxima cum diligentia & attentione huiusmodi tractatum perlegi, & sum in opinione auctorem attigisse in hoc puncto sinceram veritatē, esseque doctrinæ Sanctorum, & præcipuè Diui Thomæ conformem censeo. Mediolani. 23. Maij, anno 1622.

*Fr. Narcissus Ribes Provincialis
Aragonia.*

A L I A.

Disputationem hanc De aquæ transmutatione in Sacrificio Missæ pridem excusam, cum Appendice recenter adiuncta, eruditam ac dignam censeo, quæ ad exercitium Theologorum exeat in lucem. die nona Decembr. anno 1627.

*P. Coens S.T.L Canon. & libr.
Censor Antwerp.*

S E-



SECTIONVM

T O T I V S

DISPVATIONIS

Index & Epitome,

SECTIO I.

Multorum siue errores, siue sententia omnino improbables referuntur, & reijciuntur.

PRIMO loco error Aquariorum refertur, qui aquam solam in calice offerebant, inter quos Summi Romani Pontifices à Magdeburgensibus impudenter & falsò recensentur. Fundamentum fuit falsa sobrietatis species. Rationes, cur non in aqua tantum fuerit hoc

*** 3

Sa-

Sacramentum institutum, tres afferuntur. Vndecim deinde aliorum errores breuissimè refelluntur; postea prima Catholicorum improbabilis opinio affertur, eorum scilicet, qui dicebant verti aquam in humorem phlegmaticum corporis Christi, quæ & Innocentij & Evangelij auctoritate, & formæ Sacramenti significatione confutatur.

Secunda opinio, etiam improbabilis, est eorum, qui dicunt eandem aquam verti in eam aquam, quæ ex latere Christi exiuit; quæ iisdem ferè telis impetitur.

Tertia opinio est, aquam virtute Sacramenti in nihilum redigi: quæ reijcitur, eò quòd magnum miraculum sine necessitate confingat, & sit contra sensum, contra naturam corruptionis, & verborum formæ.

Quarta opinio est Gulielmi Estij, aquam partim in vinum conuerti, & partim simul cum sanguine permanere; quæ, vt Patribus, & omnibus Theologis, & Philosophiæ repugnans, reijcitur, & sine ea, optimè representationē myste-

steriorum vnionis populi Christiani cum Domino, & sanguinis & aquæ effusionis ex latere Christi constare ostenditur.

Quinta opinio est, asserentium, aquam simul cum sanguine in propria substantia permanere, quæ & Innocentij, & omnium Theologorum auctoritate reprobatur.

SECTIO II.

*Sexta aliorum sententia proponitur,
& argumentis roboratur.*

Affirmat hæc sententia, aquam in vinum conuerti, & eo mediante in sanguinem; quòd si contingat tempore consecrationis non esse in vinum conuersam, simul cum sanguine permanere: cuius sectatores recentiores potius sunt, quàm antiqui. Probatur autem ab ipsis, Primò, ex Concilijs dicentibus vinum tantum esse materiam calicis Domini. Secundò, ex Pontificibus Iulio & Innocentio: ille affirmat præter vinum nil aliud offerri oportere, hic aquam

quam transmutari in sanguinem, cum prius transeat in vinum; quibus additur Catechismus Romanus, tamquam asserens esse hanc sententiam omnium Ecclesiasticorum. Tertiò, ex Patribus, scilicet Cypriano, Chrysostomo, Augustino, & reliquis nusquam dicentibus, aquam esse materiam Eucharistiæ. Quartò, ex Theologis, S. Thoma & reliquis ferè omnibus, cum Hugone à S. Victore, Rabano, & Vitriaco Cardinale, suffragante PP. Dominicanorum ritu, qui aquam vino ante Missam miscent; & Græcorum, qui post consecrationem. Quintò, ratione, quia aqua admiscetur calici ex præcepto Ecclesiæ, quæ non habet auctoritatem instituendi materias Sacramentorû. Sextò, aqua non fit corpus Christi, nisi transeat in panem: ergo neque sanguis, nisi transeat in vinum. Septimò, esset aqua æquè necessaria & sufficiens Eucharistiæ materia, ac vinum. Octauò, posset esse quantitas aquæ maior, quàm vini in calice, & adhuc conuerti. Nonò, fieret etiam sanguis, si vini accidentibus tantum affe-

cta

ita esset. Decimò, idem dicendum esset, si ex aqua & vino fieret vnum tertium mistum. Vndecimò, idem posset asseri de aqua rosacea vino admista. Duodecimò, remaneret sanguis Domini sub accidentibus aquæ, etiam corruptis vini speciebus. Decimotertiò, si species aquæ vini accidentia in se verterent, esset totus sanguis sub accidentibus aquæ tantum. quod est absurdum. Decimoquartò, idem dicendum, si aqua post consecrationē separaretur à vino. Denique, posset etiam sacerdos intentionem suam dirigere ad aquam tantum, & illam solam consecrare.

SECTIO III.

Septima sententia explicatur, & ex iis, quæ Christus Dominus sacratissimam Eucharistiam instituens gessit, comprobatur.

AQuam non esse quidem propriè materiam sanguinis, esse tamen commateriam, quatenus scilicet est mista, & incorporata vino, ac proinde semper verti in sanguinem, hæc sententia

tia affirmat; an autem semper immediate, dissident eius auctores, pendet-
que ex Philosophia. quare quinta &
sexta sententia suprà relatæ non videntur, quoad Theologiam, differre.

Pro fundamento huius sententiæ statuitur ante omnia, aliquando saltem, tempore quo consecratur calix, non esse aquam in vinum conuersam; tum quia probabilissimum est, non habere vinum vim aquam in se vertendi: tum quia saltem aliquando, vel ratione modici temporis, vel magnæ quantitatis aquæ, vel tenuitatis vini, id fateri necesse est. In hoc igitur euentu saltem, verti immediate in sanguinem, ex eo probatur, quòd probabilissimum sit, Christum Dominum, dum hoc Sacramentum instituit, aquam immediate in suum sanguinem transubstantiasse. Quod ut ostendatur, tria demonstranda proponuntur. Primum est, Christum aquam calici consecrando apposuisse: quod ex antiquissima traditione in sacro Concilio Tridentino approbata, & omnium Theologorù consensu recepta, ut certum

tum habetur, quamuis in Euangelio nulla aquæ mentio fiat; non enim omnia tradiderunt Euangelistæ. Secundū, quod probandum erat, est, immediatè ante verba consecrationis Christi, non fuisse aquam in vinum conuersam. Probatur autem, quia hæc conuersio, vel supernaturaliter contigisset, vel naturaliter. non supernaturaliter, quia non est hoc miraculum cōfingendi vlla necessitas, vllum fundamentum: non naturaliter, quia vinum non tanta vi pollet, vt aquam in se vertere possit. Sed esto, aliàs polleret; tunc non potuisset, probatur: Primò, defectu temporis, quod breuissimum interfuit inter aquæ appositionem, & consecrationem, vt ex multis Liturgiis colligitur. Nec obstat D. Bonauenturam contrarium asserere: intelligendus est enim de conuersione quadam morali. neque quòd Ecclesia hunc morem non imitetur, cuius ratio redditur. Non potuisse autem vinum aquam illico in se conuvertere, Probatur, quia minori vi ad conuertendam aquam præditū esse vinum
osten-

ostenditur, quàm vitis, quæ tamen, vt terræ humorem in vinum transmutet, anno saltem indiget. Confirmatur, quia probabile est, Dominum non in tam parua quantitate, vt nos solemus, aquã miscuisse, vt D. Thomas & alij docent, frustra P. Francisco Suarez reclamante: curque à nobis aqua modicissima apponatur, rationes redduntur. Tandem neque certum esse, vinum calicis Domini admodum generosum fuisse ostenditur. Tertium demonstrandum erat, aquam, si tunc fuit in calice, à Christo Domino in suum sanguinem transmutatam fuisse, quod ex eius verbis efficaciter demonstratur; simileque argumentum Patres Concilij Tridentini confecisse ostenditur. Concluditurq; cum certum ab incerto non pendeat, certumque sit totum, quod erat in calice, in suum sanguinem fuisse à Domino transmutatum, incertum verò, vt minimum, aquã fuisse antea in vinum conuersam; eiusdem aquæ conuersione in sanguinẽ ex conuersione in vinum non pendere, in nostris etiã Missæ sacrificiis.

SECTIO

SECTIO IV.

*Conciliorum , Canonum , & Summarum
Pontificum auctoritate eadem sen-
tentia probatur.*

PER scientiæ clauem aperire nobis Sa-
cramentorum materias Ecclesiā;
idque præstitisse in Concilio Florenti-
no, quod de materia calicis loquens,
etiam aquæ meminit, demonstratur.
Non meminisse autem tamquam cæri-
moniæ, ex Concilij contextu, & inten-
tione, ex modo loquendi aliorum con-
ciliorum, ex Catechismo Romano, ex
rationibus à Pontifice adductis, & ex
ritu Ecclesiæ, quæ presbyterum ordi-
nans calicem cum vino & aqua ei por-
rigit, & auctoritate Gregorij Hieromo-
nachi ostenditur. Cur aqua modicissi-
ma sit apponenda, reiectâ, quam exco-
gitarunt Aduersarij, quinque aliæ veræ
rationes afferuntur; argumentumque
Aduersariorum ex illis verbis Concilij
(vini de vite) contra ipsos retorquetur,
non esset enim de vite vinum, si de a-
qua genitum esset.

Con-

Concilium quoque Tridentinum a-
pertè nobis fauere, dum nullam substā-
tiam innuit in calice post consecratio-
nem permanere, præter sanguinem
Christi, declaratur. Nam, data Aduersa-
riorum sententia, non aquæ substan-
tiam tantum, sed etiam ipsius vini post
consecrationem aliquando remansu-
ram ostenditur. Concilijs duo Summi
Pontifices connectuntur, Iulius Pri-
mus, & Innocentius III. ille aquam cum
vino offerendam ijs verbis docet, ex
quibus eum approbare nostram sentē-
tiam colligitur, & quæ nobis ex eodem
objiciuntur, fauere potius, quàm offi-
cere fit perspicuum. Innocentij autem
verba ab Aduersarijs contra eius men-
tem explicari, multorum tum Iuris Ca-
nonici peritorum, tum Theologorum
auctoritate, ipsiusque Innocentij testi-
monio freti contendimus. Multos quo-
que canones, quos breuitatis causa in-
dicasse tantum placuit, nobis suffragari
docemus.

S E C T I O V.

*Patrum testimoniis eadem sententia
roboratur.*

PATrum consensum non posse sine te-
meritatis nota , aut hæresis periculo
contemni; consensisse autem eos in no-
stram sententiam, ex eo probatur, quòd
plurimi eam docuerunt , nullus autem
contrariam. Vt eam docuisse ostenda-
mus, testimonia proferuntur, Ambrosij,
Augustini , Chrysostomi , Procli, Gre-
gorij Magni, Hieronymi, Cypriani, Io-
annis Damasceni, Iustini Martyris, Ire-
næi, Theodoret, Nicolai Methonensis,
Gennadij , Ieremiæ Patriarchæ Con-
stantinopolitani , Amalarij , Paschasi-
j, Samonæ Gazæ Archiepiscopi , Hilde-
berti Cenomanensis, Algeri, Hildegar-
dis , Honorij Augustodunensis , Petri
Blesensis , Germani Patriarchæ Con-
stantinopolitani, Odonis Cameracen-
sis Episcopi , & Eucherij Lugdunensis
Episcopi. Porro ex Patribus neminem
contrarium sensisse, Aduersariorum te-
stimonio, & Gaufredi auctoritate, cuius
epi-

epistola hanc controuersiam egregiè explicans affertur, comprobatur: præclarumque Cardinalis Baronij pro nostra sententia testimonium recitatur; insigni denique miraculo, ab eodem Cardinali relato, eadem nostra sententia perarmatur.

SECTION VI.

*Aduersariorum responsiones ad supradicta
testimonia Patrum referuntur
& refelluntur.*

NE Patrum testimonia deprauentur (quod alicui sententię pertinaciter adhærētes facere solent) duæ sunt prænotandæ regulæ. Prior est, accipienda esse verba Patrum in sensu proprio, & ex verborum significatione per se consurgente, dum vel alij Patres, vel vrgens ratio contrarium non suadeat. Posterior, Patres obscurè loquentes, per eos qui clarè locuti sunt, exponi debere. Ex illa colligimus Patres nobiscum sentire, quia Aduersarij fatentur se PP. dicta explicare, nos autem, nullâ adhibitâ explicatione, ea recipimus. Ex altera,
cùm

cùm aliqui clarè tradant, aquam immediate in sanguinem verti, eodem modo intelligendos cæteros comprobamus. Affertur deinde Aduersariorum explicatio de conuersione mediata, & multis argumentis & auctoritatibus, etiam Iurisperitorum, falsitatis conuincitur. Exploditur quoque illa mistionis acceptio, qua, quod conuertitur in aliud, dicitur illi misceri, & tamquam insufficiens & violenta illorum expositio rejicitur, qui vinum aqua mistum, id est, vinum cui admista est aqua, sed non aquam ipsam, in sanguinem conuerti asserunt. Deniq; Cardinalis Baronij doctrina & auctoritas ab Aduersariorum calumnijs vindicatur, miraculumq; pro nostra sententia ab eo allatum contra eorundem tela præmunitur.

SECTIO VII.

Ex S. Thoma, & aliorum Scholasticorum doctrina eadem sententia confirmatur.

EX S. Thoma, cuius auctoritas plurimi est facienda, duo loca afferuntur,

Prior

Prior est, vbi de aqua, quæ calici appo-
nitur, loquens, inquit, eam non perma-
nere, quia totum, quod est ibi, venera-
tur Ecclesia adoratione patriæ, conuer-
ti autem in vinum, & deinde in sangui-
nem. Ex quo duas Conclusiones dedu-
cimus: altera est, aquam numquam pos-
se permanere in calice post consecra-
tionem, & consequenter, etiamsi non
sit conuersa in vinum, conueri in san-
guinem: alioqui enim vana esset S. Tho-
mæ ratio, quam pro nobis pugnare co-
gitur fateri Suarez, qui eam dissoluere
conatur, sed frustra. Altera conclusio
est, aquam conueri in vinum morali-
ter, quam tenetur admittere qui hanc
quæstionem non imperfectè traditam
à S. Thoma defendere optat. Posterior
locus est, vbi loquens de pane, ait pa-
rum hordei multo tritico admistum,
esse cum eo materiam aptam consecra-
tioni, quia modicum absumitur quo-
dammodo à plurimo. Ex quo etiã duæ
conclusiones eliciuntur: prior est, hor-
deum conueri in triticum moraliter
tantum, & hoc sufficere, vt sit materia
cor-

corporis Domini. Posterior, idem dicendum de aqua respectu vini & sanguinis. Vtraque autem & ad mentem D. Thomæ, & secundum veritatem etiam ex Aduersariorum dictis firmissimè comprobatur. Afferuntur deinde pro nostra sententia testimonia Magistri Sententiarum, Alensis, Scoti, Altissiodorensis, S. Bonaventuræ, Ioan. Gerson, Gulielmi Durandi, Petri à Soto, Ianse-
nij, Salmeronis, Altonsi à Castro, Alani, Toleti, Pesantij, Bellarmini, Didaci Tapiæ, Ioan. Baptistæ Scortia, Ægidij de Coninck, & PP. Societatis Iesv Collegij Romani.

SECTIO VIII.

Rationibus theologicis idem probatur.

SEX rationes præcipuæ, præter eas quas supra attigimus, pro nostra sententia afferuntur, reiectisque Aduersariorum responsionibus, constabuntur. Prima est, Sacramenta id efficiunt, quod significant; sed verba consecrationis significant, totum id, quod est in

*** 2

cali-

calice, esse sanguinem Christi; ergo non solum vinum, sed etiam aqua, quæ tunc in calice reperitur, fit sanguis Christi.

Secunda est. Ecclesia vitat, tamquam sacrilegum, proferre formam Eucharistiæ super materiam dubiam, & multo magis super ineptam: atqui, si aqua non verteretur immediatè in sanguinem, esset materia inepta; consequenter Ecclesia semper proferret formam calicis supra materiam incertam, quia numquam est certa, aquam esse conuersam in vinum, & aliquando super ineptam, quia certum est, vt Aduersarij fatentur, aliquando non esse conuersam.

Tertia. Materia Sacramentorum debet esse sensibiliter determinata: atqui si vinum tantum esset materia, numquàm esset sensibiliter determinatum, quia non potest sensibiliter distingui ab aqua admixta: ergo totum mixtum ex aqua & vino est materia sanguinis.

Quarta. Quia ex opinione Aduersariorum sequeretur, non esse nos certos, statim post consecrationem sub qualibet particula specierum vini adesse sanguinem

guinem Christi: quod est incōueniens.

Quinta. Post exhaustū calicem consecratum censetur sacerdos ab Ecclesia ieiunus: atqui si aqua in propria substantia simul cum sanguine in calice permanet, contrarium esset asserendum; ergo.

Sexta. Quoniam in determinandis materiis Sacramentorum Ecclesia magis quàm phycas subtilitates respicit communem sensum & vsum hominū, iuxta quem non minùs censetur vinum dilutum illud in quod esset iam cōuersa aqua admista, quàm illud in quod eadem quantitas aquæ nondum fuisset conuersa; ergo sicuti totum illud est materia sanguinis, ita etiam hoc.

SECTIO IX.

Ex Aduersariorum verbis eadem sententia colligitur.

Svammer sententiam impugnare nostros Aduersarios, dum illam, quæ asserit, aquæ substantiam in calice post consecrationem permanere, reiiciunt,

*** 3 tum

tum ex negationis natura, tum ex paritate rationis euincitur. Nonnullos autem, qui hunc nodum dissolvere conantur, non satis sibi constare, nec probabiliter loqui, demonstratur; nec denique eorum responsionē, ab illa quam nonnulli Theologi, ab ipsis meritò, quasi Panistis hæreticis fauentes, reiecti, excogitarunt, esse vllò pacto diuersam. His adduntur Henricus Henriq. Paludanum, Sotum, Ledesinam, & Tabienam secum trahens, & Gabriel Vasquez Patrum testimonia exponens, qui pro nobis nolentes pugnant.

SECTIO X.

Aduersariorum suppositum, quòd aqua in vinum conuertatur, non solum necessarium non esse, sed etiam falsum, theologicis rationibus ostenditur.

VERAM Philosophiam Theologiæ numquam esse contrariam, imò illi adiumento esse, & inuicem ab ipsa adiuuari, declaratur. Aquam autem in vinum verti, ex Theologiæ principiis
non

non posse colligi; cum ex Missalis rubricâ constet, non esse de hoc sollicitam Ecclesiam, contrarium autem illi magis esse consonum, multis ostenditur. Primò, quia aquæ significatio est sacramentalis; ergo debet esse præsens, dum conficitur Sacramentum: tam antecedens autem, quàm consequentia pluribus & auctoritatibus, & rationibus confirmantur, ab eaque Aduersariorum iacula propulsantur. Secundò, quia, sicut aqua in sua substantia simul cum vino Deo offertur; ita in eadem sua substantia consecrari debet. Tertiò, quoniam alioqui sequeretur, aquam verè & per se sacrificari Deo, cum & ei offeratur, & seorsum à vino desinat esse: quod esse absurdum patet. Quartò, ex eo, quòd maxima quæque Sacramenta in aquæ substantia dicantur ab Ecclesia fuisse condita; cuius dicti veritas aquam in vinum non verti, necessariò supponere videtur. Denique ex multis Sanctissimæ Eucharistiæ figuris ex aqua desumptis idem probabiliter asseritur.

SECTIO XI.

*Argumentis ab auctoritate contra nostram
sententiam satisfi.*

TEstimonia contra nostram sententiam allata, plurimùm esse negativa, ea videlicet; in quibus, cùm sermo de materia calicis habeatur, vini tantùm fit mentio. quod argumenti genus natura sua est imbecillimum, & hinc nullas omnino vires habere, eò quòd nomine vini etiam aqua admista comprehendatur, ex Euangelio, & alijs Sacrae Script. locis, ex Iulio Pontifice, Conciliisq; Carthagenensi, Trullano, Florentino & Tridentino, ex Gaufreddo, Aristotele, & Plutarcho, & ex ipsismet Aduersariorum verbis perspicuum redditur. Hinc sigillatim auctoritatibus contra nos allatis occurrimus, Concilijsq; Carthagenensi, Triburiensi, Trullano, Florentino & Tridentino satisfacimus. Catechismum non fideliter ab Aduersarijs adductum, & nobis non aduersari, sicuti & alios multos contra nos allatos, præsertim verò S. Cyprianum

num ostendimus. Morem quoque PP. Dominicanorum, qui ante Missam aquam cum vino in calice ponunt, sicuti & ipsos Ordinis Prædicatorij Doctores nobis potius, quam Aduersarijs fauere: Græcos autem, siue antiquos, siue recentiores, illis non opitulari, contendimus.

SECTIO XII.

Argumenta contra nostram sententiam ex ratione deducta diluuntur.

DVm quinto loco argumentantur Aduersarij: Non ex præcepto Christi, sed Ecclesiæ tantum, apponitur aqua calici; ergo, &c. Occurrimus & antecedens, vel falsum, vel valde incertum esse, & consequentiam inefficacem. De antecedente, propositis vtriusque sententijs, concludimus, eam probabiliorem esse, quæ diuinum præceptum in aquæ appositione agnoscit, & cur nihilominus de Sacramenti necessitate non sit, exponimus. Consequentiam deinde non rectè ab Aduersarijs deduci,

ci, nonnullis exemplis patefacimus.

Hinc ad sextum dicimus, perperam ab argumentantibus, aquam, quæ vino admiscetur, cum ea quæ farina, comparari, inultasque inter eas differentias annotamus.

Ad septimum, falsò ex nostra sententia, quòd aqua sola à vino separata consecrari possit, deduci ostendimus, & quomodo ad calicis materiam aqua spectet, declaramus.

Ad octauum, dummodo aqua saporem vini retineat, etiamsi in quantitate ipsum vinum superet, esse posse calicis materiam ex Innocentio attestamus.

Ad nonum, in quo deducebatur ex nostra sententia, posse aquam solam vini accidentibus affectam consecrari, immeritò hoc inferri respondemus.

Decimum, inferens ex nostris dictis posse consecrari mustum, quod non sit vinum, in Aduersarios retorquetur, ex quorum sententia, non autem ex nostra, illud absurdum sequitur.

Ad vndecimum, de aqua rosacea admista, respondet Cardinalis Alanus,

&c

& ipsam conuerti in sanguinem, contra quem nimis inuehitur Pater Suarez. A nobis illatio negatur, rationesq; discriminis afferuntur.

Ad duodecesimum, si species vini corrumpantur, neque sub aquæ speciebus, illis commistis, permanfurum Christi sanguinem asserimus.

Ad decimumtertium, non posse, iuxta nostram sententiam, ab aqua in se conuerti species vini, posse tamen ex Aduersariorum principiis, patefacimus; quare inconueniens, quod contra nos inferebatur, contra nostros Aduersarios retorquemus.

In responsione ad decimumquartum quæstio agitur, an, si species aquæ à vino consecrato extraherentur, remaneret sub ipsis sanguis Christi, & problema esse statuitur: modusque vtramque partem defendendi traditur, & an aqua dicenda sit pars integrans, vel componens materiæ Sacramenti, subtiliter disquiritur.

Ad vltimum tandem dicimus, non posse sacerdotem intentionem suam
ad

ad aquam solam consecrandam dirigere : quomodoque aqua dici possit materia per accidens Eucharistiæ, explicamus.



DE

A Q V Æ

TRANSMVTATIONE

IN SACRIFICIO

MISSÆ;

*Hoc est, An in Sacrificio Missæ aqua
mista vino in sua substantia perma-
neat; vel, in quid aliud, si non
maneant, conuertatur,*

DISPVATIO.



VM ex antiquissima Eccle-
siæ Catholicæ consuetudi-
ne & præcepto, aqua vino
consecrando in Missæ sa-
crificio apponatur, multi circa hunc
ritum hæreticorum errores, nec pauca
Theologorum placita exorta sunt. Illi
enim, vt ab Ecclesiæ vnitatemore suo
discederent, in quolibet præcipitia se

A

con-

hæresi 42. Marcionitis hæresi 47. Tatiano, & Encratitis, quibus etiam eundem ascribit Theodoretus libro 1. Hæreticarum fabularum. Dicerem in eodem errore versatos fuisse Manichæos, eò quòd vinum abominarentur, testibus S. Augustino libr. 2. contra Faustum, & S. Leone Papa serm. 4. de Quadragesima; nisi scirem in alio longè peiori versatos, de quo infra.

Non videtur autem hîc prætermittendum impudentissimum mendacium hæreticorum Magdeburgensium, qui (vt refert eruditissimus Cardinalis Bellarminus libr. 4. de Eucharistia cap. 10.) centuria 3. cap. 6. & 7. affirmant errorem istum de sola aqua in calice offerenda, ab Episcopis Romanis excogitatum fuisse, & à Cypriano refutatum in epist. ad Cornelium Romanum Pontificem. Quod sanè absque vlllo fundamento ex sola mentiendo & calumniandi libidine Centuriatores asserunt. Nam epistola Cypriani non est ad Cornelium, vt ipsi mentiuntur; sed ad Cæcilium, nec in ea vlla fit mentio Episcoporum Romanorum; cùm etiam è contrario constet Pontifices Romanos ante Cyprianum, vt panis tantummodo, & vinum aqua mistum in sacrificio Missæ offerretur, mandasse, vt patet ex gestis Alexandri Papæ I. qui sub Adriano vixit, anno Domini 121, cùm Cyprianus sub Valeriano

leriano & Gallieno Imperatoribus martyrio coronatus sit, anno Domini 261.

Fundamentum autem supradicti erroris aliud esse non potuit, quàm (vt refert S. Thomas) falsa quædam sobrietatis species, cum satis alioqui constet Christum Dominum, vinum in sui sanguinis consecratione adhibuisse, & hunc eundem morem semper Ecclesiam tenacissimè custodiuisse. At dicet quis, Nōne satius fuisset in aqua hoc Sacramentum instituire, vt sobrietatem nobis commendaret? Nequaquam: congruum enim fuit institui in potu magis vsitato & communi, vt pro omnibus institutum esse ostenderetur. Secundò, vt aptius esset ad significandam animarum spirituales refectionem, & alios eius mirabiles effectus, qui per aquam non ita commodè nobis repræsentari possent.

Tertiò, propter maiorem, quam habet vinum cum sanguine similitudinem. Sobrietas verò satis fuit à Christo, & verbis & exemplis aliàs nobis commendata, neque ab hoc Sacramento fuit exclusa; cum etiam valdè modicum sit vinum, quod in sacrificio assumitur, & aqua etiam sit temperandum. De hoc igitur primo errore satis.

Secundus error fuit huic affinis cuiusdam Marci, à quo Marcosiani sunt eius sectatores appellati, qui in aqua etiā pauxillo tantū albo.

SECTIO XI.

*Argumentis ab auctoritate contra nostram
sententiam satisfi.*

TEstimonia contra nostram sententiam allata, plurimum esse negativa, ea videlicet; in quibus, cum sermo de materia calicis habeatur, vini tantum fit mentio. quod argumenti genus natura sua est imbecillimum, & hic nullas omnino vires habere, eò quod nomine vini etiam aqua admista comprehendatur, ex Euangelio, & alijs Sacrae Script. locis, ex Iulio Pontifice, Conciliisq; Carthaginensi, Trullano, Florentino & Tridentino, ex Gaufredo, Aristotele, & Plutarcho, & ex ipsismet Aduersariorum verbis perspicuum redditur. Hinc sigillatim auctoritatibus contra nos allatis occurrimus, Concilijq; Carthaginensi, Triburiensi, Trullano, Florentino & Tridentino satisfacimus. Catechismum non fideliter ab Aduersarijs adductum, & nobis non aduersari, sicuti & alios multos contra nos allatos, præsertim verò S. Cyprianum

num ostendimus. Morem quoque PP. Dominicanorum, qui ante Missam aquam cum vino in calice ponunt, sicuti & ipsos Ordinis Prædicatorij Doctores nobis potius, quam Aduersarijs fauere: Græcos autem, siue antiquos, siue recentiores, illis non opitulari, contendimus.

SECTIO XII.

*Argumenta contra nostram sententiam ex
ratione deducta diluuntur.*

DVm quinto loco argumentantur Aduersarij: Non ex præcepto Christi, sed Ecclesiæ tantum, apponitur aqua calici; ergo, &c. Occurrimus & antecedens, vel falsum, vel valde incertum esse, & consequentiam inefficacem. De antecedente, propositis vtrimque sententijs, concludimus, eam probabiliorem esse, quæ diuinum præceptum in aquæ appositione agnoscit, & cur nihilominus de Sacramenti necessitate non sit, exponimus. Consequentiam deinde non rectè ab Aduersariis deduci,

ci, nonnullis exemplis patefacimus.

Hinc ad sextum dicimus, perperam ab argumentantibus, aquam, quæ vino admiscetur, cum ea quæ farinæ, comparari, inultasque inter eas differentias annotamus.

Ad septimum, falsò ex nostra sententia, quòd aqua sola à vino separata consecrari possit, deduci ostendimus, & quomodo ad calicis materiam aqua spectet, declaramus.

Ad octauum, dummodo aqua saporem vini retineat, etiamsi in quantitate ipsum vinum superet, esse posse calicis materiam ex Innocentio attestamur.

Ad nonum, in quo deducebatur ex nostra sententia, posse aquam solam vini accidentibus affectam consecrari, immerito hoc inferri respondemus.

Decimum, inferens ex nostris dictis posse consecrari mistum, quod non sit vinum, in Aduersarios retorquetur, ex quorum sententia, non autem ex nostra, illud absurdum sequitur.

Ad vndecimum, de aqua rosacea admista, respondet Cardinalis Alanus,

&c.

& ipsam conuerti in sanguinem, contra quem nimis inuehitur Pater Suarez. A nobis illatio negatur, rationesq; discriminis afferuntur.

Ad duodecimum, si species vini corumpantur, neque sub aquæ speciebus, illis commistis, permanfurum Christi sanguinem asserimus.

Ad decimumtertium, non posse, iuxta nostram sententiam, ab aqua in se conuerti species vini, posse tamen ex Aduersariorum principiis, patefacimus; quare inconueniens, quod contra nos inferebatur, contra nostros Aduersarios retorquemus.

In responsione ad decimumquartum quæstio agitur, an, si species aquæ à vino consecrato extraherentur, remaneret sub ipsis sanguis Christi, & problema esse statuitur: modusque vtramque partem defendendi traditur, & an aqua dicenda sit pars integrans, vel componens materiæ Sacramenti, subtiliter disquiritur.

Ad vltimum tandem dicimus, non posse sacerdotem intentionem suam
ad

ad aquam solam consecrandam dirigere : quomodoque aqua dici possit materia per accidens Eucharistiæ, explicamus.



DE

A Q V Æ

TRANSMTATIONE

IN SACRIFICIO

MISSÆ;

*Hoc est, An in Sacrificio Missæ aqua
mista vino in sua substantia perma-
neat; vel, in quid aliud, si non
maneant, conuertatur,*

DISPUTATIO.



UM ex antiquissima Eccle-
siæ Catholicæ consuetudi-
ne & præcepto, aqua vino
consecrando in Missæ sa-
crificio apponatur, multi circa hunc
ritum hæreticorum errores, nec pauca
Theologorum placita exorta sunt. Illi
enim, ut ab Ecclesiæ unitate more suo
discederent, in quælibet præcipitia se

A

con-

conijcere veriti non sunt. Hi verò solum vinum sufficientem & indubitatam materiam calicis Domini esse pro certo habentes, vt quid ab Ecclesia, (quam errare non posse non ambigebant) aqua vino misceretur, & quid de illa fieret; præcipuè cùm aliquando, saltem tempore consecrationis calicis, in sua substantia persistere, & in vinum conuersam non esse fateri necesse sit, inquirentes, in varias abiire sententias; cùm & in sanguinem immediatè conuerti quibusdam durum, & simul cum sanguine aquam remanere permixtam absurdum videretur. Quid igitur in hoc euentu de ea fiat, hac disputatione examinandum nobis proponimus. Sed præludij loco,

SECTIO I.

*Multorum siue errores, siue sententia omnino improbables referuntur,
& reijciuntur.*

AB erroribus circa materiam sacri calicis versantibus exordiemur, vt, quod supponimus, aquam scilicet, & vinum in sacrificio
Missæ

Missæ ritè offerri, pro certo & indubitato, errorum tenebris depulsis, ante omnia habeatur.

Primus ergo error quorundam fuit hæreticorum, qui aquam solam in calice offerebant, unde & Aquarii appellati sunt à D. August. lib. de Hæresibus cap. 64. & Hydroparastæ in Concilio Trullano can. 32. Referunt eundem errorem Clemens Alexandrinus lib. 2. Pædagogici cap. 2. circa finem, & lib. 1. Stromatum, ubi eus auctores hæreticos appellat, eò quòd ab Ecclesiæ regula declinent; S. Isidorus lib. 4. Etymologiarum cap. 5. S. Thom. 3. p. quæst. 73. art. 1. & alij. In primis verò disputant contra eum S. Cyprianus epist. 63. & S. Ioan. Chrysostomus homil. 83. in Matth. illa verba exponens, *Non bibam amodo de hoc genimine vitis*. Vbi dicit Christum vino usum fuisse post resurrectionem, ut eorum perniciosam hæresim destrueret qui aqua in mysterijs utebantur. Et alia etiam addit, quibus visus est in alterum extremum declinare, & aquæ mixtionem omninò de medio tollere. Sed eam defendunt & explicant Patres Concilij Trullani can. 32. Quis autem fuerit huius hæresis auctor, & quo tempore cœperit, apud neminem inuenire se potuisse, inquit Alfonsus à Castro verbo *Eucharistia* hæresi 6. Sed quicumque fuerit auctor, plures eius sectatores à diuersis memorantur. S. Epiphanius hæresi 30. tribuit eum Ebionitis

hæresi 42. Marcionitis hæresi 47. Tatiano, & Encratitis, quibus etiam eundem ascribit Theodoretus libro 1. Hæreticarum fabularum. Dicerem in eodem errore versatos fuisse Manichæos, eò quòd vinum abominarentur, testibus S. Augustino libr. 2. contra Faustum, & S. Leone Papa serm. 4. de Quadragesima; nisi scirem in alio longè peiori versatos, de quo infra.

Non videtur autem hîc prætermittendum impudentissimum mendacium hæreticorum Magdeburgensium, qui (vt refert eruditissimus Cardinalis Bellarminus libr. 4. de Eucharistia cap. 10.) centuria 3. cap. 6. & 7. affirmant errorem istum de sola aqua in calice offerenda, ab Episcopis Romanis excogitatum fuisse, & à Cypriano refutatum in epist. ad Cornelium Romanum Pontificem. Quod sanè absque vlllo fundamento ex sola mentiendo & calumniandi libidine Centuriatores asserunt. Nam epistola Cypriani non est ad Cornelium, vt ipsi mentiuntur; sed ad Cæcilium, nec in ea vlla fit mentio Episcoporum Romanorum; cùm etiam è contrario constet Pontifices Romanos ante Cyprianum, vt panis tantummodo, & vinum aqua mistum in sacrificio Missæ offerretur, mandasse, vt patet ex gestis Alexandri Papæ I. qui sub Adriano vixit, anno Domini 121. cùm Cyprianus sub Valeriano

leriano & Gallieno Imperatoribus martyrio coronatus sit, anno Domini 261.

Fundamentum autem supradicti erroris aliud esse non potuit, quàm (vt refert S. Thomas) falsa quædam sobrietatis species, cùm satis aliòqui constet Christum Dominum, vinum in sui sanguinis consecratione adhibuisse, & hunc eundem morem semper Ecclesiam tenacissimè custodiuisse. At dicet quis, Nónne satius fuisset in aqua hoc Sacramentum instituire, vt sobrietatem nobis commendaret? Nequaquam: congruum enim fuit institui in potu magis vsitato & communi, vt pro omnibus institutum esse ostenderetur. Secundò, vt aptius esset ad significandam animarum spiritualem refectionem, & alios eius mirabiles effectus, qui per aquam non ita commodè nobis repræsentari possent.

Tertiò, propter maiorem, quam habet vinum cum sanguine similitudinem. Sobrietas verò satis fuit à Christo, & verbis & exemplis aliàs nobis commendata, neque ab hoc Sacramento fuit exclusa; cùm etiam valdè modicum sit vinum, quod in sacrificio assumitur, & aqua etiam sit temperandum. De hoc igitur primo errore satis.

Secundus error fuit huic affinis cuiusdam Marci, à quo Marcosiani sunt eius sectatores appellati, qui in aqua etiā pauxillo tantū albo.

A 3.

vino.

vino admixto conficiebant, sed eam prius incantatione quadam rubram reddebant, vt eam redderent aptam materiam Eucharistiæ, vt colligere licet ex Irenæo lib. 1. aduersus hæreses cap. 9. & Epiphanio hæresi 34.

Tertius error in altèro extremo versatur: asserunt enim eius sectatores solum vinum esse offerendum, minimeq; aqua miscendum. Hic error Græcis tribuitur ab Innocentio III. li. 4. de Officio Missæ cap. 32. à Guidone Carmelita, & ab alijs; ex Græcorū tamen scriptis contrarium colligi inquit Cardinalis Bellarminus. quare credibile est, ait, Innocentium, & fortasse etiam Guidonem, per Græcos intellexisse quosuis Orientales, non autem eos qui propriè Græci dicuntur. Fuerunt autem hi Orientales Armeni, quibus hic error ascribitur à Patribus Concilij Trullani can. 31. & ab eodem Guidone errore 24. Oriēbatur autem apud eos hic error ab alio maiori, si vera refert Nicephorus lib. 18. cap. 53. scribit enim Armenos non miscere aquam vino, ne significare videantur unionem duarum naturarum in Christo, quam ipsi non credunt. In Concilio tamen Florentino per suos Oratores orthodoxam fidem in decreto Eugenij illis explicatam amplexi sunt, & Ecclesiæ Catholicæ sinu excepti. Quare surgent in iudicio Armeni contra Lutheranos & Calvinistas, qui hæresiam sæpius damnatas &

& sepultas denuò ex Erebo reuocare, & in vitam restituere conantur: nam & aquæ mixtionem cum vino non solum extra sacrificium, quæ est ipsorum sobrietas; sed etiam in sacrificio, quæ est pietas, damnant. contra quos egregiè, vt solet, pugnat Cardinalis Bellarminus lib. 4. de Eucharistiæ Sacram. cap. 10.

Quartus error est aliorum, qui loco vini lac offerebāt, quos damnat Iulius Pontifex dist. 2. de consecrat. cap. *Cum omne*, & Conciliū Bracharense III. cap. 1.

Quintus error aliorum fuit, qui intinctam Eucharistiam pro complemento communionis porrigebāt, quos etiam damnat Iulius Pontifex, & Concilium Bracharense ibidem. Videntur autem hi loco consecrationis calicis, Eucharistiam aliquo liquore intinxisse; reprehenduntur enim ex eo, quòd non seorsum panis, & seorsum calicis mysteria peragerent.

Sextus error eorum fuit, qui lac & mel, loco vini & aquæ offerebant, qui indicatur, & reprobatur in Concilio Carthagenensi III. capite 24. & damnatur can. 57. Trullano, vt etiam antea cum alijs similibus reprobatus fuerat, can. 30. Apostolorum, his verbis: *Si quis Episcopus, aut Presbyter præter ordinationem Domini alia quadam in sacrificio offerat super altare, id est, aut mel, aut lac, aut pro vino siceram, & confecta quadam, aut volatilia, aut animalia aliqua, aut*

legumina contra consuetudinem faciens, congruo tempore deponatur.

Septimus error, cuius meminit Iulius Pontifex, dist. 2 de consecrat. cap. *Cum omne*, quorundam fuit, qui pannum lineum musto intinctum per totum annum reseruabant, & in tempore sacrificij partem eius aqua lauabant, & sic eam offerebant.

Octauus error Cataphrygarum fuit, qui farinam mixtam sanguine, quem ex infantis alicuius corpusculo ad eam rem minutis vulneribus eliciebant, pro materia habebant. ex Epiphanio hæresi 29. Augustino lib. de Hæresibus c. 26. & 27. & Damasceno hæresi 48. & 49.

Nonus error Gnosticorum & Manichæorum fuit, qui infandis in rebus, quas quia aures horrent, consultò prætermitto, sicuti etiam prætermisit S. Thom. 3. p. q. 73. art. 1. hoc sanctissimum & immaculatum Sacramentum conficiebant; imò non conficiebant, sed semetipsos decipiebant. non omittendum tamen, quia eorum temporibus grassabatur, putarunt sanctissimi Patres Epiphanius, & Augustinus, ille de Gnosticis hæresi 26. hic de Manichæis c. 46. de hæresibus loquens.

Decimus error, cuius etiam meminit S. Tho. 3. p. qu. 73. art. 1. eorum fuit, qui ad panem caseum quoque adhibebant. referunt hunc errorem S. August. c. 28. de Hæresibus, & S. Epiphanius

nus hæresi 69 & eius sectatores Pepuziani, siue Artotyritæ dicti sunt.

Vndecimus error eorum fuit, qui Ophitæ sunt appellati, eò quòd colubrum iuxta altare alerent, vt per incantationē sacerdotis sacrificij tempore egressus, panem, in quo Eucharistia conficienda erat, lambendo præpararet. Probabile est autē, vel quid simile circa materiā calicis egisse, vel ipsam omninò prætermisisse.

Duodecimus error, siue abusus, fuit eorum, qui in calice maiorem aquæ, quàm vini quantitatem infundebant. quem improbat Honorius III. de celebrat. Missarum, cap. *Perniciosus*. Et hætenus de erroribus circa hanc materiam consecrationem præcedentibus; quos pluribus refellere non est opus, cùm omni fundamento careant, & expressè sint contra Christi institutionem, Apostolorum traditionem, & Ecclesiæ ritum. Proprius igitur ad rem nostram accedentes, opiniones explicemus, quæ circa aquæ transmutationem in consecratione versantur. Est igitur prima opinio, siue error, conuerti aquam in humorem phlegmaticum corporis Christi. Refertur hæc opinio ab Innocentio cap. *In quadam*. de celebratione Missarum, & lib. 3. de Officio Missæ cap. 30. & eam reprobatur præcipuè ob eius fundamentum, quod erat, ex latere Christi non veram aquam, sed humorem phlegmaticum simul

cum sanguine fluxisse, quod contra Evangelicam veritatem esse ibidem Innocentius affirmat. Confutari etiam potest, quia verba consecrationis indicant sanguinem Christi esse in calice, non phlegma, sed illud efficiunt, quod significant: ergo quidquid est in calice, non in phlegma, sed in sanguinem vertunt.

Secunda opinio, quam quidam cum præcedenti confundunt, est, aquam verti in aquam illam quæ de latere Christi simul cum sanguine effluxit: quam, ut minus probabilem reliquit Innocentius cap. *Cum Martha*. de celebrat. Missarum. Eam verò Henricus Henriquez li. 8. de Sacramentis cap. 12. tribuit Cano, & inquit esse temerariam, eò quòd sit contra torrentem Doctorum. Eamdem impugnat S. Thom. 3. p. quæst. 74. art. 8. quia si vera esset, aqua seorsum consecraretur à vino, sicut vinum à pane. Addit Franc. Suarez disp. 45. in 3. p. sect. 4. quòd illa aqua quæ exiuit de corpore Christi, non pertinebat ad veritatem & substantiam illius: Aqua enim, inquit, elementaris non est de ratione corporis humani, unde omnes Sancti docent supernaturaliter ac miraculosè manasse aquam illam de corpore Christi iam defuncti, ergo illa aqua non manet nunc in corpore glorioso Christi, ergo non est, cur hæc aqua in illam conuertatur. Tandem ex formæ verbis, sicuti & præcedens, improbari potest.

Ter-

Tertia opinio est, aquam neque permanere in propria specie, neque etiam in aliam transmutari; sed omninò virtute Sacramenti in nihilum redigi. Fauet huic sententiæ Ioan. Andreas Iuris Can. insignis doctor: nam in Commento in caput *Cum Martha.* de celebrat. Missarum, inquit, *Dato quòd aqua non transubstantietur in sanguinem, absorbetur, & annihilatur virtute Sacramenti.* Verùm est omninò improbabili hæc sententia. Primùm, quia ponit magnū miraculū sine vlllo fundamento. Deinde, vel remanerent accidentia aquæ, vel non remanerent. si prius, ergo sub ipsis contineretur sanguis Christi: non enim alia ratione conseruarentur à Deo accidentia sine subiecto; si autem adesset sub eis sanguis Christi, iam hoc esset aquam in sanguinem Christi esse conuersam. Si dicas, non remanere accidentia, est manifestè contra sensum. Præterea nunquam aliquid corrumpitur, nisi vt inde aliquid aliud generetur, quia corruptio, siue annihilatio, cum tendat ad non esse, non est aliquid per se desiderabile: ergo dici non potest, quod aqua in nihil omninò redigatur. Tandem non solum est hoc præter, sed etiam contra formam consecrationis, vt ex dictis contra primam opinionem constat.

Quarta opinio est Gulielmi Estij orat. 17. Theologica, *Frequenter, ac fortassis ordinariè, quon-*

quondam fieri solere, vt pars aqua vino infusa in vini naturam transeat, eique incorporetur: pars autem vsque ad consecrationem remaneat in sua natura, quæ post consecrationem simul in calice existat cum sanguine. Motus est Estius ad hanc opinionem excogitandam ex duplici significatione, quæ aquæ tribuitur: altera, quæ repræsentatur mysterium sanguinis & aquæ simul effluentium è latere Domini, altera quæ vnio populi fidelis cum Christo capite significatur. Ratione enim illius necessarium ei visum fuit, vt ipsa aqua cum sanguine remaneret; ratione autem huius, vt in vinum verteretur, quia virtute huius Sacramenti censentur fideles quodammodo in Christum verti. Præterea, quoniam olim Patres non erant solliciti, vt tam modica aqua calici apponeretur, quæ posset ante consecrationem in vinum conuerteri; probabile igitur est, non totam aquam fuisse tunc in vinum conuersam, & consequenter aliquam eius partem simul cum Christi sanguine permansisse. & idcirco ipse ait, quondam ordinariè hoc fieri solere; nunc autem, quoniam multo minus aquæ vino apponitur quàm antiquitus, non audet asserere admodum frequenter id contingere.

Hæc tamen sententia omni probabilitate, meo iudicio, caret; repugnat enim omnibus Patribus, & omnibus Theologis, quibus nunquam in mentem venit hæc distributio aquæ,
imò

imò omnes habent pro inconuenienti aquam simul cum sanguine permanere, vt in sequenti sententia dicemus. Præterea, supponit è Philosophia, quod falsum est, & omninò improbabile, aquam vino mistam partim in ipsum conuerti, & partim in sua substantia permanere. Vera enim sententia est, quam lib. 2. de Gener. qu. 52. probauimus, nihil aquæ in vinum conuerti: qui tamen concedere vellet conuerti, non posset eam diuidere, vt facit Estius, quoniam aquæ minimæ partes permiscerentur partibus vini vniformiter. si potest igitur hæc aquæ pars à vino, cui est coniuncta, vinci, idem dicendum erit de reliquis partibus eius.

Ad argumenta ipsius facilis est responsio. Ad Primum enim, de repræsentatione aquæ, quæ ex latere Christi fluxit, respondemus, hanc sufficienter repræsentari ab accidentibus aquæ, quæ simul cum accidentibus vini remanent: mirumq; est hoc argumêto ipsum moueri potuisse, cum iam vidisset Innocentiũ idem retulisse, & neglexisse. Ad alteram partem, de significatione vnionis populi cum Christo, Respondetur, hanc melius significari per conuersione aquæ in sanguinem Christi quàm in vinum. Nam si conuersio in vinum fieret ante consecrationem, vt ipse opinatur, inciperet adesse significatio Sacramentalis, antequàm Sacramentũ conficeretur. quod est absurdum. Sed quamuis
etiam

etiam concederemus significandam esse vnionem populi fidelis cum Christo vnione aquæ cum vino; non inde tamen sequeretur aquam physicè esse vertendam in vinum, sicuti nequè populus in Christum physicè vertitur, sed summum moraliter, sicuti moraliter tantum dici potest populus in Christum conuerti.

Ad Secundum Respondetur, eosdem Patres, quibus curæ non erat aquam in vinum verti, asseruisse tamen absolutè aquam in sanguinem transmutari. ex quo colligitur, ipsos verè voluisse aquam sanguinem fieri independenter à conuersione ipsius in vinum.

Quinta opinio, cuius etiam meminit Innocentius loco suprà citato, est, aquam remanere post consecrationem simul cum sanguine, quam & ipse vt minùs probabilem reliquit, & Theologi omnes deinde reiecerunt. De ea loquens S. Thom. 3. p. q. 74 art. 8. inquit, *Hac opinio non potest stare.* Dominicus Sotus in 4. dist. 9. qu. 1. sub finem, *Si solum vinum, inquit, consecraretur, & aqua illic maneret in substantia aqua; hoc esset plebem seducere, qua adorat quidquid substantia sub illis accidentibus reconditur: tametsi, inquit, per ignorantiam excusaretur. Verùm sacerdos immane sacrilegium committeret, praesertim si prudens & sciens id faceret.*

Didacus Nuñez ex Ordine quoque Prædicatorum in 3. p. q. 24. art. 8. de eadem verba faciens,

ciens, inquit, *Nostri temporibus iam est temeraria, quia est contra communem sententiam Scholasticorum: & Doctores sancti communiter docent totum illud, quod continetur in calice, conuerti in sanguinem Christi.* Franciscus Suarez disp. 65. in 3. part. sect. 4. *ab omnibus Scholasticis, inquit, eandem esse reiectam.* Et tandem eruditissimus Cardin. Baronius anno Domini 1192. tom. 12. eam hæresim appellat, ad quam confutandam, inquit patratum fuisse miraculum, de quo infra agemus.

SECTIO II.

Sexta aliorum sententia proponitur, & argumentis roboratur.

EXistimant huius sententiæ sectatores aquam prius in vinū verti, ac deinde in sanguinem; si quando tamen contingat tempore consecrationis aquam adesse, malunt ipsam in propria specie simul cum sanguine permixtam remanere, quàm immediatè in sanguinem verti. Plurimi pro hac sententia citari solent auctores; qui tamen eam expressè tradiderint, non sunt adèd multi. Nam veteres Theologi, vt plurimum hoc tantum asserūt, aquam prius verti in vinum, ac deinde in sanguinem, nullam facientes mentionem de aqua, quæ tempore consecrationis non sit in vinum conuersa.

Imò

Imò Guliel. Estius orat. 15. apud nullum Theologum inquit se legisse tractatam ex professo hanc quæstionem; ex recentioribus tamē præter ipsum Estium diffusè ipsam pertractant Franc. Suarez disp. 65. in 3. p. sect. 4. & Gabriel Vasquez disp. 178. in 3 p. qui etiam suprà relattam sententiam sequuntur: quam auctoritatibus & rationibus munire eius sectatores fatagunt, in hoc præcipuè incumbentes, vt probent, aquam non posse immediatè in sanguinem verti, neque materiam Eucharistiæ esse dicendam.

Probant ergo primùm ex Concilijs. Nam Carthagin. III. can. 24. præcipit, *ne amplius in sacrificiis offeratur, quàm de uvis & frumentis.* Patres Concilij Triburiensis can. 19. statuentes aquam sic esse cum vino miscēdam, vt duæ partes sint vini, vna verò aquæ; hanc addunt rationē, *Quia maior est maiestas sanguinis Domini, quàm fragilitas populi, qui per aquam designatur.* Sentiunt ergo, solum vinum, non etiam aquam in sanguinem conuerti. Patres Synodi Trullanæ can. 32. morem Armenorum corrigentes, qui solo vino utebantur, dicunt inter alia, *Incrumentum sacrificium peragi ex pretioso Redemptoris sanguine & aqua:* existimant ergo aquam non conuerti in sanguinem, cùm eam à sanguine distinguant. Concilium Florentinum loquens de materia Eucharistiæ, solius vini me-

meminit, dicens: *Tertium est Eucharistiæ Sacramentum, cuius materia est panis triticeus, & vinum de vite*; deinde meminit aquæ tamquam cuiusdam ceremoniæ, dicens, *Cui ante consecrationem aqua modicissima adhiberi debet*. Concilium Lateranense sess. 13. can. 12. panem tantum & vinum asserit esse materiam Eucharistiæ. Denique Concilium Trident. sess. 13. continente decretum de Sanctissimo Eucharistiæ Sacramento, nusquam aquæ meminit, sed assidue nominat panis & vini benedictionem, consecrationem, conuersionem, transubstantiationem.

Secundò, adducuntur Summi Pontifices. Vt Iulius I. qui, vt citatur apud Gratianum de consecrat. dist. 2. *Manifestum est*; inquit, *& evidens exemplum veritatis Evangelicæ illuxit, quòd præter panem & vinum, aliud offerri non licet*. Innocent. quoque III. cap. *Cum Marthe.* de celebrat. Missarum, hanc quæstionem proponens, & deinde soluens, eam approbat sententiam, quæ asserit, aquam cum vino transubstantiari in sanguinem, cum in vinum transeat mixta vino; censet igitur eatenus transire in sanguinem, quatenus prius transit in vinum. Et id ipsum repetit lib. 4. Mysteriorum Missæ c. 29. His addi potest Catechismus Romanus Pij V. iussu editus, qui ait hanc esse omnium Ecclesiasticorum sententiam.

Tertiò, probatur ex Patribus. Nam S. Cy-

B

pria-

prianus epist. 63. ad Cæcilium aquam excludit his verbis, *Cum dicat Christus, Ego sum vitis vera, sanguis Christi non aqua est utique, sed vinum. & infra, Inuenimus & in Genesi circa Sacramentum hoc, hoc idem præcessisse, & figuram Dominica passionis illic extitisse, quod vinum bibit. & subdit, quod Noë typum futuræ veritatis ostendens, non aquam, sed vinum biberit. Præterea infra hoc idem figuratum ostendit Gen. 40. illis verbis, Lauabit in vino stolam suam, & in sanguine vuae pallium suum: Quando autem sanguis vuae dicitur, inquit S. Cyprianus, quid aliud, quàm vinum calicis Dominici sanguinis ostenditur? & in sequentibus adducit illud Isaïæ 65. Quare rubicunda sunt vestimenta tua, & indumenta tua velut in concalcatione torcularis pleni, & percalcatis? cui subdit: Numquid rubicunda vestimenta aqua potest facere? aut in torculari aqua est, quæ pedibus calcatur, vel pralo exprimitur? Vini utique mentio est, & ideo ponitur, vt Domini sanguis vino intelligatur, & quod in calice Dominico postea manifestatum est, Prophetis annuntiantibus manifestaretur.*

S. Ioannes Chrysost. super illa verba Domini Matth. 26. *Non bibam amodo de hoc genimine vitis*, hom. 83. *De genimine vitis*, inquit, *quæ certè vinum, non aquam producit.*

S. Augustinus in libro Sententiarum Prosperi, vt citatur eodem loco cap. 41. *Fateamur, inquit, ante consecrationem panem esse, & vinum, quod*

quod natura formavit; post consecrationem verò carnem Christi & sanguinem, quæ benedictio consecrauit. Denique Patres nusquam dicunt, aquam materiam esse huius Sacramenti, sed plerisque in locis magis contrarium significant, dum solius panis & vini mentionem faciunt.

Quartò, ex Theologis Scholasticis & alijs Doctoribus. Nam docuit hanc sent. S. Thom: in 4. dist. 11. quæst. 4. art. 4. & in 3. p. q. 74. art. 8. Alensis 4. p. q. 32. memb. 5. a. 2. & reliqui Theologi in 4. dist. 11. vt S. Bonavent. 2. p. dist. art. 1. q. 3. Scotus q. 7. Ricard. a. 2. qu. 5. Maior. qu. 2. Paludanus q. 1. art. 2. quibus adde Hugonem à S. Victore, qui quæst. 93. in 1. epist. ad Corinth. cum quæsiuisset, An aqua cum vino mutetur in sanguinem, respondet: *Dicunt quidam, quòd mutatur: Nobis autem videtur, quòd non mutatur, quod à magistro Acardo accepimus.* Et idem sentit Rabanus lib. de Corpore Domini cap. 4. Necnon Iacobus à Vitriaco Cardinalis in historia rerum Occidentalium cap. vlt. & Gabriel lect. 35. super Canonem Missæ, vbi inquit, hanc sententiam, tamquam indubitatam, sequi communiter Theologos, vt omittam recentiores, qui ferè omnes in eandem pedibus eunt, præcipuè verò Thomistæ, qui etiam ante Missam inchoatam aquam vino miscent, ne ob temporis breuitatem contingat tempore consecrationis, aquam non esse in vinum conuersam.

Imò Græci, quorum ritus sequuntur Mosco-
uitæ, vino consecrato infundunt aquam cali-
dam, dicentes illud Euangelicum, *Continud ex-
iuit sanguis & aqua*: non ergo intendunt, quod
aqua transeat in sanguinem.

Quinto loco succedit prima ratio, videlicet:
Ecclesiâ non habet potestatem materias Sacra-
mentorum instituendi, sed aqua apponitur vi-
no consecrando ex præcepto Ecclesiæ, vt te-
statur Concilium Trident. sess. 22. c. 7. & est cõ-
munis sententia Theologorum. ergo aqua non
est materia, consequenter nullo pacto verti
potest in sanguinem: neque enim est verisimi-
le dedisse Christum potestatem ad conuertend-
am materiam, quam non præcepit apponi.

Sextò, sicuti solus panis est materia proxima
conuertibilis in corpus Christi, & licet fiat ex
farina & aqua, tamen aqua manens in sua sub-
stantia non est capax illius conuersionis, nisi
priùs transeat in substantiam panis: ita solum
vinum, quod ex æquo ponitur cum pane, vt
materia huius Sacramenti, est proximè conuer-
tibile in sanguinem, & non aqua, nisi in substã-
tiam vini transeat. quod confirmatur auctori-
tate Cypriani, qui hac similitudine vtitur.

Septimò. Argumentatur Suarez; si aqua est
ex æquo materia ac vinum, reddi non potest
ratio, cur non sit æquè necessaria ac vinum,
vel non possit ipsa sola ac pura immediatè cõ-
uerti

uerti in sanguinem, sicut potest purum vinum.

Octauò. Argumentantur, si sufficit mixtum vinum per iuxta positionem, ergo etiam si miscatur æqualis vel maior pars aquæ, nihilominus totum illud mistum vertetur in sanguinẽ, quia reuera est vinum mistum, vsuale: nec potest reddi ratio, cur minor quantitas possit cõuerti, & non maior.

Nonò. Saltem sequitur, solam aquam, dummodo habeat accidentia vini, etsi non habeat admistam eius substantiam, posse conuerti in sanguinem. quod est omninò falsum.

Decimò. Sequitur etiam, vt, si contingeret vinum & aquam ita misceri, vt vtriusque substantia periret, & fieret aliquod distinctum habens accidentia vini, quod in ordine ad communem potum vel vsum existimaretur vinum ymphatum; nihilominus illud esset materia sanguinis. quod est alienum à sacra doctrina, & à definitione Conciliorum.

Vndecimò. Si addatur vino aqua rosacea, recipiat accidentia eius, licet in vinum non anseat, sequitur posse conuerti in sanguinem aristi, quia etiam totum illud mistum est per modum vnius potus, & substantia aquæ naturalis per se sumptæ non est magis materia, imò substantia aquæ rosacæ.

Duodecimò. Si aqua in sua substantia perueniens in sanguinem conuertitur, ergo sub

cuius accidentibus conseruaretur sanguis Christi, etiamsi vinum acesceret. quod est falsum.

Decimotertiò. Si aqua conuerteret in se species vini consecrati, sequeretur, sanguinem Christi esse totum sub speciebus aquæ. quod non est dicendum.

Decimoquartò. Si separaretur aqua post consecrationem à vino, sequeretur sub illis speciebus aquæ remanere sanguinem Christi, esset igitur Sacramentum Eucharistiæ sub speciebus aquæ tantum. quod est absurdum.

Decimoquintò. Sequeretur posse consecrari aquam solam sine vino, saltem quando aqua est mista vino: nam per huiusmodi mitionem redditur aqua apta materia sanguinis: ergo poterit sacerdos dirigere intentionem ad aquam tantum, & ita illam sine vino consecrare.

SECTIO III.

Septima sententia explicatur, & ex iis, quæ Christus Dominus sacratissimam Eucharistiam instituens gessit, comprobatur.

AFFIRMAT hæc sententia aquam non esse quidem per se materiam Eucharistiæ. nec solam, nec æquè principalem ac vinum; sed tamen simul cum vino, & ipsi vino per mitionem incorporatam, siue deinde sit versa in vinum substantialiter & physicè, siue non, semper
verti

verti in sanguinem Christi, ita ut potius dici debeat comateria, quàm materia calicis Domini. quare falluntur, qui eam impugnant, quasi velit, aquam non minùs principaliter, quàm vinum, esse materiam sanguinis Domini: quod ipsa maximè auersatur. Hoc pacto autem hæc sententia explicata, plurimos habet sectatores, & grauissimos patronos, ut infra videbimus. Notandum autem, videri aliquibus differre inter se huius sententiæ auctores, eo quòd existiment quidam aliquando tantum contingere, ut tempore consecrationis aqua non sit versa in vinum, ac proinde aliquando tantum verti immediatè in sanguinem; alij verò censeant, nunquam verti aquam substantialiter in vinum, & per consequens semper verti immediatè in sanguinem. Re vera tamen hoc discrimen totum est philosophicum, & nihil ad Theologiam attinens. Nam, qui semel tantum admiserit aquam verti immediatè in sanguinem, id semper fieri, fateri cogetur, si semper aqua tempore consecrationis reperta fuerit non conuersa in vinum: semper enim eandem vim habent, & eodem pacto ex se verba consecrationis operantur. An autem semper, vel aliquando tantum aqua in sua substantia permaneat, ex philosophia dependet.

Dices, Ergo neque differrent quinta & sexta sententia, quarum illa semper aquam remanere

nere affererat simul cum sanguine, hæc autem aliquando tantum.

Respondeo, quoad substantiam reuera parum aut nihil differre, diuersas tamen censer; quia illa ab omnibus rejicitur, hæc multos habet patronos.

Sed vt ad septimam, quæ etiam nostra est, reuertamur, ante omnia, ne in vacuum laborare, & aërem verberare videamur, firmiter constituendum est, tempore consecrationis calicis, aliquando saltem aquam in propria substantia vino admistam adesse. Dixi *aliquando saltem*, quia iuxta sententiam in Philosophia probabilissimam, quod aqua numquam in vinum cōuertatur; tum quia elementum simplex non potest in mistum conuerti, tum quia in qualitatibus actiuis, scilicet humiditate & frigiditate, vinum & aqua conueniunt, & propter alias rationes, de quibus abunde suo loco egimus, non aliquando solum, sed semper hoc contingere, erit dicendum. Nunc contendimus aliquando saltem, etiam in eorum opinione qui dicunt posse vinum aquam in se conuertere, necessario fatendum. Triplici videlicet ratione, quantitatis, qualitatis & temporis. Quantitatis, vt si multum aquæ admisceatur: non enim tam facile magna quantitas aquæ, quam parua à contrario vincitur, nec semper tam oculati esse possunt sacerdotes, vt ea tantum quantitas aquæ

aquæ apponatur, quæ facile & citò à vino superari possit. Qualitatis, vt si vinum sit debile: adhibetur enim aliquando in Missæ sacrificio vinum adeò imbecille, vt vix ab aqua discernatur: quod proinde non est credibile aquam in vinum transmutare posse; præcipuè cum sit in modica quantitate, & tam paruum temporis interuallum intercedat. Temporis denique, quoniam si sacerdos ante oblationem calicis aquam apponere obliuiscatur, iubetur per Missalis rubricas post consecrationem corporis apponere, & statim consecrare calicem. Cum autem hæc transmutatio aquæ in vinum non fiat, nisi per contrariorum actionem, non vtique fieri poterit in instanti, & consequenter non ante prolationem verborum quibus consecratur calix. Dices fortè, vel à vino aquam in se conuerti, vel ab aqua ipsum peruerti, & inter hæc duo non dari medium, sicque numquam erit aqua mixta vino tunc temporis, sed vel aderit purum vinum, vel aqua solum. Verum facile hoc reijcitur, quia, vt à vino vincatur aqua, debet illud vi maiori pollere, vt aqua vincat, minori: ergo si vires sint pares vel proportionatæ, neutra ex parte victoria stabit. Præterea magnum ex illa sententia sequeretur absurdum, numquam scilicet esse nos certos adesse in calice post consecrationem sanguinem Christi. Probatur illatio, quia nemo

certè scire potest tunc temporis, quando forma calicis prolata fuit, aquam in vinum fuisse conuersam, cum & in quaestione, An aqua conuertatur, sit positum, & nullo sensu quando hæc conuersio fiat, dignosci possit; etsi enim quis vinum aquâ mistum diligentissimè intueatur, nullam tamen mutationem in eo aduertet, qua affirmare possit, nunc & non antea, hanc conuersionem factam fuisse: atqui si aqua non est in vinum versa, vinum per Aduersarios erit ab aqua corruptum, quia inter hæc non datur medium, & corrupto vino, quod est necessaria materia calicis, non fit ibi præsens sanguis Christi: ergo cum simus incerti de aquæ conuersione, de sanguinis Christi præsentia incerti quoque erimus. Denique Suarez, Valquez, & alij ex Aduersariis doctissimi, nullum in hoc nobis negotium facessunt, quorum auctoritati, & reliquos eis in hac quaestione consentientes, par est acquiescere.

Hoc igitur constituto, tot rationum & auctoritatum propugnaculis hanc septimam sententiam munitam reperimus, vt necesse sit in plures sectiones ea diuidere; exordiemur autem ab auctoritate, qua nulla potest esse maior, scilicet, Domini nostri Iesu Christi: cum enim Sacramentorum auctor ipsemet fuerit, certiorè planè regulam eorum naturæ dimetiendæ inuenire non possumus, quàm eius voluntatem,

tatem, quæ per ipsius verba & actiones se nobis prodit. Si igitur ostenderimus à Christo Domino in huius Sacramenti institutione aquam fuisse in suum sanguinem immediate conuersam, actum erit de tota controuersia, nec ullus amplius ambigendi locus relinquetur, quin idem, dum ab eius ministris hoc sacrificium conficitur, eueniat. Porro, vt illud ostendamus, tria nobis probanda sunt. Primum est, Christum aquam vino in calice consecrandomiscuisse. Secundum, aquam non fuisse in vinum conuersam tempore quo verba consecrationis ipse Dominus protulit. Tertium, per verba consecrationis totum id quod erat in calice per modum potus, ac proinde aquam, in sanguinem suum vertisse. quæ omnia ordine, quo proposita sunt, vera esse ostendemus.

Quo ad primum. Fuit opinio Waldensis lib. 1. de Sacramentis tom. 3. cap. 32. Christum Dominum in puro vino consecrasse, nec ullomodo aquam admiscuisse, eamque probat auctoritate Chrysostomi hom. 83. in Matth. ubi disputans contra eos qui solam aquam offerebant in calice, videtur huic opinioni fauere: quem tamen aliter exponunt Patres Concilij Trullani canon. 32. Nonnullos etiam alios Patres falsò suæ sententiæ suffragari affirmat, vt aduertit Franc. Suarez disp. 74. sect. 1. sed neque Paschasius li. de Corp. & sanguin. Christi
sti

sti cap. 11. nec Rabanus, quos pro hac sententia adducit ipse Suarez, illi verè patrocinantur. Nam Palchafius inquit tantum, *Non legi*, (scilicet in Euangelio) *Christum aquam miscuisse*. Rabanus verò apertè miscuisse affirmat lib. 1. de Instit. clericor. cap. 31. cuius verba infrà sect. 5. adducemus. Durandus potius videtur ab hac sententia non longè abesse, qui in 4. dist. 11. quæst. 5. existimat, hoc incertum esse.

Contraria tamen sententia, (si modò sententia, & non articulus potius fidei est appellandus,) est receptissima inter Theologos. *Ferè certa est*, inquit de ea Suarez, *ita enim docent antiquissimi Patres, & multum inclinavit in hanc sententiam Concilium Tridentinum*. Verùm suspicionem mihi ingerit hic auctor (quamvis alioqui summè laudandus, & de sacra Theologia optimè meritus,) quoniam videbat ex hoc principio admodum probabiliter deduci contra ipsius opinionem, aquam in sanguinem conuertere, neque tamen ipsum euertere poterat; conatum esse infirmius reddere, cum verè non solum inclinet in hanc sententiam Concilium Tridentinum, ut ipse ait, sed planè veluti certam supponat. sess. enim 22. cap. 7. hæc habet verba: *Monet deinde sancta Synodus præceptum esse ab Ecclesia sacerdotibus, ut aquam vino in calice offerendo miscerent; tum quòd Christum Dominum*
ita

ita fecisse credatur, &c. Et clarius can. 9. *Si quis dixerit aquam non miscendam esse vino in calice offerendo, eò quòd sit contra Christi institutionem, anathema sit.* Non proferret autem anathema contra dicentes hoc esse contra Christi institutionem, nisi pro certo contrarium haberet; quamuis enim posset quis dicere, non esse contra Christi institutionem, sed præter; non videtur tamen hæc distinctio hîc locum habere, quoniam si Christus aqua vltus non fuisset, tunc diceretur in vino tantum instituisse hoc Sacramentum, & proinde vti aqua esset contra eius institutionem. quare Cardinalis Bellarminus fidei Catholicæ propugnator acerrimus lib. 4. de Eucharistia cap. 10. inquit, non minus certum esse Christum Dominum aquam vino miscuisse, quàm quòd vinum consecrauerit: vtrumque enim asserit haberi ex traditione, pro qua etiam plurimos Patres citat, sicuti & Guliel. Alanus lib. 1. de Eucharistia c. 13. cur autem hoc fecerit Christus Dominus, plures asserunt suprâ citati Auctores rationes, & nos infrâ proferemus.

At dices, Euangelium hoc non docet. Verum est, sed non omnia tradiderunt Evangelistæ: nam neque explicant panem illum, quem Christus consecrauit, fuisse triticeum, & tamen de hoc nemo dubitat. Immo addit Cardinalis Bellarminus lib. 4. de Eucharistia cap. 11. neque habet

habetur ex Euangelio, quòd in vino consecrauerit: nam verba illa, quæ ad hoc probandum solent afferri, *Non bibam amodo de hoc genimine vitis*, non sunt de calice, siue consecrato, siue consecrando intelligenda. Et rectè quidem. Inde tamen probabilissimum habemus argumentum, in vino Dominum consecrasse, quia vino tunc utebatur. quare cùm dicitur accepisse calicem, meritò intelligitur de portione in illa coena consueta: nisi tamen accederet etiam traditio, & Patrum expositio, non possemus illo argumento conuinci. Possent etiam in huius rei confirmationem alia proferri Sacramenta, vt Extrema Vnctio & Confirmatio, de quibus in Euangelio nulla est mentio; sed clarius est apud Catholicos, quàm vt probatione indigeat, ex traditionibus multa haberi, quæ in Euangelijs non leguntur, neque tamen inficiari ea, vel negligere fas esse. Addit S. Bonauentura non fuisse hoc ab Euangelistis relatum, ne crederemus esse de necessitate Sacramenti; haberi autem ex traditione, vt sciamus esse de necessitate præcepti. Primum igitur punctum firmissimè constitutum manet.

Quo ad Secundum, scilicet immediatè ante verba consecrationis non fuisse aquam in vinum conuersam, in quo totius argumenti, immò disputationis cardo constitutus videtur, firmissimæ quoque non deerunt nobis probationes.

iones. Et Primùm, vel fuisset aqua conuerſa in vinum ſupernaturaliter, vel naturaliter. Illud nemo, opinor, dicet, quia nulla hîc adest neceſſitas, nullum fundamentum, nulla ratio miraculum aſſerendi. hoc dici non poteſt, quia nequit vinum viribus naturæ aquam in ſe conuertere. Sed quia hoc non admittunt Aduerſarij, alijs argumentis vtamur. Probatur igitur Secundò, etiam iuxta principia Aduerſariorû. Vel immediatè, vel breuiſſima interpoſita mora, poſtquam vino miſcuit aquam, verba conſecrationis Chriſtus Dominus protulit; ergo non fuit aqua in vinum conuerſa. Antecedens probatur ex traditione Apoſtolorum; in primis enim S. Iacobus in ſua Liturgia, quam pro germana agnoſcunt Patres Concilij Trullani can. 32. & alij Patres, vt refert Sixtus Senenſis lib. 2. Bibliothecæ verbo *Iacobus*, & Margarinus tom. 6. Bibliothecæ veterum Patrum in principio: Sanctus, inquam, Iacobus ait, *Similiter poſtquam cenauit accipiens calicem, & permixſcens ex aqua & vino, & aſpiciens in calum, ac oſtendens tibi Deo, & Patri gratias agens, ſanctificans, benedicens, implens Spiritu ſancto, dedit nobis diſcipulis ſuis, dicens, Bibite ex hoc omnes, hic eſt ſanguis meus noui teſtamenti.*

S. Marcus eadem ferè habet in ſua Liturgia: inquit enim: *Similiter & calicem, poſtquam cenauit, accipiens, factaq; vini & aqua commixtione,*

ne,

ne, suspiciens in calum ad te Patrem suum, Deumq;
 nostrum, & Deum vniuersorum, gratias egit, bene-
 dixit, sanctificauit, impleuit Spiritu sancto, & tra-
 didit, &c.

Ex his ergo colligitur breuissimam fuisse
 moram inter aquæ mitionem, & consecratio-
 nem: quamuis enim non dicant post aquæ in-
 fusionem Christum immediatè consecrasse,
 cum tamen immediatè consecratio referatur,
 hoc sufficit, vt credamus immediatè hoc con-
 tigisse; quia non solent historici, dum res ali-
 quas narrant quæ ordine se consequuntur, di-
 cere hoc immediatè factum fuisse post illud,
 quia ex consequenti narratione, dum ratio in
 contrarium non occurrit, hoc satis colligitur.
 Confirmatur ex Euangelistis, nam ipsi quoque
 dicunt, Dominum post acceptum calicem gra-
 tias egisse, ac consecrasse. at non est verisimile
 vinum & aquam calici infudisse, antequam
 illud acciperet, cum contrarium ex supradictis
 liturgijs colligatur; neque in gratiarum acti-
 one diu perstitisse, cum vnico verbo ab Euan-
 gelistis referatur, & ab aliis (*Marc. 14. 23.*) gra-
 tiarum actio in participio ponatur, his verbis
 scilicet, *Gratias agens dedit eis.* qua phrasi si-
 mul cum gratiarum actione, calicem tradi-
 disse declaratur, ergo paulò post aquam infu-
 sam verba consecrationis protulit.

Tertiò, idem probatur, quia consecratio pa-
 nis

is & vini sunt duæ partes vnius sacrificij; ergo non magna temporis mora debuit inter eas intercedere; alioqui non viderentur habuisse ordinem, & vnionem inter se. quapropter & Ecclesia post panis consecrationem non differt consecrare calicem.

Quartò, confirmatur, quoniam Christus omnia summo decore faciebat: at non admodum decens homini sobrio & graui videtur, calicem in manu habentem sermonem in longinquum protrahere: ergo non est credendum id fecisse Christum; sed paulò post acceptum calicem, & aquam infusam consecrasse.

At obijciunt nobis Aduersarij S. Bonauenturæ, qui in 4. dist. 11. 2. p. art. 1. aduertit, Christum Dominum non antea consecrasse calicem, quàm aqua in vinum fuerit conuersa. Verùm si considerentur verba S. Bonauenturæ, facilis est responsio: inquit enim, *Ad illud, quod obiicitur; vtrum Dominus posuerit, (scilicet aqua) dicendum, quòd sic, sed non tamquam necessariam, sed tamquam congruam: & hoc patet, quia vinum erat, ex quo confecit: ergo aqua transierat in vinum; antequam conficeret.* Totum igitur fundamentum S. Bonauenturæ est, quia dicitur Christus in vino consecrasse, cui cùm satisfecerimus, erit etiam eius auctoritati satisfactum.

Dicimus igitur ad eius fundamentum, dici Christum consecrasse in vino, quia etsi mista sit
C aqua

aqua vino, totum illud mistum appellari solet simpliciter vinum, vt infrà copiosius probabimus. Adde, quòd inulti Patres expressè asserunt, Christum consecrasse id quod mistum erat in calice: sic Irenæus lib. 4. c. 57. *Dominus, inquit, temperamentum calicis suum sanguinem confirmavit.* sic Theodor. dialogo 1. ait, *Christum suum sanguinem fecisse id quod in calice infusum & commixtum erat.* Sic Concilium III. Cathag. cui S. Augustinus interfuit; præcipit enim can. 24. *vt in Sacramento corporis & sanguinis Domini nihil ampliùs offeratur, quàm ipse Dominus tradidit, hoc est, panis & vinum aqua mixtum.* Et clariùs Concilium Florentinũ in decreto Eugenij, vbi dicitur, Christum Dominum in vino aqua permixto hoc Sacramentum instituisse: tunc enim instituit, quando verba consecrationis protulit, vt alios omittam quos Cardinalis Bellarminus lib. 4. c. 10. diffusè refert.

Colligitur etiam ex Scriptura, ex illo loco Prouerb. 9. *Bibite vinum, quod miscui vobis:* quamuis enim iuxta litteralem sensum Scripturam sacram per hanc mensam, & hoc vinũ intelligat Iansenius, & miscere vinum apud profanos auctores idem sæpè sit, quod præparare, & propinare; Patrès tamen communiter hunc locum exponunt de conuiuio altaris, in quod ipse quoque Iansenius ait, longè perfectiùs & excellentiùs, quæ hñc dicuntur competere;

etere ; & S. Cyprianus epist. 63. ad Cæcilium : *ex hoc loco probat , aquam vino esse miscendam in calice Domini . inquit enim : Sed & per Salomonem Spiritus sanctus typum Dominici sacrificij antè præmonstrat . & paucis interpositis , Vinum mixtum prophetica voce pronūciat .* Idem sentit S. Hieronymus , siue , vt alij volunt , Beda in huius loci commentario ; nam , *in pane , inquit , corporis ipsius , in vino mixto sanguinis sacrosancti mysterium , quo in Altari , mensa videlicet eius , satiamur , ostenditur .* Et de eodem conuiuio altaris non solum S. August. lib. 17. de Ciuitate Dei c. 20. hunc locum intellexit ; sed etiam Iudæos ipsum ita interpretatos refert Rabbi Moyse Hadarsam in cap. 14. Gen.

Ex his igitur liquet nedum certum non esse , vinum purum fuisse illud , quod Christus in sanguinem consecrauit ; sed potius ferè exploratum aqua fuisse permistum , etiam tempore consecrationis . quare ruit fundamentum S. Bonauenturæ ; nisi velimus dicere , quod magis mihi probaretur , locutum fuisse S. Bonauenturam de conuersione morali . Nam ea ratione inquit aquam fuisse in vinum conuersam , qua vinum appellatur id , quod Christus consecrauit ; sed hoc vinum dicitur , non quod secundum omnes suas partes esset substantialiter vinum ; sed quia vsu communi solet appellari vinum id quod est mixtum ex aqua & vino .

dem igitur pacto , inquit S. Bonauentura aquā esse conuersam in vinum, id est, ita fuisse vino vnitam, vt iam communi vsu sub vini nomine comprehēderetur. Habemus igitur, si non tamquam certissimū, saltem tamquam valdè probabile, paulò post aquæ infusionem, Christum Dominum verba consecrationis protulisse.

Verūm dices, Cur ergo Ecclesia non imitatur Christum aquam infundendo immediatè ante consecrationem? Respondeo, Ecclesiam imitari Christum, quòd simul cum vino ponit aquam in calice, item quòd post consecrationem panis consecrat calicem, & in aliis, quæ spectant ad substantiam huius Sacramenti & sacrificij. Non imitatur autem in omnibus circumstantiis, ita à Spiritu sancto edocta ob maiorem huius Sacramenti reuerentiam; nam neque quo ad tempus, vesperi celebrat, neque post comestionem: aliqua enim faciebat Christus Dominus, quæ ratione temporis & personarum congrua tunc maximè erant, quæ modo non congruerent. Ponit ergo nunc Ecclesia ante consecrationem corporis vinum & aquam in calice, vt simul prius offerat in propria specie, & tum sacerdos ipse se disponat ad tam excelsum ministerium, tum ipsa materia tanti Sacramenti suo modo per quamdam sanctificationem extrinsecam præparetur. Hæc igitur pro antecedenti superioris argumenti
sint

sint dicta. Probabimus nunc consequentiam, scilicet, ergo nondum aqua erat in vinum conuersa.

Vinū maiori ad conuertendum in vinum humorem illum aqueum, quem ex terra exugit, prædita est vitis, quàm sit vinum ipsum ad generandum aliud vinum ex aqua sibi admitta: atqui vitis non nisi integro anni circulo, cælestibusque influentiis, & solis vehementi calore adiuta illud potest: ergo in tam breui mora, quam ostendimus intercessisse inter aquæ cōmisionem, & calicis consecrationem, non est verisimile vinum potuisse aquam in se commutare, & nouum vinum gignere. Minor experimento patet. Maior probatur: quoniam vitis est animata, & vi nutriendi prædita, vinum autem est inanime, & beneficio nutritionis consequenter caret. Secundò, vinum omnem suam vim habet à vite, ergo non ea maiorem. Tertiò, vinum est extra locum proprium, & connaturalem sibi statum, qui est in cortice vuz, ergo imbecillius. Quartò, non est in fructu, quòd vim maiore gignendi habeat, quàm femina, quæ ad hoc à natura sunt instituta: at hæc non sunt vinum, sed granula illa, quæ in acinis vuz conspiciuntur, quæ tamen longo indigēt tempore, vt possint ex se proferre vitem, & ea mediante vinum: ergo multò minùs vinum in breuissima temporis morula gignere

poterit aliud vinum, nam aquam in se conuertere est vinum ex illa gignere. Quintò, vinum ab alio vino genitum (si tamen gigni potest) est longè imperfectius, quàm quodlibet aliud à vite productum; adeò vt homines decipi se putent, si eis vinum, cui admista fuerit aqua, vendatur, ac si totum esset vinum de vite. quare de re tamen conqueri non possent, si vinum ex aqua genitum longè imperfectius non esset, quàm vinum de vite. Si igitur effectus vini est imperfectior, ergo etiam virtus causæ, & consequenter vitis productiua virtus longè maior erit, quàm vini. quod erat probandum.

Præterea, quo magis materia distat à perfectione formæ introducendæ, eo longiori tempore opus est ad eam gignendam: at aqua quæ longissimè abest à perfectione vini: ergo non breuissimo tempore potest ad eius formam disponi. Probatur minor, quia vinum est opus viuientis, & liquor perfectissimus, aqua verò elementum simplex, & liquor imperfectissimus: ergo maximè inter se distant.

Confirmatur, quia probabile est, Christum Dominum non vnâ aut alterâ tantum guttam aquæ calici infudisse; nam S. Thom. in 4. dist. 11. & alij Theologi passim probant, Christum vinum aqua dilutum consecrasse, quia moris eius erat, vino aquam miscere; sicut etiam cæterorum illius regionis hominum propter

per vim & potentiam vini; at Christus non sol-
lebat vnā aut alteram tantū guttam aquæ
vino miscere, ergo neque id fecit in consecra-
tione calicis. Respondet ad hoc Suarez sect. 2.
illam ex Christi, vel illius gentis more dedu-
ctam rationem non probari Theologis: præ-
terea ait, Christum non instituisse hoc Sacra-
mentum inter cœnandum cœna vsuali, ac si
rem communem & vulgarem ageret, sed ante
inchoatam illam singulari attentione & reue-
rentia, pro vt mysterium postulabat. Vnde fit,
non oportuisse, vt vteretur in mysterio vino
mixto modo vsuali, sed modo mystico, pro vt
nunc in sacrificio fit. Verū non satisfacit; pri-
mum enim, quod ait, illam rationem ex more
gentis deductam non probari Theologis, cum
indefinitè id pronuntiet, si velit æquiuale-
re propositioni singulari, verum erit: ipsi enim,
vel alteri Theologo fortassis non probatur, at
potiori iure possumus nos dicere, probari The-
ologis, quia placuit D. Thomæ loco suprâ cita-
to. Magistro Sentent. in 4. dist. 11. Alensi 4. p. q.
10. membr. 4. art. 1. Gabrieli lect. 3. in Cano-
rem. Soto in 4. dist. 9. q. 1. art. 6. Dionysio Car-
thusiano in 4. dist. 8. q. 3. Henrico Henriquez
lib. 8. cap. 12. & aliis communiter. quare Thost.
paradoxo 2. q. 34. tamquam communem om-
nium Theologorum & Doctorum eam assert,
& probat. Nec displicuit S. Bonauenturæ in 4.
C 4 dist.

dist. 11. qui licet debilem asserat esse rationem, non tamen dicit esse malam. Si verò velit Suarez suum dictum æquivalere propositioni vniuersali, est manifestè falsum, vt ex citatis auctoribus patet. Præterea, quamuis verum sit, quod ipse ait, Christum Dominum non instituisse hoc Sacramentum inter cœnandum cœna vsuali, ac si rem communem ac vulgarem ageret; docent nihilominus omnes Theologi cum D. Thoma in 3. p. quæst. 74. a. 1. instituisse Christum hoc Sacramentum in pane & vino, quia his communius homines reficiuntur; respexit ergo Christus vsum communem: & propterea, cum nulla ratio obstaret, etiam in aquæ miltione, credendum est, ipsum vsum communem secutum fuisse. Adde, quòd si quis guttam aquæ calici vini pleno infunderet, non propiè diceretur miscere aquam vino: oportet enim inter miscibilia adesse proportionem aliquam; vt inquit Aristoteles lib. 1. de Ortu & intertu cap. vlt. Ergo, cum omnes Patres dicant, Christum aquam vino miscuisse, hoc non debet tantum de vna, vel altera gutta intelligi, quia dum proprietatem verborum saluare possumus, non debemus ab ea recedere; alioqui liceret verba Patrũ & sacra Scripturæ ad quoslibet nostros sensus detorquere. quare & Henriquez lib. 8. cap. 12. in annotationibus ait, *Nec Christus videtur tam parum aqua miscuisse, quin dic-*

eretur temperatum. Et Didacus Tapia q. 2. de
eucharistia art. 10. *Nec ipse calix*, inquit, *quem*
dominus benedixit, tam modicâ, vt credo, fuit aquâ
mixtus. Quod ergo ait Suarez ad vim huius
gumenti vitandam, Patres locutos fuisse de
ystica quadam mixtione, ita concedendum
temur, vt tamen non excludamus veram &
historicam mixtionem ab ea non dissimilem,
quia Christus & reliquitunc homines commu-
iter utebantur.

Dices, Ergo malè agit Ecclesia, quæ modi-
ssimam aquam iubet infundi. Respondeo, re-
ctissimè hoc ab Ecclesia præcipi. Primò, vt pe-
culū vitet; quod, si magna quantitas aquæ vi-
o infunderetur, adiremus, ne vinum ab ea
inceretur, ac proinde non esset apta materia.
Secundò, quoniam à multis tam modicum vi-
um solet calici infundi, vt, nisi modicissima sit
qua, æqualis futura sit vino, vt alias rationes
mittam, de quibus infra sect. 4. sermo erit:
quando tamen determinata fuit proportio a-
quæ ad vinum, dictum est in Concilio Tribu-
rensi cap. 19. vt duæ partes essent vini, tertia
erò aquæ. Quod Concilium licèt non fuerit
generale, ac proinde non infallibili auctoritate
præditum; non est tamē contemnendum: nam
neque vnquam reprobaturum fuit, & ex eo Gra-
ianus multas sententias in Decreta transtulit.
Honorius quoque III. cap. *Perniciosus*, de cele-
brat.

brat. Missarū. nil aliud dicit, quàm consuetudinem Ecclesiæ esse, vt plus vini quàm aqua ponatur. Quia tamen aliquando vina, vel debilia sunt, vel etiam aqua in dolio admistā habent, tutius visum est Concilio Florentino non determinare tertiam partē, sed tantum admonere sacerdotes, vt modicissimā aquam apponant.

Dicunt prætereā Aduersarij, vinum illud, in quo instituit Christus Dominus Eucharistiam, generosum fuisse, & magnarum virium, quare non mirum potuisse breui aquam in se conuertere. At, dicam ego, vnde colligunt, vinum illud generosum fuisse? an quia Christus, vel eius Apostoli vino pretioso ac generoso delectabantur? asserere non audebunt. An quia apud Principem diuerterat, qui hospitibus suis huiusmodi delicias præberet? diuitem non negauerim hunc hospitem Christi, quamuis neget S. Ambrosius Lucæ 22. vel potius non pauperem; Principem tamen, & huiusmodi delicias captantem, cū Christi discipulus fuerit, nulla ratio cogit nos vt asseramus. An quia vina illius regionis generosa sunt? probabile est aliquot talia esse, cū calida sit regio; sed neque certum omnino est argumentum, cū & in calidis regionibus vina aliquando frigida oriantur, vt euenire in Ægypto inquit Macrobius lib. 7. Saturnal. ca. 8. cuius etiam rationem reddit, dicens, *Frigus ima petens, vitium radicibus inuol-*

inuoluitur, & talem dat qualitatem succo inde nascenti, ideo regionis calida vina calore caruerunt. Adde, non tantum ex regionibus, sed etiam ex natura & qualitate vitium, potentiam vel debilitatem vini oriri. Præterea, Iudæam non fuisse vini admodum feracem, argumento est, quia ficera apud Iudæos in usu erat, quod non nisi ex vini inopia contingere solet. Tandem, neque Plinius diligentissimus auctor, siue cum Iudæam describit lib. 5. siue cum vina generosa enumerat lib. 14. ex omnibus terræ partibus prouentientia, vini Iudaici vnquam meminit. quare vinum illud fuisse generosum, est omnino incertum, vt proinde non debeamus Theologicam sententiam tam magni ponderis, quanti est quam præ manibus habemus, in eo fundare. Addo etiam, vinis generosis sæpè difficilius aquam commisceri, eò quod sint substantiæ crassioris & solidioris, quod in vino Cretico, vel similibus facile est experiri. Quapropter cuiuscumque conditionis fuerit vinum à Christo in calicis consecratione adhibitum, est probabile, etiam iuxta illorum sententiam qui dicunt vinum in se aquam vertere posse, tam breui tempore naturaliter non potuisse in se aquam conuertere. Vt cumque sit, non poterunt nobis Aduersarij non concedere, dubium esse, an aqua tunc in vinum fuerit conuersa; ex quo sequitur saltem dubium esse, an aqua in sanguinem

nem immediatè conuertatur. Sed si dubium est, cur ipsi indubitanter negant? Sed nimium eis concedimus: ferè enim certum videtur, naturaliter tunc non potuisse aquam in vinum esse transmutatam: neque verisimile est, si aquam in vinum verti ante consecrationem ad Sacramenti dignitatem pertineret, rem tanti momenti voluisse Christum sub dubio nobis relinquere.

Tertium probandum erat, posito, quòd aqua fuisset in calice simul cum vino, quando Christus verba consecrationis protulit, in eius sanguinem fuisse conuersam. quod sanè tam mihi clarum & certum videtur, vt aliquem Catholicum de hoc dubitare possè, vix credam. Nam potuisse Christum aquam in sanguinem conuertere, quis hæreticus, ne dicam Catholicus, inficiari ausit? porrò voluisse, ex gestis & verbis ipsius colligitur. Ex illis, quia voluit, aquam simul esse cum vino tempore consecrationis; si enim in sanguinem conuertenda non erat, vt quid eo tempore simul cum vino mistam & confusam esse voluisset? Sed multò clariùs ex eius verbis hoc colligitur: non enim dixit, Hoc vinum, siue hoc quod videtur vobis esse vinum (quamuis, etsi hoc dixisset, contra nostram sententiam non esset) sed, *Hic calix nouum testamentum est in meo sanguine*: calicis autem nomine totum illud quod est in calice

calice per modum potus, intelligitur: quare etiam Dominus in Euangelio dixit: *Si quis dederit calicem aqua frigida, &c.* Cum igitur & in hominibus talis præsumatur animus, qualem verba prolata declarant. *l. Labeo. ff. de supel. legat. & Aristot. i. Perihermen.* dicat, voces esse signa conceptuum, & Cicero in 1. de Legibus affirmet, orationem esse mentis interpretem; & quod maius est, in Sacramentis verba id efficiant, quod significant, & verba consecrationis à Christo prolata significant totum illud quod est in calice esse sanguinem; euidenter sequitur aquam, si qua in calice illo erat (vt valdè probabilissimum est extitisse) & voluisse Christum Dominum in sanguinem suum conuvertere, & verè conuertisse: nam vt inquit S. Bernardus hom. 4. super Missus est, *Apud Deum nec verbum dissidet ab intentione, quia veritas est; nec factum à verbo, quia virtus est; nec modus à facto, quia sapientia est.* Confirmatur, quia eodem prorsus argumento vtitur Concilium Tridentinum sess. 13. cap. 4. ad probandum, totam vini substantiam in sanguinem Christi conuerti: inquit enim, *Quoniam Christus Redemptor noster corpus suum id quod sub specie panis offerebat, verè esse dixit. ideo persuasum semper in Ecclesia Dei fuit, idq; deuoto sancta hæc Synodus declarat, per consecrationem panis & vini, conuersionem fieri totius substantia panis in substantiam corporis Christi*
Domi-

Domini, & totius substantia vini in substantiam sanguinis eius. Vbi Nota ex eo, quod Christus dixit indefinite, *Hoc est corpus meum*, colligere & argumentari Conciliū, totum omnino panem verti in corpus Christi: ergo etiam ex eo, quod dixit, *Hic calix*, &c. totum illud quod erat in calice, dicendum est, in sanguinem suum vertisse.

Confirmatur, quia DD. Iacobus & Marcus, quorum sententias supra retulimus, affirmant Christum Dominum calicem Spiritu sancto impleuisse; non utique alia ratione, nisi quia id quod erat in calice, in suum sanguinem transmutauit: si igitur quidquam remansit in calice quod eius sanguis nostr fuerit, non fuit ille calix Spiritu sancto plenus, sed ex parte tantum.

Debet ergo omnino certum esse, nihil aquæ remansisse post consecrationem in calice Domini: atqui non est certum, aquam ipsius fuisse conuersam in vinum, quia neque auctoritas, neque ratio id conuincit: ergo cum certum ab incerto non pendeat, siue aqua fuerit conuersa in vinum, siue non, dicendum est in sanguinem transubstantiatam fuisse. Adde, quod Conciliū non tantum argumentatur ex verbis Christi, ipsum Dominum totam substantiam panis vertisse in sanguinem suum, sed etiam id semper fieri in consecratione eiusdem; ergo idem etiam dicendum erit de calice. quare sicut

ut certum est, numquam post consecrationem remanere aliquid substantiæ panis, & non remansisse substantiam aquæ in prima huius Sacramenti institutione: ita certum esse debet, in qualibet consecratione nihil aquæ remanere; atqui si aqua non conuertitur immediatè, saltem aliquando, in sanguinem, oportet dicere, aliquando remanere, vt & ipsi Aduersarij faterentur: ergo ne hoc absurdum admittatur, totaque vis argumenti Concilij pereat, dicendum est, aquam, siue versa sit in vinum, siue non, semper verti in sanguinē. Dices, Cur non meminit Concilium hinc aquæ, sed solius vini? Respondeo, quia noluit definire, aquam non conuerti in vinum, cum hoc ad philosophiam spectet. deinde, quia nomine vini intelligitur etiam aqua ei admista, sed non permanere aquæ substantiam, apertè dixit sess. 13. can. 2. asserens, remanere tantum post consecrationem species vini. quod falsum esset, si etiam remaneret aquæ substantia.

Denique, etiamsi tunc in calice Christi non extitisset aqua, sed iam conuersa fuisset in vinum, adhuc hoc argumento colligeretur, à sacerdote aquam, si quando non sit conuersa in vinum, immediatè transmutari in sanguinem Christi. Nam sacerdos in hoc Sacramento conficiendo est minister Christi, & agit virtute illius, ita vt omnia illa peragat, quæ per ageret, Chri-

Christus, si adesset præsens. Sed si Christus protulisset verba consecrationis super vinum & aquam, dubium esse non posset, quin ea conuertisset in sanguinem; ergo idem de sacerdote dicendum, cum non possit obijci, quòd in hoc se gerat sacerdos contra Christi institutionem, quoniam ab ipso Christo ita hoc Sacramentum est institutum, ut moraliter necesse sit aliquando contingere tempore consecrationis, aquam non esse conuersam in vinum. Quare hoc argumentum ex Christi institutione desumptum est omnino magnum, & nostram sententiam efficacissimè probat.

SECTIO IV.

*Conciliorum, Canonum & Summorum
Pontificum auctoritate eadem
sententia probatur.*

NON habet quidem Ecclesia potestatem instituendi Sacramenta, neque aliquid circa materiam vel formam ipsorum innouandi; quia tamen Apostolo Petro data est non tantum clavis potestatis, sed etiam clavis scientiæ; ad ipsam spectat declarare materiam, formam & ritus, qui in Sacramentis tum conficiendis, tum administrandis obseruari debet. Non possumus igitur post Christi institutionem,

nem, firmiori in hac materia argumento niti, quàm Ecclesię auctoritati, quę nobis per Summos Romanos Pontifices, per Canones, & per Concilia ab ipsismet Romanis Pontificibus approbata, innotescit. Ex horum igitur auctoritate nostram sententiam confirmabimus, & à Concilijs generalibus exordiemur, quę si legitima sint, & à Petri sede approbata, in rebus fidei decernendis non minori auctoritate, quàm Euangelia ipsa, prædita esse meritò existimantur.

Et primò consulamus Concilium Florentinum sub Eugenio IV. Summo Pontifice, in quo diffusè de Sacramentorū materia & forma agitur. In decreto igitur ipsius Eugenij, quod est in fine Concilij, hæc verba habentur; *Tertium est Eucharistia Sacramentum, cuius materia est panis triticeus, & vinum de vite, cui ante consecrationem aqua modicissima admisceri debet.* Hæc Eugenius. Ex quibus ita argumentor: aqua est pars materiæ Sacramenti Eucharistiæ; ergo vertitur immediatè in sanguinem Christi. Consequētia est evidens, probatur antecedens. Quia explicans Pontifex materiam Eucharistiæ, simul cum vino de aqua mentionem facit, quamvis diuersimodè de vino & aqua loquatur, de illo scilicet absolutè asserens esse materiam, quia est materia necessaria; de hac verò, debere apponi, quia non est materia ne-

D

cessa-

cessaria, sed debita & congrua tantum, licet ex præcepto necessario etiam apponenda. At dicunt Aduersarij, missionis aquæ meminit Pontifex tamquam cæremoniæ cuiusdam, quæ in materia obseruari debet, non tamquam materiæ. Verum hanc non fuisse mentem Pontificis, facile probatur, quia non intendebat ibi Pontifex explicare cæremonias huius Sacramenti, sed tantum materiam & formam; cur enim, si cæremonias huius Sacramenti explicare volebat, tot alias prætermisit? cur hanc ipsam perfectè non explicauit, dicens, Cui multò ante consecrationem, & non tantum ante consecrationem? cur in reliquis Sacramentis materiam tantum & formam aperuit, nullo addito verbo de ipsorum cæremonijs? cur tractans de materia statim ad cæremonias transit, nullâ distinctione factâ, nec præmonitione adhibitâ, ne quis cum loqueretur de materia, putaret etiam aquam ad materiam spectare? Concilium certè Tridentinum sess. 14. cap. 3. explicans formam Sacramenti Pœnitentiæ, in illis inquit verbis positam esse, *Ego te absoluo*, &c. quibus quidem de Ecclesia sancta more preces quadam, (nota preces, inquit, vt admoneret non spectare ad formam) laudabiliter adiunguntur. Non igitur solent Concilia cæremonias cum partibus essentialibus Sacramentorum confundere, sed distinctè vtrasque tradere: quare & idem Concilium

cilium Florentinum loquens de forma eiusdem Sacramenti Pœnitentiæ, verba illa, quæ tamquam preces ei adiunguntur, omisit; idem facturum de aqua, si ad materiam calicis non spectare, sed tantum cæremoniæ causa adhiberi credidisset. Cur non dicemus quoque, cum dixit Pontifex, materiam corporis Christi esse panem triticeum, panem quidem spectare ad materiam, triticeum autem ad cæremonias, si nostro arbitrato licet verba Pontificis diuidere, & alia ad materiam, alia ad cæremonias referre?

Est igitur violenta hæc expositio, & contra mentem Eugenij, qui materiam explicare intendebat, non autem cæremonias. Confirmatur, quia si aqua ita apponatur calici, vt ante consecrationem non sit conuersa in vinum (vt aliquando etiam euenire Aduersarij fatentur) sequitur necessariò, vt supponatur formæ verborum tamquam materia, quia verba formæ significant totum illud quod per modum potus est in calice; ibi autem est aqua, ergo aqua est materia. si ergo voluisset Pontifex à materia aquam excludere, oportuisset eum dicere, Ita admisceatur aqua, vt in vinum conuertatur: quod cum non dixerit, signum est, habuisse ipsam aquam tamquam materiam ipsius Sacramenti. Quod auctor Catechismi rectè intellexisse videtur: nam explicans materiam ca-

licis inquit, *Est autem vinum ex vitis fructu expressum, cui modicum aqua permixtum sit.* Quæ verba tam apertè significant aquam ad materiam spectare, vt potius ex illis colligi possit, aquam esse materiam necessariam, quàm non esse materiam; nam qui dicit, illud vinum esse materiam calicis, cui modicum aquæ permixtum sit, videtur innuere, illud non esse materiam, cui aqua permixta non sit. Sicuti si dicerem, *Dono tibi vinum in cella mea vinaria existens, cui aqua admixta sit;* omnes intelligerent, me illud donare velle tantum, cui admixta est aqua. Similiter si dicerem, materiam corporis Christi esse panem qui ex tritico sit confectus, nemo me reprehenderet tamquam malè locutum; omnes enim intelligerent, verba illa, *qui ex tritico sit confectus,* determinare materiam, non verò spectare ad cæremonias. Atqui hæc propositio, vinum cui aqua sit admixta, nullo pacto differt, quoad formam enunciationis, ab hac alia propositione, *Panis qui ex tritico sit confectus.* ergo sicut totum hoc spectat ad materiam, ita etiam totum illud.

Præterea hæc duo, vinum aqua mistum, & vinum cui aqua mista sit, nullo pacto differunt, quia verbum, *Sum, es, est,* habet tantum vim copulæ, vt aiunt Dialectici, quare coniungit prædicatum cum subiecto, & nihil præterea facit; & idcirco apud plures Doctores reperies,
vinum

vinum aqua mistum esse materiam Eucharistiae, vt apud Petrum Gregorium in suo Syn-
tagmate Iuris lib. 2. c. 6. & Lælium Zechium
c. 2. de Eucharistia; sed neque differunt, quoad
modum enunciandi hæc duo, vinum aqua mi-
stum, & panis triticeus: quia totum illud, aqua
mistum, munere fungitur vnius adiectiui, quo
caret lingua Latina, non tamen Græca. & id-
circo Patres Græci, dum dicunt, Christum Do-
minum vinum aqua mistum consecrasse, eo
vtuntur, vt sectione sequ. patebit. Ergo sicut,
qui dicit, panem triticeum esse materiam cor-
poris, significat non solum panem, vt sic, sed
etiam quatenus triticeus est, esse materiam; ita
qui dicit, vinum aqua mistum, siue vinum cui
aqua mista sit, significat non solum vinum, sed
etiam vt aqua mistum, esse materiam calicis.

Dices, Si hæc vera sunt, erit igitur mistio a-
quæ de necessitate Sacramenti, & vinum pu-
rum non erit materia sufficiens, sicuti non est
panis non triticeus. Respondeo, vinum purum
non esse quidem materiam perfectam, & qua-
lem voluit Christus & Ecclesia, esse tamen ma-
teriam sufficientem, quare merito ita loquitur
Catechismus, vt videatur excludere à materia,
scilicet perfecta, omne aliud vinum, quod non
sit mistum. Neque oportebat minus clarè ipsum
loqui, ne ab Aduersarijs in contrariam partem
traheretur. Sed redeamus ad Concilium Flo-

rentinum, quod idem sensisse probatur rationibus allatis ab Eugenio, cur aqua admisceri debeat.

Subdit enim Eugenius, *Aqua autem ideo admiscetur, quoniam iuxta testimonia sanctorum Patrum, & Doctorum Ecclesie* (pridem in disputatione exhibita) *creditur ipsum Dominum in vino aqua permisto hoc instituisse Sacramentum*. Nota lector, non dixisse Pontificem, aquam à Christo fuisse vino permistam ante institutionem, sed instituisse in vino aqua permisto. quæ verba clarius significare non poterant, ipsum vinum, vt aqua permistum, verè fuisse materiam huius Sacramenti: id enim, in quo Sacramentum instituitur, est verè materia illius, non autem ceremonia: ergo aqua non ad ceremonias, sed ad materiam spectat. Præterea subiicit Concilium: *Inquit B. Alexander Papa quintus à B. Petro, In Sacramentorum oblationibus, quæ intra Missarum solennia Domino offeruntur, panis tantum & vinum aqua permistum in sacrificium offerantur. Et paulò post Iulius Papa citatur dicens: Calix Dominicus iuxta canonum præceptum, vino & aqua permistus debet offerri*. Quos Pontifices loqui de materia Eucharistiæ, patet. Nam & dicunt offerri, & appellant Calicem Domini, quæ non nisi de materia dici possunt.

Et simili ferè modo loquitur Ecclesia dum Acolythos ordinat, inquit enim, *Accipe ut ceolum*

lum ad suggerendum vinum & aquam in Eucharistiam sanguinis Christi. Et in oratione pro iisdē, *Et ad suggerendum vinum & aquam ad conficiendum sanguinem Christi.* Vbi notandum aquam proximiori loco poni, quā vinum, ante illa verba, *ad conficiendum sanguinem*; ne diceres aquam conuerti mediante vino, id est, ita vt prius conuertatur in vinum.

Nec est prætereundum, in ordinatione Presbyteri tradere illi Episcopum calicem cum vino & aqua; sciunt autem omnes, per traditionem materiæ, & non alterius rei Ordines conferri. Nulla igitur adest ratio, cur suspicemur, non spectare ipsam aquam ad materiam, sed ad cæremoniam.

Confirmatur hoc etiam auctoritate doctissimi viri Gregorij Hieromonachi, qui Concilio Florentino interfuit, & post ipsum Concilium Marco Ephesino pro defensione ipsius Concilij respondens, & calicis materiam explicans, inquit, eam esse *vinum & aquam*. Et infra inquit, *semper panem, vinum & aquam transmutari in corpus & sanguinem Christi.* ita enim habetur in Græco, quauis interpret vtrobique, vinum cum aqua traduxerit. non quod crederet vir eruditissimus, aquam non conuerti immediate in sanguinem, sed, vt innueret, vinum esse materiam præcipuam, & in maiori quantitate apponendum, vt ipsemet consultus respondit.

Edita est autem hæc epistola nouissimè , & apposita Concilio Florentino in editione generalium Conciliorum Romana, vbi etiam dicitur hic Gregorius fuisse postea Patriarcha , & miraculis coruscasse.

At obiiciunt Aduersarij: Dixit Eugenius modicissimam aquam admisceri debere, ea scilicet ratione , vt possit in vinum conuerti. Respondeo, modicissimam aquam debere apponi , & Concilium Florentinū docuit , & alij quoque Patres ; nemo tamen vmquam hanc rationem posuit, vt aqua faciliè possit in vinum conuerti: nam si hoc existimassent necessarium, addidissent etiam, Idque fiat multò ante consecrationem, & vinum adhibeatur generosum, vt possit aquam in se conuertere. quæ numquam dixerunt, cum non possit esse tam modica aqua, quæ sine his cōditionibus in vinū conuertatur.

Cur ergo dixit Concilium modicissimam aquam? quia, vt etiam sectione præced. notauimus, supposebat valdè modicum vinum apponi, vt fieri solet: vt ergo aqua minor esset quàm vinum, addidit modicissimā. Præterea modicissimam dixit, quia hæc sufficit, nec plustene-
mur apponere: & hoc est tutius, si vinum sit valdè debile; non tamen prohibita est maior quantitas, dummodo, vt inquit Innocentius li. 4. de Mysterijs Missæ, saporem vini retineat, siue, quod idem est, transeat in vinum moraliter.

Cur

Cur autem aquæ quantitas minor esse debeat quàm vini, Honorius III. cap. *Perniciosus*, de celebrat. Missarum, nullam affert rationem, nisi Ecclesiæ consuetudinem, & ibi Iuris Pontificij interpretes nonnullas quidem alias afferunt rationes, sed nemini in mentem hæc venit, vt scilicet posset in vinum conuerti. Rationes autem quæ afferri solent, sunt hæc. Prima, quia voluit Christus instituire hoc Sacramentum in potu, qui maximè esset in vsu: frequentatissimus autem vsus est, vt vino minor aquæ quantitas apponatur. Secunda, quia vinum est materia necessaria, aqua nequaquam; est igitur apponenda modica aqua, quia si maior esset eius quantitas, periculum suboriri posset, vel dubium, an vinum corruptum ab aqua fuisset, & consequenter materia esset incerta. Et hanc rationem afferunt multi Doctores simul cum S. Thom. in 3. p. q. 74. art. 8. & habent pro inconuenienti, vinum corrumpi ab aqua; aquam verò remanere non conuersam in vinum, tamquam inconueniens non deducunt, cum maximè fuisset deducendum, quoniam absurdum existimant, aquam remanere post consecrationem, nisi supposuissent conuerti in sanguinem. Tertia, quia quamuis non sit necesse, vt aqua in vinum conuersa sit substantialiter, debet tamen conuerti accidentaliter, vel moraliter, ita vt non discernatur à vino, & dici possit iuxta

communem modum loquendi illud totum quod est in calice, esse vinum. Quarta, ob rationem à Concilio Triburiensi ca. 19. allatam, quia scilicet, maior est maiestas sanguinis Domini, qui per vinum significatur, quam fragilitas populi, qui per aquam. Quinta, quia vinum repræsentat sanguinem Christi, aqua verò illam aquam, quæ ex eiusdem latere fluxit; at longè maior fuit quantitas sanguinis quem Christus effudit, quàm aquæ ex latere manantis.

At obijciunt nobis Aduersarij: Dixit Eugenius, vinum de vite esse materiam, aqua autem licet mista vino dici possit vinum moraliter, non tamen vinum de Vite; ergo non est materia. Verùm non vident gladio suo se trāfuerberari; nam si in rigore verba illa Eugenij sumenda essent, vinum, quod ex aqua genitum est, non posset esse materia sanguinis, quia non esset vinum de vite, sed de aqua. Præterea, si concedunt aquam vino mistam esse vinum moraliter, quodnam vinum moraliter erit, nisi de vite? utique qui poculum ex aqua & vino mistum bibit, vinum absolutè se bibisse dicit, & interrogatus quodnam vinum, non dubitabit asserere fuisse vinum de vite.

Secundum Concilium est Tridentinum, in cuius sess. 13. can. 2. hæc verba habentur: *Si quis negauerit mirabilem illam, & singularem conuersionem totius substantia panis in corpus, & totius sub-*

substantia vini in sanguinem manentibus dumtaxat speciebus panis & vini, anathema sit. Ex his autem verbis ita argumentor. Manent in calice post consecrationem species dumtaxat vini, ergo non manet substantia aquæ, ergo est conuersa in sanguinem. Dicent fortè, supponere Concilium, quòd aqua fuerit ante consecrationem conuersa in vinum. At contrà primò, quia aliquando certum est, vt diximus, non esse conuersam, vt quando aqua immediatè ante consecrationem calici infunditur, vt docet faciendum rubrica Missalis, si antea admista non fuit. Si dicas, Concilium loqui de eo quod frequentius accidit, non verò de eo quod per accidens, vrgebo, quia eodem modo loquitur Conciliū de conuersione vini in sanguinem, & de speciebus vini dumtaxat permanentibus: ergo sicut, si quis diceret, non semper vinum conuerti in sanguinem Christi, hæreticus esset; ita neque dici potest, quòd illa verba *remanentibus dumtaxat speciebus vini*, non semper sint vera. Præterea, vt verum sit, aquam in calice post consecrationem non permanere, oportet vt aqua vel sit in vinum conuersa, vel in sanguinem, alterutrum igitur definiuit Concilium; at non est probabile, definiuisse primum, quia est res philosophica, quas numquam determinat Ecclesia, nisi habeant necessariam connexionem cum rebus fidei; quam non habere conuersionem

nem aquæ in vinum ex co liquet, quia aliquando non conuerti certum est; neque hinc efficitur non esse perfectum Ecclesiæ Sacramentū. Alterum ergo definiuit Concilium, scilicet, aquam in sanguinem conuerti.

Secundò, posset quis respondere, Concilium loqui tantum de vino, non verò de aqua, vini-
que substantiam excludere, non aquæ; quia intentio Concilij fuit damnare hæreticos Panistas, qui affirmabant simul cum corpore & sanguine Christi permanere substantiam panis & vini. Attamen cum non ignoraret Concilium, aliquos velle remanere aquæ substantiam, & nihilominus ita loqui voluerit, vt eam quoque excluderet, non parum certè sententiæ neganti fauit. Confirmatur, quia Concilium hoc deducit, vt suprà sect. 3. notauimus ex verbis Christi, at illa non magis comprehendunt vinum quàm aquam, quia nomine calicis quidquid est in calice intelligitur, igitur non solum de vino, sed etiam de aqua locutum est Concilium. Confirmatur Secundò, quia sub vini nomine ostendit Concilium etiam aquam admissam se intelligere; nam in eadem sess. inquit, *Saluatorem nostrum, in vltima cana post panis & vini benedictionem, corpus suum discipulis & sanguinem tradidisse.* Non benedixisse autem Christum vinum tantum, sed & aquam cum vino mistam ex his, quæ sect. 3. diximus, constat.

Con-

Concilium igitur nomine *vini* intelligit etiam aquam vino mistam ; nam totum hoc mistum ex aqua & vino nomine solius vini appellari solet. Non fecit autem Concilium hîc peculiarrem mentionem de aqua, quia de ipsa clarissimum erat testimonium Concilij Florentini; neque modò contra Armenos, qui illam negabant, disputabat, sed contra alios hæreticos; non omisit tamen, sess. 22. vt suprâ sect. 3. in principio notauimus. Ex quo liquet, quàm leue sit argumentum Aduersariorum, qui ex eo, quod Concilium asserit remanere dumtaxat species vini, argumētantur non remanere species aquæ, & consequenter aquam non conuerti in sanguinem: leue est inquam, quia sub nomine vini intelligitur etiam aqua admista; alioqui si habent pro inconuenienti remanere species aquæ, quomodo pro absurdo non habent, & substantiam remanere, & ipsas species aquæ? Immò quomodo affirmant etiam post corruptionē aquæ remanere vinum affectum qualitatibus aquæ, quas proinde post consecrationem superesse necesse est, si omninò species dumtaxat vini strictim sumpti Concilium remanere docet?

Præterea can. 3. eiusdem sess. dicitur: *Si quis negauerit in venerabili Sacramento Eucharistiæ sub vnaquaque specie, & sub singulis speciei partibus separatione facta totum Christum contineri, anathe-*

ma

ma sit. Ex quo ita argumentor; totum illud quod est in calice post consecrationē per modum potus, censetur species sanguinis Domini: propterea enim si quælibet gutta effundatur; ea diligentia adhibetur circa eam, quæ sanguinem Domini decet. At si aqua non conuerteretur in sanguinem, essent sub illis speciebus plures guttæ, quæ non continerent sanguinem Domini: ergo malè crederet Ecclesia sub singulis cuiusque speciei partibus totum Christum contineri. Confirmatur, quia si post consecrationem aqua conuertatur in vinum, ut aliquando euenire non eunt inficias Aduersarij, non solum cum vini speciebus, sed etiam sub ipsis speciebus vini containeretur alia substantia à substantia Christi. quod est omninò alienum à sensu Ecclesiæ; quare & cap. 4. supradictæ scss. dicitur à Concilio Tridentino conuersionem fieri totius vini in substantiam sanguinis.

Duobus Concilijs generalibus addamus duos Summos Pontifices, Iulium Primum, & Innocentium II. ille scribens Episcopis per Ægyptum, hæc habet verba, quæ referuntur à Gratiano 2. de Consecrat. cap. Cum omne: *Quæ copulatio & coniunctio aqua & vini sic miscetur in calice Domini, ut mistio illa non possit separari: nam si vinum tantum quis offerat, sanguis Christi incipit esse sine nobis; si verò aqua sit sola, plebs incipit esse sine Christo: ergo quando botrus solus offer-*
tur,

tur, in quo vini tantum efficitur designatur, Sa-
 cramentum nostra salutis negligitur, quod per a-
 quam designatur. Hæc Iulius. Hinc autem pri-
 mò habemus, vinum & aquam debere offerri,
 id est consecrari. ita enim solent Patres hoc
 verbo uti, ut etiam fatetur Suarez disp. 45.
 sect. 4. At si aqua in vinum semper conuerte-
 retur, iam solum vinum offerretur. Secundò,
 additur, *Que copulatio & coniunctio sic misceatur,*
ut non possit separari. Vbi nota appellari copula-
 tionem & coniunctionem aquæ mitionem
 cum vino, ad quod sufficit, ut sit mista vino: non
 autem requiritur, ut corrumpatur, imò ineptè
 diceretur aqua non posse separari à vino, si non
 supponeretur adesse. quod enim non existit,
 frustra dicitur separari non posse.

Verum ex hoc eodem capite duo nobis ob-
 iiciunt Aduersarij: alterum est, Iulium Pontifi-
 cem dicere, *Manifestum & euidentis Evangelica ve-
 ritatis exemplum illuxit, quod præter panem & vi-
 num aliud offerri non licet.* Dicunt enim, si aliud
 quàm panis & vinum offerre non licet, ergo
 neque aqua. Rectè omninò, si aliud sit aqua à
 vino: nam si admisceatur vino, iam efficit v-
 num quid cum ipso vino, & sub nomine vini
 comprehenditur: alioqui enim Iulius nimis a-
 pèrte sibi contra dixisset, cum paulò post dicat
 in eodem cap. aquam & vinum offerenda Me-
 liùs ex hoc loco colligimus, nos nihil nobis of-
 ficere,

ficere, si quando Concilia, vel Patres solius vini meminerunt, quia ex hoc capite constat, etiam cum additur vino particula exclusiua, non tamen aquam debere excludi.

Alterum, quod obijciunt, sunt illa verba: *Permistio illa non possit separari*, si enim, inquiunt, mistio facta esset tantum per iuxta positionem, tunc, ut experimenta probant, separari possent. Respondeo, numquam somniasse Pontificem, per hæc verba excludere separationem, quæ per aliquod artificium fieri posset: non enim cum physicis erat illi negotium, sed voluisse tantum docere, ut verè miscerentur in eodem calice, ita ut communi modo separari non possent, ne quis crederet sufficere, si aquæ botrus immergeretur. Nam isti, ad quos scribit Pontifex, botrum offerebant: & hanc fuisse mentem Pontificis, colligitur ex ipsius ratione. sequitur enim immediatè, *Nam si vinum tantum quis offerat*, &c. qua ratione ostendit Pontifex, idcirco nolle se aquam à vino separari, ne quis vnum sine altero offerat: loquitur ergo de separatione, quæ in ipso altari fieri commodè posset, non de ea quæ à physicis per artificium. Adde, quòd tunc tantum per Aduersarios aqua separari non potest, quando est in vinum conuersa; at non semper est conuersa, ut ipsi concedunt, & tamen Pontifex inquit ita permiscendam aquam, ut non possit separari. & ratio-

rationem addit, quia alioqui Christus esset sine nobis; ergo vel quando aqua non est in vinum conuersa, sequitur absurdū, quod infert Pontifex: vel de illa separatione non est locutus; quæ per conuersionem aquæ in vinum solummodo excluditur; quod multo potius est dicendum. Vel denique non posse separari dixit, id est, non nisi difficulter posse: sæpius enim hoc modo loquendi vtimur, sicut etiam intellexit Glossa, de celebrat. Missar. cap. *Cum Marthe*, super illa verba, *licet physici contrarium asserant*.

Sed iam ad Innocentium accedamus, de quo magna nobis est cum Aduersarijs controuersia, cum illi totum sibi vendicent, nos verò sententiæ nostræ suffragari existimemus. Vt igitur lector eius mentem melius percipere possit, totum eius textum hîc describemus: est autem sequens, de celebrat. Missarum cap. *Cum Marthe*.

Quæsiuisti etiam, vtrum aqua cum vino in sanguinem conuertatur: super hoc autem opiniones apud Scholasticos variantur; aliquibus enim videtur, quod cum de latere Christi duo præcipua fluxerint Sacramenta, redemptionis in sanguine, ac regenerationis in aqua, in illa duo vinum & aqua, quæ commiscuntur in calice, diuina virtute mutantur, vt in hoc Sacramento plene sit veritas & figura. Alij verò tenent, quod aqua cum vino transubstantiatur in sanguinem, cum in vinum transeat mista vino, licet physici contrarium asseuerent, qui aquam à vino

E

per

per artificium posse asserunt separari. Præterea potest dici, quod aqua non transit in sanguinem, sed remanet prioris vini accidentibus circumfusa, ita quod vini saporem assumit. quod inde conuincitur, quia si post calicis consecrationem aliud vinum mittatur in calicem, illud quidem non transit in sanguinem, nec sanguini commiscetur, sed accidentibus prioris vini commistum, corpori, quod sub eis latet, undique circumfunditur, non madidans circumfusum; ipsa tamen accidentia vinum appositum videntur afficere, quia si aqua fuerit apposita, vini saporem assumit. Contingit igitur accidentia mutare subiectum, sicut & subiectum contingit accidentia permutare: cedit quippe natura miraculo, & virtus supra consuetudinem operatur. sed nec inconueniens creditur, aut absurdum, si aqua in corpore Christi esse credatur, cum legatur de ipsius latere processisse. Et infra: Verum inter opiniones predictas illa probabilior iudicatur, quæ asserit aquam cum vino in sanguinem transmutari, ut expressius eluceat proprietas Sacramenti: nam cum aqua multa sint populi multi, iuxta quod alibi legitur, Beati qui seminatis super aquas, ideo vino aqua vnitur, ut Christo populus adunetur, &c.

Præcipua autem controuersia est circa illa verba: Verum inter opiniones predictas illa probabilior iudicatur, quæ asserit aquam cum vino in sanguinem transmutari. Hic enim, dicunt Aduersarij, præfert Innocentius reliquis secundam opinionem.

pinionem relata, sed illa opinio volebat aquam transmutari in vinum, ac deinde in sanguinem : ergo id etiam ipse approbat, & consequenter, si in vinum mutata non sit, neque poterit in sanguinem verti.

Nos è contra censemus, Innocentium illis verbis nostram tantum sententiam approbasse: quod & ex Innocentij contextu, & ex aliorum auctoritate comprobabimus. Ex contextu probatur multipliciter. Primò, quia absolute asserit, aquam & vinum in sanguinem transmutari; si autem voluisset aquam necessario prius conuertendam in vinum, numquid tam infans Innocentius fuisset, ut hoc dicere nescisset? vel verbis ei fuit potius parcendum, quam vitandum periculum, ne perfecte intelligeretur? Omisit igitur illam partem, quia approbare tamquam necessariam eam noluit. Præterea, qui aliquam opinionem amplectitur, non sequitur, ut etiam eius rationem approbet: sæpe enim eandem opinionem plures sequuntur, sed propter diuersas rationes. Secundam ergo opinionem approbavit Innocentius, quæ erat, aquam transubstantiari in sanguinem; quod adiiciebatur, *Cùm in vinum transeat mista vino*, erat ratio illius sententiæ, non pars. hoc enim ostendit & particula (*cùm*) quæ rationem reddit, & ordo dictorum, quia cùm prius sit aquam in vinum verti, quàm in sanguinem, posterior

tamen loco ponitur, tamquam ratio præcedentis. Cum igitur sint duo diuersa, non sequitur, ut approbet etiam rationem, qui approbat sententiam; immò eum sententiæ tantum meminere Innocentius, signum est noluisse probare rationem.

Confirmatur, quia rationem iam ipse Innocentius incertam reddiderat argumento physicorum: non fuisse autem mentem Innocentij reprobare opinionem physicorum, probatur Primò, quia numquam consuevit Ecclesia determinare res physicas, nisi tantam prorsus connexionem habeant cum rebus fidei, ut hæc sine illis defendi nequaquam possint; quod huic non contingit: multò autem minus, quando experimenta sunt contraria, & auctoritates Doctorum. Secundò, quia quando paulò infra non recipit dictum philosophicum, quòd accidentia non mutant subiectum, reddit rationem, *Cedit quippe, inquit, natura miraculo, & virtus supra consuetudinem operatur*: ergo cum ipsos non refellit, credendum est, ipsorum dicta approbare. Tertiò, post relatam sententiam physicorum statim subdit Innocentius: *Præterea dici potest, quòd aqua non transit in sanguinem, sed remanet*. Quod utique dici non potest, nisi suppositâ sententiâ physicorum, quòd in vinum aqua non transeat: ergo eam non reiecit Innocentius, sed approbavit, cum disse-

rat,

rat, quid posita ea dici possit.

Dices, Atqui videtur hanc sententiam physicorum reprobare Innocentius lib. 4. de Mysterijs Missæ cap. 30. vbi huic eidem quæstioni respondens dicit: *Quibusdam non absurdum videtur, quòd aqua cum vino transit in sanguinem, ea videlicet ratione, quòd aqua per admistionem transit in vinum, & vinum per consecrationem transit in sanguinem. Quis enim ambigat aquam in vinum transire, cum multo vino modicum infunditur aquæ?* Resp. Videri posse mirum, quòd hîc dicat Innocentius, *quis ambigat*, cum alibi non solum ambigere, sed etiam contrarium asserere doceat physicos. Fortassis igitur quod prius dixerat priuatus Doctor, *Quis ambigat*, correxit Pontifex. Vel cum dixit, *Quis ambigat*, locutus est de transitu quodam morali, de quo nemo certè ambigit. Vel denique vno loco locutus est de modicissima aqua multo vino infusa, altero verò, de mistione in qua non multum excedatur aqua à vino. Vt cumque sit, hinc aliud deduco pro nostra sententia argumentum: Non semper in sacrificio Missæ vertitur aqua in vinum ex Innocentij mente, at semper simul cum vino vertitur in sanguinem: ergo siue versa sit in vinum, siue non, in sanguinem vertitur. Maior probatur, quia tunc tantum vult Innocentius verti aquam in vinum, cum multo vino modicum infunditur aquæ: igitur cum mul-

tum infunditur, non conuertitur, quare & E-
 stius, qui nostræ sententiæ maximè aduersatur,
 inquit, *Transitum aquæ in vinum eo sermone con-*
firmare voluit (Innocentius) vt possibilem, & con-
tingentem, non autem vt necessarium, aut vniuer-
salem. Quòd verò velit semper aquam cum
 v. no in sanguinem verti, probatur ex ipsius
 c onclusionè, quoniam absolutè & simpliciter
 dixit, aquam cum vino in sanguinem verti, &
 absolutè negauit aquam remanere, ergo non
 debemus nos eius dicta coarctare. Sciebat e-
 n m Innocentius dicere, si voluisset, aquam
 transire in sanguinem, si priùs transierit in vi-
 num, noluit tamen hanc conditionem appo-
 nere; ergo eius conclusio, quòd aqua in sangui-
 nem transeat, absolutè, & non conditionatè est
 intelligenda. quod clariùs patet ex libro citato
 de Mysterijs Missæ, vbi inconueniens existi-
 mat, aquam remanere simul cum sanguine, sic-
 uti habuerunt deinde omnes ferè Theologi.
 Confirmatur etiam, quia quærens deinde: *Quid*
si plus apponatur aquæ quàm vini, erit irritum Sa-
cramentum? Respondet, *Oportet quidem, quòd*
tantum vini ibi ponatur, vt aqua commistum sapo-
rem vini retineat. hoc autem quid aliud est, quàm
 aquam esse conuersam in vinum moraliter, si-
 ue accidentaliter? hoc igitur existimat suffice-
 re, vt Sacramentum irritum non sit, & aqua
 vertatur in sanguinem; sicuti & cap. *Perniciosus.*
 de

de celebrat. Missarum, nil ampliùs requirit Honorius III. qui proximè ei successit, quàm, vt in calice plus vini quàm aquæ ponatur: atqui si credidisset, aquam non conuerti in sanguinem, nisi antea conuersa sit in vinum, cùm pro absurdo habeat aquam in sua substantia remanere simul cum sanguine, monuisset vtique, vt tam parum aquæ apponeretur, quæ posset commodè in vinum ante consecrationem verti.

Dices: Non meminit Innocentius huius sententiæ, quæ affirmat, aquam, siue conuersa sit in vinum, siue non, semper verti in sanguinem, quomodo ergo eam approbare potuit? Resp. quo ad conclusionem eandem esse hanc nostram sententiam cum secunda ibi ab Innocentio allata, quamuis ab ea differat in ratione conclusionis; non igitur opus fuit, vt Innocentius eam tamquam ab alijs diuersam referret, præcipuè cùm rationem ab alijs allatam ipse refutasset physicorum auctoritate: si enim à secunda sententia illam rationem auferas, ne hilum quidem discrepabit à nostra.

Præterea, ignorare non potuit Innocentius multorum sententiam esse, aquam in vinum non transmutari, & tamen in sanguinem verti. Nam ante annos 24. iam apud Gallos percubuerat hæc sententia, & de ea Gaufridus Romanam scripserat, vt refert Cardinalis Baronius anno Domini 1188. cùm Innocentius floruerit.

anno Domini 1212. & illi ipsi, ad quos scribebat Innocentius, supponebant aquam non conuerti in vinum, & ambigebatur, an conuerteretur immediatè in sanguinem: inquit enim Innocentius, *Quasiuisi etiam, vtrum aqua cum vino in sanguinem conuertatur*; si enim supposuissent aquam in vinum verti, dubium esse non poterat in sanguinem transmutari. Cum igitur sciret Innocentius, hanc multorum esse sententiam, & de ea præcipuè quæri, non potuit eam omittere. Si autem non omisit, non aliàs retulit, quàm cum dixit, aquam cum vino transubstantiari in sanguinem. quod & approbavit. Confirmatur etiam, quia responsio debet esse ad mentem interrogantis: qui autem interrogauerat, supponebat, vt diximus, aquam non verti in vinum, & quærebat an verteretur in sanguinem; cum ergo Innocentius respondet verti in sanguinem, loquitur & ipse, facta eadem suppositione, quòd aqua non vertatur in vinum.

Probatur præterea idem auctoritate multorum Doctorum, qui ita vt diximus, intellexerunt Innocentium. Antonius de Butrio super hunc textum, *Nota, inquit, credendum esse physicis in arte sua, & quibuslibet etiam peritis.* quod & ipsum docent Iura Ciuilia l. 1. in principio, ff. de inspiciendo ventre. & l. 7. ff. de statu hominis: sentit ergo Butrius, Innocentium non contradicere physicis, sed illos approbare; alio-

qui

qui dicendum fuisset, *Nota, non credendum physici in arte sua*. & meritò hoc sentit, quia cum doctissimus esset Innocentius, non est credibile, vel ignorasse hanc regulam Iuris, scilicet periti in arte sua credendum esse, vel illam contempsisse nulla addita ratione. Idem etiam Antonius de Butrio ibidem, *Quæro*, inquit, *an sit alia opinio præter dictas*; & respondet, *Dicit hic Ostiensis, quod aliqui dicunt, quod aqua non transit in sanguinem, sed absorbetur omnino à specie vini cum quo miscetur, ita quod definit esse aqua, & omnino mutatur species, adeò quod non remanent nisi species prioris vini*. Et hoc, subdit Butrius, posset esse verum secundum Ostiensem, quando apponitur aqua cum vino ante consecrationem. & idem omnino dicit etiam Ioan. Andreas eodem loco. Vide igitur, quæso, quomodo opinionem Adversariorum, qui volunt aquam substantialiter conuerti in vinum, recenseant hii auctores, tamquam penitus diuersam ab ea quam approbat Innocentius. Nota præterea, quomodo Iuris periti, quando significare volunt, aquam substantialiter in vinum conuerti, clarè hoc explicant, dicentes, *Ita vt non remaneat aqua*, &c. quia videlicet, quando dicitur aqua transire in vinum, existimant intelligi posse de quodam transitu ratione accidentium, & iuxta communem loquendi consuetudinem.

Præterea Ostiensis, quem Zabarella & Io-

annes Andreas sequuntur, Innocentium exponens, inquit, *Vinum & aqua simul transubstantiantur in sanguinem secundum Innocentium: intelligas tamen, quod aqua non transubstantiatur per se, sed tantum, in quantum est mista vino, nisi autem hoc dictum exponeres, error esset.* Hæc illi, in quibus duo notanda sunt. Alterum est, hos Doctores nihil aliud requirere ad mentem Innocentij, vt aqua vertatur in sanguinem, quam vt sit mista vino; ergo non oportet, vt conuertatur in vinum secundum Innocentium. Alterum, neque hoc ipsum dicere Innocentiū, sed ab his auctoribus afferri tamquam expositionem, non tamquam ipsius dictum tam longè abest, vt crediderint, Innocentium clarè asserere, aquam debere in vinum substantialiter conuerti, ad hoc; vt vertatur in sanguinem.

Eadem quoque videtur esse sententia Innocentij IV. Abbatis, & aliorū, qui simpliciter dicunt vinum, & aquam simul in sanguinē transubstantiari, nulla facta mentione de transmutatione aquæ in vinum. Glossa quoque, si rectè consideretur, sentit nobiscum, nam ait, *Cum vino, id est vinum aquaticum; non enim transeunt duo in sanguinem, sed vinum, quod sibi aquam incorporauit. & ita expone, aquam cum vino, id est, compactum, vel compositum ex eis.* Verum, si aqua conuertitur in vinum, non potest dici, quod aliquid componatur ex aqua & vino, sicut ex lignis

lignis & igne non componitur aliquod tertium, ergo loquitur Glossa de incorporatione & vnione accidentali. Nota etiam, verba illa Innocentij, *Cum in vinum transcat*, non intelligi à Glossa de transitione substantiali, sed de accidentali: nam ipsa exponens inquit physicos contrarium dicere, scilicet, *Quod aqua & vinum non miscentur per minima, idest non ita, quod inseparabilis sit, sed talis separatio impossibilis vel difficilis videtur.* hæc Glossa. Quæ si verba Innocentij de transitu substantiali accepisset, dixisset vtique contrarium dicere physicos, quod scilicet aqua non fiat vinum, vel quid simile: ergo, cum affirmat physicos negare tantum mitionem per minima, & in hoc esse contrarios secundæ opinioni; sentit vtique secundam opinionem asserere tantum, quod vino per minima misceatur aqua, non verò quod fiat substantialiter vinum.

Denique hoc idem probat titulus huius §. qui, vt ait sæpius S. Augustinus in Psalmos, dicendorum solet esse clavis, in eo enim hæc habentur: *In Sacramento altaris aqua cum vino transubstantiatur in sanguinem*, nulla mentione facta de conuersione aquæ in vinum; quando autem textus est ambiguus, & rubrica clara, textus per rubricam declarari debet, vt scribit gloss. in l. 1. & ibi Bartol. C. de capitat. ciuium cens. exim. l. 1. & in l. 1. C. ne liceat, vt Alciatus in

Alfonſus quoque Salmeron, qui Concilio Trident. interfuit, pietate & doctrina inſignis tractat. 14. de vita Chriſti, *Innocentius*, inquit, *probabilem docet illam opinionem eſſe, quæ aſſerit, aquam cum vino in ſanguinem tranſmutari. quæ ſententia poteſt conſiſtere, etiam eo dato, quod phyſici dicunt, aquam vino miſtam non conuerſi in vinum.*

Didacus Tapia in 3. p. q. 2. de Eucharift. ab iſdem non recedit, dicens, *Aliqui docti phyſici aſſeuerant, aquam, licet modica ſit, non conuerſi in vinum. & mihi quidem id videtur non omnino improbabile; ac proinde Innocentius. III. noluit in hac parte deſignare quid dicendum ſit.*

Chriſtophorus Gillius recentiſſimus quidem, minimè tamen contemnendus auctor tract. de Locis Theolog. cap. 7. idem docet, inquit enim Innocentium elegiſſet tamquam magis probabilem ſententiam, quæ affirmat in ſacroſancto Euchariftiæ Sacramento aquam ſimul cum vino conuerſi in ſanguinem Chriſti, nullà omnino de conuerſione eius in vinum factâ mentione. Sentit igitur illud tantum approbaſſe Pontificem, non autem hoc: alioqui enim nimis imperfectam & mutilam retuliſſet Innocentij ſententiam; ſed cap. ſequenti, n. 6. apertiùs id ipſum teſtatur: inquit enim, eos qui tenent conuerſionem aquæ in vinum non fieri ante conſecrationem, non cogi quidem

sanguinem, non quia conuertitur in vinum, sed quia per verba cælestia consecratur. Et quamvis Estius affirmet hoc testimonium in libris S. Augustini de Baptismo non reperiri, non tamen est contemnendum, quia quæ ab antiquis auctoribus citantur, pro veris haberi solent, etiamsi non reperiantur, cum fortassis temporis iniuria perierint, nec faciliè credendum sit, graues illos auctores mentitos fuisse, sed potius memoria lapsos in loco notando. Idem etiam in Sermone ad infantes, cuius fragmentum recitat Beda in cap. 10. prioris ad Corinth. *Calix, inquit, vel quod habet calix, est sanguis eius*: non dixit vinum, sed *Quod habet calix*: ergo si in calice sit vinum & aqua, vtrumque conuertetur in sanguinem.

Idem D. Augustinus 3. de Trinitate cap. 2. ait de latere Domini percusso illum fluxisse liquorem, qui est in calice. Quibus verbis, vt exponit Cardinalis Bellarminus lib. 4. de Eucharist. cap. 10. significatur in calice esse verum Domini sanguinem, & esse eo modo, quo ex latere fluxit quoad repræsentationem, scilicet quoad aquam & vinum. Sicut ergo sub speciebus vini adest sanguis Christi, ita etiam sub speciebus aquæ. Tractatu quoque 120. in Ioan-nem eidem sententiæ fauet.

Liturgia Ecclesiæ Constantinopolitanæ auctore Ioanne Chrysostomo, *Quod, inquit, est in*
F
calice

calice isto (vinum scilicet & aqua) in pretiosum sanguinem Christi filij tui transmutans Spiritus sancto tuo.

Proclus Constantinopolitanus de traditione diuinæ liturgiæ: *Vt eius diuina præsentia propositum in sacrificium panem, & vinum aqua permistum, ipsum illud corpus, & sanguinem Saluatoris nostri Iesu Christi efficiat.*

S. Gregorius Magnus, vt refert Paulus Diaconus in eius Vita, post patratum miraculum, quo mulier dubitās de veritate præsentia Domini in Eucharistia confirmata est, hæc etiam inter alia dixit: *Præscius conditor nostra infirmitatis panem & vinum aqua mistum manente propria specie in carnem & sanguinem suum ad catholicam precem ob reparationem nostram Spiritus sui sanctificatione conuertit.*

S. Hieronymus, siue, vt alij volunt, Beda in cap. 14. Marci Formans, inquit de Christo loquens, *sanguinem suum in calice vino & aqua mistus, vt alio purgemur à culpis, alio redimamur à pœnis; sanguine namque agni seruaturne domus à percussione Angeli, & aqua maris rubri extinguuntur inimici. quæ sunt mysteria Ecclesiæ Christi.* Quæ verba S. Anselmus Cant. Episc. in suum comment. in c. 26. Matth. transtulit.

S. Cyprianus epist. 66. ad Cæcilium multis contendit, vt etiam fatetur Suarez disp. 45. sect. 4. *Calicem Domini non esse vinum solum, neque*

neque aquam solam, sed vtrumque mistum, & hoc esse, quod sanctificatur, id est, in sanguinem vertitur: si autem aqua non conuerteretur in sanguinem, non vtrique sanctificaretur.

S. Ioan. Damascenus lib. 4. Orthodoxæ fidei cap. 14. *Quid tandem, inquit, afferri potest, quin ex pane corpus, ex vino & aqua sanguinem suum efficere queat? Et infra: Panis, ac vinum & aqua per sancti Spiritus inuocationem, & aduentum mirabili modo in Christi corpus & sanguinem vertuntur. Vbi cum nullum ponat discrimen inter panem, vinum & aquam, planè colligitur eodem modo velle conuertere aquam immediatè, sicuti & alia duo immediatè conuertuntur.*

S. Iustinus Martyr, martyrio coronatus anno Domini 150. in Apologia ad Antoninum Pium prope finè, loquens de Eucharistiæ distributione, hæc habet verba, quæ etiam recitat Canisius in Catechismo: *Distribuunt unicuique præsentium, vt participet eum, in quo gratia acta sunt, panem, vinum & aquam, & ad absentes perferant. Porro alimentum hoc apud nos appellatur Eucharistia. Appellata autem Eucharistiam panem, vinum, & aquam, non quia hæc ibi sunt, sed quia apparent, & ex ipsis tamquam ex materia remota est Eucharistia confecta. Porro si aqua in sanguinem non verteretur, numquam D. Iustinus eam appellaret Eucharistiam.*

S. Irenæus lib. 4. cap. 37. de Christo loquens,

Temperamentum, ait, calicis suum sanguinem confirmavit. Et lib. 5. c. 2. Quando mistus calix, & fractus panis percipit verbum Dei, fit Eucharistia sanguinis, & corporis Christi. Vocat mistum calicem, quia supponit adesse vinum & aquam, & hunc dicit fieri Eucharistiam, quia videlicet sentit non solum vinum, sed etiam aquam verti in sanguinem Christi.

Theodoretus dialog. 1. in mysteriorum traditione, Deus corpus appellavit, & sanguinem id quod in calice infusum & commistum est.

Nicolaus Metonensis orat. de Eucharistia: *Quid requiris causam, & ordinem naturae? panis transmutationem in Christi corpus, & aqua vinique in sanguinem?*

Gennadius Scholarius de sacrificio in azy-mo sect. 4. Domini verba, inquit, qua panem & vinum cum aqua in corpus & sanguinem eius transmutant.

Ieremias Patriarcha Constantinopolitanus responsione 2. cap. 4. de usu Sacramentorum; *Panis fit corpus Christi, & vinum & aqua sanguis Christi superuentu Spiritus sancti.*

Amalarius Treuirensis de Officiis Eccles. li. 3. cap. 24. *Hic credimus naturam simplicem panis & vini misti verti in naturam rationabilem, scilicet corporis & sanguinis Domini.*

Paschasius Abbas, qui floruit anno Domini 805. vir, ut ait Trithemius, in diuinis Scripturis

vis valdè eruditus, & sæcularium litterarum non ignarus, Græco & Latino nobiliter instructus eloquio, in libro, quem edidit de Corpore & sanguine Domini, & habetur tom. 6. Biblioth. veterum Patrum, ita cap. 11. hac de re loquitur: *Quam bene in hoc mysterio nostra figura per aquam admittitur, ut unusquisque in illo Christi sanguine susceptum se intelligat, & in melius transmutatum: vnde licet prius mysticè vinum & aqua commisceantur, post consecrationem tamen non nisi sanguis bibitur.* Et paulò post: *Aqua consecratur, non quòd aqua permaneat, sed vertatur in sanguinem, quo testimonio nihil clarius afferri posse videtur pro nostra sententia.*

B. Samona Gazæ Archiepiscopus in disceptatione cum Saraceno, quæ habetur tom. 6. Biblioth. veterum Patrum, huic veritati suffragatur, dicens: *Sed quare Christus sub specie panis, vini & aquæ abditum suum corpus, & sanguinem assumendum potius tradidit, quàm sub alia materia?* Et paulò infrà: *His igitur pane, inquam, vino & aqua nobis assuefactis Dominus coniuncta sua divinitate, virtute sui verbi, quæ omnia, ut essent, ex nihilo produxit, in proprium suum corpus & sanguinem ea transfert.* Est autem tam clarum hoc testimonium, ut plus etiam, quàm velimus, probare videatur, videlicet, aquam etiam à vino separatam, esse posse materiam sanguinis: hoc enim indicare videntur illa verba, *sub specie a-*

qua, quafi non folùm quando aqua eſt ita à vino abſorpta, vt moraliter ſub nomine vini comprehendatur, poſſit eſſe materia ſanguinis, vt nos volumus, ſed etiam quando ipſiuſmet aquæ ſpecies, vt folius aquæ euidenter apparent. quapropter appoſita ei fuit in margine gloſſula, qua admonetur lector intelligendum eſſe Samonam de aqua in vinum conuerſa, ſcilicet moraliter: non enim aliud ea adnotatiuncula indicari, ex eo euidenter colligitur, quòd Algero & Palchaſio, qui in eodem tomo ante Samonam leguntur, nec minùs clarè aquam in ſanguinem verti aſſerunt, nulla gloſſa appoſita fuit, quia videlicet ſupponunt illi, aquam vino eſſe miſtam. quod non apparet in Samona.

Hildebertus Cenomanenſis, & deinde Turonenſis Epiſcopus, cuius opera tom. 3. Bibliot. veterum Patrum habentur, *Aqua*, inquit, *in ſanguinem vertitur, vt populus, qui per aquam figuratur, in melius ſe mutatum intelligat.*

Algerus, quem doctiſſimè ſcripſiſſe de Sacramento Altaris teſtatur Antonius Poſſeuinus in ſuo Apparatu, qui & claruit circa annum Domini 1050. *Sed licet*, inquit, *in menſa Domini tria conſtituantur munera, ſunt tamen duo, per quæ ſanctificamur; eſt aqua miſta priùs vino, ſed quando ſacratur, non niſi ſanguis erit, quo anima intus alatur.* Atqui ſi aqua remaneret poſt confecratio-

tionem, non adesset tantum sanguis, ut ait Algerus.

Hildegardis epist. ad Moguntinenses, *In eadem virtute altissimi Dei oblatio panis cum vino & aqua in carnem & sanguinem Saluatoris, &c.*

Gemma animæ, cuius auctor creditur Honorius Augustodunensis, qui floruit anno 1120. cap. 27. *Ideo verò hoc Sacramentum de vino fit, &c.* & cap. 28. *Ideo autem hoc Sacramentum de aqua fit, &c.*

Petrus Blesensis D. Bernardi contemporaneus, & suo ævo, & doctrina & sanctitate celeberrimus, in tractatu de SS. Eucharistia, quem versibus edidit, eandem approbat sententiam. sic enim canit:

*Sed licet in mensâ Domini tria constituentur
Munera: sunt tamen duo, postquam sacrificantur.
Est aqua mista prius, sed vino quando sacratur,
Non nisi sanguis erit, quo spiritus intus alatur,
Mystica res dat aquâ, Christi cruor ebibit illam.*

Quibus in verbis ea præcipuè sunt notanda, *Christi cruor ebibit illam*: si enim Christi sanguis ebibit aquam, ergo non prius erat aqua in vinum versa, sed immediatè in sanguinem transmutatur.

Quod planè vidit Ioannes Bulaeus ex Societate IESV, cuius operâ & studio Blesensis lucem nunc aspicit. nam argumentum huic capiti præfigens hæc habet verba: *Licet vinum &*

aqua ante consecrationem in altari typicè misceantur, post non nisi sanguis bibitur, quia in sanguinem demutatur aqua. cumque hic auctor in præfat. ad lectorem professus fuisset, se notas quasdam Blesensi apposuisse, ut dogmata quædam ipsius Blesensis, quæ licet Catholicæ fidei non aduersentur, tamen non satis cum doctrina hoc tempore in Ecclesia magis probata & recepta conspirant, indicaret; huic capiti nullam subtexuit notam, sentiens eius doctrinam ab ea, quam Ecclesia magis probat & recipit, non discedere.

S. Germanus Patriarcha Constantinopolitanus in Theoria rerum Ecclesiasticarum, cum docuisset vinum & aquam in calice apponi, explicans deinde verba consecrationis, inquit; *Signantur autem diuina dona, ut aduentus, & gloriosa sancti Spiritus presentia, ex pane quidem ipsum pretiosum corpus Domini nostri Iesu Christi, ex eo autem, quod est in calice, ipsum pretiosum sanguinem, &c.* Noluit dicere ex vino, sed ex eo quod erat in calice: quia sciebat etiam adesse aquam, ut ipse paulò superius asseruerat.

Odo Cameracensis Episcopus Canonem exponens super illa verba; *Accipiens & hunc præclarum calicem, Metaphoricè, inquit, id quod continet, pro eo quod continetur, id est vas pro liquore vini & aque.* Exponit deinde verbum illud, *Benedixit, id est, sanguinem suum fecit.* quare & supponit,

ponit, aquam tempore cōsecrationis in vinum non esse conuersam, & sub nomine calicis intelligi, & tandem sanguinem fieri.

Rabanus de Institutione clericorū li. 1. c. 31. *Nec in Sacramentis aliud offerri licet, nisi quod Dominus ipse instituit, & suo exemplo nos facere docuit.* Et paulò pòst infrà: *Ergo panem in fermentatum, & vinum aqua mistum in Sacramentum corporis & sanguinis Domini sanctificari oportet.* Si aqua autem non conuerteretur in sanguinem, non posset dici sanctificari in Sacramentum sanguinis Domini.

Denique Eucherius Lugdunensis Episcopus, qui sub nomine Eusebij falsò circumfertur in serm. 5. de Paschate docet Christum ipsum exemplo suo nos docuisse, vt calicem ex vino aqua misto consecrarem.

Ex his igitur satis apparet, plurimos & grauissimos Patres hanc nostram sententiam docuisse. At quomodo ostendemus neminem docuisse contrarium? Primò, quia nemo ab Aduersarijs, qui hoc doceat, adduci potuit, & Suarez diligentissimus, & plurimę lectionis auctor eum non prætermisisset, si quis foret, qui vel leuiter insinuaret: à quibusdam alijs autem licèt citentur S. Cyprianus, S. Chrysostomus, S. Augustinus, & Rabanus; hos tamen in responsionibus argumentorum ostendemus, non esse contra nos. imò patet ex dictis esse nobis-

cum. Innocentius III. est antiquissimus, qui ab Aduersarijs contra nos adducitur, qui tamen floruit anno Domini 1212. & nostræ sententiæ magis fauet, vt ostendimus. Præterea testis erit epistola quædam Gaufredi pulcherrima, quam refert Cardinalis Baronius tom. 12. anno Christi 1188. & nos quoque huc transferemus, quia nihil aliud, quàm præsentem disputationem continet, & mirum in modum nostræ sententiæ fauet.

*Amantissimo Domino & Patri A. Deigra-
tia Albanensi Episcopo, & Domini
Papæ Vicario,*

Fr. Gaufredus de Claraualle mini-
mum id quod est.

QVIA semel cæpi, loquar ad Dominum meum
super verbo etiam altero, cum nobis opportu-
num fuerit, vestrum desiderans obtinere responsum.
Ad partes enim Gallia, sicut nostis, hoc anno cum
vestra benedictione reuersus, nouam & mihi hæte-
nus inauditam ventilari inter aliquos reperi qua-
stionem de substantia aquæ, quæ vino mista in cæ-
lice similiter offertur, & an & ipsa similiter cum eo-
dem vino in sanguinem Domini conuertatur. Nec
mediocri est inter modernos Theologos super eadem
questione dissensio, negantibus aliis, aliis affirmanti-
bus,

bus, totius liquoris misti, sicut panis, qui ex simila & aqua similiter conficitur, vnam fieri transubstantiationem. Et affirmantium quadam assertio est, nullatenus esse credendum, quod in calice Domini purum fuerit vinum, praesertim cum in regione illa sic habeatur in usu commistio aquae, ut de Sapiencia quoque legatur, quia miscuit vinum: nec nisi mistum in illis maxime regionibus facile soleat propinari. Aiunt etiam, quod dum substantia aqua, quae ad conficiendum panem miscetur simila, post consecrationem aqua non remaneat; incongruum fore videtur, ut mista vino similiter in consecratione non mutetur. Postremo, cum elementa quatuor, ignis, aëris, aqua & terra supernus Artifex sic coniunxerit, ut non tam elementa simplicia, quod ex eis elementata sunt, quae videntur, si ab illa mutatione excipere coeperit, alius ignem, alius aërem, alius terram, sicut isti aquam excipiunt, non mediocris inde confusio consequitur. Igitur circa hoc, & huiusmodi affirmantium conuersionem totius misti liquoris, qui in calice continetur, in sanguinem Domini ratiocinatio studiosa versatur. Auctoritates etiam quasdam protulere, quas praesentis scriptura consummationi duximus reseruandas: nam qui eis super hoc aduersantur, ex nullis antiquorum, siue etiam modernorum scriptis tam euidentia testimonia protulere sua assertionis. Caterum innituntur potissimum vni verbo, quod principales Sancti in duabus speciebus panis & vini consecrationem perfici perhibentes, nullam

nullam in verbo illo alicuius diuersae speciei, nullam aqua fecerint mentionem. Ad quod respondetur eis, quod non consueuere homines misturam vini & aquae, nec si quantitas aquae praeualeat, aquam nuncupare, sed vinum. Præterea calicem Dominus legitur accepisse, non vinum, quamuis continens Euangelista posuerit pro contento. Sacerdos quoque, cum Missam celebrat, quod dicere soleat, attendendum: Similiter postquam cœnatum est, accipiens & hunc sacrosanctum calicem (in quo videlicet continetur vinum mistum aqua) benedixit, & dedit discipulis suis dicens: Accipite, & bibite ex eo omnes, hic est sanguis meus, &c. Dicunt aliqui, qui sub Magistro Petro Lombardo, dum adhuc viueret, studuere, quod numquam eos docuerit aquae mutationem; sed quod eam negauerit, neminem reperio profitentem. Nam & in lib. Sententiarum eius super eodem Sacramento auctoritates plurimae continentur, quarum aliquas aiunt illi pro parte sua: sed nec soluta, nec saltem proposita in eius codice eadem quaestio reperitur. Opponunt iidem auctoritates, in quibus nihil legitur de mutatione aquae in sanguinem, & huic verbo potissimum innituntur, quoniam per Apostolos ad significandam plebem vniendam Christo, misceri iussa est aqua vino. Et respondetur eis, quod auctores, qui non astruunt commutationem, non tamen negant, & proferunt testimonia de Scripturis, in quibus & iidem ipsi, siue alibi reticent, siue etiam alibi vini mixti mutationem euidentius asseuerant.

Affert

Affert deinde Gaufredus testimonia Cypriani, Hieronymi, Ambrosij, Augustini, Paschasij, Hildeberti Cenomanensis, & Algeri, quæ nos etiam suprâ retulimus. post quæ subiicit; *Ceterum pars aduersa auctoritates priores admittit utcumque, dicens, vinum, quod aqua mistum est, sed non propterea aquam mutari. Testimonium verò Paschasij, quod euident est, eadem pars contemnit, licet magnum ipsius B. P. Gregorius in lib. Dialogorum perhibeat testimonium sanctitati. sicut Hildebertum aiunt versificatorem fuisse, non Ecclesiasticorum dogmatum assertorem. De Algero dicunt, Nescimus hominem, ipsius tamen nullum adhuc comperi librum; & Sancti, vel cuiusque Doctoris auctoritatem similiter suffragari. Ac proinde placeat vestra dignationi cum Dominis nostris fratribus vestris super hoc verbo, cum opportunum affuerit tempus, diligenti collatione tractare, ut auctoritas S. R. Ecclesia definiat, quid super hoc credi debeat, vel doceri.*

Hæc Gaufredus, sed quodnam fuit Cardinalis responsum? subiicit Baronius. *Quid autem rescripserit ad petitam consultationem Cardinalis, non inuenimus; sed aliud rescribere non potuisse, certum est; quàm, quod credidit & custodiuit semper Sancta Romana Ecclesia, nimirum aquam simul & vinum transubstantiari in sanguinem Christi.*

Hæc Cardinalis Baronius antiquitatis & rituum Ecclesiæ peritissimus.

Cæterum nonnulla sunt præcipuè digna, vt notentur in hac epistola. Primum, sunt illa verba Gaufredi; *nam qui eis super hoc aduersantur, ex nullis antiquorū, siue modernorum scriptis, &c.* vbi Gaufredus, qui nulli parti adhærebat, affirmat, antiquos esse pro parte affirmante, aquam conuerti in sanguinem. Immò vsque ad illud tempus neminem fuisse, qui contrarium docuisset. Ex quibus patet verum esse id, quod nos suprà dicebamus, nullum ex Patribus fuisse in contraria sententia. Secundum notandum, totum fundamentum eorum qui negabant aquam conuerti in sanguinem, non aliud fuisse, quàm auctoritates quasdam negatiuas aliquorum Patrum, quod argumenti genus per se leuissimum est, & illi etiam optimè satisfaciebant alij, dicentes, *Quòd non consueuere homines misturam vini & aquæ, nec si quantitas aquæ praualeat, aquam nuncupare, sed vinum.* Quæ responsio & à nobis suprà sæpiùs est commemorata, & infrà copiosius confirmabitur. Tertium notandum, supposuisse hos Doctores quos refert Gaufredus, aquam non conuerti in vinum: nam si hoc admisissent, quis tam hebes fuisset, vt negaret aquam iam vinum factam in sanguinem Christi conuerti? hac enim ratione non dubitabant de aqua, quæ farinæ commiscebatur, quia hæc iam erat in panem conuersa. Præterea, hoc idem demonstrat responsio ab
 ipsis

ipsis allata, *Quòd mixtura vini & aqua, etiamsi quantitas aqua praeualeat, soleat appellari vinum.* Non igitur volunt, aquam verti in vinum substantialiter, sed tantum moraliter, ita ut nomine vini subintelligatur etiam aqua. Quare etiam Estius orat. 15. fatetur constare ex serie narrationis, & ex rationibus utriusque partis, de immediata conuersione aquae in sanguinem sermonem esse. imò hinc etiam patet pro comperto tunc temporis habuisse omnes, aquam in vinum non conuerti, alioqui non omisisset Gaufredus eius mentionem facere, cum ita facile omnes difficultates solui possent. Quartò notandum: qui negabant aquam in sanguinem veri, ad Patrum testimonia numquam respondisse, intelligenda ea esse de conuersione mediata, ut nunc recentiores solent. Est igitur tam improbabilis hæc responsio & expositio, ut illi ipsi, quibus maximè fauet, vel admittere eam noluerint, vel ne subodorati quidem in Patrum verbis fuerint. Verum de hac, siue contra hanc, sect. sequenti fusiùs erit disputandum. Quintò, ponderanda sunt verba Cardinalis Baronij, qui sine vlla hæsitazione tamquam certum affirmat, Ecclesiam Romanam semper existimasse, aquam simul & vinum in sanguinem verti. quod doctissimus Cardinalis non dixisset, nisi exploratum illi fuisset; neque verisimile est ipsum ignoraturum si pro
con-

contraria sententia , vel vnum testimonium in Patribus extitisset.

Tandem pro coronide huius sectionis adijciendum est miraculum , quod idem Baronius anno 1192. ab Helmondo Abbate in Sclauorum historia narratum , in confirmationem eiusdem sententiæ affert: *His ferme diebus, inquit; puella quadam in partibus Thuringiæ prope ciuitatem Erpifordiam agrotante, cum Sacerdos post datum ei ex more viaticum, abluitionem digitorum faciens in calice vitreo, vt illam aquam puella bibendam traderet, instienter portiunculam sanctissimæ Eucharistiæ in eam excussisset; confestim tota aqua mutata est in sanguinem, & portiuncula formam accipiens digituli versa est in cruentam carnem. sed & interim, dum mittitur pro tanto prodigio ad Archiepiscopum Moguntinum, calice super altari reuerenter posito, videntibus cunctis columba venit super labrum calicis, & diu sedit non sine admiratione cunctorum, quod mole corporis ipsum non euertisset, quippè qui parte inferiori longè angustior esset, quàm in superiori: vnde creditum est, non corporalem, sed spiritualem esse columbam. Adueniens autem Archiepiscopus cum omnibus Prelatis suis, & vniuerso clero, ac multo populo, post apportatum cum supplicationibus & processionibus sanguinem in prædictam ciuitatem ad Ecclesiam B. M. Virginis hortatus est omnes orare, vt diuina clementia, quæ ad euacuandum errorem infidelium, vel corroborandam fidem*

fidem suorum, Sacramentum, quod sub specie panis & vini sanctificatur, verè suam carnem & sanguinem evidentissimis indiciis demonstrasset ad laudem & gloriam nominis sui; similiter etiam ad iucunditatem & exaltationem Ecclesie sue sanctæ, rursus in priorem substantiam panis & vini transformare dignaretur. Quod cum post multam orationem demum factum esset, Archiepiscopus egregio habito in laudem tanti Sacramenti sermone, in gratiarum actione novi istius miraculi iniunxit omnibus in sua diœcesi consistentibus à minimo vsque ad maximum, ab infantulis vsque ad decrepitos, ut incuruati adorarent Dominum Iesum, cui omne genu flectitur, caelestium, terrestrium & infernorum. Idq; adeò factum est, ut etiam qui in cunabulis iacebant, incuruati gratias agerent. Denique Archiepiscopus ipsam aquam transubstantiatam in alio vasculopretioso ad posteritatis memoriam in eadem ecclesia honorificè reposuit, priorem verò calicem Moguntiam detulit, ubi exinde maxima veneratio-
ni est habitus.

Hæc ibi de transubstantiatione aquæ in sanguinem Christi. Post cuius relationem subdit Baronius: Confutauit idem miraculum hæresim hoc saculo obortam negantium aquam vino mistam mutari in sanguinem. Hæc ille.

SECTIO VI.

Aduersariorum responsiones ad supradicta testimonia Patrum referuntur, & refelluntur.

Verissimè S. Augustinus lib. 3. de Doctrin. Christian. c. 10. hanc sententiam pronuntiauit: *Si animam occupauerit alicuius erroris opinio, quidquid aliud asseruerit Scriptura, figuratum arbitratur.* Et eadem prorsus ratione possumus vniuersè nos dicere: si cuiusque animum occupauerit falsa de aliqua re opinio, nullum erit tam clarum, vel tam graue testimonium, quod vel non contemnat, vel non deprauet; nulla ratio tam euident, quam cauillationibus obscurare non tentet. Quare quamuis clarissima & grauissima testimonia pro nostra sententia sect. superiori attulerimus; non tamen illis acquiescunt Aduersarij, sed vt eludat potiùs quàm explicent, dicunt intelligendos esse Patres de cōuersione mediata, ita, vt aqua in vinum priùs conuertatur, & vinum deinde in sanguinem. Agè igitur ostendamus, quàm fragili scuto se protegant, & demonstremus, nec debere, nec posse Patres, vt ipsi volunt, intelligi, & denique admissa quoque eorum explicatione, nobis Patres fauere.

Sed

Sed ante omnia duas regulas, quibus in testimonijs Patrum intelligendis uti debemus, ni velimus & à veritate, & ab eorum mente aberrare, præmittere oportet. Quarum prior est. Accipienda esse verba Patrum in sensu proprio, & qui ex ipsis verbis absque alia explicatione, siue additione consurgit, dummodo, vel alij Patres non sint contrarij, vel euidenter fidei articulo non repugnent. Hæc regula ex S. August. li. 3. de Doctrina Christian. cap. 10. pro testimonijs sacræ Scripturæ colligitur, & ab omnibus recipitur, ut testatur Cardinalis Bellarminus li. 10. de Eucharistiæ Sacramento ca. 9: sed æquè valere debet pro sanctis Patribus. Primò, quia sancti Patres clariùs lequuntur, quàm Scriptura sacra; quàm nobis suis verbis explicant, & claram reddunt: ergo si Scriptura, quæ obscurè loqui solet, debet tamen propriè, & iuxta sensum verborum intelligi, multò magis Patres, qui verborum proprietate & claritate delectantur. Secundò, quia Scripturam debemus intelligere iuxta expositiones Patrum, ut Concilium Lateranense sess. 11. & Tridentinum sess. 4. præcipiunt. At si Patres non sunt intelligendi, prout ipsorum verba significant, sed ad varios sensus nostros detorqueri possunt, iam nihil erit certum & firmum in fide: quodnam enim dictum erit tam clarum & apertum, quin aliqua explicatione non

possit in alium sensum detorqueri? exemplo
sint verba Christi Domini, quibus instituens
sanctissimum Eucharistiæ Sacramentum, testa-
tus est, ipsum, quod habebat in manibus esse
suum corpus; nihil enim poterat clariùs dici, &
tamen hæretici sexcentas excogitarunt expo-
sitiones, vel, vt veriùs dicam, deprauationes
quibus viam huius testimonij effugere conan-
tur: contra quos argumentantes Catholici af-
ferunt, & meritò, verba intelligi debere iuxta
propriam notionem, dum aliqua ratio contra-
rium non conuincit. Ob eandem rationem
felicis recordationis Pius Papa IV. in decreto
super confirmatione Concilij Tridentini pro-
hibet cōmentarios, glossas, annotationes, scho-
lia, vllùmve omnino interpretationis genus su-
per Concilij decretis quocumque modo edi,
*Ad vitandum, vt ipse ait, peruersionem & confusio-
nem, qua oriri posset, si vnicuiq; liceret, prout ei libe-
ret, in decreta Concilij commentarios & interpreta-
tiones suas edere.* Cùm igitur fides nostra ex sa-
cra Scriptura pendeat, sacrae Scripturae sensus
à Patribus sit petendus, si licet verba Patrum
pro libito cuiusque interpretari, neque in Scri-
ptura, neque in fide nostra aliquid erit firmum
& ratum; sed omnia, prout quilibet ad suos
sensus verba Patrum accommodauerit, inuerti
poterunt & confundi. Tertiò, quia auctores
sacrae Scripturae sunt longè pauciores Patri-
bus;

bus; quare si humanam tantum rationem spectemus, facile erit credere vnum aut alterum eorum, vel figuratè, vel obscurè, vel non propriè locutum. At cum Patres, qui plurimi fuerunt, & regionibus & temporibus quàm longissimè diffusi, omnes eodem modo loquantur, neminem eorum non propriè, non clarè locutum, sed omnes eadem, vel amphibologiâ, vel obscuritate, vel improprietate fuisse vfos, est planè incredibile. Denique ex regula legali & vniuersali, quòd verba etiam in dubio debent propriè intelligi. l. 3. §. *hec verba*. ff. de neg. gest. vbi Bartol. & reliqui l. 1. §. *Is qui nouem*. ff. exercit. actionis, & l. *non aliter*, ff. de legat. 3. multo magis autem à verborum proprietate non est recedendum, quando sunt clara, vt tradunt Socin. in l. *vbi est verborum*, in quinto notabili, de rebus dubijs. Ruin. in consil. 158. in fine li. 3. ex Crauet. in consil. 288. col. 2. in fine, & Menoch. consil. 870. num. 2. Huic autem regulæ in hac nostra quæstione potissimum locum esse debere probatur, quia eius solutio ex traditione, quæ per Concilia & Patres ad nos demanauerit, maximè pendet, cum non aliunde de Christi mente, à quo materiæ Sacramentorum institutæ sunt, possimus certiores reddi.

Altera regula est, vt, cum aliqui Patres obscurè loquuntur iuxta ea, quæ alij Patres clariùs tradiderunt, explicentur. Tradit hanc regulam

doctissimus Bessarion Cardinalis in oratione, quam in Concilio Florentino habuit pro vnione Græcorum & Latinorum, & hac euicit, credendam esse processionem Spiritus sancti à Filio cum Latinis, quamuis ipse Græcus esset; quia etiam multi Patres Græci ita loquuntur, vt videri possint negare huiusmodi processionem, cum tamen Patres Latini clarissime eam asserant, ne dicantur inter se contrarii, fateri oportet, Patres obscure locutos, explicandos esse iuxta dicta clariora aliorum Patrum. Quam regulam pro sacrae Scripturae intelligentia antea quoque tradiderat S. August. li. 3. de Doctr. Christ. cap. 26.

His duabus regulis positis, iam dicta Patrum absque controuersia sunt pro nostra sententia. nam apertissime dicunt, aquam verti in sanguinem, nullus eorum contradicit, nihil hinc sequitur contra fidem; immò est valde consonum, cum & constet, Christum Dominum in huius Sacramenti institutione aquam adhibuisse, & plurimæ adsint etiam pro hac sententia rationes, vt partim vidimus, & fusius infra videbimus: ergo ita debent intelligi, vt ab eis profertur, & absolute debemus asserere, aquam verti in sanguinem. Quare cum Suarez post allata Patrum & Doctorum testimonia, *Quæ videntur, inquit ipse, huic sententia fauere, subiicit; Sed hæc omnia facile explicari possunt; ergo,*
argu-

argumentor, Pro nobis sunt Patres: nam si eos explicare oportet, ut in contrariam sententiam trahantur, iam non accipiuntur eorum verba iuxta germanam & ipsis innatam significationem, contra priorem regulam, secundum quam nobis fauent.

Sed iam inspiciamus hanc explicationem, an possit Sanctorum verbis accommodari, inquit igitur Suarez in solut. ad 2. *Aquam dicunt sancti conuerti in sanguinem, quia saltem mediate ita communiter fit; & interdum etiam dicunt, vinum mistum aqua conuerti, quia licet aqua conuersa sit in vinum, tamen simpliciter vocatur illud vinum mistum, quia manet affectum & temperatum qualitatibus aqua.* Sed facilius erit hanc explicationem refellere, quam fuerit ipsam excogitare.

Primum enim, multis sanctorum Patrum dictis accommodari non potest: nam S. Ambrosius aperte dicit, ante consecrationem adesse aquam in calice, & post eam esse sanguinem; ergo non prius in vinum, sed immediate transit in sanguinem.

Quocirca, ut ipsemet Suarez dicit, *Videntur fauere huic sententia, praesertim Ambrosius & Damascenus, indicant enim aquam manere usque ad consecrationem, & conuerti.* Quibus tamen peculiariter ipse nihil respondet: prudenter enim voluit potius silentio praeterire, quam nimis absurde eos exponere. Eodem autem modo

loquitur Paschasius, & alij multi. Hinc ergo per secundam regulam argumētamur: Patres, qui obscuriùs loquuntur, debent per Patres qui clariùs loquuntur, exponi; sed nos habemus Patres clarè dicentes, aquam conuerti immediatè in sanguinem; idem est enim conuerti immediatè, atque esse aquam, vsque ad consecrationem, & postea esse sanguinem, nisi miraculum ponamus, quod nec Aduersarij ponunt; ergo, quamuis alij Patres obscurè loquerentur, deberent & ipsi hoc pacto intelligi.

Secundò, argumentor ex illis Patribus, qui dicunt illud quod est in calice fieri sanguinem Christi; sicut Augustinus, Germanus & Odo Cameracensis; Non potuit his Patribus esse exploratum, aquam esse conuersam in vinum, & consequenter non esse in calice tempore consecrationis, vt Aduersarij fatentur: immò ex aliquorum dictis colligitur, ipsos supponere aquam adesse, & tamen sine ulla hæsitatione dicunt id quod est in calice, fieri sanguinem; ergo quòd aqua fiat sanguis, non pendet ex eo quòd fiat vinum, sed quidquid sit de illa conuersione, quæ incerta est, hæc firma manet, quæ non obstante illa incertitudine, vt certa ab ipsis asseritur.

Tertiò, eodem prorsus modo de vino, pane & aqua loquuntur sancti Patres, neque vniquà aliquis eorum dixit, vel panem vel vinum im-

me-

mediatè conuerti in corpus & sanguinè Christi; & tamen omnes intelligunt ipsorum verba de conuersione immediata. Cur ergo ad hoc, vt intelligamus aquam conuerti immediatè in sanguinem, debemus requirere hoc verbum *immediatè* in ipsorum scriptis? satis certè est, vt eodem pacto loquantur de aqua ac de vino, vt intelligamus eodem pacto vtrumque conuerti: & sicut dum dicunt vinum in sanguinem Christi conuerti, germanus eorum sensus est conuerti immediatè, idem etiam erit germanus sensus respectu conuersionis aquæ.

Quartò, ea expositio non debet admitti, quæ facit Patres otiosè loquentes. nam & Iurisperiti pro inconuenienti habent, quòd verba legis, immò & syllabæ nihil operètur. vt post glossam in l. 1. ff. quod metus causa, tradunt Iason in l. 3. num. 3. ff. de transact. Ripa in cap. *sicut Romana*, n. 5. de rescript. Gomez §. *in personam*, num. 17. in Instit. de act. & Menoch. præsumpt. 37. li. 4. num. 5. Nec mirum, cum id etiam in priuatis dispositionibus locum habere velint l. *si quando*. in princ. de leg. 1. & scribunt copiosè post alios Felin. in cap. 1. num. 4. de rescript. Alciatus in resp. 163. num. 4. & latius Crauett. in conf. 131. num. 24. & in conf. 294. num. 12. *vers. quinto loco*. Atqui hæc expositio de mediata conuersione est huiuscemodi, igitur. Probat minor, quia si Patres supponebant a-

quam conuerti in vinum, otiosum & ineptum erat dicere conuerti in sanguinem: quis enim fidelium de hoc ambigere poterat, cum certum sit vinum conuerti in sanguinem? si non supponebapt, cur non aliquando clarè assererant? mirum certè esset, cum sit longè certius vinum conuerti in sanguinem, quàm aqua conuerti in vinum, numquam Sanctos de conuersione aquæ in vinum verbum protulisse, sæpissimè de conuersione eiusdem in sanguinem locutos, cum tamen vellent vtramq; credi: hoc enim voluerunt secundùm Aduersarios, cum apud eos vtraque conuersio sit necessaria ad hoc, vt aqua mediatè dicatur in sanguinem Christi conuerti.

Confirmatur, quia numquam dixerunt Patres farinam, vel aquam, quæ cum ipsa misceatur, fieri corpus Christi: quare? quia non fiunt immediatè, sed mediante conuersione in panem, ergo eadem ratione, si credidissent, aquam mediatè tantùm in sanguinem transmutari, numquam dixissent absolutè ipsam in sanguinem conuerti. Et quamuis S. Cyprianus dicat, *Sic verò calix Domini non est aqua sola, aut vinum solum, nisi vtrumq; sibi misceatur, quomodo nec corpus Domini potest esse sub farina sola, aut aqua sola, nisi vtrumq; fuerit adunatum.* Non tamen per hæc verba, quæ in sui fauorem citat Suarez, voluit significare mediatè aquam conuerti in san-

sanguinem, sicuti mediatè dum miscetur farine, vertitur in corpus; nam eodem prorsus modo loquitur S. Cyprianus de aqua, atque etiam de vino. si igitur voluit aquam conuerti mediatè in sanguinem Christi; idem etiam dicendum est, voluisse de vino. Non ergo hoc voluit S. Cyprianus, sed tantum docuit, ita debere constare materiam sanguinis ex aqua & vino, sicuti materia corporis constat ex aqua & farina: & sicut ex farina & aqua fit vnum mistum, quod neque est aqua, neque farina; ita ex aqua & vino fieri vnum compositum, quod neque sit vinum purum, neque aqua, sed mistum quoddam ex aqua & vino. quare ex S. Cypriano, sicuti farina non vertit aquam in se, ita neque conuertere debet vinum. Debuisset autem, si opinioni Suarez fauere voluisset S. Cyprianus, dicere, sicut corpus Domini non est sub aqua, nisi conuersa fuerit in panem, ita neque sanguis, nisi aqua sit commutata in vinum: nam Suarez vult aquam habere ad vinum eam proportionem, quam habet aqua ad panem: sanctus autem Cyprianus, & nos eam, quam habet aqua ad farinam, ita, vt sicuti ex aqua & farina fit vnum compositum substantiale, quod est materia corporis; ita ex aqua & vino fiat vnum mistum accidentale, quod est materia sanguinis. quare verè S. Cyprianus est pro nobis.

Quin-

Quintò. Intentio SS. Patrum in supradictis testimonijs non fuit determinare aliquid physicum, sed aliquid ad fidem, siue Theologiam spectans; at si vera est explicatio Suarez, totum contrarium determinarunt, ergo non est recipienda eius expositio. Maior immeritò in dubium vocaretur, nam vt aduertit Caño lib. 7. de Locis theolog. cap. 3. Patres totos se dabant diuinæ sapientiæ, neque solliciti in philosophicis dogmatibus perscrutandis erant. quod post ipsum notarunt etiam Bañes 1. part qu. 1. art. 8. dub. 5. concl. 1. & Christophorus Gillius lib. 1. comment. Theolog. tract. 7. cap. 12. & idcirco in rebus philosophicis non maximi sit eorum auctoritas: & ex ipsorum etiam contextu liquet, non de rebus philosophicis, sed de sacris & Theologicis eps agere, & loqui. Probatur assumptio, quia iuxta principia ipsius Suarez hæc conclusio, Aqua vertitur in sanguinem, pendet ex duobus principiis, altero Philosophico, altero Theologico: illud est, aquam verti in vinum, de quo idem ipse loquens inquit, *Hoc pendet ex principiis Philosophiæ*: hoc verò est, vinum verti in sanguinem. quando ergo Patres dicebant, aquam verti in sanguinem, oportet, eos voluisse determinare alterum horum principiorum, ex quibus necessariò hæc conclusio pendet. nam si ambo admittantur, nemo est tam cæcus, quin videat, illam conclusio-

nem

nem sequi. quâ ratione suprà dicebamus, numquam Patres asseruisse farinam mutari in corpus Christi, quia constabat & ipsam mutari in panem, & panem in corpus. Noluerunt autem determinare Patres vinum conuerti in sanguinem, quia hoc apertis alioqui verbis asserébât, & bis idem dixissent, cum affirmarent vinum & aquam in sanguinem verti. Sequitur ergo ipsos voluisse determinare aliquid philosophicum, scilicet aquam verti in vinum. quod ab ipsorum mente fuit alienissimum.

Confirmatur, quia ipsi absque vlla limitatione tamquam certissimum & infallibile asserunt, aquam conuerti in sanguinem, non minus quàm vinum: atqui iuxta principia philosophica, etiam ex Aduersariorum sententia, non potest certò asseri aquam verti in vinum, nam & Suarez inquit, *hoc communiter tantum fieri*: ergo nisi velimus eos hallucinatos esse, numquam mens Patrum fuit hoc philosophicum determinare.

Confirmatur Secundò, quia, vt suprà diximus, tunc temporis communissima erat sententia, aquam numquam in vinum verti, quam etiam docuit D. Nemefius lib. de Anim. cap. 3. insinuant plerique Patres, vt patet ex testimonijs ipsorum suprà citatis, nemine eorum refragante, & supponebant inquirentes an aqua in calice vertatur in sanguinem, vt suprà notauimus.

uimus. quibus etiam Physici illorum temporum assentiebantur, ut dicebat Innocentius, imò, & experimenta, ut patet ex Plinio lib. 18. cap. 35. & Catone de Re rustica cap. 151. nec ab illis moris erat apud Patres in rebus philosophicis discedere.

Sextò, periculosa esset hæc propositio; farina vertitur in corpus Christi, quia non conuertitur immediatè; at si aqua non conuertetur immediatè, longè periculosior esset hæc; aqua vertitur in sanguinem: ergo vel est dicendum, Patres periculosam propositionem nobis tradidisse, vel aquam conuerti immediatè in sanguinem. Probatur maior, quia illa propositio est periculosa, quæ cum duplicem possit habere sensum, alterum bonum, & alterum malum, facilius admittit malum; quam bonum: atqui huiusmodi est hæc propositio, Farina vertitur in corpus Christi; quia si intelligatur mediatè, bonum habet sensum, si immediatè malum; facilius quoque recipit malum, quia vel semper, vel frequentius, cum aliquid dicitur verti in aliud, præcipuè si sermo sit de conuersione supranaturali, intelligitur de conuersione immediata. Probatur autem longè periculosiorem futuram hanc propositionem, *aqua vertitur in sanguinem Christi*, quoniam nullos legimus hæreticos asseruisse farinam immediatè conuerti in corpus Christi; non defuerunt
tamen,

tamen, qui dicerent, aquam solam immediatè conuerti, & videri poterant habere aliquod fundamentum, quia Christus Dominus obtulerat vinum & aquam, longè igitur periculosius fuisset asserere, aquam verti in sanguinem, quàm farinam in corpus; & tamen Patres à posteriori propositione diligenter cauerunt, priorem frequentissimè vsurparunt: ergo signum est, non periculosam, sed verissimam esse illam propositionem, & non de mediata, sed de immediata conuersione, quæ simul cum vino fiat, intelligendam.

Septimò, si aqua tantùm mediatè potest conuerti in sanguinem Christi: ergo non minùs est vera hæc negatiua, Aqua non vertitur in sanguinem, quàm hæc affirmatiua, Aqua in sanguinem vertitur; nam illa vera esset de cōuersione immediata, hæc de mediata. Si ergo æquè vera est illa negatiua, cur neminem Sanctorum reperimus eam vsurpasse? cur omnes conspirarunt in hanc affirmatiuam? si dicant, maiorem esse vim negationis quàm affirmationis, & ad illam verificandam oportere neque immediatè, neque mediatè aquam in sanguinem verti; Contrà, quia hac ratione nihil esset, de quo dici non deberet, quòd in corpus & in sanguinem Christi conuerteretur: nam etiam ex terra fit mediatè panis, quare non posset dici, terram non conuerti in corpus Christi. Præ-

terea

terea, cur negant omnes Patres, & Scholaſtici, vel ex vva, vel ex omphacio, quod vulgò dicitur agreſta, poſſe confici hoc Sacramentum, vt docet S. Thom. q. 74. art. 5 & Miſſale in rubricis, cùm tamen ex vva, vel omphacio facillimum ſit fieri vinum, & ſic mediatè confici Sacramentum? certè videmus in nulla alia propoſitione admitti hunc ſenſum de mediata cōuerſione, cur ergo admitteremus in hac tantum?

Octauò. Quando duo termini ſunt ſubordinati, rectè intelligitur ſi quis ad poſterioſiorem progreditur, progredi etiam ad priorem: vt ſi ad hoc, vt eam Romam, oporteat me pertrāſſire Florentiam, dum dicor ire Romam, rectè intelligitur me quoque ire Florentiam; at ſi termini ſunt diſparati, vt Roma & Hispania reſpectu Mediolani, ex vno non poteſt intelligi alter: atqui iſti duo termini, vinum & ſanguis ſunt diſparati, quia prior attingitur per virtutem naturalem, poſterior per ſupernaturalem, neque ſi aqua vertitur in ſanguinem, oportet vt tranſeat per vinum, cur enim non poterit Chriſtus immediatè eam conuertere in ſanguinem? Eſſet igitur omnino per accidens, quòd priùs verteretur in vinum, ac deinde in ſanguinem: ergo dum dicunt Patres aquam conuerti in ſanguinem, non neceſſariò intelligunt eam conuerti priùs in vinum. Id ipſum ex modo loquendi PP. probatur, dicunt enim
aquam

aquam & vinum verti in sanguinem Christi: loquuntur ergo de aqua tamquam de re diuersa à vino, & de vino tamquam de termino à quo, non ad quem; voluntque aquam conuerti immediate in sanguinem, sicuti si dicerem, Summos Pontifices ex Episcopis & Cardinalibus creari, omnes intelligerent de creatione immediata, non verò de mediata, ita vt necesse esset Episcopos prius fieri Cardinales, quamuis non aliter fieri soleat.

Nonò. Curæ non erat veteribus Patribus, eam apponere aquæ quantitatem, quæ ante consecrationem verti in vinum posset. Nam S. Cyprianus epist. ad Cæciliū hoc tantum contendit, vt vinum & aqua in Missæ sacrificio adhibeantur, de quantitate aquæ nihil sollicitus; nec ante Concilium Triburiense, quod habitum fuit anno Domini 895. in quo decretum est canon. 19. vt duæ partes essent vini, tertia verò aquæ, quidquam reperitur de quantitate aquæ vino apponendæ præscriptum. Innocent. verò multò post, id est, circa annum Domini 1200. l. 4. de Myster. Missæ c. 30. asserit solum oportere, quòd tantum vini ponatur, quòd aqua eius commistum saporem retineat. Honorius quoque III. qui ei successit, de eadem re ad quemdam Archiepiscopum scribens, vt habetur Extrau. de celebrat. Missarum, cap. *Perniciosus*, inquit tantum, secundum genera-

lem

lem consuetudinē Ecclesiæ plus de vino, quàm de aqua esse ponendum. Quare Estius ingenuè fatetur, *Non ad id rarum aut esse, aut fuisse, ut aqua calici infusa, & vino mista, maneat aqua vsque ad consecrationem.* Si ergo hæc vera sunt, quomodo credibile est, Patres eatenus tantum aquam in sanguinem verti existimasse, quatenus prius erat versa in vinum, & tamen absque vlla hæsitazione, aut conditione simpliciter asseruisse, aquam in sanguinem verti? An credebant aquam, licet in magna quantitate vino appositam, statim in ipsum verti? nemo vulgarium hominum hoc sibi persuadet, quomodo ergo illi sapientissimi viri crederent? si non credebant, neque solliciti erant, ut aqua eo modo & tempore apponeretur, quo facile posset in vinum conuerti: ergo quòd aqua in vinum verteretur, non existimabant referre ad Sacramentum. Vel igitur dicendum est, nihil eos existimasse quoque referre, quòd aqua verteretur in sanguinem, vel censuisse conuerti, quamuis in vinum non esset redacta; illud autem dici non potest, quia omnes asserunt tam aquam quàm vinum in sanguinem commutari: ergo hoc posterius est admittendum.

Decimò, quis non videat, quàm sit violenta hæc expositio, Vinum & aqua, siue aqua simul cum vino vertuntur in sanguinem Christi, id est, vinum quidem immediatè; aqua verò, quia

quia prius vertitur in vinum? Numquid lignū dicitur sursum ascendere, quia in ignem vertitur qui sursum ascendit? Numquid farina simul cum pane dicitur verti in hominis substantiam, quia vertitur in panem, ac deinde panis in eius substantiam? Irrideretur certè, qui ita loqueretur: qui enim asserit duo simul concurrere ad aliquid, supponit illa duo existere, non verò vnum esse mutatum in alterum; cū ergo dicant Patres aquam simul & vinum verti in sanguinem Christi, intelligendi sunt de aqua & vino simul existentibus, non de aqua in vinum versa. Si autem addamus id, (quod alibi à nobis demonstratum est,) aquam nunquam in vinum verti, quis non videat, non sine eorum magna iniuria & ignorantia nota, posse hunc sensum de mediata conuersione Patrum dictis ascribi?

Ex his igitur patet, Patres vel locutos fuisse de immediata aquæ conuersione in sanguinē, vel, vt deus Aduersarijs quod possumus, voluisse aquam in sanguinem conuerti, non determinantes, vel non curantes de modo, an scilicet mediatè, vel immediatè, vt etiam fatetur Gabriel Vasquez, qui nobis alioqui aduersatur in 3 p. q. 74. art. 8. quod etiam nobis sufficit. nam hinc sequitur, vt aqua, siue sit in vinum conuersa, siue non, in sanguinem tamen ex Patrum sententia transmutetur. quod ipsum

est à nobis in hac , & superiori sectione intentum. Quid plura? admissa quoque Aduersariorum responsione , Patres à nobis potius stant, quàm ab Aduersarijs. quid enim asserunt? aquam verti in sanguinem mediatè; ergo falsum est, ipsam in calice post consecrationē remanere: atqui Aduersarij aliquando remanere asserunt, nos verò numquam, ergo nobis magis fauent. Adde, quòd si Patribus cōtradicare licet, multò magis in re philosophica, quàm theologica licebit. quòd autē aqua vertatur in vinum, est res philosophica; quòd verò in calice remaneat post consecrationem, est theologica. Et si igitur demus Aduersarijs Patres vtrumque negare, satius tamē fuerit illos deferri, quoad philosophicam, quod videremur nos facere, quàm quoad theologicam, quod ipsi facere non verentur. quare etiam approbata eorum non probabili responsione , magis contra eos pugnant Patres, quàm contra nos.

Transcamus modò ad alteram partem responsionis Suarez, in qua dicit, vinum vocari mistum, quia licet aqua in vinum conuersa sit, hoc tamen aquæ qualitatibus affectum manet. Quæ responsio est apertè contra Aristotelem, qui in 1. de Gener. cap. vlt. loquens de mistione, duo tantum genera mistionum agnoscit, & alterum vocat ad sensum; & hoc pacto inquit, misceri hordeacea grana frumentaceis, cū quod-

quodlibet iuxta quodlibet positum est. Alterum vocat veram miftionem, cum duo miscibilia potentias habent quodammodo æquales, & vtrumque ex sua natura mutatur, & fit quoddam medium & commune. Hanc verò miftionem, quam excogitavit hîc Suarez, non modò non agnoscit Aristoteles, sed etiam planè excludit: nam inquit, lignum non misceri igni, nec nutrimentum corpori, quia corrumpuntur, & negat etiam misceri accidentia corporibus. Est etiam contra rationem miftionis, quia in hac vel debent ambo miscibilia corrumpi, & fieri vnum tertium, vel neutrum debet corrumpi, sed inuicem vniri ad tertium accidentale componendum, quia miftum ab omnibus censetur esse quid diuersum à simplicibus: quamuis posterior modus miftionis sit potiùs compositio quàm miftio, sed largo modo & ad sensum, vt dicebat Aristoteles, dici potest miftio; in casu autem nostro vnum tantùm corrumpitur, ergo nullo pacto dici potest cum altero misceri.

Confirmatur, quia tunc miftio non differret à nutritione: nam si aqua, quæ conuertitur in vinum, dicitur misceri cum vino, cur etiam non dicitur alimentũ misceri cum alito? nam si aqua relinquit vinum suis qualitatibus affectum, etiam nutrimentum corpori nutrito aliqua ex suis qualitatibus impertitur.

H 3

Præ-

Præterea, posset dici vinum in sacrificio Missæ misceri cum sanguine: nam vinum dicitur mistum aqua, quia in eoremanent accidētia aquæ, quamvis substantia in vinum sit conuersa. Sed etiam vinum ipsum ita conuertitur in sanguinem, vt tamen ei relinquat sua accidentia, sub quibus latet, ergo cum eo dici poterit hac ratione misceri.

Adhæc, numquam vinum esset purum, quoniam quando in vite gignitur, conuertitur in ipsum humor aqueus, quem è terra suis radicibus vitis exhaustit, & illius humóris retinet vinum non paucas qualitates, saltem humiditatem: ergo hac ratione semper dici poterit esse mistum humore aqueo & terreo. Si dicas, hinc rectè probari vinum esse corpus mistum, non autem simplex, addo, aliud esse, vinum esse corpus mistum, aliud esse vinum mistum. illud de quolibet vino dici potest, hoc nequaquam; & tamen dici deberet iuxta notionem mistionis allatam à Suarez. Explicemus hoc clariùs. Dicitur vinum corpus mistum, quia ex corporibus simplicibus inuicem agentibus, & se contemperantibus genitum est; non dicitur vinum semper, mistum vinum, quia non ex alio vino simplici factum est. & quamvis in genere corporis sit mistum, in genere tamen vini est simplex. idem enim videmus & in plantis, nam quælibet planta est corpus mistum, sed in genere
nere

nere plantæ est simplex, nisi sit per insitionem ex pluribus plantis composita; ergo etiam ad hoc, ut vinum dicatur mistum, oportet, ut ex vino simplici, & alio liquore fiat mistum. Si autem sufficeret tantum aquam in se vertere, iam nullum vinum esset simplex, quia in quodlibet vinum est aliqua aqua conuersa: sicuti etiam nulla planta esset in genere plantarum simplex, quia omnes succum à terra trahunt, & in se conuertunt; & homo ex tot rebus mistus esset, quot sunt illæ quas comedit & in se vertit, quod est omnino absurdum.

Vide igitur, quæso, lector, quas nouas vocabulorum notiones oporteat Aduersarios excogitare, quot absurda deuorare, quot testimonia in contrarios sensus pertrahere, ut suam ipsorum sententiam tueantur, cum nostra proprias vocum notiones retineat, Patrum sententias iuxta germanum, & per se confluentem sensum recipiat; in omnibus denique plana & recta via progrediatur, quod, etsi nulla alia ratio suppeteret, sufficiens argumentum veritatis huius, & illius falsitatis esset.

Hactenus responsionem Suárez impugnauimus, quæ probabilior videbatur; nunc verbum dicendum de alia responsione, quam in sua epistola refert Gaufredus: refert enim Aduersarios respondere, quod, dum à Patribus dicitur, vinum aqua mistum verti in sangui-

nem, nolunt, quòd aqua ipsa vertatur, sed illud vinum cui aqua erat admista.

Verùm, quis non aduertat improbabilitatem huius responsionis? primùm enim ex ipsa sequitur aquam remanere in calice post consecrationem simul cum sanguine, quod & ab Innocentio improbabile iudicatum fuit, & ab omnibus Scholasticis reiectum. Deinde non potest accommodari multis Patrum dictis, qui non tantùm dicunt vinum aqua mistum, sed etiam ipsam aquam verti in sanguinem. Tertiò etiam respectu illorum, qui asserunt vinum aqua mistum in sanguinem verti, est violenta expositio: frustra enim aquæ mentio fieret, si non ipsa, vel conuerteretur in sanguinem, vel esset ratio, aut conditio conuerſionis vini; cùm autem hoc posterius non sit dicendum, quia vinum etiam merum verti potest in sanguinẽ, sequitur, vt dicatur prius. Præterea idem omnino significare, vinum aqua mistum in sanguinem verti, atque vinum & aquam in sanguinẽ commutari, & non vinum tantùm, ostenditur ex cap. in *Sacrament. de consecrat. dist. 2. vbi cùm dixisset Alexander Summus Pontifex, Panis tantùm & vinum aqua permistum in sacrificium offeratur. subdit, Non debet in calice Domini, aut vinum solum, aut aqua sola offerri, sed vtrumq; permistum. Idem igitur apud Pontificem est, vinum aqua mistum offerri, atque vtrumque, id est*

est, tam aquam quàm vinum offerri. Quare Lælius Zechius hunc canonem citans c. 2. de Sacrament. Euchar. inquit in eo statui, *ut aqua vino permista offeratur*, in recto ponens aquam & vinū in obliquo. Videbat enim nihil referre, vtrū poneretur in recto, vel in obliquo: quod & ante eum videtur fecisse S. Cyprianus, dum epist. 63. inquit, *calicem mistum vino offerri*, vinum in obliquo ponens, & aquam nomine calicis intellectam in recto. Maneat igitur firmum & constitutum, Patres, nisi ipsorum verba peruertantur, clarissimè nostræ sententiæ patrocinari.

Tandem hæc omnia confirmantur auctoritate doctissimi Cardinalis Baronij suprà allata, qui dixit semper Ecclesiam Romanam credidisse, aquam simul & vinum in sanguinem Christi conuerti. Quid enim hîc dicent Aduersarij? negabunt, vel exponent auctoritatem sapientissimi Cardinalis?

Vtrumque non est veritus tentare Estius, inquit enim: *Possemus sine iniuria dicere optimum Baronium historia totum intentum, intimam dogmatum theologicorum notitiam non habuisse. Verumtamen illud magis placet, virum doctissimum, multa lectione ac scriptione occupatum, & semper ad alia properantem, non satis considerasse sensum questionis, quam ut absolutè propositam intellexisse videtur; id est, Vtrū aqua vino mista, quocumque*

modo, ac saltem mediatè conuertatur in sanguinem Christi. Ad eam verò sic intellectam haud dubie quadrat affirmativa responsio. Verùm, & ego possem plurima non in defensionem tantùm, sed etiam in laudem sapientissimi Cardinalis afferre, paucis tamen contentus ero. Quod ergo ait, ipsum non habuisse intimam dogmatum theologicorum notitiam, ynde quæso colligit? si theologia doctrina omnes Baronij libri referri sunt, & cùm occasio se offert, hæreses fortissimè profligat, quomodo Theologia destitutus est? An, quia in scholis fortatè eam non didicit, nec subtilibus disputationibus exercuit? atqui ex Patribus & Concilijs, quibus è fontibus & ipsi Theologorum magistri doctrinam suam hauscrunt, eruere potuit. Præterea non est hæc quæstio, quam præ manibus habemus, ex illis, quæ ex subtilissimis Theologorum disputationibus pendeat, sed ex Patribus, Cōcilijs & sensu Ecclesiæ, quorum, si quis virquam alius, peritissimus fuit Baronius, vt proinde eius auctoritas sit meritò maximi facienda. Dum verò secundo loco dicit, non satis eum considerasse sensum quæstionis, non tantùm ignorantiam, siue stoliditatem, sed etiam temeritatem sapientissimo Cardinali obijcit. Quis enim ad cò hebes fuerit, qui titulum solummodo illius quæstionis legens, nedum ipsam totam, non intelligat quæstionem esse de immediata aquæ
con-

conuerfione in fanguinem? fi ergo hoc non ad-
uertiffet Baronius, profectò ftolidus fuiſſet. Si
dicat, non ex ftoliditate, ſed ex inconfideratio-
ne factum, vt eiùs ſenſum non perceperit, te-
meritatem illi impingit. Prorſus enim temerè
ſententiam tam grauem protuliſſet, ne confi-
derato quidem quæſtionis ſenſu. Conſideraſſe
igitur, & percepiffè, nemini dubium eſſe debet:
id enim optimi Cardinalis tum ſapientia, &
prudencia ſuadet, tum etiam ſententia ipſa.
Nam eodẽ pacto loquitur de vino, & de a-
qua, & inquit ſimul vtrumque tranſubſtantia-
ri in fanguinem Chriſti: ſi enim aqua non im-
mediatè verteretur in fanguinem, non tran-
ſubſtantiaretur, quia hic terminus eſt proprius
huius conuerſionis ſupernaturalis, non in ſan-
guinem, quia in vinum; non ſimul cum vino,
quia quando vinum tranſubſtantiatur in ſan-
guinem, iam ipſa non eſſet. Quòd ſi voluiſſet
Baronius mediatè tantum aquam verti in ſan-
guinem, cur id non explicaiſſet? An, vt breuis
eſſet, ſubſcurè locutus eſt? ſcilicet is ipſe eſt
qui verbis parcat, cum duodecim magnos to-
mos hiftoriarum ediderit. An explicare nẽſci-
uit? Poſſet fortaiſſe admitti, ſi rem nouam, &
numquam ampliùs auditam vel lectam expli-
care aggreſſus eſſet: atqui ipſi Aduerſarij vo-
lunt, hanc eorum ſententiam eſſe omnium Pa-
trum & Scholaſticorum; quomodo igitur vel
igno-

ignorare eam potuit, vel explicare nesciuit sapientissimus Cardinalis? Præterea, si vera est explicatio Aduersariorū, dicendum erit iuxta Baronij mentem, S. R. Eccles. semper tamquā certum credidisse, aquam in vinum verti in sacrificio Missæ, quod cū sit philosophicum, immò falsum, esset omnino absurdum. Sed demus etiam veram esse Estij explicationem, adhuc Cardinalis responsio erit pro nobis. Nam inquit intelligendam esse, vt quocumque modo, ac saltem mediātē aqua cōuertatur in sanguinem: hoc est autem, quod nos hīc contendimus, quocumque modo, siue immediātē, siue mediātē in sanguinem verti, nulloque pacto posse simul cum sanguine remanere. Sed quid ad miraculum ab eodem Baronio allatum Aduersarij dicent? An perpetratum fuisse vt probaretur aqua in vinum verti, ac deinde in sanguinem? atqui ibi vinum non aderat, nec in ipsum prius aqua transiit, sed immediātē in sanguinem. neque consuevit Deus ad res phycas comprobandas miracula patrare. An ipsum negabunt? vel dicent in alium finem editum fuisse? Sed videant, quæso, Catholici, ne id ipsum tentandi aduersus miracula edita in confirmationem conuersionis panis in corpus Christi, & vini in sanguinem, hæreticis occasionem præbeant. Fateantur ergo necesse est, non solum grauissimum huius Cardinalis

te-

testimonium sententiæ nostræ maximè suffragari, sed etiam miracula nobis fauere, Patresque omnes à nobis stare.

SECTIO VII.

Ex S. Thomæ & aliorum Scholasticorum doctrina eadem sententia confirmatur.

SANCTI Thomæ & omnium Scholasticorum auctoritatem obiciunt nobis Aduersarij, & inde sententiæ nostræ falsitatem argumentantur. cuius argumenti antecedens quàm sit falsum, modò aperiemus, & à S. Thoma incipimus, cuius auctoritas, & propter insignem vitæ sanctitatem, & propter summam doctrinæ præstantiam, maximi semper in Ecclesia meritò est habita. hunc ergo si ostenderimus esse nobiscum, non erit, cur recentiorum clamores timeamus: ostendemus autem ex duobus præcipuè locis eius Summæ, quam meritò ipsius testamentum eius sectatores appellant.

Prior ergo locus est in tertia p.q. 74 .art. 8. vbi de hac re agens, hæc habet verba: *Dicendum, quodd circa aquam adiunctam vino, sicut Innocentius tertius dicit in quadam decretali, triplex est opinio. Quidam enim dicunt, quodd aqua adiuncta vino per se manet, vino conuerso in sanguinem. sed hac opinio stare non potest, quia in Sacramento altaris nihil est, nisi corpus, & sanguis Christi; sicut enim*

enim Ambrosius dicit, ante benedictionem illa species nominatur, post benedictionem corpus significatur; alioquin non totum adoraretur veneratione latræ: & ideo alij dixerunt, quod, sicut vinum conuertitur in sanguinem, ita aqua conuertitur in aquam, quæ de latere Christi fluxit. sed nec hoc rationabiliter dici potest, quia secundum hoc, aqua seorsum consecraretur à vino, sicut vinum à pane: & ideo sicut ipse dicit, aliorum opinio probabilior est, qui dicunt aquam conuertere in vinum, & vinum in sanguinem, hoc autem fieri non posset, nisi adeò apponeretur modicum de aqua, quod conuerteretur in vinum, & ideo eo semper tutius est, parum de aqua apponere, & præcipuè, si vinum sit debile; quia si tanta fieret appositio aquæ, vt solueretur species vini, non posset, perfici Sacramentum. Hæc S. Thomas ex quibus duas ego elicio conclusiones pro nostra sententia.

Prior est. Aqua si tempore consecrationis non sit conuersa in vinum, non potest permanere, sed conuertitur in sanguinem.

Posterior. Aqua conuertitur in vinum moraliter, siue accidentaliter, non verò substantialiter.

Prior Conclusio probatur. Habet S. Thom. pro inconuenienti, quod aqua permaneat post consecrationem, sed neque vult mutari in aquam quæ fluxit de latere Christi, neque censet miraculosè destrui, aut in vinum supernaturaliter conuertere, quia miracula non sunt ponenda

nenda sine necessitate: alioqui liceret etiam dicere numquam ab aqua solui species vini, quod S. Thom. negat. igitur si aqua neque permanet, neque in nihilum redigitur, nec semper mutatur in vinum, vel in aliam aquam, relinquitur ut aliquando saltem conuertatur immediate in sanguinem.

Quid ad hoc dicent Aduersarij? an illum casum, quod aqua non sit conuersa in vinum, esse impossibile, & pro tali habitum à S. Thoma? atqui longè possibilior est ille casus, quam fuerit possibile, hoc dici. Nam si S. Thomas existimauit possibile tantam aquam misceri, ut vini species solueretur; & idcirco de hoc admonendum censuit esse lectorem, quomodo id, quod est facilius, scilicet, aquam non conuertere in vinum, neque destruere vinum, non duxerit possibile? An censuit non dari medium inter hæc duo, vel necessariò, aquam vinum destruere, vel à vino destitui? Verba eius contrarium ostendunt, nam ad hoc, ut aqua conuertatur in vinum, inquit *tutius, parum de aqua apponere*; ad hoc verò, ut dissoluatur species vini, non inquit, sufficere, si non parum aquæ apponatur; sed *si tanta*, ait, *fieret appositio aquæ, ut solueretur species vini*, innuens, magnam esse debere aquæ quantitatem, si per eam est species vini soluenda. Præterea, saltem ratione temporis, quando videlicet instante iam consecratio-

ne calicis aqua infunditur, oportet concedere aquam non esse aliquando cōuersam in vinum. quod cū Aduersarij fateantur, non debent tam malè sentire de D. Thom. vt hoc noluerit ipse admittere. Sed etsi demus, hoc credidisse S. Thomam, iam quod ad conclusionē theologicam spectat, non erit contra nos, quia non negat aquam posse conuerti in sanguinem, si tempore consecrationis adsit, sed negat adesse; eò quòd conuertatur in vinum. quod est philosophicum.

Fortassis dicent, de hoc euentu non cogitasse D. Thom. At, tunc argumentor etiam, vt priùs, ergo non est contra nos. Addo vlteriùs; posse nihilominus ex eius doctrina colligi, quid fuisset dicturus, si hic casus ei propositus fuisset; videamus enim quid ipsius argumenta probent, & habemus eius mentem. Inquit igitur S. Thom. non posse aquam permanere, vino conuerso in sanguinem, quia in Sacramento Altaris post consecrationem nihil est, nisi corpus & sanguis Christi: & probat tum auctoritate Ambrosij, tum ratione, quia alioqui non totum adoraretur veneratione latriæ. At, quis non videat, ex his concludi, aquam numquam permanere cum sanguine? quis non colligat, aquam verti in sanguinem Christi, si ante consecrationem erat in calice, vt supponimus, & post consecrationem ex S. Thom. nihil aliud est

est in calice præter sanguinem? Quòd si ex argumento S. Thom. hoc non colligebatur, cur conatus est Suarez ipsum dissolvere? ipsius enim hæc sunt verba: *Ad illud verò de adoratione respondetur, non adorare fideles quidquid est in calice: possunt enim esse in calice alia res, vt palea, &c. adorant ergo id quod consecratum est, seu quod sub speciebus vini continetur.* hæc Suarez. Quid igitur iam ulterius de sententia S. Thom. litigamus? Suarez conatur eius argumentum dissolvere, nos libenter recipimus, & corroboramus. S. Thomas inquit, totum id, quod est in calice post consecrationem adoratione patriæ venerandum, & nos idem fatemur. Suarez hoc pernegat, & quis adhuc erit qui affirmare audeat, S. Thomam contra nos esse, & cum Aduersariis sentire?

Nolo tamen hîc prætermittere, malè dissolui à Suarez argumentū S. Thomæ; maximum enim est discrimē inter aquam & paleam: nam aqua est per se in calice, & ex intentione sacerdotis, & Christi; & fideles sciunt appositam fuisse, & tamen sine distinctione adorant totum illud quod est in calice, at palea est per accidens, contra intentionem Ecclesiæ & Christi, & præter scientiam fidelium, quare adoratio eorum nullo pacto terminatur ad paleam: aqua efficit vnum simul cum vino, vel cum eius speciebus, ita vt non possit ab ipso discerni, &

totum illud tamquam vnum Sacramentum proponitur ab Ecclesia adorandum: at palea neque efficit vnum cum vino, neque proponitur adoranda: immò si sacerdos aduertat inesse, ipsam extrahit.

Quantum verò Deo displiceat, aliquid extraneum altaris Sacramento admisceri, miraculo ostendit ipsemet Deus, quod narrat Cæsarius Heisterbachius lib. 9. cap. 65. & refert etiam Iodocus Coccius in suo Thesauro Catholico libro 6. de Eucharistia. Anno videlicet Christi 1218. quamdam hostiam consecrandam patenæ superimpositâ sæpè resiliisse, coactumque sacerdotem aliam sumere, eamque consecrare; cuius miraculi cum causa requireretur, inuentus est in priori illa hostia cimex decoctus, quem noluit Deus, licet ferè inuisibiliter adesset, speciebus Eucharistiæ admisceri.

Nota præterea lector, S. Thomam quæst. 75. art. 2. hoc eodem argumento ex veneratione totius Sacramenti deducto, vti ad probandum non remanere sub speciebus consecrationis ipsam substantiam panis; & à Suarez disp. 49. sect. 2. approbari, & extendi ad singulas partes integrantes illius. si ibi ergo vim habet, cur & hic non habebit?

Altera conclusio erat, aquam conuerti in vinum moraliter, id est, non verè fieri vinum, sed
ita

ita commisceri vino, vt sub nomine vini censeatur, & dicatur simpliciter in calice adesse vinum. Hæc conclusio non est tam certa, sicuti præcedens, est tamen valdè probabilis. Primò, quia si hoc pacto intellexit S. Thomas aquam conuerti in vinum, optimè & exactissimè explicauit hanc aquæ misionem: nullum enim dabitur medium inter duos casus, quos posuit, quia vel aqua cōuertitur hac ratione in vinum, vel ab ipsa peruertitur vinum, ita vt non possit dici simpliciter potus vini; nihil erit igitur, quod à S. Thoma ampliùs desideretur. At, si de conuersione substantiali locutus est, prætermisit, vel saltem non satis clarè explicauit casum illum medium, de quo paulò antè locuti sumus. Cùm ergo credendum sit, S. Thomam perfectissimè hanc rem totam explicasse, asserendum quoque est de accidentali, siue morali conuersione ipsum fuisse locutum.

Probatur Secundò, quia eo pacto intellexit S. Thomas aquam conuerti in vinum, quo iam intellexerat Innocentius, quem ipse citat; at Innocentium intellexisse de conuersione morali, probabile ostendimus suprà sect. 4. ergo idem dicendum de S. Thoma.

Probatur Tertiò, quia in hac materia Sacramentorum res non minùs diiudicantur in ordine ad vñum, & communē opinionem hominum, quàm ex physica ipsarū natura. Nam &

ipse Suárez disp. 64. sect. 2. loquens de pane confecto ex aqua rosacea, *Quidquid sit*, inquit, *de specie physica, satis est, illum panem non esse vsualem, vt non possit esse materia huius Sacramenti.* & paulò infrà, *Neque oportet differentiam esse specificam, & substantialem, sed satis est, vt ita dicam, quòd sit vsualis & artificialis.* Clariùs etiam Scotus subtilitatum aliàs amator, hic eas refugit, dicens in 4. sent. dist. 2. q. 6. *Noluit Christus in Sacramentis suis istam subtilem disputationem de differentia physica imponere nobis, sed quòd panem triticeum existimatum habeamus pro materia consecrationis.* Et idem reliqui Scholaistici ferè omnes sentiunt. Probabile est igitur, idem sensisse S. Thomam, & propterea non de physica conuersione, quæ subtilem continet disputationem, & parum aptam huic materiæ, sed de morali & vsuali, quæ magis in his rebus est attendenda, fuisse locutum.

Sed meliùs hoc ipsum ex altero loco, quem pro nostra sententia afferre proposuimus, explicabitur: est autem locus in eadem quæst. 74. art. 3. ad 3. erat enim tertium argumentum: *Permissio speciem soluit, sed vix inuenitur farina triticea, quæ alterius frumenti permissionem non habeat, nisi fortè de electis granis studiosè fiat; non ergo videtur, quòd panis triticeus sit propria materia huius Sacramenti.* Ad quod deinde respondet: *Dicendum, quòd modica permissio non soluit speciem,*

ciem, quia id quod est modicum quodammodo absumitur à plurimo: & ideo si sit modica admistio alterius frumenti ad multò maiorem quantitatem tritici, poterit exinde confici panis, qui est materia huius Sacramenti; si verò magna sit permistio, putà ex aquo, vel quasi, talis permistio speciem mutat, unde panis exinde confectus non erit debita materia huius Sacramenti. Haëtenus S. Thomas. Ex quibus verbis duas conclusiones, quæ nostræ sententiæ fauent, ex mente ipsius, elicio.

Prior est. Si modicum hordei multo tritico admisceatur, & exinde fiat panis, hordeum dicitur verti in triticum, non substantialiter, sed moraliter & accidentaliter. & hoc sufficit, ut totum vertatur in corpus Christi.

Posterior Conclusio. Idem omnino, & maiori etiam ratione dicendum est de modica aqua, si multo vino admisceatur.

Prior Conclusio probatur ex illis verbis S. Thomæ, *Quod est modicum quodammodo absumitur à plurimo.* cur enim addidit *quodammodo*, nisi quia credebat propriè non absumi, id est, substantialiter in aliud conuerti, sed accidentaliter & moraliter? alioqui enim, non quodammodo, sed propriè & verè absumeretur. Præterea, neque dixit corrumpitur, vel conuertitur, sed absumitur, id est, reputatur ac si non esset. Præterea Tertiò, non dixit, Vna species frumenti modica absumitur ab alia pluri-

ma, sed modicum à plurimo, ostendens hanc absumptionem non esse tribuendam virtuti, siue, vt aiunt, actiuitati tritici, sed quantitati, quia in quocumque alio genere modicum absumitur à plurimo, non quidem physicè, sed moraliter: si enim vnicum granum hordei sit in aceruo tritici, non consumetur ab ipso, vt experimento liquet, sed ita venundabitur, ac si esset triticum: absumitur ergo moraliter, non physicè.

Hanc autem conclusionem non solùm esse ad mentem D. Thomæ, sed etiam veram secundùm se probatur. Primò, quia si triticum haberet hanc virtutem in se conuertendi hordeum; vel haberet eam ex se, vel ex contusione, vel ex aqua admista, vel ex igne. Ex se non habere, patet, sicuti neque ex contusione, quia neque triticum integrum, neque farinam certum est agere in hordeum, vel in farinam hordei. Neque ex aqua, quia hæc neque tribuere potest virtutem, quam non habet, neque excitare eam, quam reperit in tritico; quia potius eam retundit, & triticum ad corruptionem disponit. Neque verò ex igne, quia hic, licet sit maximè actiuus, tamen eius virtus est alterius generis, & ad productionem tendit alterius ignis, non tritici, vel hordei; immò in vtrumque agit, vt ipsa corrumpat, non vt alterum alterius conuersione augeat. Et confirmari hoc potest

ex

ex illo loco Euangelij, *Nisi granum frumenti cadens in terram mortuum fuerit, ipsum solum manet*, hoc est, aliud granum non producit: at si posset hordei granum in se vertere, iam & fructum faceret, & solum non maneret, quamuis in terram non caderet.

Probatur præterea, quia eadem ratione nihil esset in mundo quod non posset alia in se conuertere. nam & lapides & ligna in puluerem redigi possunt; aqua deinde, & modico puluere alterius generis misceri, & omnia apponi igni: ex quo pari ratione sequeretur, ut illud, quod est in maiori quantitate, reliqua conuerteret in se: & idem, vel simile dici posset de metallis, & de omnibus aliis rebus. quod esset totam philosophiam euertere, & artem chymicam nimis facilem reddere; cum tamen in ea frustra iam plurimi, etiam ex præstantissimis philosophis, insudauerint.

Confirmatur idem testimonio Aduersariorum: nam Suarez ipse disp. 47. sect. 1. de hac eadem mistione loquens, ita scribit: *Si autem fiat mistio ex aliis frumentis, & maior pars cum notabili excessu sit triticea, censeri potest sufficiens materia, quia in usu omnium hominum ille panis iudicatur triticeus, alias panis confectus ex tritico male purgato non esset sufficiens. quod est plane falsum. Ratio verò est, quia illa maior pars adiuncta contusione, seu coctione censetur alias particulas tra-*

here ad suam speciem, & ita confici mistum eiusdem rationis cum pane tritico. Hæc Suarez, Vbi aduerte, duas ipsum rationes afferre, cur panis ille sit sufficiens materia: vna est, quia in vsu omnium hominum panis ille iudicatur triticeus; ergo verum est, quod suprà dicebamus, quidquid sit de physica transmutatione, satis esse quòd moralitertalis censeatur. Deinde addit, & est Secunda ratio, siue confirmatio prioris, quòd maior pars censetur trahere alias particulas ad suam speciem. Noluit apertè dicere maiorem partem alias in se conuertere, quia videbat esse contra veritatem, neque tamen apertè negauit, ne suæ sententiæ parum faueret; ita tamen locutus est, vt à conclusione suprà posita non videatur abhorre: nam illa verba *censetur trahere*, moralem potius quàm physicam conuersionem indicant.

Dicere tamen quis posset, non posse quidem triticum vertere hordeum in se, sed tamen illud mistum, quod ex modico hordei, & multo tritico resultat, addita coctione, non differre specie ab eo quod resultat ex tritici farina tantum. Ratio esse potest, quia vtrobique fit vnum mistum nouum substantiale; non est autem probabile, quòd totum hoc mistum differat essentialiter ab illo alio toto propter granum hordei tantum; & potest exemplo confirmari, quia quauis cibi, qui ab homine comeduntur,

tur, sint diuersæ speciei, calor tamen naturalis in sanguinem eiusdem speciei omnes illos transmutat. Ad quod respondeo, primum quidem inniti hoc dicentes fundamento incerto, supponunt enim, quod massa differat essentialiter à farina, & panis à massa. quod si cum Scoto, Gabriele, Cano & alijs negemus, ruit totum argumentum: tunc enim non fiet aliquid mixtum substantiale nouum per coctionem, & consequenter numquam farina, vel massa hordei mutabit speciem. idemque de farina mista, ac de massa, & de pane mixto dicendum erit.

Quod si etiam concedamus, farinam differre à massa essentialiter, parum refert, quia non minus potest misceri massa hordeacea cum massa triticea, quàm misceantur ipsæ farinæ; cum autem massæ miscentur, clarum est, vnam non agere in aliam, & consequenter nullam fieri conuersionem. Si igitur neque panis differt à massa substantialiter, remanebit massa hordeacea in sua specie, sicuti prius. Secundò, dato etiam illo fundamento, nihil sequitur cōtra nos: nam vel farina hordeacea tanta fuit, vt cum tota farina tritici commisceri potuerit, ita vt nulla daretur pars massæ, quæ simul non haberet & hordeaceam & triticeam farinam: & tunc dico, hoc mixtum differre specie à pane triticeo puro, quia reuera componitur ex longè diuersis. Si verò tam modica fuit farina

hordei, vt non potuerit cum tota farina tritici cōmisceri, dico illam solam partē, quæ constat ex hordeo & tritico, differre specie à triticeo pane puro. Si quæras autem, an hæc pars possit cōsecrari? Respondeo cum Scoto, quem etiam approbant Suarez, & reliqui, non tam esse hīc attendendam subtiliter speciem physicam, sed videndum an communiter censeatur ille panis triticeus, & an sensibilibiter, vel notabiliter ab alia parte triticea differat; & iuxta hunc communem sensum ferendum esse iudicium.

Ad instantiam de calore naturali, dico non esse ad rem, quia calor naturalis virtute vitali illos omnes cibos in animalis substantiam conuertit. quare priuat illos propria forma, & tribuit illis suam, hic autem non tribuit ignis aliquam propriam formam pani; sed hæc ex dispositione materiæ resultat. quare sequitur etiam præcedentem materiam. quod non euenit in actione caloris naturalis.

Quare ex dictis concludere possumus, & ex mente S. Thomæ, Scoti, & aliorum Theologorum, non esse in commistione hordei, & tritici, siue alterius generis frumenti, attendendam diuersitatem substantialem physicam, sed moralem: quia illa est valdè incerta; hæc autē sufficit ad materiam certam constituendam. quod in priori nostra conclusione intendebamus.

Erat posterior conclusio. Idem dicendum esse

esse de aqua vino mista : quæ probatur tum ad mentem S. Thomæ, tum secundum veritatem, quia nulla apparet ratio in contrarium; immò potius adsunt non paucae rationes, quæ de aqua id magis dicendum esse probant, quam de farina hordeacea. Nam aqua miscetur ex institutione Christi, hordeum est præter institutionem eius. Secundò, aqua magis incorporatur & miscetur vino, quia cum ambo sint liquida, facilius se penetrant & permiscentur. Tertiò, difficilius aqua discernitur in vino, quam vel hordeum, vel aliquid aliud in pane triticeo; & ratio est, quia vina habent inter se maximam diuersitatē: quare licet vinum reddatur ab aqua debilius, vel minùs coloratum, cogitare tamen quis potest, tale esse vinum ex propria natura. at verò triticum non tantam patitur diuersitatem, & propterea facillimè cognoscitur, an panis confectus sit ex puro tritico, vel aliquid aliud admistum ei fuerit: si ergo hordeum admistum tritico, dummodo moraliter censeatur in triticum cōuersum, quamuis physicè non sit commutatum, secundum omnes Theologos dicitur verti in corpus Christi; cur non multò magis id erit de aqua affirmandum, dum moraliter censeatur in vinum conuersa, vt sæpiùs explicauimus?

Respondet tamen Suárez, hoc argumentum de pane potius probare contrariū, *Quando enim,*

enim, inquit, aliqua farina hordeacea ita miscetur triticea, vt tandem totum quod conficitur, sit panis triticeus, & eiusdem rationis & substantie, tunc totum consecratur: si verò contingeret particulam panis hordeacei manere interpositam pani triticeo, substantialiter tamen ab illo distinctam, re vera non consecraretur. & hæc quidem rectè Suarez. Sed applicationem similitudinis ad rem, de qua agebatur, siue minorem argumenti ipse omisit, quia vel oportebat eum dicere, aquam ita misceri vino, sicut farina hordeacea miscetur triticeæ, & contra ipsius sententiam conclusio illata fuisset, vel, vt, quod volebat, obtineret, aquam ita manere interpositam vino, sicuti panis hordeacei particula pani triticeo. & hoc videbat falsum esse, quia vino verè miscetur aqua. quare silentio applicationem similitudinis præterit, vt hanc quoque præteriret lector, & optimè tamē argumentum concludere crederet. Subnectamus ergo eam nos: sic autem est, quòd aqua quæ vino infunditur, ita cum eo permiscetur, vt simul cum vino perficiat vinum totum: quod non minori ratione dicitur simpliciter vinum, quàm ille panis cui est admista farina hordeacea, dicitur panis triticeus, quia vtrumque dicitur moraliter tale, quidquid sit de specie physica. non autem se habet aqua, sicut particula panis hordeacea: quæ licet interponatur pani triticeo, tamen non potest cum

cum eo misceri, & separata sensibiliter manet & distincta: Ergo sicut ille panis simul cum hordeo vertitur in corpus Christi, ita etiam debet verti hoc vinum simul cum aqua. Præterea, quærerem ego libenter à Suarez, an, quando inquit panem confectum ex farina hordeacea & triticea totum esse triticeum, intelligat esse verè triticeum substantialiter & physicè, vel moraliter tantum? illud dici non potest, nisi supponamus hordeum mutatum fuisse in triticum, quod suprà fieri non posse ostendimus; si autem moraliter tantum, ut verè dicendum est; ergo multò magis aqua, quæ moraliter in vinum sit commutata, in sanguinem Christi vertetur. Confirmatur ex verbis ipsius Suarez suprà relatis, nam de illo pane triticeo misto inquit, *Censeri potest materia sufficiens, quia in usu omnium hominum ille panis iudicatur triticeus*: atqui vinum, cui modicum aquæ mistum est, in usu omnium hominum iudicatur quoque vinum, cur ergo non erit materia sufficiens? Neque verò, ut argumenti vim effugiat, dicere quis potest panem illum, ut triticeum, verti in corpus Christi, non verò ut hordeaceum, quoniam id esset contra communem sensum Ecclesiæ, quæ totum illum panem, ut inquit S. Thomas, & Suarez, habet pro vera materia: & maximæ confusionis causa esset, quia non posset sensibiliter distingui id quod ex tritico est

est in illo pane; ab eo quod est ex hordeo . quæ absurda æquè locū habent in aqua vino mista.

Habemus igitur tum ex doctrina , quam de pane tradidit , tum ex ea quam de vino, S. Thomam sententiæ nostræ suffragari : quamuis enim illam clarè non explicet, ita tamen loquitur, vt ex eius dictis , quæ idcirco à Suarez refutantur, deduci debeat. Et cōfirmatur, quia in 4. sent. dist. 11. q. 2. art. 4. inquit vinum esse principalem materiam calicis : ergo censet aliam esse minùs principalem , hæc autem non potest esse nisi aqua. Nunc breuiter aliquot alios Scholasticos percurramus.

Primus ergo ipsorum, qui Magister sententiarum dicitur , de hac quæstione , vt testatur Gaufredus in epist. suprà allata , verba non facit, ex eius tamen doctrinâ sententia nostra non obscurè colligitur. nam de hoc Sacramento loquens, ait, *Quodd non sit ibi substantia nisi corpus Christi & sanguis, ex prædictis & subditis aperte deducitur.* Sciebat autem Magister apponi aquam, neque poterat esse certus semper conuerti in vinum, & tamen tamquam de re certa inquit, ibi non adesse aliam substantiam , præter corpus & sanguinem Christi : ergo supponit, aquam, si non conuertatur priùs in vinum, non posse ibi remanere, sed debere conuerti in sanguinem Christi.

Alexander Alensis grauissimus Theologus,
&

& SS. Thomæ & Bonauenturæ magister, numquam negat aquam in sanguinem conuerti. Immò nostræ sententię fauet, quia inquit p. 4. quæst. 10. membr. 4. art. 1. §. 5. *non sufficere, quòd aqua admisceatur in dolio, quia sic admista nihil faceret ad Sacramentum, quia non admiscetur, vt transubstantianda in sanguinem Christi.* ergo per Alensem aqua debet transubstantiari in sanguinem, & ea intentione admisceri vino, alioqui frustra esset posita, & non faceret ad Sacramentum. Præterea eodem modo loquitur de missione aquæ cum vino, atque hordei cum tritico, sicuti etiam S. Bonauentura, & reliqui ferè antiqui Scholastici. quare per conuersionem aquæ in vinum, probabile est, eos intellexisse non mutationem substantialem, sed moralem, & in ordine ad vsum hominum, vt explicauimus.

De Scoto id probabilius dici potest, cum apertè, vt suprà retulimus, asserat, non esse in hac materia quærendas subtilitates physicas. clariùs tamen Altisiodorensis libr. 4. Summæ tract. 5. c. 2. *Vinum & aquam, ait, transubstantiari in sanguinem Christi.*

S. Bonauentura præterea in 4. dist. 2. qu. 2. art. 4. ait, *aquam esse quid annexum materie calicis, scilicet vino.* quod idem videtur esse cum eo, quod nos diximus, aquam non esse materiam, sed commateriam.

Ioan.

Ioan. Gerson in sua Summa lib. 4. de materia Eucharistiæ loquens; *Materia necessaria*, inquit, *est vinum; materia debita, quod aqua vino miscetur.* & assignans rationē, *Quia*, inquit, *Christus sanguinem suum sub tali specie dedit.* Si autem aqua non spectaret ad materiam, multo minùs constitueret materiam debitam, nec sub eius specie Christus sanguinē suum nobis dedisset.

Guilielmus Durandus lib. 4. Rationalis diuini officij cap. 30. num. 21. quærens, cur aqua in oblatione benedicatur à sacerdote, & non vinum, refert quorundam responsionem, quia vinum suam benedictionem expectat in consecratione calicis; & eam impugnat dicens, *quod in benedictione vini sub nomine calicis tam vinum, quam aqua simul benedicuntur.* Quibus verbis ostendit, & aquam in vinum substantia- liter non conuerti ante consecrationem, & simul cum eo consecrari, hoc est enim benedici sub nomine calicis: & quamuis dicat, tunc totum esse vinum, intelligit tamen moraliter, alioqui vana esset eius impugnatio; quia aqua non simul cum vino benediceretur.

Ex recentioribus quoque non desunt, qui nobiscum sentiant: nam Petrus Soto lect. 14. de Eucharist. idem planè sentit, inquit enim: *Neque opus est scrupulosè inquirere, vbi aqua apposta maneat: totum enim quod in calice est, vinum est, & illud conuertitur in sanguinem Christi: non*

po-

potuit autem intelligere, totum id quod est in calice, esse vinum substantialiter, quia hoc semper verum non est, & hoc se non quærere per illa verba ostendit, *Non oportet scrupulosè inquirere*. Quid enim aliud poterat hic ingerere scrupulum, nisi quòd dubium esset, illam aquam esse versam in vinum? nam si hoc certum esset; nullus remaneret scrupulis locus, quia dubium non est, vinum conuerti in sanguinem. Est igitur eius mens, totum quod est in calice, esse vinum moraliter, & totum verti in sanguinem.

Cornelius Iansenius ex ijs, quæ suprà sect. 4. ex ipso retulimus, clarè ostendit, se existimare, aquam, siue versa sit in vinum, siue non, semper in sanguinem verti, & eandem inquit esse mentem Innocentij III. & idem dici potest de Alfonso à Castro, vt suprà quoque notauimus, & de Alfonso Salmerone.

Gulielmus quoque Alanus insignis Doctor & Cardinalis lib. I. de Euchar. c. 13. non solum asserit, aquam, etsi in vinum non sit versa, in sanguinem Christi transubstantiari, sed etiam inquit, *Hoc certa fide est tenendum*. In quo verbo, ait Suarez, ipsum excessisse. & fortè verum dicit, si Alanus de fide diuina locutus est; si autem de fide humana, quæ tamen innitatur etiam principijs fidei diuinæ, nullo modo videtur mihi excessisse: quia si de hordeo admisto cum tritico hoc omnes asserunt, multò magis

K

de-

debet hoc credi de aqua, totque ad sunt pro hac sententia Patrum & Conciliorum auctoritates, totque rationes, & congruentiæ, vt potuerit meritò dicere Alanus, hoc esse certa fide tenendum.

Franciscus Cardinalis Toletus lib. 2. de Instructione sacerdotum cap. 25. eandem sine vlla hæsitacione pronunciat; inquit enim, *Cum vino est quantitas parua aque adhibenda, que simul est materia, siue conuersa sit in vinum, siue non.*

Alexander Pefantius Romanus in suis non prolixis, sed doctis commētarijs super D. Thomam 3. p. qu. 74. art. 8. hanc eandem sententiam amplectitur, & inquit etiam esse ipsius D. Thomæ.

Robertus Cardinalis Bellarminus, quoniam cum hæreticis erat illi concertatio, hanc controuersiam ex professo non diremit; attamen cap. 2. lib. 4. de Sacramento Eucharistiæ ad 3. inquit, in calice solum esse Christi sanguinem. quod verum non esset, si etiam adesset aqua.

Didacus quoque Tapia, vt sect. 4. notauimus, hanc sententiam probabilem existimat, & ei non repugnare Innocentium III. vbi etiam Christophorum Gillium, & multos Iuris Canonici interpretes, pro ea adduximus.

Nouissimè Ioan. Baptista Scortia Societ. Iesu lib. 4. de Sacrosancto Sacrificio Missæ c. 1. eandem amplectitur. Sicuti & Ægidius Coninck

ninck in 3.p.qu.74. art. 8. pro eadem egregiè pugnat, cuius lucubrationes, non nisi postquam hæc scripseram, & iam commentarios in libros Aristotelis de Generatione edideram, in manus meas peruenerunt.

Denique PP. eiusdem Societatis Iesu optimè de Theologia meriti, Romæ degentes, in publicis disputationibus iam sæpius eandem examinandam proposuerunt, & præstantissimè, ut solent, propugnarunt.

SECTIO VIII.

Rationibus Theologicis idem probatur.

MVLTA iam indicatæ sunt rationes theologicæ pro hac nostra sententia, præsertim sectione superiori, ubi S. Thomæ, & aliorum Theologorum dicta pro ea adducta sunt: hic tamen alias quoque afferemus non minus efficaces, ut cognoscat lector, auctoritatibus & rationibus, non ad necessitatē tantum munitam esse, sed etiam ad superabundantiam hanc nostram sententiam affluere.

Prima ergo ratio sit. Sacramenta id efficiunt, quod significant, ut docent omnes Theologi, & ex Concilijs Florentino in decreto Eugenij, & Tridentino sess. 7. can. 6. colligitur: atqui verba consecrationis calicis, quæ sunt forma

Sacramenti Eucharistiæ, significant, totum id quod est in calice tempore consecrationis, esse sanguinem Christi : nam calicis nomine totum id, quod in eo per modum potus continetur, indicatur ; sumitur enim continens pro contento, vt omnes asserunt: ergo si tempore consecrationis adsit in eo aqua simul cum vino, ipsa quoque virtute verborum fiet sanguis Christi.

Respondet Franc. Suarez, idem argumentum fieri posse, si vino sit admista gutta mellis, vel alterius liquoris, vel si intra panem lateat particula casei: nam totum hoc, scilicet, panis cum caseo, significaretur per verba consecrationis corporis, & gutta mellis comprehenderetur etiam sub nomine calicis ; nemo tamen diceret, vel caseum conuerti in corpus Christi, vel mel in sanguinem. Respondetur ergo, inquit, *ad argumentum, nomine calicis ex intentione sacerdotis, seu Ecclesiæ, & Christi, ad quam se debet conformare sacerdos, solum designari, quod sub speciebus vini continetur.*

Verum quis non aduertat inter huiusmodi exempla à Suarez allata, & rem nostram, magnum esse discrimen? nam si gutta mellis in calice ponatur simul cum vino, est omnino contra intentionem Christi & Ecclesiæ: consequenter, quamuis significetur per verba formæ, non mirum si non conuertatur in sanguinem.

guinē, quia dato vno inconuenienti necesse est alia plura sequi: & idem dicendum est de caſeo pani admisto. At aquam miſceri vino eſt ex inſtitutione Chriſti, & præcepto Eccleſiæ, & ex eiſdem Chriſti inſtitutione verba formæ ordinata ſunt ad ſignificandum illud totum, quod (dummodo ritè ac rectè hoc Sacramētum conficiatur) eſt in calice. quare etiam contra hæreticos ex verbis formæ colligunt Theologi, & Patres Concilij Tridentini, vt ſect. 3. diximus, totum vinum in ſanguinem Chriſti conuerti: ergo dicendum eſt ex Chriſti intentione illis verbis comprehendendi etiam aquam. Sicut enim ſiquis crumenam pecunijs plenam alteri tradens diceret, Hoc tibi dono, intelligeretur totum illud donare quod in crumena eſſet: ita dum Chriſtus ſive ſacerdos eiſus nomine dicit, calicem eſſe ſuum ſanguinem, hoc debet intelligi de toto illo quod eſt in calice. vnde enim melius, quàm ex verbis eiſus, intentionem illius colligere poſſumus, præſertim cùm de re grauiffima, & diſcipulis cariffimis loqueretur, quibus nulla aderat ratio, cur nollet maximè clarè hoc Sacramentum tradere? Nec de Eccleſia præſumèdum eſt, aliam eſſe à verborū propria ſignificatione eiſus intentionem, præſertim cùm de hoc nuſquam admoneat ſacerdotem vel fideles, ne in re tam graui, & illa erraret, & iſti deciperentur. Quare falſum omni-

no est, quod in responsione dicitur, ex intentione sacerdotis, Ecclesiae & Christi, nomine calicis, id tantum quod sub speciebus vini continetur, designari. nec plus virium instantia de melle habet, quam si quis argumentaretur per illa verba, *Hoc est corpus meum*, non conuerti panem in corpus, quia si super lapidem proferantur, non idem efficerent: & sicut illi responderetur panem conuerti, & non lapidem, quia ex Christi institutione super illum, & non super hunc proferri debent: ita dicimus nos verba consecrationis calicis à Christo fuisse prolata & instituta, ut à sacerdotibus proferantur super mistum ex vino & aqua, non verò super mistum ex vino & melle. quare non mirum, si aqua conuertatur, non verò mel.

Sed Gabriel Vasquez disp. 178. in 3. p. cap. 3. n. 22. alia utitur responsione, & inquit, *verba consecrationis supra totum calicem prolata demonstrare solum id quod precipue sub speciebus vini in calice continetur, & ex quo denominationem accipit, aliud autem admistum in parua quantitate, aut contentum sub eo, ita ut non possit denominationem calici tribuere, non demonstrari etiam comitanter. Verum facile refelli potest hæc responsio: est enim contra omnem usum, & omnem animi conceptionem. Quis enim dum diceret, se plenum calicem hausisse, de vino tantum, & non etiam de aqua mista intelligeretur loqui? quis dum*

dum dicit, calicem esse mistum, nomine calicis non intelligit totum liquorem in calice contentum? Præterea in respons. ad 5 fatetur idem auctor, totum quod est in calice, post mistionem aquæ cum vino, dici vinum: ergo aqua comprehenditur nomine vini. Quis ergo non videat, quàm improbabiler, & parum consequenter loquatur hic auctor, dum concedit, aquam comprehendì sub nomine vini, cum tamen re vera non sit vinum, & tamen non vult comprehendì nomine calicis, cum hoc nomen sit indifferens ad aquam, ad vinum, & ad omne quod in eo continetur?

Adice, quòd ex eius responsione sequeretur, vt, si parum vini albi admistum esset vino rubro, non demonstraretur per verba consecrationis, & consequenter non verteretur in sanguinem. Si dicas, etiam vinum album contineri sub nomine vini, nihil hoc refert, quia in consecratione calicis non dicitur Hoc vinum, sed Hic calix: quæ verba non minùs significare possunt aquam, quàm vinum ex natura sua. quare & ipse Valquez concedit, quòd si magna aquæ quantitas esset in calice, & parua vini, aquam per nomen calicis significatum iri, & non vinum: ergo ex mente ipsius semper referuntur ad id quod est in maiori quantitate, & non ad illud quod in minori. efficitur proinde, vt minima pars vini albi non demonstrare-

tur per verba consecrationis, nec consecraretur, sed maneret in propria substantia: quia calix ille simpliciter denominatur calix vini rubri. quod est contra decretum Concilij Tridentini suprà sect. 3. relatum.

Adhæc, apertissime falsitatis cōvincitur hæc responsio ex Innocentio, qui li. 4. de Mysteriis Missæ c. 30. docet, etiam si plus aquæ sit in calice quàm vini, si tamen aqua saporem vini retineat Sacramentū perfici: atqui in eo casu secundum Vasquez aqua significaretur nomine calicis, & non vinū: ergo vel aqua tantum verteretur in sanguinem, vel nihil conficeretur. Exemplo quoque illius, qui crumenam donat argento & auro plenam, qui vtrumque donare censetur, explicari & confirmari idem potest.

Secunda ratio principalis est. Ecclesia, & omnes Theologi docent vitandas esse in Sacramentis materias incertas, tum quia incerti essemus de Sacramento, tum etiam quia iniuria Sacramento fieret, si fortè verba sacra super rem, quæ non esset eius materia, proferrentur. Multo magis autem docent, non esse proferenda verba, siue formam Sacramentorum super rem quæ nullo pacto potest esse materia Sacramenti; esset enim hoc sacrilegiū magnum. Atqui, nisi concedamus, aquam conuerti immediatè in sanguinem Christi, semper ex Ecclesiæ institutione, proferemus verba conse-
cra-

crationis calicis super materiam, vt minimùm incertam, & aliquando etiam super rem, quam certum est non esse materiam, scilicet super aquam: ergo ne in hoc absurdum incidamus, dicendum est, aquam immediatè conuerti posse in sanguinem.

Probatur minor quoad priorè partem, quia numquā possumus esse certi, quòd aqua tempore consecrationis in vinum sit conuersa; & tamen verba consecrationis proferimus super totam materiam quæ est in calice; ergo super materiam incertam.

Respondet Vasquez, numquam fore incertam materiam, si sequamur Ecclesiæ legem præcipientis modicissimam aquam apponi. Sed hæc responsio falsa est, & insufficiens. Falsa, Primò, quia est in quæstione positum apud Philosophos, an aqua conuertatur in vinum? immò ferè certū est in philosophia numquam conuerti. Secundò, quia data etiam sententia affirmantiū, non possumus certò definire, quantum temporis ad hoc requiratur, præcipuè cū vina sint valdè diuersa. Tertiò, qui vtitur vino imbecilli, non facit contra legem Ecclesiæ, quæ circa hoc nihil vnquā præcepit. immò Ecclesiæ mos est, vino albo vti, quod solet esse debilius vino rubro in partibus nostris. Ergo saltem ob vini imbecillitatē esse poterit incertum, an aqua tempore cōsecrationis sit in

vinum versa. Non esset etiam sufficiens illa responsio, esto vera esset, quia Ecclesia adhibet omnem diligentiam, ut nullum, quoad fieri potest, sequatur incommodum vel absurdum in hoc augustissimo mysterio peragendo, non solum seruatis omnibus ipsius legibus, sed etiam si ob obliuionē, vel negligentiam ministro- rum aliquid ab ipsa requisitum omittatur: his enim defectibus Missalis Rubricæ medentur, atqui proferre formam super materiam incer- tam, est maximum inconueniens; & tamen de hoc vitando quoad aquam non est Ecclesia sol- licita: nihil enim præcipit circa hoc, si plus a- quæ sit appositum vino, vel si non tempore debito, immò, ut diximus, iubet aliquando ap- poni, & statim proferri formam super eam; er- go non habet eam pro materia incerta.

Addo, quòd, etiam si concedamus (quod Ad- uersarij volunt) aquam in vinum conuerri, ad- huc incōueniens non vitetur, quòd scilicet ver- ba proferantur super materiam ineptam. Ra- tio est, quia nulla fit tam perfecta conuersio, quin semper aliquid non cōuersum remaneat, ut probauimus qu. 52. in lib. de Generat. sect. 3, art. 6. Et pater, quia etsi ignis sit maximè acti- uus, & ei apponatur pabulum maximè pro- portionatum, videlicet palea, vel stuppa, non adhuc eas totas in se cōuertit, sed pars in cine- res, pars in fumum resoluitur; ergo cū aqua
sit

sit maximè vino improporcionata , & hoc sit
 igne longè debilius, necessariò fatendum erit,
 aliquid aquæ remanere in vinum non conuer-
 sã: erit igitur in calice aliquid , quod non erit
 vinum, cõsequenter ineptum ad consecratio-
 nem , ac proinde super materiam ineptam for-
 ma Sacramenti proferetur.

Confirmatur , quia & auctores contrariæ
 sententiæ fatentur ex aquæ mistione remanẽ-
 re simul cum vino quemdam humorẽ aqueum,
 quem dicunt à vino per artificiũ extrahi pos-
 se; hic ergo humor aqueus, cum non sit vinum,
 non erit apta materia sanguinis Domini, & cõ-
 sequenter adhuc forma Sacramenti super ine-
 ptam materiam proferetur.

Dicit fortè quis , satis esse , quòd sit aliqua
 pars materiæ certa, ne verba consecrationis o-
 tiosè proferantur , vel determinari verba per
 intentionẽ ministri ad materiam tantum cer-
 tam; quia etsi esset in calice gutta olei , non
 propter hoc desineret vinum esse vera & con-
 grua materia Sacramenti. Sed contrà , quia
 verba significant totum illud , quod per mo-
 dum potionis est in calice, vt diximus; ergo ad
 hoc, vt vera sint, oportet vt totum illud quod
 est in calice, & per illa verba demonstratur, in
 sanguinem Christi conuertatur. Confirmatur,
 quia totus sanguis Christi continetur sub qua-
 libet minima particula specierum : ergo verba
 non

nontantum de toto, sed etiam de singuliseius partibus verificari debent.

Adde, quòd si aqua non supponitur verbis tamquam materia, vt quid Suarez sacerdotem monet, vt eo tempore & quantitate aquam apponat, quo possit conuerti in sanguinem; quia dubiis debent præferri certa; & certum est, si vertatur in vinum, etiam verti in sanguinem; si verò non vertatur in vinum, dubium est, in sanguinem verti? dubium enim & certitudo in materia tantum, vel forma solent attendi.

Aptius videretur exemplum in Sacramento Pœnitentiæ, in quo si quis peccata tantum venialia confiteatur, non opus est vt de omnibus contritionem habeat, sed de vno sufficit; & tamen absolutio datur de omnibus peccatis, neque aut pœnitens, aut minister sacrilegium committit, quamuis proferatur forma Sacramenti super materiam, cuius pars altera est apta, & altera inepta: idem ergo dici poterit de Sacramento Eucharistiæ, nullumque esse absurdum, quòd proferantur verba super materiam partim aptam, partim ineptam. Cæterum neque hoc exemplum euincit. Primò, quia longè maior reuerentia Eucharistiæ Sacramento debetur, quàm Pœnitentiæ: quocirca nemo vnquam dixit, licitum esse adhibere in eo aliquam partem materiæ ineptam; neque nobis licet aliud tradere de Sacramentorum

ma-

materia, quàm à maioribus accepimus. Secundo, primarius effectus Sacramenti Pœnitentiæ est tribuere gratiam, cum qua non pugnant peccata venialia, & idcirco non censentur reddere materiam ineptam: sicuti etiam si quis accedat ad Eucharistiæ Sacramentum cum peccato veniali, quamvis non accedat perfectè dispositus, non tamen mortaliter peccat. Tertiò. Falsò dicitur, si propriè loqui velimus peccata esse materiam Sacramenti: quomodo enim res tam sacra, qualis est Sacramentum, ex re tam execrabili, qualis est peccatum, tamquam ex materia componetur? quomodo peccata, quæ ad præsentiam Sacramenti recedunt & delentur, dici poterunt eius materia? si ergo materia quandoque appellantur, largo modo, siue potius abusiue, hoc est intelligendum, quatenus scilicet sunt quædam conditio prærequisita ad pœnitentiam, sicuti priuatio ad generationem.

Dices, quamvis non sint materia, quatenus committuntur, sunt tamen quatenus proferruntur: confessio enim reuera est materia Sacramenti Pœnitentiæ. Respondetur etiam oris confessionem appellari in decreto Eugenij *quasi materiam*, vt sciremus, non omnes materiæ conditiones in ea exactè requirendas. Præterea, respondeo peccaturũ sacerdotẽ, qui absolueret aliquem à peccatis, de quibus sciret ipsum non
dole-

dolere: poenitens autem peccata, de quibus non dolet, non censetur facere materiam absolutionis; quare negandum licere unquam proferre formam Sacramenti Poenitentiae super materiam ineptam. Adde, quod materia, quae requiritur apta, est re vera poenitens ipse, actus vero eius sunt veluti dispositiones materiae vel applicationes; quia animus, qui videri non potest, per actus externos representatur. Et si sufficienter representetur per unum actum, parum refert, quod talis non habeatur per alium, dummodo hic non tollat sufficientem dispositionem per alium representatam, ut contingit in peccato mortali, non autem in veniali: at vero totum id quod est in calice, supponitur tamquam propriissima materia sanguinis Christi: non est igitur eadem ratio de ipsa, ac de peccatis.

Dicemus praeterea in illa mihi secundi argumenti, nisi aqua conuertatur in sanguinem, fore ut aliquando proferantur verba super materiam, quam certo scimus non esse aptam. quod probatur ex Rubrica Missalis, in qua habentur haec verba: *Si celebrans ante calicis consecrationem, aduertat non fuisse positam aquam, statim ponat eam, et proferat verba consecrationis.* In quo casu certum est in omni sententia, aquam non esse in vinum conuersam, quia haec conuersio non fit in instanti: ergo certum est, (posita

sita Aduersariorum sententia) proferri verba super materiam ineptam, & hoc ex præcepto Ecclesiæ, quæ tamen non monet sacerdotem, vt intentionem restringat ad materiam tantum aptam.

Confirmatur argumentum, quia vt Suarez ipse fatetur, docent omnes Theologi, aquam infundi calici, vt conuertatur in sanguinem: sed in hoc casu non potest alio pacto conuerti, nisi immediatè, ergo id intendit & sentit Ecclesia. Adde, quòd Concilium Tridentinum sess. 6. docet remanere dumtaxat species vini, & idem docent omnes Theologi in hoc autem casu clarum esset remanere etiam substantiam aquæ. Præterea Ecclesia declarat, se habere pro inconuenienti, vt sit alia substantia in calice simul cum sanguine Christi, etiam ipsius aquæ: nam in eadem Rubrica sequitur: *Si id aduertat post consecrationem calicis, nullo modo apponat, quia non est de necessitate Sacramenti.* At quid, quæso referret, ponere immediatè ante consecrationem, & non postea, si eodem modo semper remaneret aqua, & nihil per consecrationem acquireret? Neque refert, si dicas, hoc esse per accidens, quòd aqua apponatur immediatè ante consecrationem; tum quia tam venerandum est hoc Sacramentum, vt neque per accidens sit aliquod inconueniens circa ipsum permittendum; vnde videmus Ecclesiam, quo ad fieri po-

potuit, casus huiusmodi praeuidisse, & eis prouidisse, tum etiam, quia potius est per accidens illa mora, quae inter missionem aquae cum vino & consecrationem intercedit, cum sit praeter institutionem huius Sacramenti, & propter Ecclesiae ceremonias tantum introducta. Praeterea inquit Sotus, quod sacerdos magnum sacrilegium committeret, si aquam apponeret, quam certo sciret non couertendam in vinum, quia remaneret simul cum sanguine Domini: ergo cum non sit dicendum Ecclesiam committere magnum sacrilegium, fatendum est non remanere aquam ex ipsius mente, sed conuerteri in sanguinem.

Confirmatur, quia ex duobus malis maius vitandum est: sed minus malum est, non adhibere aquam, quam proferre formam super materiam ineptam, quia illud non spectat ad essentiam Sacramenti; hoc autem spectat: ergo si non crederet Ecclesia aquam esse materiam certam, non praeciperet tunc apponi.

Tertio principaliter, argumentor: Materia consecranda debet esse sensibilibiter determinata, ita ut possit sensibus distingui à quacunque alia materia: sed si aqua non est immediate in sanguinem Christi conuertibilis, vel nunquam, vel non semper materia calicis esse poterit huiusmodi: ergo. Maior probatur ex vi pronominis, *Hic*: oportet enim, ut inquit Sua-

rez

rez disp. 43. sect. 5. vt per ipsam rei præsentiam definiatur, & vt quasi manibus, vel signis ostendatur res, ad quam locutio dirigitur. Et addit Greg. de Valentia disp. 6. q. 2. p. 3. hanc demonstrationem fieri debere modo quodam externo, & morali, atque adeò secundum sensum aliquem externum, vt rectè etiam aduertit Sotus. quare secundum omnes, si quis præsentem haberet octo formulas siue hostias, & intenderet sex tantum consecrare, non determinando quas, nulla earum consecrata esset: item non sufficeret remittere suam intentionem in intentionem Dei, quia per hanc non determinaretur sensibiliter materia, nisi per miraculum, quod non est expectandum. Immo addit Suarez disp. 43. sect. 7. (cuius auctoritate libenter vtor, tum quia apud Recentiores meritò magna est, tum quia cum sit ipse veluti dux Adversariorum, maiorem vim contra ipsos habet) addit inquam Suarez, quòd pars panis in toto existens, non potest per se sola consecrari, nisi sensibiliter designari possit, quia & ratio Sacramenti, & propria ratio huius formæ hoc requirit. Est igitur sensibilis determinatio, vt in maiori dicebamus, necessaria in materia consecranda. Minorem autem, videlicet hanc determinationem, sæpè non reperiri in vino, si aqua non est materia apta, probamus, quia, vt supra diximus, vel numquam, vel non semper est a-

L₃ qua

qua conuersa in vinum, quamuis cum eo sit mista; tunc autem materia consecrabilis esset vinum tantum, sed non potest hoc sensibilibiter designari, quin designetur etiam aqua, quia nullus est sensus qui inter ea discernat: ergo tunc materia non est sensibilibiter designabilis. Neque sufficit, quod quis in mente designet, dicatque intra se, Volo consecrare vinum tantum, & non aquam. quia hæc designatio est merè mentalis, quæ hic non sufficit, vt diximus. Nam & quando sacerdos ex sex formulis tres tantum consecrare intendit, oportet, vt sensibilibiter eas designet, vel per separationem quoad locum, vel saltem per oculorum obtutum, qui in tres tantum feratur, vel per aliquod aliud signum sensibile.

Obijciēs, Si sacerdos sex hostias ante se haberet, quarum tres triticeæ essent, tres verò hordeaceæ, posset dirigere intentionem ad consecrandas triticeas tantum, quamuis ab hordeaceis, nec loco, nec alio signo externo separatæ essent, quia satis censentur distinctæ, eò quod diuersam habeant naturam: ergo similiter licebit consecrare vinum tantum, quamuis cum aqua confusum, quia satis est quod per naturam suam, quæ sensibus abundè percipitur, distinguatur. Respondeo, & antecedens non carere difficultate, & consequentiam non admittendam: non caret difficultate antecedens,

dens, quia pronomen *hoc*, debet ferri in aliquod sensibus designatum : non videtur ergo sufficere, quòd illæ hostiæ sint natura distinctæ, sed oportet etiam, vt prout distinctæ sensibus obiciantur. quod hîc non contingit. Vnde si sacerdos credens vnâ tantum habere hostiam præsentem, duas tamen reuera habeat, ambas consecrat; quia de ambabus verificatur pronomen *Hoc*, & vnâ non fuit ab altera sensibilibiter distincta.

Est quoque neganda consequentia, quia illæ hostiæ sunt verè à parte rei distinctæ, & sensibilibiter designabiles, vnde & post consecrationem non confunderentur, sed possent consecratæ à non consecratis separari. At in calice vinum & aqua ita sunt inuicem confusa & permista, vt neque ante, neque post consecrationem distingui possint, vel separari; nisi fortè per aliquod artificium, quod neque congruum est adhiberi, neque de eo est ratio habenda, cum, vt rectè etiam dicebat Scotus, non sint Sacramentorum res subtilitatibus his definientiæ : ergo non est par ratio de illis hostiis & de hoc misto.

Quartum argumentum, quod etiam pro confirmatione tertij deservire potest, est ab inconuenienti: quia data Aduersariorum opinione, sequeretur, nos certos non esse post consecrationem, sub qualibet gutta illarum specie-

rum sanguinem Christi contineri : hoc autem est maximè absurdum, ergo & illud ex quo sequitur. Consequentia probatur, posito casu, de quo Suarez sect. 4. disp. 65. nempe, si contingat, aquam conueri in vinum, vel ante finitam formam, vel in eodem momento, in quo perficitur forma cōsecrationis, aut immediatè post; tunc enim affirmat, consequenter ad sua principia, quòd aqua verteretur in vinum, & illud vinum non verteretur in sanguinem, sed simul esset cum sanguine in calice : ergo posito hoc casu immediatè post consecrationem adesset aliquod vinum in calice quo ad substantiam non conuersum in sanguinem : numquam autem nos possumus esse certi, an ista conuersio aquæ in vinum fiat ante prolationem verborum, vel dum ipsa verba proferuntur : ergo numquam possumus esse certi, quòd post consecrationem immediatè, nihil substantiæ vini sit in calice. Hoc autem esse inconueniens probatur. Primò, quia Concilium Tridentinum sess. 13. can. 2. docet, remanere dumtaxat accidentia vini, & anathematizantur contrarium dicentes, ergo pro certo habet non remanere ibi vini substantiam. Item can. 3. *Si quis, inquit, negauerit in venerabili Sacramento Eucharistia sub vnaquaque specie, & sub singulis speciei partibus, separatione facta, totum Christum contineri, anathema sit* : ergo sentit sub qualibet gutta illarum

rum specierum vini adesse sanguinem Christi.

Neque effugies si dicas, Concilium loqui de Sacramento Eucharistiæ, vinum autem, quod non vertitur in sanguinem Christi, non esse Eucharistiam, quoniam nomine Eucharistiæ intelligi debet id quod pro Eucharistia veneratur Ecclesia: alioqui posset etiam aliquis dicere, Christi sanguinem esse tantum sub extrema superficie vini, & illam solam esse Eucharistiā; neque hoc esse contra Concilium, quod tamen reuera esset: Ecclesia autem tamquam verissimum Eucharistiæ Sacramentum totum illud veneratur, quod post consecrationem sub vini speciebus repræsentatur.

Præterea, si quælibet gutta à cæteris vini speciebus separetur, nemo est fidelium, qui in ea sanguinem Christi non agnoscat & veneretur; & illi omnem reuerentiam sanguini Christi debitam exhiberi præcipit Ecclesia: signum est ergo certum haberi sub qualibet particula illarum specierum adesse sanguinem Christi.

Dices, ita vinum de nouo ex aqua productum commistum esse cum reliquis speciebus vini, vt non possit separari, & idcirco sub quælibet gutta, immò etiam particula guttæ adesse sanguinem Christi. Verum hoc dici nequit iuxta eorum principia: nam in vera mixtione hoc tantum contingit, vt quælibet pars mixti sit mista; hîc autem non fit, vt ipsi quoque fa-

tentur, vera mistio; alioqui oporteret, vt ex duobus corruptis tertium produceretur: non ergo ita sunt confusæ partes, vt omnino non possint separari. Confirmatur, quia differt accretio viuentium ab accretione non viuentium; quòd illa crescunt in omnem sui partem, hæc autem cum accrescant tantum per iuxta positionem, ex ea parte tantum crescunt, ex qua noua materia eis apponitur: Vinum autem si aquam in se conuertit, non accrescit instar viuentium, quia caret anima, ergo non crescit in omnem partem, sed tantum per iuxta positionem: ergo non in omni sua parte recipit augmentum, consequenter non cum qualibet parte ipsius est pars vini denuo producti cõmixta.

Quartò, cadat gutta huius vini super lintum, videmus partes tenuiores vini exterius diffundi, quæ vel sunt aqua, vel illud vinum, quod ex aqua factum esse dicunt Aduersarij; ergo tunc saltem vinum non consecratum à consecrato separaretur, & tamen Ecclesia totum habet pro sanguine Christi. Si dicas, totum haberi pro sanguine Christi, quia Ecclesia nescit discernere inter vinum consecratum, & non consecratum. Contrà, primò enim sequeretur, quòd idem dicendum esset, si nouum vinum post consecrationem calici infunderetur, de quo tamen omnes affirmant haberi pro non consecrato. Secundò, si de hoc dubitaret

Ec-

Ecclesia, præciperet eo pacto seruari totum illud vinum, vt vtrumque periculum & idololatriæ, & etiam contemptus sanguinis Christi vitaretur. Tertiò, si nequeunt discerni post consecrationem, hinc roboratur nostrum argumentum, neque ante consecrationem posse discerni, & consequenter vinum mistum non esse consecrabile sine aqua admista, vt hæc inconuenientia vitentur.

Quintò, principaliter argumentor, sacerdotem, qui corpus & sanguinem Domini tantum sumpsit, ieiunum esse Ecclesia non dubitat; sed si aqua in sanguinem non verteretur, non posset de hoc esse certa: immò aliquando non esse ieiunum pro explorato haberet: Igitur, &c. Maior probatur, quia quando permittit sacerdotibus sæpius in die Sacrum facere, vt in die Natalis Domini, præcipit, vt abluitionem non sumant, ne ieiunium frangant, cap. *Ex parte. de celebrat. Missarum*, quod aliqui censet non frangi per Sacramenti sumptionem, cum in eo nullam adesse substantiam præter corpus & sanguinem Domini supponat: quapropter etiam Hostiensis in cap. *Cum Martha. de celebrat. Missar.* hinc probat, non remanere aquam in calice post consecrationem. Minor probatur, quoniam cum non possit Ecclesia esse certa, an tempore consecrationis aqua sit conuersa in vinum, si aqua in sanguinem non

transubstantiaretur; neque posset esse certa, aquæ substantiam in calice non esse, & consequenter sacerdotem esse ieiunum. aliquando etiam certum esset, ieiunum non esse, vt in casu illo, quando instante iam consecratione aqua apponitur.

Respondet ad hoc Suarez, satis esse, vt probabiliter credatur, aquam esse conuersam in vinum; in secundo autem casu, quando certum est, non esse conuersam, consultius esset, inquit, vt sacerdos se existimaret non ieiunum, neque iterum conficeret: quamuis si vellet alteri opinionioni adhærere, non damnamus illum.

Verum, meo iudicio, non satisfacit, quia Ecclesia non tantum probabiliter credit, sed etiam pro certo habet, huiusmodi sacerdotem esse ieiunum: alioqui enim cum nulla adsit necessitas pluries in die celebrandi, non exponeret illum periculo celebrandi non ieiunum, quia hoc maximè solet vitare Ecclesia. quare neque ad communicandum infirmum in periculo mortis, censent Doctores, posse sacerdotem celebrare non ieiunum, vt refert idem Suarez disp. 68. sect. 5. Neque est credibile, Ecclesiam, si hoc pro comperto non habuisset, non aliquid consuluisset circa hoc sacerdotibus, vt periculum frangendi ieiunium vitarent, ne in eo quidem casu, in quo concedunt Aduersarij certum esse sacerdotem non esse ieiunum, esset

esset etiam res quæ sacerdotum conscientias scrupulis illaquearet : semper enim timerent, ne vel ex debilitate vini, vel ex maiore aquæ apposita quantitate, remansisset aqua post consecrationem, & consequenter ipsi non essent ieiuni. Esset etiam contra mentem Ecclesiæ non celebrare secundam Missam in die Natalis Domini in illo secundo casu ; quando quis certus est, aquam non fuisse in vinum conuersam, cùm Ecclesia absque vlla huiusmodi exceptione moneat tres Missas celebrandas esse.

Confirmatur, quia S. Thomas hoc eodem argumento vtitur qu. 72. art. 2. ad probandum non remanere post consecrationem substantiam panis.

Quod verò aliqui dicunt, etiamsi maneat aqua, non frangi ieiunium, quia sumitur simul cum Sacramento, friuolum est. quia etiam purificatio calicis semper sumitur cum aliqua sanguinis particula, & tamen Ecclesia per eam frangi ieiunium existimat. Præterea, per illius aquæ sumptionem reuera ieiunium naturale soluitur, quod tamen secundum omnes prærequiritur ad celebrationem. Et confirmatur, quia cùm Ecclesia strictissimè velit hoc ieiunium obseruari, non decet absque illius auctoritate, quæ hîc non adest, aliquam exceptionem fieri.

Sextò principaliter, quoad sensus nostros,

& existimationē humanam nullum est discrimen inter vinum quod habet aquā admistam, nondum tamen in se conuersam, & vinum quod illam in se iam conuertit: ergo vtrumque est materia æquē apta ad consecrationem. Antecedens sensibus patet, quia nemo est, qui gloriari possit, se cognoscere, quando aqua iam sit conuersa in vinum: nam & color, & sapor, quales percipiuntur immediatē post infusionem aquæ, tales quoque sentiuntur si diu post iisdem sensibus admoveantur; neque minus censetur quis bibere vinum dilutum, quando illi multo antē infusa fuit aqua, quā si tunc, cū illud est potaturus, ei apponatur. & quamuis aliqui dicant melius esse longē antea misceri vinum, non tamen aliam afferre solent rationem, nisi quia per illud temporis interval- lum magis se penetrant, & perfectiūs vinum & aqua permiscentur. Probatur consequentia; quia sicuti Christus instituere voluit hoc Sacramentum in rebus quæ communiter cibo & potui deseruiunt; ita etiam Ecclesia ab ipso docta has materias considerat in ordine ad vsum communem & hominum existimationē, non autem, vt etiam notabat Scotus suprā citatus sect. 7. has phycas subtilitates & à sensibus remotas: cū ergo vtrumque in vfu hominum æquē censeatur vinum dilutum, vel dicendum est temperatum vinum posse esse materiam

teriam Eucharistiæ, & semper esse poterit, siue aqua sit conuersa in vinum, siue non: vel negandum omnino vinum dilutum esse posse materiam aptam, (quod tamen nemo dicet) & sic etiam illud, quod in se iam aquam conuertisse dicitur, non erit apta materia calicis. At obiicit Suarez, sicut dicitur dilutum absolutè vinum, licet particulam aquæ admixtam habeat, ita dicitur sanguis Christi post conuersionem, licet eandem particulam aquæ admixtam habeat. Ad quod respondeo, primùm negandam esse consequentiam: nam aqua solet uisceri vino, & sub vini nomine comprehendi; at non solet misceri cum sanguine, neque consequenter sub illius nomine intelligi; præcipuè si loquamur de sanguine uiuo, qualis est in calice, cum quo numquam est aliqua gutta aquæ admixta, alioquin miraculum non fuisset ex latere Christi aquam simul manasse cum sanguine.

Deinde comprehenditur aqua sub nomine vini, quia eius accidentia participat; vel saltem ita permiscetur & confunditur cum vino, ut ipsorum accidentia non discernantur; & quoniam accidentia vini multò magis sensibilia sunt, quàm aquæ, ipsa ferè sola sentiuntur, & ita videtur aqua accidentibus vini affecta, & à vino absorpta; at verò non possumus dicere, aquam ita permisceri cum sanguine Christi, neque ab eius accidentibus vllò modo affici: non rectè

rectè igitur sub illius nomine comprehendetur. Præterea, verborum formæ efficacia & reuerentia quæ debetur sanguini Christi, eiusque dignitas non patiuntur, vt aliquid, quod ab eo substantialiter differt, sub ipsius nomine comprehendatur. quæ ratio non habet locum in vino.

Ad hæc, argumentum contra ipsum Suarez retorquetur, nam vel aqua comprehenditur sub nomine vini, & ita conuertetur vi formæ in sanguinem Christi; vel non comprehenditur, & multò minùs poterit sub sanguinis nomine intelligi. Si verò quis dicat, eodem argumento posse contra nos Suarez vti, vt solet in huiusmodi dilemmatibus euenire. v. g. si vrgeat, vel sub nomine vini comprehenditur aqua, & comprehendetur sub nomine sanguinis; vel non comprehenditur; ergo non poterit conuerteri in sanguinem.

Respondeo, hanc retorsionem contra nos vim non habere: & ratio est, quia prius est, aquam vel comprehendi, vel non comprehendi sub nomine vini, quàm sub nomine sanguinis: consequenter dum tibi concedo comprehendere sub nomine vini, antequam possis inferre, Ergo comprehenditur sub sanguine, iam conuersio vini facta est; ac proinde si ipsa censetur idem cum vino, iam est in sanguinem conuersa, & tunc opus non est, vt sub nomine sanguinis

nis comprehendatur, cum verè sit sanguis: si verò sub nomine vini non comprehenditur etiam aqua, iam patet neque subintelligi posse in sanguinis nomine; quare argumentum pro nobis tantum militat, non autem contra nos.

SECTIO IX.

Ex Aduersariorum verbis eadem sententia colligitur.

EA est veritatis vis, ut suos Aduersarios, vel inuitos testimonium sibi perhibere non raro cogat. quod in hac quæstione contigisse, nunc demonstrandum suscipimus, ut nostræ sententiæ quanta sit, & quàm perspicua veritas, innotescat.

In primis ergo fatentur Aduersarij, sententiam illam, quæ asserit, aquam vino mistam manere post consecrationem in propria specie, relictam fuisse ab Innocentio, tanquam minus probabilè, & ab omnibus Scholasticis reiectā, ut sectione prima retulimus. Quid autem aliud hoc est, quàm suo se gladio transfuerberare, & foueam, in quam incidunt fodere? in hoc enim controuersia nostra versatur, quòd volumus nos, aquam non remanere, & consequenter verti in sanguinem, si antea non sit facta vinum; ipsi verò volunt, non conuerti in sanguinem,

nem, & proinde in propria substantia post cōsecrationem, aliquando saltem, permanere. Dicent fortè damnandam illam sententiam, quæ asserit, aquam semper permanere, non verò eam, quæ aliquando.

Verùm, quisnam Theologorum hanc responsionem non damnet? dum enim res scientificè tractantur, quæ de eis indefinitè proferuntur, debent vniuersaliter intelligi, alioqui essent contingetia, quæ sub scientiam non caderent. Hinc videmus indefinitè dici vinum verti in sanguinem, panem in corpus Christi, hominè esse rationalem, & alias innumerabiles conclusiones certissimas & vniuersalissimas indefinitè proferri, neminemque dubitare, an semper, vel aliquando tantùm sint veræ. Præterea, etsi non omnes propositiones indefinitæ æquiualerent vniuersalibus, saltem hoc verum esset de negatiuis: negatio enim, vt Dialectici docent, hac vi pollet, vt totum & omnino neget, & vniuersaliæquipolleet. Quare etiam si semel tantùm in anno aqua remaneret in calice, falsa esset hæc propositio, *Aqua non remanet*; & vera hæc, *Aqua remanet*, vt in re simili tradit Lud. Molina 1. p. q. 14. art. 13. ad 4. & ipsemet Suarez suo tom. 3. in 3. p. disp. 48. sect. 2. §. *Ad argumentum*. Quocirca etiam diuinæ legis interpretes docent, præcepta negatiua obligare semper, & ad semper. *Non occides*, inquit Deus indefinitè.

finitè, & quis tam impius vel plumbeus est, vt dicat prohiberi tantùm, vt non semper occidamus, non verò, vt aliquando? Cùm igitur omnes Scholastici, & omnes Patres doceant aquam non remanere in calice post consecrationem; quis non videat, quàm improbabili- ter hoc negatiuum axioma non vniuersaliter, sed in aliquibus tantùm casibus verum esse dicatur? Cur enim, si aliquando remanet aqua, aliquando non remanet, dixerunt omnes absolute non remanere, & sententiam illam, quæ remanere dicebat, vt omnino improbabilem reiecerunt? Præterea, vel qui asseriebant aquam permanere, intelligi debent vniuersaliter, vel particulariter: si vniuersaliter, ergo multò magis ita intelligi debent, qui negant permanere, cùm negationis sit maior vis quàm affirmationis: si particulariter, ergo cùm per Aduersarios verum dicerent, immeritò impugnantur; vel si non immeritò, vt verè dicendum est, damnata est sententia, contra quam nos modò disputamus, quæ affirmat aliquando aquam post consecrationem remanere.

Præterea, id ipsum rationibus ostenditur. Nam, vel ex eo, quòd aqua remaneat, sequitur aliquod inconueniens, vel nullum; si nullum, cur ergo non poterit remanere semper? cur è illa sententia damnatur, ad quam nullum sequitur incommodum? si aliquod sequitur, cur ali-

aliquando concedemus permanere? numquid quia rarò accidit, permittendum erit aliquod incommodum contra sanctissimi Sacramenti dignitatem, & reuerentiam? quis hoc affirmare audeat?

Confirmatur, quia nullum omnino argumentum fieri potest contra illos, qui simpliciter asserébant, aquam permanere, quod æquè contra nostros Aduersarios, qui aliquândo tantum permanere dicunt, contorqueri non possit. Nam ipsemet recentiorum doctissimus Alani sententiam, quæ nostra etiam est, referens, *Fundamenta*, inquit, *potissima huius sententia sunt eadem, qua contra secundam sententiam posuimus.* Atqui si eadem sunt, quomodo ergo paulò suprà firmissima erant, nunc sunt infirmissima? contra alios validissima, contra ipsius sententiam imbecillima? saltè docuisset nos pulcherrimum hoc artis genus, quo idem gladius semper in manibus nostris ferreus esset & acutissimus, in aduersariorum plumbeus & obtusus. Ipse certè nullam attulit rationem, qua ostenderet argumenta secundam illam sententiam profligantia, non æquè suam ipsius conterere: attamen, vt oculatissimus erat, subaspexit hunc scopulum, vt quæ euaderet, dixit: *Si interdum contingat consecrationem fieri ante conuersionem aqua in vinum, non sequitur aliquod incommodum: magis quidem decet, vt si commodè fieri possit,*

test, aqua prius in vinum conuertatur, & hoc sensu intelligenda & acceptanda sunt, quæ contra secundam opinionem dicta sunt; si tamen aliud accadat interdum, non refert.

Verum hæc eius responsio (bona venia tanti viri dixerim) nec sibi constat, neque eius superius dictis cohæret, atque omni probabilitate caret. Non sibi constat, nam primum ait, nullum sequi incommodum, quod aqua remaneat; deinde magis decere, quod non remaneat; postremò non referre, siue maneat, siue non. At, si non refert, quomodo ergo magis decet, ut non remaneat? numquid nihil refert, ut quàm decentissimè hoc Sacramentum peragatur? si etiam nullum sequitur incommodum ex eo quod aqua remaneat, unde nobis constare potest magis decere, ut non remaneat? Neque etiam, eius superius dictis cohæret, nam quomodo vir grauissimus atque doctissimus secundam sententiam supra reiecit ob argumenta, quæ aliquid concludunt, quod nihil refert? si quæ nullum sequitur incommodum ex eo quod aqua permaneat, quomodo supra tot incommoda intulit ex illa secunda sententia, quæ hoc idem assererat? Verum inquit, *illa argumenta in hoc sensu acceptanda sunt*, scilicet, ut non aliquod incommodum inferant, sed tantum id, quod magis decet, probent; cur ergo ibi nos de hoc non admonebat, verum

M

tam-

tamquam firmissima, & omninò expugnantia argumenta proponebat? Præterea, vel illa argumenta sunt omnino inutilia, vel efficaciter, & vniuersaliter id quod intendunt, euincunt; deducuntur enim ex veritate formæ: nam si inquit ipse, *Non totus ille liquor, qui in calice continetur, est sanguis, forma non est simpliciter vera:* ex adoratione Ecclesiæ & similibus. Formam autem Eucharistiæ esse veram non tantum magis decet, sed omnino necessario & semper fatendum est: Ecclesiam non committere idolatriam in veneratione Sacramenti, non tantum magis decet, sed de fide est: ergo non datur medium, sed vel illa argumenta efficacia sunt, & nostram quoque probant sententiam, vel inefficacia, & frustra contra illam secundam sententiam sunt adducta. Quare, & ipsemet conatus est quidem ipsa dissoluere; quomodo autem probarent saltem aliquid, quod magis deceret, aggredi non est ausus. Adde, nec suis principiis esse consentaneum, quod ait, non referre, si interdum aqua remaneat: nam suprà dixerat, hac intentione miscendam aquam, ut in sanguinem conuertatur, & paulò post apponendam aquam in eâ quantitate, quæ possit conuerti ante consecrationem, quia certa incertis sunt præferenda. At si non refert, quòd conuertatur, ut quid hoc intendam, & ita me gerere satagam, ut conuertatur?

Postre-

Postremò, probabilitate caret illa responsio. quo pacto enim verisimile est, omnes Scholasticos, & Patres conuenisse in ea sententia reiicienda, ex qua nullum incommodum sequeretur, sed illud tantum, quòd non magis deceret? Certè S. Thomas inquit, illam sententiam non posse stare; Didacus Nuñez esse temerariam; Sotus, si quis appoheret aquam, quam sciret permanfuram, fore sacrilegum; Doctores Conimbricenses, falsitatis conuinci; Ioseph Angles in 4. d. 8. inter errores numerat; Patres sancti in eodem ferè albo cum sententia, quæ negat vinum conuerti, eam reponunt: nam absque vilo discrimine, vinum dicunt & aquam in sanguinem conuerti; Card. Baronius eam appellat hæresim; Card. Alanus contrariam certa fide tenendam. Quis igitur credat ex hac sententia nihil sequi incommodi, & in hoc sensu accipienda esse ea omnia, quæ contra illam & Patres, & Scholastici proferunt? Prætereasi ob illud tantum reiecta est illa sententia, quòd aliquid minùs decens poneret, ergo etiam reiicienda Aduersariorum sententia, ex qua idem minùs decens sequitur. At inquit ipse, tunc tantum magis contrarium decere, quando commodè fieri potest: ergo dicent auctores secundæ sententiæ, si numquam commodè fieri possit, vt nos asserimus, & Aduersarij ipsi numquã contrarium probauerunt, non erit minùs decens,

cens, aquam semper permanere. Ego verò, Ergone dicam, ex nostro commodo, vel incommodo aliquid decebit, vel non decebit Sacramentum? numquid eius natura mutabilis est, vt hoc nunc deceat, quia commodum nobis est; paulò pòst dedeceat, quia nobis incōmodum? quis non videat, quàm incommode hæc dicantur?

Potest quidem ex nostro incommodo aliquid, quod non magis deceat hoc Sacramentum, permitti, vt si in vino paululū acescēte, sed nondum aceto conficiatur: at propter nostrum vel commodum, vel incommodum non desinet magis hoc Sacramentū decere vinum optimum, quàm acescens: ergo si non decet aquam permanere, quidquid sit de nostro commodo, semper non decebit.

Probabilitate quoque destituta est illa responsio, si rationes spectemus, quæ & efficaciter & vniuersaliter concludunt, aquam permanere non posse, quòd de vnaquaque singulatim ostendere facile foret, nisi abunde hoc iam constaret ex dictis. Hic prosequamur ergo ostendere, sententiam illam de aquæ permanentia, non tantum vt plurimum, sed etiam vt semper falsam, fuisse à Patribus & à Scholasticis reiectam.

Argumentor igitur Quartò, à sensu distributio ad collectiuum. Potest per Aduersarios
aqua

aqua remanere cum his, & cum illis, & cum quibuscumque aliis Sacramenti speciebus, ergo & cum omnibus. Antecedens patet, quia si dicunt posse interdum permanere, non est vlla ratio cur alias permanere non possit; quamuis enim dicere possint, tunc non permanere, quando aqua in vinum est conuersa, tamen quod nunc fuerit aqua in vinum conuersa, est omnino per accidens. quare de vnoquoque Sacramento Eucharistiæ, seu de quibuscumque speciebus sigillatim verum erit dicere, nullum esse incommodum, nullum inconueniens, quod cum ipsis aqua permaneret. Patet autem consequentia, quoniam, quamuis hoc argumentum à sensu distributiuo ad collectiuum in rebus fortuitis, & in liberis non valeat ob moralem repugnantiam, quæ sine physica impotentia intercedere potest; in rebus tamen naturalibus, in quibus moralis repugnantia locum non habet, est optimum. At verba consecrationis modo naturali, quamuis supernaturali virtute, operantur, & nihil in Sacramento est, quod possit requiritis ab hominum arbitrio, vel casu pendeat: ergo si potest in vnoquoque Sacramento aqua remanere, poterit etiam in omnibus. Si dicas moraliter esse impossibile, quod aqua numquam conuertatur in vinum; respondeo, cum hoc pendeat à virtute naturali vini, nullo pacto esse impossibile. Secundo non

M 3

tam

tam hinc nos contendere, posse effici, vt aqua numquam conuertatur in vinum, quàm si fiat, nullum esse absurdum: ridiculum enim esset asserere, Patres impugnando illam sententiam, nihil aliud intendisse, quàm moraliter esse impossibile, aquam numquam conuerti in vinum. Si ergo ex hoc tantum impugnatur illa sententia, quòd non sit verisimile semper eo modo apponi vinum & aquam, vt aqua non conuertatur in vinum, posito quòd hoc fieret, nullum aliud sequeretur absurdum: ex parte igitur Sacramenti nullum erit incommodum, quòd aqua semper permaneat, quod hìc intendimus.

Quintò, si sensus Patrum & Scholasticorū fuisset impugnare eam sententiam in eo tantum euentu, quando aqua vertitur in vinum, reiecissent eam, tamquam omnino hæreticam: ergo, cum vt talem non reiecerint, signum est, non dependenter ab illo casu, sed vniuersaliter eam respuisse. Antecedens patet, quia quando aqua conuersa est in vinum, iam est de fide ipsam conuerti in sanguinem, quia non est amplius aqua, sed vinum: & de fide est totam vini substantiam conuerti in sanguinem Christi; ergo cum damnata tamquam hæretica communiter non fuerit illa sententia, signum est reiectam fuisse in alio sensu, id est, supposito quòd aqua non sit versa in vinum. Vel dicendum est, ipsos voluisse tantum reijcere sententiam

tiam illam philosophicam, quòd aqua non conuertatur in vinum. quod sanè ridiculum esset, & iam suprà à nobis impugnatum sect. 6.

Præterea Sextò, ponamus in omni consecratione aquam remanere, quæram tunc ab Adversarijs, vel erit inconueniens respectu omnium consecrationum, vel tantum respectu aliquarum; si respectu omnium, ergo numquam debet concedi, aquam remanere. quis enim adeò stupidus erit, vt dicat, si aqua remaneat in hac Missa tantum, nullum esse incōueniens; si verò remaneat in hac, & in alijs, tunc esse inconueniens, non solum quòd remaneat in alijs, sed etiam quòd remaneat in hac? hæc enim Missa singularis est independens ab omnibus alijs, nec ab alijs quidquam recipit, vel quidquam ei detrahitur: ergo illud, quod non est inconueniens, si fiat ipsa sola, neque erit inconueniens, si fiat simul etiam in omnibus alijs. Dicent fortè, esse inconuenient tantum in aliquibus, in alijs verò non; at nulla ratio diuersitatis assignari potest, cum æqualis perfectio in omnibus requiratur. Dicent, non esse vllum inconueniens, aquam remanere in hoc Sacramento distributiue sumpto, esse tamen collectiue: sed neque hoc collectiuum inconueniens potest aliunde colligi, quàm ex sensu distributiuo. An respondebunt, esse inconueniens, quatenus Patres supponunt, aquam con-

aqua prius esse in vinum? ergo, qui diceret quam numquam conuerti in vinum, & semper permanere in calice, nullum diceret absurdum, neque contradiceret Patribus, vel in hoc tantum quod est merè philosophicum, aquam scilicet non conuerti in vinum. Præterea frustra etiam impugnaretur illa sententia, quia illi, qui dicunt aquam permanere, utique supponunt non conuerti in vinum, & in hoc sensu Aduersarij censent, non esse aquam conuertendam in sanguinem, sicuti & illi. Confirmatur, quia Theologi numquam argumentantur contra illam sententiam ex eo, quod aqua debeat conuerti in vinum, sed ex veritate formæ, & ex alijs principijs theologicis, quæ tantum abest, ut probent aquam conuerti in vinum, ut hoc supposito, frustra omnino adducantur. Probant igitur esse inconueniens, quod aqua non conuersa in vinum permaneat post consecrationem; atqui si hoc est inconueniens, semper erit inconueniens.

Præterea, qui concedunt semel aquam conuerti immediatè in sanguinem, non possunt non concedere, quotiescumque adest aqua in calice tempore consecrationis, conuerti, quia non est maior ratio de hac vice, quam de altera: ergo similiter, qui concedit semel permanere, debet admittere, nullum esse inconueniens si semper permaneat.

Liquet

Liquet igitur, non disiungendam esse causam illius sententiæ, quam Suarez secundo loco recenset à causa Aduersariorum, frustra quæ hoc contendisse doctissimos recentiores, quæ periculum quidem viderunt, & si caueri potuisset, euitassent, sed verè non poterat; reliqui autem ferè neque aduertisse periculum videntur. quare non, vt prudenter Suarez, rationes contra secundam sententiam extenuant, sed potiùs amplificant, vt Doctores Conimbricenses, qui dicunt, argumentis conuinci; & Nuñez, qui asserit esse temerariam, ex eo præcipuè, quod Sancti docèt, *Totum quod est in calice conueriti in sanguinem*: cui non possum gratias non agere, nam appositissimè ad mentem meam locutus est. quid est enim totum id, quod est in calice, nisi aqua simul & vinum? ergo quotiescumque aqua erit in calice tempore consecrationis, conuerteretur in sanguinem. Prudenter non dixit totum vinum quod est in calice, sed totum id, vt etiam aqua comprehenderetur: alioqui enim esset otiosum & falsum illud dictum.

Præterea, in responsionibus ad argumenta dum quærit Suarez, An sacerdos sit ieiunus, qui aquam nondum cōuersam in vinum tempore consecrationis simul cum sanguine sumit, inquit, *Consultius esset, vt sacerdos se existimaret non ieiunum, neque iterum conficeret, quam-*

quam si vellet alteri opinioni adhaerere, quia totum illud recipitur per modum vnius Sacramenti. & quia contraria opinio non est omnino improbabilis, non damnamus illum.

Ecce affirmat tandem hanc opinionem non esse improbabilem: immò addit, se non damnaturum, qui in praxi secundum eam se gesseret, & tamen in materia Sacramentorum debemus semper propter ipsorum reuerentiam tutiori parti adhaerere, præcipuè cum non adsit necessitas. Nota præterea illam rationem, *Quia totum recipitur per modum vnius Sacramenti.* Si enim per modum vnius Sacramenti est aqua cum sanguine in calice, multò magis per modum vnius materiae Sacramenti erit simul cum vino in eodem calice. Maiorem enim proportionem & veriorem mixturem habet aqua cum vino, quàm cum sanguine. Præterea, cur per modum vnius Sacramenti recipitur aqua cum sanguine, nisi quia se habet simul cum illo per modum vnius potus? si igitur est vnus potus in receptione, cur non erit etiam in consecratione? si autem est vnus potus in consecratione, iam sub nomine calicis intelligitur, & totus conuertitur in sanguinem Christi: longè autem facilius est, vnum potum effici ex vino & aqua, cum ambo sint potus naturales, & inuicem misceantur, quàm ex aqua & Sacramento, cum illa sit res naturalis, hoc verò supernaturale: si ergo

ergo hoc secundum admittit, multò magis illud admittere debebat.

Obseruandus est etiam alius locus P. Suarii disp. 49. sect. 2. dub. 2. vbi probans per verba consecrationis non remanere in Sacramento Eucharistię substantiam panis, refert quosdam Theologos respondentes, non oportere, vt pronomine *Hoc* demonstretur totum id, quòd sub sensibilibus accidentibus continetur; sed ex intentione loquentis posse, quando res plures sub iisdem accidentibus continentur, definiri ac determinari pronomen *Hoc*, ad designandum vnā, & non aliam rem, præsertim quando ea res quæ signatur, est maioris existimationis, & præcipua: sicuti signato marsupio verè diceremus, hoc esse aurum, quamuis aliquid argenti ibi inclusum esset.

De hac autem responsione quid subiicit ipse Suarez? *Sed hac*, inquit, *sententia & multum fauet huius temporis hæreticis, & nullo modo defendi potest.* Hæc ille, & meritò. Sed, quæso, attendat lector, an non in eandem respõsionem, quam hîc impugnat, incidat Suarez, dum argumenta pro nostra sententia diluere conatur: argumentamur enim nos, totum, quod est in calice, debere verti in sanguinem, vt verba consecrationis sint vera. Respondet verò ipse disp. 45. sæpius citata sect. 4. *Ex intentione sacerdotis, seu Ecclesiæ, & Christi, ad quam sacerdos se conformat, solum*

solum designari, quod sub speciebus vini continetur.

At quænam differentia est, inter hanc responsionem, Vera esse hæc verba, *Hic calix est sanguis meus*, quamuis in calice sit parum aquæ, & illam supra impugnatam, huicque exemplo innitentē, verum esse dicere, Hoc marsupium est aurum, quamuis in eo sit parum argenti? utique non possent melius verbis verba, calici marsupium, sanguini aurum, aquæ argentum respondere. quid igitur concludendum est? iudicet lector, an meritò huic quoque responsioni applicare possit ipsius Suarj iudicium, vltimè modo possit defendi.

Dices, adesse discrimen, quòd in marsupio argentum est sensibiliter distinctum ab auro, at verò aqua in calice ita est mista vino vel sanguini, ut ab eo discerni nequeat. Respondetur, hoc nihil eum iuuare; primum, quia & illi, contra quos argumentatur Suarez, supponebant, materiam non esse sensibiliter separatam à forma, siue substantia corporis Christi. Deinde, quoniam hoc discrimen magis roborat argumentum meum, quia pronomen *Hic* facilius potest coarctari ad significandum vnum ex duobus, si duo illa sint distincta, quàm si sint insensibiliter permista. ergo cum aqua & vinum sint in calice ita permista, multò minùs illa verba *Hic calix*, poterunt coarctari ad vinum tantum significandum. Si autem pronomen

men demonstratiuum non coarctatur ad vinum, sed significat etiam aquam admistam; iam negari non potest, quin & ipsa conuertatur in sanguinem, quia verba Sacramentorum efficiunt id quod significant. Sed iam pergamus ad alios.

Henricus Henriquez inter impugnatores nostræ sententiæ annumerandus est, & tamen li. 8. c. 12. hæc ait, *Clarè tum retinet speciem vini consecrabilis ex parua mixtura aromatum aut mellis, vt quando grana pauca hordei miscentur tritico, sit panis omnino aptus consecrationi.* & pro hac sententia Paludanum, Sotum, Ledesmam & Tabienam citat. Quis igitur non miretur, velle hunc auctorem aromata & mel simul cum vino mista in sanguinem verti, cum tamen non sit verisimile, nedum certum, in vinum prius fuisse commutata, & id negare de aqua, quæ ex Christi institutione vino miscetur, & in sanguinem verti à tot Patribus, quot suprâ retulimus, asseritur?

Denique Gabriel Vasquez disp. 178. in 3. p. Patres nostræ sententiæ, quam tamen alioqui impugnât, nolens suffragari fatetur: nam c. 1. n. 4. asserit, *Sententiam illam, quæ affirmat, aquam manere in propria substantia in calice consecrato aduersari Patribus qui dicunt, totum calicem plenum aqua & vino in sanguinem Christi conuerti.* Deinde cap. 3. n. 17. ad Patrum testimonia respon-

spondens, inquit, *Patres hoc tantum contendebant, ut aqua vino misceretur; de modo autem, quo in sanguinem transfiret, non curarunt.* Athoc quid aliud est, quàm dicere, non curasse, an verteretur in vinum? ergo omnino independenter à conuersione in vinum, voluerūt Patres aquam in sanguinem transmutari, quod & nos volumus. Videat igitur lector, quàm parum Aduersariorum dicta sibi cohæreant, quod maximum est falsitatis signum, cum è contra in nostra sententia omnia, & sibi, & Patribus, & Concilijs, & Theologorum doctrinæ optimè consentanea sint. quod magnum est veritatis argumentum, addo & Philosophiæ. Nam auctores contrariæ sententiæ coguntur supponere aquam in vinum substantialiter conuerti, quod in Philosophia falsum esse aliàs demonstrauius, cum nostra autem optimè conuenit non conuerti. sed quoniam affirmant Aduersarij Philosophiam famulari debere Theologiæ, & idcirco fatendum aquam in vinum cōuerti, quia theologiæ doctrinæ hoc magis conducit, ostendamus nos non modò Theologiæ hoc nihil conducere, sed etiam aduersari, & multò magis cohærere cum theologica doctrina, quod aqua numquam in vinum vertatur.

SECTIO X.

Aduersariorum suppositum, quòd aqua in vinum conuertatur, nedum necessarium non esse, sed etiam falsum, theologicis rationibus ostenditur.

EX philosophiæ principijs pendere, an aqua possit in vinum conuerti, nulli meritò dubium esse potest; quia tamen nec veritas veritati, nec philosophiæ veræ potest Theologia esse contraria, non mirum, si quod pendet ex philosophiæ principiis, theologicis rationibus probari, vel improbari possit; sicuti è contra, & res theologicæ rationibus philosophicis confirmari, vel infirmari non rarò solent. si enim conclusio theologica cum philosophica pugnat, certum est & euidens argumentum, alteram earum falsam esse; erit autem falsa philosophica, si theologica ex principijs fidei per necessariam consecutionem deducatur, quia certius & superius est lumen fidei, cui talis conclusio nititur, quàm sit lumen sensuum, vel rationis à quo philosophica deducitur; si tamen conclusio theologica sit in opinione posita, non erit contemnendum argumentum, illam partem esse probabiliorem, quæ cum conclusione philosophica magis cohæret. Possumus igitur

igitur ex rebus theologicis pro philosophicis argumenta desumere ; & è conuerso. Vt ergo ostendamus philosophicam sententiam, quam qu. 52. in lib. de Generat. Aristotelis de aquæ conuersione tradidimus, & rationibus, auctoritatibus, & experimentis clarissimis communiuimus, veræ Theologiæ non esse contrariam, immò maximè consentaneam, & Aduersariorum fundamentum non tantum philosophicis argumentis, sed etiam rationibus theologicis euertamus, aquam in vinum verti in sacrificio Missæ non modò necessarium non esse, sed etiam inconueniens, theologicè hîc palàm faciemus.

Et quidem necessarium non esse nullo negotio probabitur, quoniam ad hoc confirmandum sufficit Rubrica illa Missalis suprâ allata, qua iubetur sacerdos, qui prius oblitus fuerat aquam apponere, illam infundere, & statim verba consecrationis proferre : tunc enim certo certius est, aquam illam ante consecrationem in vinum non esse conuersam, neque Ecclesiam de hoc esse sollicitam, quia alioqui moneret sacerdotem, vt non statim verba consecrationis proferret, & adeò modicam aquam apponeret, vt in tam breui temporis mora posset in vinum conuerti. Quare & Aduersarij concedunt in hoc casu aquam non esse ante consecrationem factam vinum, si ergo de hoc Ecclesia

clesia non est sollicita, quæ tamen omnem diligentiam adhiberi semper docet, ut quàm decentissimè hoc Sacrificium peragatur; argumento est, nihil referre ad ipsius dignitatem, quòd aqua vertatur in vinum, cùm tamen verti in sanguinem, maximi referat ob rationes suprà allatas. Sed iam ostendamus etiam conducibilius esse, ut aqua non vertatur in vinum.

Primùm autem argumentor ex fine, propter quem miscetur aqua vino, quem omnes fatentur esse significationem: Significatio huiusmodi est sacramentalis: ergo non est dicendum aquam conuerti in vinum, antequam conficiatur Sacramentum. Antecedens probatur, Primò auctoritate grauissimorum Theologorum; nam Alexander Alensis 4. p. q. 10. memb. 4. art. 1. dub. 5. *Quantum, inquit, ad plenitudinem, siue perfectionem esse sacramentalis, requiritur aqua, & est de substantia Sacramenti, quia sine aqua admista, etsi habet Sacramentũ effectus suos quantum ad esse spirituale, non tamen quantum ad esse sacramentale, siue significatiuum. Quare censet Alensis non solum hanc significationem esse sacramentalem, sed etiam sine ipsa imperfectum esse Sacramentum quoad significationem.* S. etiam Bonauent. in 4. dist. 11. in expositione literæ ad idem dubium de aqua mista in dolio, respondens, inquit, *Dicendum, quòd admistio aquæ cum vino est sacramentalis, vnde solius*

N

est

est sacerdotis, & est ad significationem, & ideo tunc debet poni, quando iam inchoantur sacra mysteria: Præterea, S. Thomas 3. p. q. 74. art. 7. Appositio, inquit, aquæ ad vinum refertur ad significandum participationem huius Sacramenti à fidelibus, vsus autem fidelium non est de necessitate Sacramenti, sed est aliquid consequens ad Sacramentum. Itaque vult S. Thomas aquæ significationem spectare ad Sacramentum, quamvis non ad essentiam eius. Tandem Gabriel lect. 32. in Canonibus inquit, *mitionem aquæ esse necessariam quantum ad plenitudinem significationis.*

Præterea probatur eadem maior rationibus, propter quas Patres dicunt aquam vino misceri in calice: sunt enim, præter Christi exemplum, multiplices eius significationes; Primò namque significat ex latere Christi aquam & sanguinem fluxisse: ita Alexander I. epist. 1. decretali, vt habetur in c. 1. de consecrat. dist. 2. Secundò, significat vnionem Ecclesiæ cum Christo, quia per aquam significatur populus, Apocal. 17. hoc tradit Cyprianus epist. 62. & alij permulti post ipsum. Tertiò, significat introitum in vitam æternam, vt notat D. Thomas ex D. Ambrosio lib. 1. de Sacramentis dicente. *Redundet aqua in calicem, & salit in vitam æternam.* Quartò, duplicem naturam in Christo, diuinam in vino, & humanam in aqua, ex Niceph. lib. 1. c. 53.

In

In quibus licet aduertere contineri illas tres significationes, quas recolit Ecclesia in Antiphona, *O sacrum conuiuium*, &c. Recolitur enim memoria passionis eius, dum aqua repræsentatur, quæ ex latere Christi exiuit: Gratia, quæ mens impletur, significatur in vnione populi cum Christo: & futuræ gloriæ nobis pignus datur, dum iuxta tertiam rationem, introitus significatur in vitam æternam. Illæ autem significationes sunt maximè sacramentales, ergo sacramentalis quoque est significatio aque, præcipuè cùm ad hoc fuerit instituta à Christo Domino: cùm igitur habeat significationē sacramentalem, non potest non spectare ad Sacramentum. Probatur autem consequentia, ergo aqua non cōuertitur in vinum: quoniam si aqua, vt Aduersarij volunt, in vinum cōuertitur, ergo tempore consecrationis, quando conficitur Sacramentum, non erit ampliùs aqua in calice: ergo omnes significationes, quæ ab aqua desumuntur, peribunt, quia quod non est, significare non potest: ergo numquam poterunt tribui Sacramento Eucharistiæ; quia quando aqua est præsens, nondum adest Sacramentum Eucharistiæ; quando verò fit præsens Eucharistiæ Sacramentum, iam aqua desit esse.

Confirmatur, vel aqua significauit, quando mista fuit; vel significare debet, quando fit Sa-

cramentum: si prius, ergo ante consecrationem adest in Altari verum Sacramentum; nam Sacramentum est signum sacrum à Deo institutum, huiusmodi autem est mistio aquæ: si posterius dicas, ergo oportet adesse aquam; si enim non adest, quomodo significare potest?

Si dicas, sufficere, quòd aliquando mista fuerit, quamuis modò non adsit. Contrà, quia eodem pacto dici posset, aquam, quæ farinæ admiscetur, hæc omnia significare, quia ipsa quoque admista fuit, quamuis modò non existat, quod tamen nemo vñquam asseruit. Dices, farinæ non admisceri aquam in ipso sacrificio Missæ, sicuti vino. Verùm neque hæc responsio satisfacit; Primò, quia neque aqua vino admiscetur propriè in sacrificio, sed in præparatione ad sacrificium; & multò magis patet hoc in ritu Patrum Dominicanorum, qui miscent ante Missam. Præterea, adhuc aliunde est maior ratio de aqua admista farinæ, quàm de mista vino; primò, quia illa non est conuersa in farinam, sed ex ipsa & farina factum est vnum tertium: est ergo adhuc aqua in pane, eo modo, quo miscibilia in misto; at eam, quæ miscetur vino, omnino volunt in illud conuerti, ergo nullo pacto neque actu, neque potentia remanet. Præterea, qui videt panem, scit in eamistam fuisse aquam, at qui videt vinum, non potest cognoscere an mista fuerit aqua: ergo
aptior

aptior ad significandum esset aqua in pane, quàm in vino.

Tandem, etiam si aqua misceretur farinæ in ipsa Missa, adhuc non esset hac significatione sacramentali prædita, ergo idem dicendum de ea quæ vino miscetur. Si dicas antecedens verum esse, quia non ad hoc fuit instituta à Christo mistio aquæ cum farina, verum dices: sed verè quoque dicer alius, non fuisse à Christo institutum, vt aqua tantò ante consecrationem infunderetur calici, vt tota conuerteretur in vinum.

Præterea, si quis post aquæ mitionem cum vino, ante consecrationem denuo totam aquam extraheret, nemo, credo, admitteret illam mitionem præteritam sufficere ad præceptum adimplendum de aqua admiscenda. sed parum refert, quòd aqua hoc modo potius quàm illo desinat esse; ergo siue desinat ibi esse, quia corrumpitur, & in vinum transmutatur, siue quia extrahitur, eadem ratio militabit, & non poterit Sacramento deseruire.

Confirmatur, quia, si vinum, postquam oblatum est, ante consecrationem omnino acetum fieret, non magis amplius esset apta materia ad Eucharistiam conficiendam, quàm si omnino effusum fuisset: ergo par ratio est de extractione, & de corruptione.

Præterea, docet Missale Romanum, si ara-

nea ceciderit in calicem ante consecrationem, debere vinum proijci subtus altare, & aliud poni in calice, & aquam misceri; at si non oporteret aquam adesse, dum Eucharistia sit praesens, sed sufficeret praecessisse mistionem, non esset necesse in hoc casu denuò aquam misceri, quia iam mista fuit. & quamvis hoc secundum vinum dici non possit mistum, nihil referret, quia etiam primum iam desierat esse mistum; requiritur ergo non tantum ut mistio praecesserit, sed etiam ut aqua mista sit praesens.

A simili etiam confirmatur, quia praecipit Ecclesia, non apponendam aquam post consecrationem, etiamsi antea ex obliuione apposita non fuerit. ratio est, quia apponitur ante consecrationem ea intentione, ut conuertatur in sanguinem; at post consecrationem si apponatur, non potest amplius in sanguinem conuerti; merito ergo superuacanea censetur eius appositio. Eodem igitur pacto si ea intentione misceretur aqua vino, & in vinum conuerteretur, & hoc medio etiam in sanguinem, frustra misceretur instante consecratione, quia iam amplius neque in vinum, neque in sanguinem est conuertenda. Si dicas misceri propter significationem, eadem ratione dici potest misceri post consecrationem: magis enim pertinere potest ad significationem sacramentalem id quod fit circa Sacramentum iam existens, quam

quàm id, quod circa materiam futuri Sacramenti efficitur.

Tandem, si illa mistio præcedens esset sufficiens fundamentum huius significationis sacramentalis, sicut illa mistio est præterita, ita significaret unionem Christi cum populo præteritam, non verò præsentem. quod est absurdum.

Idipsum exemplo balsami, quod cum oleo miscetur, ostenditur: nam fatetur Suarez disp. 33. sect. 1. si Chrisma, id est, compositum ex oleo & balsamo, sit adeò vetus, ut odorem balsami amiserit, aut omnino nullam, aut certè valdè dubiam materiam fore, quia iam videretur omnino corruptum Chrisma, saltem quo ad misionem ex oleo & balsamo; ergo eodem pacto si mistio aquæ non remanet, non erit vinum amplius perfectæ materia, quamvis adhuc sit sufficiens, quia mistio aquæ non est de essentia.

Dices, Tempore consecrationis, quamvis aqua iam sit conuersa in vinum, tamen vinum communi appellatione appellatur mistum, quia remanet affectum qualitatibus aquæ, & hoc sufficit ad rationem Sacramenti, quòd vinum tunc dicatur mistum. Verùm supra iam impugnavimus hanc responsionem, & ostendimus, non posse dici mistum vinum, si iam aquam in se conuertit. quòd si communiter hoc nomine appellatur, signum est, non esse aquam in vi-

num transmutatam. Adde, quòd vel accidentia, quæ remanent, sufficienter indicant aquam adesse, vel non. si prius, ergo immeritò adesse negatur, cum eius præsentia sufficienter indicium habeamus: si posterius, ergo non sufficiunt ad significationem. Nam eatenus aquæ accidentia hoc munus præstare possunt, quatenus aquam repræsentant; si autem hanc non indicant præsentem, multò minùs repræsentare poterunt id, quod per aquam significari debet. Ex hac igitur significatione sacramentali rectè concluditur, aquam non debere in vinum ante consecrationem verti, immò etiam ipsam aquam in sanguinem verti: quia si habet significationem sacramentalem, igitur intrinsecè spectat ad Sacramentum, cuius essentiam participat: non spectat autem tamquam forma, ergo tamquam materia, siue tamquam commateria, quia eius significatio est complementum quoddam significationis Sacramenti.

Verùm ad infirmandum hoc idem argumentum possunt nobis nonnulla obijci, quæ reiicienda sunt. Primum est: Notat S. August. *serm. 2. Paschæ*, in his rebus Dominum Eucharistiam constituere voluisse, quæ ex multis ad vnum aliquid rediguntur, nam ex multis granis tritici fit panis, & ex multis vitz racemis vinum, vt nobis charitatem & vnitatem com-
men-

mendaret, sed neque grana, neque vuae racemi adfunt, dum conficitur Eucharistia, sufficit tamen præextitisse: ergo eodem pacto, vt aqua suo munere significandi fungatur, non opus est vt existat, sed sufficit extitisse, & conuersam esse in materiam præsentem, sicuti conuersa sunt grana & racemi.

Respondetur Primò, hanc significationem, quæ sumitur ex multis granis vel racemis, non esse sacramentalem; nam & vestes sacerdotales, & quidquid in Missa geritur, aliquid significant, neque tamen habent significationem sacramentalem, quia neque habentur ex institutione Domini, neque gratiam infallibiliter significant; vnde etiam S. Augustinus non dixit, Dominum in his rebus Eucharistiam instituisse, vt vnitatem & charitatem significarent, sed vt commendaret. Naturalis igitur, vel moralis dici poterit hæc significatio, non autem propriè sacramentalis.

Præterea, quamuis non remaneant grana vel racemi, remanet tamen illud vinum, & ille panis, qui ex pluribus confecti sunt, nec aliter fieri potuerunt, ac proinde hoc sufficeret ad significandam vnitatem ex multis: at aqua & debet significare aliquid per se, quia significat aquam quæ ex latere Christi exiuit, & non potest rectè repræsentari per vinum in quod est conuersa; tum quia vinum potest esse sine aqua,

tum quia non est aliquod tertium resultans ex aqua & alio liquore misto, sicuti panis est tertium resultans ex multis granis; sed est aliquid productum ex aqua. Est autem magna differentia inter hæc duo, quia illa censentur manere in tertio, miscibilia enim manent saltem potentia in misto, & idcirco per hoc tertium aptè repræsentantur: at corruptum nullo pacto dicitur manere in genito, & idcirco per genitum non potest corruptum repræsentari.

Secundò, obiicies, Si aqua permanet mista vino, satis ergo erit miscere aquam in dolio; quia adhuc in calice esset aqua & vinum, quod ad Sacramentum, & Sacramenti significationem sufficere videtur. Respōdeo. satis hoc non esse, Primò, quia quamvis aqua esset in calice, non tamen ibi adesset sensibilibiter, quod ad Sacramentum requiritur; dum autem paulò antè apponitur, est ibi sensibilibiter eo meliori modo quo potest, quia & sensus testatur appositam fuisse, & intellectus iudicat non esse in vinum conuersam, & sensus ipse nullum habet argumentum, quo iudicet, aquam appositam ibi non adesse. Secundò, mistio, quæ fieret in dolio, non esset ordinata ad Sacramentum, vel saltem valdè remotè, ac proindè non videretur apposita propter significationem, quæ in Sacramento requiritur.

Tertiò, obiicies, Si commistio aquæ & vini est

est sacramentalis, ergo debet remanere simul cum Sacramento, ergo non conuerſi aqua in ſanguinem. Reſpondeo, non eſſe neceſſe, vt cum Sacramento aqua permaneat, ſed ſatis eſſe quòd ſit præſens, dum Sacramentum conficitur, & quòd poſt conſecrationē remaneant eius accidentia; ſicuti etiam ſufficit, quòd remaneant ſpecies panis & vini, quia quo ad ſenſibilitatem & ſignificationem æquivalent ipſi ſubſtantiæ.

Quartò, obiicies, Aqua apponitur, vt ſignificetur conuerſio populi in Chriſtum, hoc autem aptius ſignificatur, ſi aqua conuertatur in vinum, quàm ſi non conuertatur, vt inquit S. Thomas quæſt. 74. art. 8. ad 2. qui etiam ad 1. reſpondens, ait ſufficere ad Sacramenti huius ſignificationem, quòd ſentiatur aqua, dum apponitur, non autem oportere, quòd ſit ſenſibilis poſt miſtionem. Reſpondeo, vt diximus contra Eſtium ſect. 1. conuerſionem populi in Chriſtum, eſſe moralem, non verò phyſicam, & conſequenter multò melius ſignificari per conuerſionem aquæ moralem, eo modo, quo ſuprà explicauimus, quàm per conuerſionem phyſicam. Adde, quòd non tantum debet ſignificari vnio populi cum Chriſto, ſed etiam perſeuerantia vnionis: nam, vt inquit S. Cyprianus, ſi vinum ſit ſine aqua, Chriſtus incipit eſſe ſine nobis; ſi igitur aqua deſineret eſſe in calice,

ce, iam desineret Christus esse nobiscum. Ad auctoritatem S. Thomæ respondeo, sufficere, quòd aqua sentiatur dum apponitur, quia semel mista prælupponitur semper adesse, & in virtute illius appositionis dicitur etiam adesse sensibiliter; at si conuerteretur in vinum, non solum non sentiretur, sed neque adesset. quare non dixit S. Thomas, non oportet quòd aqua adsit, sed, quòd sit sensibilis: supponit igitur adesse, sed non esse per se sensibilem, vt explicauimus.

Quintò obijcies, In ordine ad sensus nostros se habet aqua, ac si conuersa esset in vinum, quia non apparet, neque sentitur: sed Ecclesia, vt suprà diximus, non scrutatur subtilitates physicas, ergo quidquid sit de substantiali conuersione, ab Ecclesia habetur pro conuersa: ergo æquè contra nos militant supradicta absurda, atque contra Aduersarios. Respondeo, falsum esse antecedens, quoniam semel apposita aqua, & sensus cognoscit diuersitatem saporis & coloris in vino, & opinio communis habet semper illud vinum pro diluto; dicitur tamen moraliter conuersa in vinum, quia neque ab eo discernitur, & eius accidentibus afficitur, & sub vini appellatione continetur, quamuis verè credatur adesse aqua.

Secundò principaliter argumentor: Ecclesia illud intendit consecrare, quod post Euangelium
lium

lium Deo offert : sed si aqua verteretur in vinum, frustraretur eius intentio . quod non est dicendum: ergo, &c. Maior est clara, vt quid enim offert, nisi vt consecret? Quare nec plus, nec minus offerri vult, quàm sit cōsecrandum; &, si post oblationem aduertit defectum in materia, præcipit, si sine scandalo fieri potest, vt denuo noua materia offeratur. Minor quoque est euidens, quia offerret vinum & aquam, & deinde vinum tantum consecraret, ergo & aliquid consecraret quod non obtulisset, illud scilicet vinum ex aqua genitum, & aliquid offerret quod non consecraret, scilicet aquam.

Dices, curæ non esse hanc minimam partem Ecclesiæ, quia in suo toto censetur & illa oblata; quocirca etiam præcipit, vt si in calice post consecrationem corporis aduertat sacerdos non adesse aquam, quòd ipsam infundat, & deinde consecret, absque eo quod offerat. Respondetur, hoc quidem probare, non esse hanc oblationem de essentia, non tamen non esse contra intentionem Ecclesiæ quæ vellet quidem offerri totum illud quod est consecrandum; sed vt scandalum, & alia incommoda vitentur, non fieri permittit.

Dices rursus, sufficienter offerri totum vinum, dum offertur aqua, ex qua conficiendum est vinum. At contrà, quia non esset verè eadem numero oblatio, contra id quod intendit

Ec-

Ecclesia, quæ sæpè vocat hanc oblationem; dum autem possumus retinere germanam significationem; non debemus quærere extraneam.

Tertiò principaliter, sequeretur aquam verè sacrificari Deo, esseque hoc sacrificium diuersum à sacrificio corporis & sanguinis Domini. quod dici non potest. Probatur illatio, quoniam sacrificium est, *oblatio facta Deo in signum supremi cultus alicuius rei permanentis, per quam illa res, vel consumitur, vel ad consumptionem proximè ordinatur.* Vel, vt inquit Suarez, *est oblatio facta Deo per immutationem alicuius rei in signum legitime institutum diuina excellentiæ, & reuerentiæ.* Vel, vt ab aliis definitur, *sacrificium est externa caremonia, qua res per legitimum ministerium consecrata, cum quadam, consumptione offertur Deo in cultum.* Ex quibus duas præcipuas cōditiones sacrificij colligere possumus. Prior, vt res offeratur Deo; altera, vt aliquo pacto consumatur, vel saltem immutetur; per hanc enim præcipuè differt sacrificium ab oblatione: has autem duas reperiemus in aqua, iuxta Aduersariorum sententiam. nam offerri Deo simul cum pane & vino in illa parte Missæ, quæ idcirco Offertorium dicitur, & ipsi fatentur; ordinari etiam ad consumptionem ex principijs ipsorum colligitur, quia dicunt, aquam desinere esse, & conuerti in vinum. Neque dicere

tere possunt, per accidens, & extra intentionē Ecclesiæ sequi aquæ defitionem; quia Suarez inquit debere à sacerdote aquā infundi vino, vt in ipsum vinum conuertatur. Consequens autem esse absurdum, probatur ex Concilio Trident. sess. 22. in procœmio, vbi Eucharistiæ sacrificium non solum verum, sed etiam singulare appellat; quia solum est in Ecclesia Catholica, vt omnes Theologi vnanimiter docent.

Dices, non reputari diuersum sacrificium à sacrificio Eucharistiæ, tum quia fit in eadem Missa, tum etiam quia ordinatur ad ipsum Eucharistiæ sacrificiū, alioqui neque vitari posset, quin in Missa dicerentur sacrificari panis & vinum, quia & ipsa offeruntur Deo, & etiam destruuntur per consecrationē. Verū non euacuat hæc responsio difficultates; primò enim, quòd fiat in eadem Missa, hoc nihil refert, quia hoc valdè accidentarium & extrinsecum est. Nam si in eadem Missa bis consecraretur Corpus Christi, & absumeretur, reuera duplex esset sacrificium, sicut triplex offertur in die Natalis Domini, quamuis in eodem altari, & continuè vna post aliam Missæ à sacerdote dicantur. Quod subiungitur de ordinatione, neque nobis officit, quia poterunt esse duo sacrificia, sed vnum ordinatum ad alterum, nam & omnia sacrificia veteris legis ordinabantur in sacrificium nouæ, & tamen vera sacrificia erant.

In-

Instantia verò, quæ ultimo loco offertur de panis & vini desitione in consecratione, magnam inuoluit quæstionem. Nam Pater Suarez disp. 75. sect. 1. & Cardin. Bellarminus li. 5. de Eucharistia, qui est primus de Missa cap. 27. concedunt panem & vinum esse materiam, quæ offertur in hoc sacrificio, dicunt tamen non esse duo sacrificia, vel quia vnum ordinatur ad alterum, vel quia alterum se habet, vt terminus à quo, alterum vt terminus ad quem. Hæc tamen sententia, sâtem quo ad priorem partem, pace tantorum virorum, mihi nequaquam probatur; censeo enim Christum solum illum esse, qui verè & propriè in mysterio Missæ sacrificatur, tamquam ipsius sacrificij materia. Probatur autem ex Concilio Tridentino sess. 22. cap. 2. asserente, *In sacrificio Missæ vnâ eandemq; esse hostiam, quæ immolata fuit in cruce.* Si autem est vna hostia, ergo non panis & vinum sacrificantur; si eadem est cum ea quæ fuit in cruce; ergo non aliquid diuersum à Christo Domino sacrificatur. Quod verò ait Suarez, dici Christum sacrificari, non quia sit materia sacrificij, sed quia est terminus resultans ex actione sacrificandi, non vero simile mihi videtur. Primò enim est inauditum, terminum resultantem ex actione sacrificandi, & non materiam sacrificari. Quis enim vquam dixit, cadauer ouis sacrificari, & non ipsam

ipsam ouem viuam? porro cadauer ouis est terminus resultans ex actione sacrificandi, ouis uiua est materia. Præterea, illud sacrificatur. quod Deo in sacrificio offertur; quod autem offertur, præsupponitur existere in potestate mea, vt quid enim offeram, quod non habeo? promittere quidem potero, at non propriè offerre. atqui quod resultat ex actione sacrificandi, non est in potestate mea, neque præsupponitur; ergo non potest offerri.

- Præterea, apud omnes, quod sacrificari dicitur, vel intelligitur mactari, vel consumi, vel saltem ad consumptionem & mortem ordinari. quod doctissimè ex nominis etymologia, tum Græca, tum Hebræa, ex Scriptura, & ex Patribus probat Cardin. Bellarminus lib. 1. de Missa cap. 2. sed materia est, quæ vel mactatur, vel consumitur, non autem terminus resultans, qui è contrario producitur per actionem sacrificandi: ergo est omnino alienum à notatione & acceptione sacrificij, vt terminus, qui producitur, sacrificari dicatur. At inquit ipse Suarez: *Singulare & excellens est in hoc sacrificio, vt sit potius propter efficiendum, quàm propter destruendum.* Excellentissimum fateor hoc sacrificium, sed excellentia eius non debet destruere rationem sacrificij, quod ex natura sua ad consumptionem ordinatur, sed potius perficere; alioquin poterit etiam quis dicere excellentissi-

nam fuisse mortem Christi, & idcirco non ad separationem animæ à corpore ordinatam, sed ad meliorem vnionem, quod planè esset hæreticum; & similiter in omnibus alijs mysterijs Christi Domini, quodlibet aliud comminisci, & dum rationibus in contrarium vrgetur; respondere, illud esse excellens & singulare in illis mysterijs. Cùm ergo vocibus communibus vtimur, non debemus propter excellentias rerum, earum communem notionem corrumpere: nam potius Ecclesia voces nouas excogitat, vt in hoc mysterio, quia conuersio longè diuersæ rationis ab aliis conuersionibus intercedebat, transubstantiationem appellauit, & in mysterio Trinitatis consubstantialis nomen inuenit, & ita in reliquis. si ergo in hoc sacrificio Missæ non adesset vera ratio & notio sacrificij, quæ consumptionem rei sacrificatæ indicat, alio nouo nomine, & non sacrificium appellasset. Præterea si hoc sacrificium ordinatum est ad repræsentandam Christi Domini mortem & passionem, quomodo, vt inquit Suarez, ordinatum est potius ad efficiendum, quàm ad destruendum? Numquid mors melius nobis repræsentabitur per productionem, quàm per destructionem alicuius rei? Sed hæc obiter dicta sint. nam accurata huius difficultatis tractatio longiorem posceret disputationem, quàm par sit hîc inserere.

Ad

Ad instantiam ergo suprà allatam dicerem ego, non sacrificari substantiam panis vel vini, quia per accidens destruuntur, ex incompatibilitate scilicet quam cum eis habet præsentia sacramentalis corporis & sanguinis Christi Domini nostri. id autem de aquæ definitione dicere nequeunt Aduersarij, nam volunt ea intentione apponi vino, vt in vinum transeat, & desinat esse aqua. Quod autem in altera parte responsionis asseriebant Suarez & Bellarminus, panem scilicet & vinum non sacrificari, quia sunt terminus à quo sacrificij Eucharistiæ; per hoc enim & non distingui ab ipso Eucharistiæ sacrificio, & simpliciter dici offerri corpus & sanguinem Christi, quod est infinitè nobilius, & solùm ab Ecclesia intentum; hoc, inquam, sicuti probabiliter dicitur, ita nostræ sententiæ fauet. nam dum aqua desinit esse, non est terminus à quo Eucharistiæ, quia non vertitur in sanguinem, sed in vinum: ergo cessante hac ratione, erit dicenda simpliciter offerri in sacrificium distinctum à sacrificio Eucharistiæ.

Quartò, dum aquam sacerdos iuxta ritum S. R. E. benedicit, Deum alloquens, ait, *Deus, qui ad salutem humani generis maxima quæque Sacramenta in aquarum substantia condidisti, &c.* Si quæras autem ab Aduersariis, quænam sint hæc Sacramenta in aquæ substantia constituta, non aliud asserre poterunt, quàm baptisma;

atque hoc, & vnum tantum est, & non maximum. Quomodo ergo Ecclesia dicit maxima quæque Sacramenta in aqua condita? At nos dicemus, non solum baptismum, sed etiam Eucharistiam in aqua (mixta scilicet vino, vt explicauimus) fuisse institutam: quorum Sacramentorum hoc est maximum dignitate, illud necessitate; hoc quia omnium aliorum finis, illud quia principium & ianua; hoc ob summam intensiuam perfectionem, illud ob extensiuam: nullum est enim Sacramentum, quod à pluribus participetur. Porro si aqua in vinum esset versa tempore consecrationis, dici non posset Eucharistiæ Sacramentum in aqua conditum fuisse.

Quintò probabile, quamuis non efficax, argumentum ex figuris huius Sacramenti deduci potest: cum enim alioquin non magna adsit similitudo inter aquam & Eucharistiam, & tamen inueniamus in aqua ipsam significatam & præfiguratam fuisse; argumēto est, non tam propter conuenientiam, quam quòd materia eius futura esset, ipsius fuisse symbolum. Porro quamplures siue figuras, siue prophetias, in quibus per aquam hoc ineffabile Sacramentum præmonstratum fuit, adducere possem, ex quibus clariōres aliquot commemorabo. Hoc enim Sacramentum referebat aqua illa, quam eduxit Moyſes de petra, vt tradit S. Ambrosius lib.

lib. 5. de Sacramentis c. 1. & etiam S. Thom. 3. p. q. 74. art. 6. Immò & S. Paulus 1. ad Cor. 10. dicens, *Omnes eundem potum spiritalem biberunt*, id est aquam de petra, quæ spiritualiter, id est mysticè, typus erat sanguinis Christi. Hoc idem Sacramentum indicabat vas illud aquæ, quod eum pane subcinericio cælitus sibi allatum bibit Elias. Hoc aqua Bethleemica, quam tantopere expetiuit David, Deo quæ veluti in sacrificium obtulit. Hoc aqua illa refectionis, quæ, eodem regio Vate teste, animam conuertit, hoc est, deliquio abeuntem spiritum reuocat. Hoc ille fluuius è templo egrediens, quem Ezechiel (os enim eius iam pertingebat) pertransire nequirit. Hoc ille aquæ potus, quem puluere conspersum vituli populo propinauit Moyfes: de quo ait Rabbi Salomon apud Lyrarum, quòd inflationem & languorem peccato obnoxiiis inferebat, aliis autem utilis & dulcis erat, iuxta id quod canit Ecclesia de hoc Sacramento, *Mors est malus, vita bonus*; vel, vt alij volunt, lepra aspergebantur qui culpa non carentes eum bibebant; quare extra tabernacula propterea egressi, à filiis Leui trucidati sunt. Hoc piscina illa Probatica, in qua, vt inquit D. Hieronymus, carnes pecudum sacrificandæ lauabantur, vnde & sanguine mistam fuisse verisimile est. Quid? Nónne ipsamet aqua tamquam pars materiæ Sacramenti Eucharistiæ

in veteri testamento præfigurata fuit ? tradit enim D. Hieronymus, siue, vt alij existimant, peritus quidam Hebræus in Traditionibus Hebraicis super Paralipom. circa illud, *Quodd aqua David libauit Domino*, quodd in sacrificiis, in quibus vinum offerebatur, eidem vino aqua admiscebatur : cuius testimonio si quis nolit habere fidem, proferemus testem omni exceptione maiorem, sanctum videlicet Paulum, qui ad Hebr. 9. testatur Moysen sanguini vitulorum & hircorum, quo vetus testamentum confirmauit, aquam admiscuisse, dicens, *Leſto omne mandato legis à Moſe vniuerſo populo, accipiens ſanguine vitulorum & hircorum cum aqua, ipſum librum & populum reſperſit. Vt quid autem voluerit Deus hanc fieri miſtionem, multæ poſſent afferri rationes, quarum inter primas, hanc crediderim, vt populus, qui per aquam ſignificatur, Deo vniri oſtenderetur : nam illa ſanguinis aſperſio in ſignū fœderis inter Deum & populum fiebat, & eadem ratione dicunt Patres vniri in calice aquam cum vino : ergo ſicuti ibi aqua in ſanguinem verſa non fuit : nam & ſanguis extra venas potiùs ipſe corrumpitur, quàm aliquid aliud in ſe conuertat, & non diu veriſimile eſt aquam ſimul cum ſanguine fuiſſe. ita neque hîc verti debet aqua in vinum.*

Præterea, illam miſtionem aquæ cum ſanguine

guine figuram fuisse calicis Domini ex vino & aqua permisti, demonstrant verba Moyssissimi-
millima, vt D. Anselmus notauit, his quæ Christus Dominus dixit hoc Sacramentum conficiens. Nam *Hic est sanguis testamenti, quod mandauit ad vos Deus*; dixit Moyses, nec dissimiliter Christus, *Hic est sanguis noui testamenti, qui pro vobis effundetur*. Si autem aqua conuerteretur in vinum, non rectè figuratum figuræ responderet; tum quia ibi aqua non vertebatur in aliquid aliud; tum quia de ea simul cum sanguine dicebatur, *Hic est sanguis noui testamenti*: hinc autem verba consecrationis non proferrentur super aquam, cum iam versa esset in vinum.

Si verò obiicias, quòd ibi aqua non conuertebatur in sanguinem: ergo neque hic conuer-
ti debet. Respondetur negando consequentiam; quoniam in illa Moyssis actione nulla fiebat conuersio, siue transubstantiatio, quia congruum erat, vt hoc maximum miraculum sanguini Christi reseruaretur: quare non mirum, si aqua quoque non conuertebatur. Addo & antecedens non esse omnino verum, quia conuertebatur moraliter: nam totum illud mistum sanguinis nomine appellatum fuit à Moysse, vel vt præsignificaret in calice Domini aquam conuertendam in sanguinem, vel quia mistum accidentale ex maiori parte denominari solet.

Ad idem confirmandum adduci potest e-

manatio sanguinis & aquæ ex latere Christi, figuram dicam respectu calicis, an figuratam? vtrum tamen dicas, mea non interest, quoniam si figura fuit, ergo in figurato calice debet adesse aqua, & quoad suam substantiam, sicut terminus à quò consecrationis, & quoad accidentia post consecrationē; neutro autem modo esset, si ante consecrationem verteretur in vinum. Si figurata, ergo eodem modo in consecratione, & post ipsam debet esse aliquid in calice, quod illam repræsentet; si autem aqua verteretur in vinum, nihil planè adesset.

Tandem, si figuram optas, quæ clarè præsignificaret aquam immediatè vertendam in sanguinem; nōne Moyles populum Israel ab Ægypto liberans id præstitit? Sicuti enim illa conuersio aquæ in sanguinem argumēto fuit, & Moysen missum esse à Deo, & populum ab Ægypto liberandum; ita hæc conuersio, quæ in calice contingit, & Christum nobiscælitus mitti in Sacramento declarat, & nos ipsius gratia à dæmonum & peccatorum seruitute liberandos demonstrat. En igitur aquam versam in sanguinem, cū tamen id de vine nusquam legamus.

Quod si obijcias, in conuiuio Canæ Galilææ in vinum quoque aquam fuisse conuersam; Respond. hoc etiam esse pro nobis. Quis enim adeò desipiat, vt affirmet conuersionem aquæ

in vinum in calice, quæ si datur, per vires naturæ efficitur, figuratam fuisse per supernaturale miraculum? Fuit igitur illa conuersio figura cōuersionis aquæ non in vinum, sed in sanguinem: nam per illud vinum optimum vsque ad conuiuij finem reſeruatum potus sanguinis Christi præſignabatur.

Nolo tamen hîc prætermittere, Patres ex hoc miraculo cōuersionis aquæ in vinum confirmare conſueuille miraculum conuerſionis vini in sanguinem; ſicuti etiam ad idem probandum aliarum conuerſionum exemplis vti ſolent, præterquam naturalis conuerſionis aquæ in vinum. Non eſt autem veriſimile, eos prætermiſſuros fuiſſe hoc exemplum conuerſionis naturalis, quod & appoſitiſſimum fuiſſet, & maximè confirmaiſſet, Deum poſſe vinum in sanguinem tranſmutare, ſi probabile credidiſſent.

Denique fauent huic ſententiæ duo Concilia, Carthaginenſe III. & Florentinum. Illud enim canon. 24. ſtatuit, *Ne in ſacrificiis offeratur amplius, quàm de vuis & frumentis*, id eſt, id quod ex illis conficitur. Hoc verò in decreto Eugeniij *materiam calicis*, inquit, *eſſe vinum* non quodcumque, ſed *de vite*. Atqui, ſi ex aqua fieri poſſet vinum, hoc neque eſſet de vuis, neque de vite: non ergo eſſet materia iuxta doctrinam horum Conciliorum; ſed neque differret eſſen-

tialiter ab alio vino de vite, aut ab eo posse discerni, & si cum eo simul esset in calice, remaneret, eo conuerso in sanguinem, in propria substantia. quæ omnia sunt perquam absurda, & ea vitantur, si dicamus ex aqua numquam fieri posse vinum.

Fauet etiam mos Græcorum, qui præter aquam, quam ante consecrationem calici infundunt, post eandem, denuo aquam calidam apponunt: si enim actio mutua corruptiua inter aquam & vinum daretur, non sine magna irreuerentia, hoc ab ipsis fieret; credunt igitur aquam in vinum non cõuerti, vt ipsorum quidam doctissimi Romæ existentes à me consulti testati sunt. Immo hoc eodem more ostendunt, se quoque credere aquam immediate conuerti in sanguinem. Nam alioqui, (cùm nolint conuerti in vinum,) post consecrationem adhuc aqua esset in calice, & frustra denuo ab ipsis apponeretur. Ne dicas autem hunc morem Græcorum esse damnandum. Nam & ab Ecclesia Romana permittitur, & eius meminit S. Germanus Patriarcha in Theoria rerum Ecclesiasticarum, qui floruit circa annum Domini D. CCXXVIII.

S E C T I O · XI.

*Argumentis ab auctoritate contra nostram
sententiam satisfit.*

Communiuimus huc usque sententiā nostram validissimis, & rationibus & auctoritatibus; reliquum est, vt eam ab Aduersariorum telis defendamus. Exordiemur autem ab auctoritatibus, quæ in rebus theologicis merito maximi fiunt, & præcipuum fundamentum Aduersariorum sunt. Pro quorum solutione notandum, nullum afferri ab ipsis testimoniū, quo explicite dicatur aquam non verti in sanguinem (nisi fortè recentiorum) vt etiam aduertit Gaufridus apud Baronium : sed argumentantur ab auctoritate negatiua, quia videlicet nonnulla Concilia, vel Patres nullam fecerunt aquæ mentionem. quod argumentum natura sua est valdè infirmum, & in hac materia infirmissimum, ne dicam mortuum; tum quia vel ab iisdem Concilijs & Patribus, vel ab alijs similibus aquæ facta est mentio, tum quia sub nomine vini comprehenditur etiam aqua ei admista, quia consuevere homines mistum ex aqua & vino appellare simpliciter vinum. Quæ generalis responsio, antequam descendamus ad particulares auctoritates, est firmiter
stabi-

stabilienda. quod multis auctoritatibus & exemplis præstabimus.

Primum ergo probatur ex Euangelio, nam illis verbis, *Non bibam amodo de hoc genimine vitis*, solius vini fit mentio; & tamen certum est, in calice Christi admistam etiam fuisse aquam: ergo vini nomine in Euangelio comprehenditur etiam aqua. Quare quod ait Suarez, suam sententiam nonnullum fundamentum habere in Scriptura, non magis est verum, quam in eadem Scriptura fundamentum habere sententiam Armenorum, qui dicebant, non esse in calice admiscendam aquam. quod tamquam hæreticum meritò damnatum fuit.

Secundò; est clarissimum testimonium Iulij I. qui dist. 2. de consecrat. cap. *Cum omne*, inquit nihil aliud esse offerendum in Missa, quam panem & vinum. nomine autem vini comprehendere etiam aquam admistam ex ipsomet patet, quia paulò post in eodem cap. ut supra sect. 4. notauimus, docet vinum mistum aqua offerendum esse: si ergo etiam quando apponitur vino particula exclusiua, adhuc non censetur aqua exclusa, multò minùs exclusa censenda est, cum vini tantum, nulla addita particula exclusiua, fit mentio.

Tertiò, ex Concilio III. Carthagin. can. 24. (cui etiam S. Augustinus interfuit) in quo statuitur primum, *Ut in Sacramentis corporis & sanguinis*

guinis Domini nihil amplius offeratur, quàm ipse Dominus tradidit, hoc est panis, & vinum aqua mistum; ac postea subiungitur: Nec amplius in sacrificiis offeratur, quàm de vis & frumentis. ne igitur dicamus, Concilium sibimet esse contrarium; oportet fateri aquam etiam intelligendam secundo loco, quamvis non expressam. Quod verò ait Estius, ne putaremus esse materiam aquam, secundo loco fuisse prætermisam friuolum est. Nam ad hunc finem multò magis excludenda fuisset à traditione Domini; at Concilium inquit, ipsum Dominum tradidisse offerendum vinum aqua mistum: ergo cum nolit Concilium dissentire à traditione Christi, non est existimandum voluisse prætermittere aquam, sed subintellexisse, licet non expresse-rit, quia iam cum vino misceri dixerat.

Quartò & clariùs, Armeni vinum tantum in sacrificio Missæ offerebant, quibusdam verbis S. Ioan. Chrysostomi moti, qui errorem impugnans adhibentium tantum aquam, Christus, inquit, *usus est genimine vitis: vitis autem vinum, non aquam generat*. Videbatur igitur S. Chrysostomus excludere aquam, tamen reuera non excludit, immò in sua liturgia adhibendam præcepit. & P. P. Concilij Trullani canon. 32. ipsum ita intelligunt, vt noluerit aquam prohibere: ergo multò magis Patres illi, qui solius vini mentionem faciunt, ita intelligi debent

bebunt vt aquam non excludant.

Quintò, ex epistola Gaufredi à nobis suprà sect. 4. relata idem ostenditur; nam Doctores in ea citati testantur, vinum aqua mistum, etiam si aqua præualeat, nuncupari tamen simpliciter vinum.

Sextò, ex Aristotele, qui cap. 23. suæ Poëtice ait, vinum mistum aqua, quam uis totum non fit vinum, ex consuetudine tamen appellari absolutè vinum.

Septimò, Plutarchus opusculo de Ratione valetudinis obseruandæ idem sentit: *Vinum enim*, inquit, *aqua mistum, etiam si maior sit aqua infusa quàm vinum, vinum tamen vocamus.* Vocat autem Plutarchus hoc mistum *κεγμα*, qua voce vsus est etiam Iustinus Martyr in Apologia ad Antoninum Pium ad calicem consecratum significandum.

Octauò, ex Concilio Tridentino idem comprobatur: nam sess. 22. cap. 7. docet Concilium, à Christo aquam in calice offerendo mistam fuisse. sess. verò 13. cap. 2. dicit, Christum post panis & vini benedictionem corpus suum & sanguinem discipulis tradidisse. quare cum vno loco vini tantum mentionem faciat, & altero etiam aquæ, vel dicendum est, Concilium sibi met fuisse contrarium, vel certò certius esse debet, cum vini tantum mentionem fecit, non exclusisse aquam. At dicunt nonnulli, Idem Con-

Concilium ait cap. 4. sess. 12. fieri in hoc Sacramento conuersionem totius substantiæ vini in sanguinem Christi, ergo non comprehendit aquam, quia nomen substantiæ cogimur in rigore physico intelligere. Resp. facillimos certè hos homines esse, qui nullo negotio coguntur. Vnde enim, quæso, hoc priuilegium habuit substantiæ nomen, vt in rigore physico intelligi debeat? An S. Paulus cum dixit, fidem esse substantiam, in rigore physico sumpsit? fides igitur non erit accidens, sed substantia physica. præterea quis negauit substantiam in rigore sumendam? si aquam diceremus esse accidens, vrgeri nos possent; at dicimus non accidentia, sed substantiam tum vini, tum aquæ, quæ sub nomine vini comprehenditur, in sanguinem verti.

Nonò. Simili omninò responsione, immò longè minùs probabili, vtitur Suarez disp. 33. eiusdem 3. tomi sect. 1. vbi cum ipse defendat, balsamum esse de essentia materiæ Confirmationis, & sibi obijciat, multos Patres olei tantum fecisse mentionem: Respondet, *Chrisma, quod ex vi nominis vnctionem tantum significat, apud antiquos Patres regulariter significare compositum illud ex oleo & balsamo; quia verò præcipua pars eius compositi erat oleum, eiq; modicum balsamum miscebatur, ideo mirum non esse, quòd interdum nomine olei significaretur: præsertim cum ex*

iiisdem

*ijsdem Patribus vel iisdem, vel alijs locis constaret
huiusmodi Chrisma semper habuisse balsamum ad-
mistum.* Atqui multò minùs mirum est, nomine
vini aquam significari: nam mistio balsami cum
oleo non solet usurpari extra Sacramentum
Confirmationis, vnde neque est in consuetu-
tudine hominum, vt nomine olei balsamum
admixtum intelligatur; at verò frequentissima
est vini & aquæ mistio, & nomine vini etiam
aqua mista solet communiter comprehendi, vt
docuimus.

Decimò, & est verè appositissimum exem-
plum, Spiritum sanctum procedere à Patre,
nulla facta mentione Filij: & multi Patres Græ-
ci, & Symbolum Nicænum in primo Constan-
tinopol. Concilio confirmatum, & Euangeliū
ipsum tradidit Ioan. 15. v. 26. & tamen, quia a-
lij Patres docuerunt à Filio quoque procede-
re, & id etiam ex alijs Euangelij locis colligi-
tur, definitum fuit in Concilio Florentino cō-
tra Græcos, non solum à Patre, sed etiam à Fi-
lio Spiritum sanctum procedere: ergo etiam
licet quidam Patres, vel Concilia solius vini
mentionem faciant, cū tamen plures alij Pa-
tres, & alia Concilia aquæ quoque memine-
rint, non erit hæc excludenda à materia calicis.

Vndecimò, vnguentum asseruabatur anti-
quitus in templo ex varijs aromatibus & ex o-
leo confectum Exod. 30. num. 23. & tamen olei
solius

folius nomine nuncupari solet , vt aduertit acutissimus atque eruditissimus Ioan. de Pineda li. 2. de Rebus Salomonis cap. 6. quòd illo tamquam basi & fundamento , ac parte primaria reliqua aromata immiscebantur : ergo cùm in misto , quod est materia sanguinis , longè maior & potior pars sit vinum ; non mirum , si totum vini nomine nuncupetur , quamuis adsit etiam aqua mista .

Duodecimò. Efficacissimè probatur ex D. Paulo. Nam cùm Exodi 28. dicatur Moyse sanguine aspersisse populum , nulla aquæ facta mentione ; S. Paulus ad Hebr. 9. inquit , admistam ei fuisse aquam , vt supra retulimus ; ergo quamuis solius sanguinis facta sit mentio , non tamè censetur exclusa aqua admista : multò minùs igitur , licet solius vini fiat mentio , aqua ei admista , & quæ longè frequentius cum vino , quàm cum sanguine admiscetur , est excludenda . Neque verè hinc efficitur , vt etiam in calice nomine sanguinis comprehendipossit aliqua gutta aquæ ei admista ; immò potius contrarium est colligendum . quod vt probem ,

Noto priùs , aliquando verba pendere à rebus , vt cùm dicimus Christum aquam posuisse in calice , quod rectè dicitur , quia reuera Christus posuit : aliquando res pendere ab ipsis verbis , vt cùm Deus dixit , *Fiat lux* , tunc enim res ipsa verbum est secuta . Hinc autem effici-

P

tur,

tur, vt quando verba pendent à rebus, tunc non mirum, si verba improprie sumantur quandoque, vt ipsis rebus aptentur; quando verò res pendent à verbis, cum non ipsa rebus, sed res verbis sint accommodandæ, iuxta proprium & germanum eorum sensum sunt verba accipienda. Ratio est, quia in priori euentu res sunt priores, & ab ipsis verborum veritas pendet; quare si qua dissensio inter verbum & res apparet, debent verba ad res aptari, non verò res ad verba. At in posteriori euentu, cum verba sint priora, & ex verborum sensu res ipsæ sint dimetiendæ, nulla est ratio, cur verba propriissime non sumantur, & res ipsa verbis non consentiat. Declaratur hoc exemplis: si narrandum sit Moysis factum, quo sanguine aqua misto asperfit populum, licebit sine mendacio asserere, sanguine aspersisse populum, & nomine sanguinis comprehendere etiam aquam admistam, quia verba pendent à rebus, & re ipsa aqua fuit admista; quamuis si aqua admista sanguini non fuisset, non licuisset dicere, Moysem aspersisse populum sanguine & aqua, quia rebus non possent per vllam expositionem conformari verba. Quando verò dixit Deus, *fiat lux*, non est dicendum aliquid aliud factum fuisse quàm lucem, quia res à verbis pependit, & si quid aliud factum fuisset, non vtique ex vi illius verbi, contra suppositum factum fuisset.

Simi-

Similiter si dicam, Hoc prædium est meum, quamvis particula ipsius prædij mea non sit, non censëbor mendacium dicere; si verò dicam, Dono tibi hoc prædium, non licebit excipere ab hoc prædio aliquam partem, quia non verba à rebus, sed à verbis res pendet. Nunc ad rem nostram accedentes, quando dicimus, vinum esse materiã calicis, verba pendent à rebus, quia non idcirco vinum est materia, quia ego dico; sed contrà ego dico, Quia vinum est materia, & ideo nomine vini potest intelligi etiam aqua. At cum dico in consecratione, *Hic est sanguis meus*, res ipsa pendet à verbis, & idcirco non licet aliquid excipere, sed totum illud quod continetur in calice, & demonstratur per pronomen *Hic*, fiet verè sanguis.

Decimotertiò, Genes. 2. legimus, dixisse Deum Adamo, *Ex omni ligno paradisi comede, de ligno autem scientiæ boni & mali ne comedas*, nulla Eux facta mentione, cui tamen etiam hoc præceptum datum fuisse nulli dubium esse potest; alioqui enim dum de ligno illo cõedit, nequaquam peccasset. cur igitur Adamus solius facta est mentio? quoniam, vt rectè notat Pererius, ipsi Adæ principaliter præceptum datum est. Adde, quòd vxor pars quædam viri censetur, ac proinde quod viro dicitur, de eadem etiam est intelligendum. Qua ratione etiam Titelmannus, & alij graues Doctores asse-

runt, dæmonem ausum non fuisse Iobi vxorem interficere, sicuti filios, quia in præcepto de anima & vita Iobi seruanda, etiam vita ipsius vxoris intelligitur comprehensa. Cui etiam affine est, quod aiunt Iurisperiti, vxorem mutare proprium, virique sortiri domicilium & forum. l. *cum quadam*, & ibi notant Doctores, de iurisdictione omn. iud. & l. *exigere*. ff. de iud. Immo etiam eiusdem ciuitatis censericiuem, & eiusdem originis cum viro, vt tenet Gloss. in l. *Ciues*. C. de incolis. & l. *orig*. C. de municip. & orig. & alij complures, quos refert & sequitur Andreas Tiraquell. li. i. conn. n. 28. & seqq. Sed non est prætermittenda ratio, quam affert Baldus conf. i 10. §. *Considerato*, quod dicta domina Agnes. post princ. lib. 5. inquit enim, hoc probari ex virtute vnionis, in qua id quod potentius est, trahit ad se id quod est minus dignum, vt plenè legitur & notatur in cap. i. Extrau. de sede vacante: sed nulla maior vnio, quàm coniugalis, per quam vir & vxor efficiuntur vna caro, & vna substantia in duabus personis. Ex eodem fonte manat, quod augmentum apud Iurisperitos sequitur naturam principalis. l. *Si ex toto*. ff. de leg. fideic. Vbi Iason, *Nota*, inquit, ex hoc textu, quod idem iudicamus de augmento, quod iudicamus de suo principali, quia accessorium debet iudicari eiusdem natura, cuius est suum principale.

Ex

Ex quibus omnibus colligitur, quòd mentione facta tantum de principali, idem etiam censetur dictum de minus principali illi vnito, vel addito: atqui in materia sanguinis, siue (ne sit lis de nomine) in calice, principale est vinum, accessorium & minus principale est aqua: ergo id, quod de solo vino dicitur, de aqua quoque est intelligendum, cumque dicatur vinum verti in sanguinem, verti quoque intelligenda est aqua. Hæc igitur pro generali responsione dicta sint.

Nunc ad particulares auctoritates descendemus Ad Concilium Carthagin. patet ex tertio exemplo supra allato. Ad Concilium Triburiense respondeo, si omnino paritas seruari deberet inter vinum, quatenus significat sanguinem; & aquam, quatenus populum; oporteret, vt, sicuti vinum vertitur realiter in sanguinem Domini, ita aqua verteretur in populum. quod nullo pacto est dicendum. Satis ergo significatur vnio populi cum Christo ex eo, quòd vinum & aqua vnum fiunt in Christo, vt dicitur c. *Oportet*. dist. 2. de consecrat. & remanent accidentia aquæ cum accidentibus vini: alioqui si aqua remaneret, cum verè non misceretur, nec vniretur cum sanguine Christi, non bene repræsenteret vnionem populi cum Christo. Ad auctoritatem Synodi Trullanæ Resp. non rectè fuisse ab Aduersarijs allatam; verba enim

cius hæc sunt, *Aquam vino miscendam tradidis* (S. Ioan. Chrysoft.) *quando incruentum peragi sacrificium oportet; ex pretioso & honorando nostri Redemptoris latere ex sanguine & aqua contemperationem ostendens, quæ in totius mundi viuificationem effusa est, &c.* Non ergo dicunt, vt referebat Estius, peragi sacrificium incruentum ex aqua & sanguine: aqua enim non sacrificatur, neque concurrit simul cum sanguine Christi ad nostram redemptionem; sed affirmant representari in sacrificio incruento effusionem sanguinis & aquæ ex latere Christi, ad quod nihil refert, vt iam sæpè diximus, quòd aqua in sua substantia permaneat.

Ad Concilium Florentinū, sicut & ad Tridentinum pro responsione sufficiunt, quæ diximus suprà sect. 4. vbi ostendimus à nobis stare, Ad Lateranense resp. vini nomine etiam aquā comprehendisse, non explicitè autem tradidisse, quia summa tantum capita fidei proponebat, & supponebat, quæ iam tradiderat Concil. Florentinum, quod aquæ expressè meminerat.

Ad secundum, quoad Iulium & Innocentium Pontifices, pater esse pro nobis ex sect. 4. Quoad Catechismum resp. non fideliter fuisse ab Aduersarijs adductum. Eius autem verba sunt: *Illud autem sacerdotibus animaduertendum est, quemadmodum in sacris mysteriis aquam vi-*
na

no adhiberi oportet, sic etiam modicam infundendam esse: nam Ecclesiasticorum scriptorum sententia & iudicio, aqua illa in vinum conuertitur, quare de eo Honorius Pontifex, &c. Quis autem non videat, longè diuersam esse Catechismi sententiam ab ea, quam illi Aduersarij, ac potissimum P. Suarez imponit? Non conuerti in sanguinem, nisi prius conuertatur in vinum, refert Suarez; conuerti in vinum, inquit Catechismus, de non conuersione in sanguinem ne verbum quidem: omnium Ecclesiasticorum, refert Suarez; Ecclesiasticorum indefinitè, ait Catechismus. Non idem autè esse quod ait Suarez, & quod Catechismus, ex eo etiam patet, quòd plures Theologi, vt Alanus, Pesantius, & alij dicunt, aquam conuerti in vinum, iuxta id quod affirmat Catechismus, tamen si conuersa non sit tempore consecrationis, dicunt immediatè conuerti in sanguinè: non ergo idem est, conuerti in vinum, quod tantum ait Catechismus; & non conuerti immediatè in sanguinè, quod illi tribuit Suarez. Quid plura? nòne ipsemet Suarez apertè ostendit, hìc duo esse diuersa? nam de primo inquit, *Tertium* (ex iis videlicet, in quibus dixerat, omnes ferè Theologos conuenire) & ad vsum pertinens, est, sacerdotem debere aquam miscere ea intentione & modo, vt verisimile sit, posse facìle in vinum conuerti ante consecrationem. De secundo verò, *Controuersia*, inquit,

superest, si interdum contingat tempore consecrationis aquam non esse in vinum conuersam, virum maneat, an immediate conuertatur in sanguinem. Si ergo illud est ferè certum secūdum Suarez, & hoc controuersum, ergo sunt duo diuersa; & vltius; ergo consistere potest, vt quis existimet, ponendam esse in calice aquam, ita vt conuertatur in vinum, & tamen affirmet, dato, quòd in vinum conuersa non sit, in sanguinem transmutari. Cur ergo, cūm Catechismus primum tantū dicat, assertur ab ipso pro secundo? Certè si dixisset, Catechismus illi sententiæ fauere, vel in illam inclinare, mirandum non esset: at simpliciter asserere, Catechismus hanc sententiam omnibus Ecclesiasticis tribuere, hoc certè nimium fuit, illi præsertim, qui superius dixerat, Concilium Tridentinum inclinare tantū in sententiam, quæ affirmat, Christum apposuisse aquam in calice, cūm tamen Concilium, vt sect. 3. notauimus, anathema dicat in contrarium sentientes.

Verū, quamuis non id dicat Catechismus, quod refert Suarez, videtur tamen adhuc contra nos pugnare. Primum, quia militat contra eam partem sententiæ nostræ, in qua asserimus aquam in vinum non transmutari. Deinde, quia si aqua posset immediate in sanguinem conuerti, nihil referret, quòd tam modica apponeretur, vt in vinum conuerteretur. Respondeo

ad

ad primum, Catechismus non tamquam veram & certam approbare illam sententiam de conuersione aquæ in vinum : nam si pro certo habuisset, aquam in vinum conuerti, hoc simpliciter asseruisset, sicuti & cætera consuevit, sed neque ad ipsum spectabat, cum philosophiam non doceret ; tantum igitur retulit id sentire Ecclesiasticos, quod etiam nos fatemur ; dicimus tamen hos Ecclesiasticos, sicuti & ipsum Catechismus, intelligi de conuersione morali. Nam ex eis complures explicantes hanc aquæ conuersionem dicunt, *Ita, vt aqua saporem vini retineat.* ita Bertachinus in suo Repertorio verbo *Aqua* : & longè antè Innocent. lib. 4. de mysteriis Missæ c. 31. At qui dicit, aquam retinere saporem vini, non dicit in vinum conuerti, nisi moraliter vel accidentaliter, quia sapor est accidens, & quod retinet aliquod accidens, debet existere secundum suam substantiam : ergo hoc tantum voluerunt Ecclesiastici, & consequenter Catechismus.

Præterea, ad hoc vt aqua substantialiter conuertatur in vinum, ex Aduersariorum sententia non sufficit modicam esse, nisi etiam per aliquod temporis spatium ei infusa permaneat ; vt verò conuertatur moraliter, nullum temporis spatium requiritur post mitionem. Atqui Catechismus de tempore nullam mentionem facit, solumque de aquæ paucitate meminit.

nit: ergo non de substantiali, sed de morali siue accidentali conuersione loquitur, vel, ut aliquid etiam Aduersarijs demus, de conuersione indefinitè, siue ea substantialis, siue accidentalis sit: vtra enim esset, nihil eius intererat.

Tandem, cùm sit res omnino philosophica, rationi euidenti credendum est potiùs, quàm dubiæ aliquorum Ecclesiasticorum sententiæ. At cur retulit Catechismus hanc sententiam, si, ut diximus in prima parte nostræ responsionis, non approbavit? quoniam in Sacramentis debemus semper tutiorem partem sequi, illa autem est tutior pars, quæ in omni sententia locum habet. ut ergo non tantùm iuxta nostram, sed etiam iuxta Aduersariorum sententiam ritè perficeretur Sacramentum, retulit Catechismus, aliquos id sentire, non contrariũ damnans, sed id docens quod tutissimum erat; nam etsi non concedamus nos, aquam conuersti in vinum, nullum tamen censemus adesse periculum, si tam modica aqua apponatur, ut secundùm illam opinionem, quæ id asserit fieri posse, sit conuertenda in vinum. quare qui modicam ponit iuxta id quod docet Catechismus, in omni sententia periculum non rectè conficiendi Sacramentum euitat.

Ad secundum eadem ratione Respondeo, si esset omnino de fide, aquam immediatè conuersti in sanguinem, parum vel nihil referret, si
ita

ita apponeretur aqua, vt non conuerteretur in vinum: sed quia hoc est controuersum, & ex illis quoque qui volunt aquam conuerti immediatè in sanguinem, aliqui nihilominus affirmant, melius esse, vt eo pacto apponatur, vt priùs conuertatur in vinum; rectè Catechismus admonuit sacerdotes, vt tam parum aquæ apponerent, vt etiam secundum illorum sententiam, qui volunt debere priùs aquam in vinum conuerti, nihil sequatur in hoc Sacramento absurdi. Debemus enim ita Sacramenta conficere, vt, si possibile sit, vitentur incommoda, quæ ex qualibet sententia non omnino reiecta sequi possunt. Dici etiam posset locutum fuisse Catechismum de conuersione morali, quam admittunt omnes, quia non considerabat phycas subtilitates. Sed de Catechismi auctoritate hactenus, progrediamur ad reliqua.

Ad tertium. Quoad S. Cyprianum, respondeo, ipsum longissimè abesse ab Aduersariorum sententia, ijsque ipsis verbis, quæ attulerunt, nihil illis fauere. nam, cui magis credendum est S. Cypriani mentem explicanti quàm S. Augustino? Audiamus igitur, quid de hoc loco S. Cypriani sentiat S. Augustinus: adducit quippe hic sanctissimus Doctor verba S. Cypriani suprà citata li. 4. de Doctr. Christ. c. 11. & ipsius mentem explicans inquit, *Soluitur ibi quæstio, de qua quaritur, Vtrum calix Dominicus aquam*

aquam solam, an eam vino mistam debeat habere. hæc S. Augustinus. Quibus verbis ostendit, tantum abesse S. Cyprianum, vt definiat aquam non conuerti in sanguinem, vt neque hac de re loquatur. Præterea, neque inquit probare vinum tantum in calice sine aqua offerendum: quod ex mente Aduersariorum esset concludendum; sed supponendo, aquam debere apponi, totum esse, sicut reuera est, in probando, aquam solam non sufficere, sed debere etiam addi vinum. Quod si S. Augustino non credunt, sancto Cypriano non debent saltem negare fidem. Explicet igitur S. Cyprianus, quid in illa epistola probare intendat. Proponit ergo S. Cyprianus in principio epist. quid probare intendat, dicens: *Quoniam quidam vel ignoranter, vel simpliciter in calice Dominico sanctificando, & plebi ministrando non hoc faciunt, quod Iesus Christus fecit & docuit.* Explicat deinde, quid fecerit & docuerit Christus Dominus, dicens: *Vt calix, qui in commemorationem eius offertur, mistus vino offeratur.* Et statim subdit verba suprâ citata, *Nam cum dicat Christus, Ego sum vitis, &c.* Contendit igitur probare offerendum esse calicem ex aqua & vino mistum, & non aquam tantum. Idem colligitur tum ex toto contextu illius epistolæ, tum ex conclusione, quam ex rationibus & testimonijs, quæ attulerat, infert, dicens, *Non est ergo, frater carissime,*
quod

quòd aliquis existimet , sequendam esse quorundam consuetudinem , siqui in prateritum aquam solam offerendam putauerint. Et horum errorem impugnans inquit: Miror satis, vnde hoc vsurpatum sit, vt contra Euangelicam & Apostolicam disciplinam , quibusdam in locis aqua offeratur in Dominico calice , qua sola Dominicum sanguinem non possit exprimere. Nota, non negare aquam posse exprimere sanguinem, sed non solam. Vel igitur S. Cyprianus intendens probare , aquam non conuerti in sanguinem , colligit deinde ineptissimè , vinum cum aqua in calice miscèdum esse. Vel dicendum est , numquam ei in mentem venisse illud , quod Aduersarij , cum voluisse, probare contendunt.

Præterea, si ex illis verbis, *Sanguis Christi non aqua est vtrique , sed vinum* , & similibus, dicant Aduersarij colligendum esse, aquam non conuerti in sanguinem ; quamuis id non intenderit S. Cyprianus ; ergo ex illis etiam colligi debet, vinum tantum in calice offerendum esse, nam de appositione vini in calice agebat S. Cyprianus, non autem de conuersione ; si igitur de appositione non probat , multò minùs de conuersione.

Confirmatur, quia non inquit S. Cyprianus, Vinum fit sanguis, sed vinum est sanguis. quod cum in rigore verum non sit , apparet hæc ipsum non protulisse, vt demonstraret , vinum solum

solum vel esse, vel fieri sanguinem Domini, sed tantum vt metaphoræ suprà allatæ de vite al- luderet, cuius sanguis dicitur esse vinum iuxta illud, *Et sanguinem vuae biberet meracissimum.* quasi diceret, sicuti sanguis vitis non est aqua, sed vinum, ita cum Christus dicatur vitis, ineptè quidam aquam solam materiam eius sanguinis asserunt. Et sicuti dum dicitur in Euangelio, *Non veni vocare iustos, sed peccatores,* est sensus, magis peccatores, quàm iustos; & illud, *Misericordiam volo, & non sacrificium;* rectè exponitur, magis misericordiam volo, quàm sacrificium: ita S. Cyprianus inquit, non aquam, sed vinum esse sanguinè, id est magis vinum, quàm aquam, vel non aquam solam. Prudenter igitur Suarez, & alij melioris notæ scriptores numquam hæc S. Cypriani verba contra nostram sententiam adduxerunt, immò in genere facti sunt hanc epistolam nobis fauere: videbant enim, nimis apertè eius mentem aliam non esse ab ea, quam nos cum S. Augustino suprà explicauimus.

Hinc etiam patet, quàm parum probabiliter dixerint quidam, reliquos Patres iuxta hæc dicta S. Cypriani eo modo, quo ipsi volunt, intellecta, explicari debere. Primum enim verba S. Cypriani ipsis, vt vidimus, nullatenus fauent. Secundò, nullo pacto auctoritates Patrum verbis Cypriani ad eorum mentem intel-

telle&is accommodari possunt. Quid enim dicunt Patres? Aquam, & vinum in sanguinem Christi conuerti. Quid ex eorum mente S. Cyprianus? Vinum tantum, & non aquam conuerti; erit igitur expositio, aquam conuerti, id est aquam non conuerti: quam, nisi quis aqua ipsa sit insulsior, approbare non poterit. Non sunt igitur reliqui Patres per hæc verba Cypriani explicandi; sed ipse Cyprianus per ea, quæ tum alij Patres, tum ipse etiam in eadem epistola docet, explicandus est, vt neget scilicet aquam esse sanguinem Christi, id est aquam solam, & vino non mistam.

Ad S. Ioann. Chrysostomum responsio iam ex Synodo Trullana suprâ allata fuit in 4. exemplo. S. Augustini auctoritas est tantum negatiua, quare per primam generalem regulam est exponenda, præcipuè cum idem S. August. in Concilio Carthagin. III. vt suprâ retulimus, censuerit aquam cum vino esse offerendam. Rabanum quoque esse nobiscum, suprâ sect. 5. docuimus. Ad id, quod asseritur, Patres numquam asseruisse, aquam esse materiam calicis; respondeo, licet fortè vsi non sint hac voce *materia*, quam non faciliè apud veteres vsurpata reperies neque quoad vinum, sufficienter tamen indicasse esse materiam, dum dixerunt, in sanguinem Christi conuerti.

Ad quartum, fateor, nonnullos Theologos

con-

contra nos sentire, sed multi quoque nobiscum sentiunt, & quod pluris faciendum est, Patres omnes, Concilia & rationes: non tamen omnes illi, qui ab ipsis citantur, sunt contra nos, ut supra ostendimus de S. Thoma, Alensi, D. Bonaventura, & alijs nonnullis. Nec facile apud veteres Scholasticos reperiēs, qui dicant, aquā remanere simul cum sanguine, licet affirmēt plurimi, aquam verti in vinum. quod non aduersatur huic nostræ theologicæ sententiæ. Exponi præterea possent de quadam conuersione morali, ut supra diximus; & considerandum est etiam, eos obiter potius hanc quæstionem attigisse, ut etiam aduertit Estius, quam exactè pertractasse; ut non sit mirum, aliquos ex ipsis à veritate aberrasse. Nec est prætereundum, Hugonem, qui cæteris est antiquior, in cap. 6. Ioan. cum eandem hanc quæstionem mouisset, duobus verbis eam absoluisse, dicendo, *se nescire, an illa aqua verteretur in sanguinem, vel in sua substantia in calice permaneret*: quare etsi alibi alteram partem amplectatur, non est censendus ei firmiter adhæsisse, nec est eius auctoritas magnificienda. Gabriel quoque non loquitur de sententia asserente aquam remanere in propria specie, sed de ea, quam tradidit Innocentius: hæc enim sunt eius verba, *Id eo fuit tertia opinio, quod aqua cum vino transubstantiatur in sanguinem mista vino. hanc opinionem dicis*

*dicat Innocentius probabiliorem, quam communiter sequuntur Doctores Theologi, S. Thomas, Scotus, & ceteri tamquam indubitata. Non est autem hæc sententia contra nos, immò est ea ipsa, quam nos sequimur, licet non tam clarè explicet immediate conuerti in sanguinem, sicuti neque negat. Et quamuis Gabriel videatur necessariò prærequirere, vt priùs aqua transeat in vinum, non audet tamen dicere, ipsam remanere cum sanguine: & multo minùs Sotus, qui etiam affirmat, magnum sacrilegium commissurum sacerdotem, qui aquam apponeret, quam sciret simul cum sanguine in propria specie permanfuram. De consuetudine autem Patrum Dominicanorum Estius, cuius sententiæ videtur ea fauere, hæc habet verba oratione 15. *Licet hodie multorum vsu receptum sit, vt ante Missam inchoatam aqua adinistio fiat, velut Fratrum Dominicanorum, & quarundam aliarum Ecclesiarum, vt testatur Domin. Sotus in 4. dist. 9. sub finem questionis primæ. Sed vsus ille recentior est, sicut & ille, de quo Gabriel in expositione Canonis Missæ, vt ante Euangelium aqua apponatur: at meritò præferendus est hac in parte mos Ecclesiæ Rom. qui habet, vt ea mistio demum fiat imminente oblatione, idest, quando sacra mysteria inchoantur: & ita oportere fieri docet S. Thomas, & ex eo Syluester.**

Verùm ego non absque rationabili causa hunc morem apud sapientissimos & religio-

Q

nisi.

fissimos Patres Ordinis Prædicatorij inualuisse crediderim; eamque præcipuam fuisse, vt, sicuti ante Missam materia corporis Domini in patena collocatur; ita etiam materia sanguinis, vinum scilicet cum aqua, in calice apponeretur. ex quo nostra sententia probatur potius, quàm improbatur. Si quis autem obstinatè contendat ea potissimum ratione tunc apponi, vt facilius ante consecrationem in vinum conuertatur, Ecclesiam quoque Romanam, quæ hunc morem non seruat, de aquæ in vinum conuersione non esse sollicitam, ac proinde mirum in modum nostræ sententiæ fauere, idem fateatur necesse est.

Imò fauebit & hic idem PP. Dominicanorum mos; non enim, vt quidam ex nostris Aduersariis affirmabant, nihil referre existimabunt, vt aqua simul cum sanguine Christi permaneat; cum hoc tantopere caueant, sed pro maximo inconuenienti habebunt, vt verè habent. & merito. Nam Didacus Nuñez eiusdem Prædicatorij Ordinis, q. 74. art. 8. de illa sententia. quæ aquam in propria substantia remanere asseribat, loquens, hæc habet verba: *Secunda sententia relinquitur ab illo (Innocentio) tamquam improbabilis, & nostris temporibus iam est temeraria. Primò, quia est contra communem sententiam Scholasticorum, & Doctores sancti communiter docent, totum illud quod continetur in calice, conuerti*
in

in sanguinem Christi. Censent igitur Patres Dominicani, vt ex hoc eorum auctore colligitur, totum illud, quod continetur in calice, id est, vinum & aquam ei admistam, in sanguinem Christi conuerti; quia tamen sciunt, nonnullos quoque esse in contraria sententia, vt omne periculum minus rectè hoc Sacramētum conficiendi, caueant; aquam in principio Missæ vino apponere tutius existimarunt.

Ad auctoritatem Græcorum Resp. Græcos antiquos, & verè Catholicos aquam vino ante consecrationem miscuisse, vt constat ex Ioanne Damasceno, & alijs Patribus suprà citatis. De Neotericis verò dubium esse potest: Card. enim Bellarminus lib. 4. de Sacramento Eucharistiæ contendit, hunc errorem falsò illis imponi: Estius autem, & quidam alij verè ascribi. De his qui Romæ existunt, mihi compertum est, & ante, & post consecrationem aquam apponere, vt etiam sect. 10. in fine notauimus: an verò quidam alij Ecclesiæ Romanæ non communicantes, tantum post consecrationem admisceant, parum refert: vtcumque enim sit, de ipsorum auctoritate, quæ, si nobis aduersatur, ritibus quoque sanctæ Romanæ Ecclesiæ, quæ est infallibilis veritatis regula, repugnat, non sumus solliciti.

S E C T I O XII.

Argumenta contra nostram sententiam ex ratione deducta diluuntur.

PRoponebatur quinto loco ratio, cuius summa est: Apponitur aqua vino consecrando, non ex præcepto Christi, sed Ecclesiæ tantum, ergo non est materia. Ad quod Resp. & antecedens vel falsum, vel valdè incertum esse, & consequentiam infirmam & inefficacem.

Quoad antecedens, duæ sunt Theologorum sententiæ, altera negans, aquæ mitionem esse præceptum diuinum, altera affirmans: priorem, inquit Suarez sect. 2. esse communem Doctorum, sed nimium fauet suæ sententiæ. nam pro ea citat sequentes tantum, Scotum in 4. dist. 11. q. 7. in fin. Durand. quæst. 5. Sotum dist. 9. qu. 1. art. 9. Ledesmam p. 10. art. 7. Gabrielem lect. 35. in Canonem, & Gulielmum Durandum lib. 4. Rationalis cap 30. ex quibus etiam nonnulli suboscure & dubitativè loquuntur, & ferè omnes potius affirmant, esse hoc præceptum Ecclesiæ, quàm negent esse præceptum diuinum. Sotus etiam videtur esse in contraria sententia: nam inquit, non esse dubitandum, quin Apostoli ab ipso Christo hanc traditionem acceperint. At verò esse præceptum diuinum,

num, affirmat Alexander Alenf. parte 4. q. 32. memb. 5. a. 6. Hofius in Conf. cap. 14. in initio, Alfonsus à Castro verbo *Eucharistia* hæresi 7, Gulielmus Alanus lib. 1. de Euchar. c. 13. Gregor. de Val. disp. 6 in 3. p. lib. 1. qu. 2. quietiam pro eadem sententia Sotum citat, & Henriquez lib. 8. c. 12. Nec dissentit Card. Bellarminus, qui cap. 11. lib. 4. de Sacrament. Euchar. inquit, *hoc esse imperatum vel à Deo immediate, vel per Concilia, & Ecclesiam.* & hæc videtur probabilior sententia. Primò, quia conformior dictis Patrum; nam S. Cyprianus epist. 63. inquit, contra diuinum mandatum & institutionem fieri, si aqua vino non misceatur. Similiter Concilium Africanum cap. 4. & Aurelianum IV. c. 4. idem vocant *sacratissimum mandatum, & Saluatoris institutionem.* Concilium quoque Carthaginense III. cap. 24. & Trullanum can. 32. *Diuinam Christi traditionem* appellant. Denique antiquissimi Pontifices, vt aduertit Valentia, cum hanc mitionem aquæ faciendam esse asserunt, tamquam de re loquuntur, quam non ipsi primùm præciperent, sed quæ necessario fieri deberet ex traditione Christi & Apostolorum, & ipsemet Suarez fatetur à temporibus Apostolorum hoc præceptum manasse: atqui iuxta regulam ab ipso met Suarez approbatam disp. 66. to. 3. sect. 3. iudicium iuris diuini est, quando aliquid ab

vniuerſa Eccleſia obſeruatur, quod neque ab
 aliquo Pontifice, neque à Concilio præceptum
 eſt, ſed initium eius ſignoratur; ergo cùm conſtet
 ſemper in Eccleſia obſervatū fuiſſe hunc mo-
 rem aquam vino miſcendi, antequam præce-
 ptum aliquod Pontificis, vel Concilij extaret,
 ſignum proſectò eſt, ex diuino mandato ma-
 naſſe. Confirmatur præterea, quoniam verba
 illa, *Hæc quotieſcumq; feceritis in mei memoriam*
facietis, præceptum continent eo modo confi-
 ciendi Euchariftiam, quo Chriſtus confecit.
 quod præceptum quamuis non debeat exten-
 di ad omnes circumſtantias, nam alioqui eſſet
 etiam iuris diuini conſecrare in azymo, non
 videtur tamen excludenda aquæ miſtio. Pri-
 mò, quia eſt res valdè grauis, & ad Sacramenti
 ſignificationem non parum conferens. Secun-
 dò, quia fuit circumſtantia per ſe intentæ, nam
 quòd Chriſtus conſecrauerit in azymo, ex oc-
 caſione fuit dierum azymorum: ſimiliter quòd
 veſperi & poſt manducationem Agni Paſcha-
 lis, circumſtantia fuerunt, non propter Sacra-
 mentū ſecundum ſe intentæ, ſed prout à Chri-
 ſto inſtituebatur in fine ſuæ vitæ, in principio
 nouæ legis, &c. At miſtio aquæ non alia ratio-
 ne, niſi propter Sacramentum ſecundum ſe
 inſtituta fuit. Tertiò, nemo melius declarare
 nobis potuit, quaſnam circumſtantias in hoc
 Sacramento obſeruandas præceperit Chri-
 ſtus,

stus,quàm Apostoli; ipsi autem tamquam præceptum nobis tradiderunt hanc aquæ mystionem,ergo signum est,ita etiam eos intellexisse Christi Domini verba.

Dices,At Concilium Tridentinum ait, hoc esse ab Ecclesia præceptum,ergo supponit non esse mandatum diuinum. Respondet idem Suarez, Concilium non excludere Dei præceptum, sed tantum asserere esse Ecclesiæ, cum quo stat, vt sit etiam ipsius Christi. & exemplum ex ipsomet Suarez asferri potest, qui libro 4.aduersus Anglicanæ sectæ errores ca.9. docet, priuilegium exemptionis Clericorum immediatè, & cum omni proprietate esse de iure diuino, & nihilominus esse etiam de iure Canonico declarante ius diuinum, & priuilegium hoc conseruante. Addit Valentia, Concilium tradidisse id tantum,quod erat certissimum, quod verò erat probabilissimum, sed non certum,noluisse definire.quare quod subiicit Suarez, illum modum loquendi non solere vsurpari in rebus, quæ sunt de iure diuino præceptæ, est intelligendum de illis rebus, quas, certum est, esse de iure diuino. Addo, vocari præceptum Ecclesiæ, quia quamuis sit Christi, tamen in Euangelio non habetur, sed ab Ecclesia nobis proponitur.Et idem dici potest ad alias auctoritates, quas pro sua sententia affert Suarez.

Adiungit præterea Suarez pro hac sententia coniecturam, quia si hoc esset diuinum præceptum, vix posset reddi ratio, cur etiam non esset de necessitate Sacramenti, quia hæc necessitas solum oritur ex institutione & præcepto Christi, ynde in omnibus alijs materijs Sacramentorum, quidquid ex institutione & præcepto Christi necessarium est, est etiam de necessitate Sacramenti. Respondeo, missionem aquæ esse de necessitate Sacramenti, non de fuisse qui sentirent, vt refert S. Bernardus epistola 96. ita enim opinatus est Armacanus li. 9. de quæst. Armenorum cap. 9. & Cardinalis Bellarminus lib. 4. de Eucharist. cap. 10. inquit, dubium esse inter Theologos, an sit de necessitate Sacramenti, neque Concilium aliquod reperitur, quod aliquam partem definierit, licet & Concilia, & Patres & Theologi parti negatiuæ faueant: quam etiam ego censeo esse longè probabiliorem, non tamen adeò certam, vt inquit Suarez. Ratio autem, cur non sit de necessitate Sacramenti, multiplex potest afferri. Prima & præcipua est, voluntas Christi, quam nobis declarauit Apostolorum traditio. Secunda, quia aqua non adhibetur vt materia principalis, sed vt adiuncta vino, ita vt vino incorporaretur; se habet igitur non tamquam pars essentialis, sed tamquam commateria, siue pars, quæ ad perfectionem accidentalem pertineat:

aliq.

alioqui enim si requireretur tamquam materia per se principalis, deberet seorsum à vino consecrari, vt seorsum consecratur panis, & dicerentur esse duæ materiæ calicis, cùm verè vnica tantùm sit, quæ tamquam parte essentiali vino constat, & tamquam accidentali aqua. Tertia, quia cùm sit institutum hoc Sacramentum cum proportionem ad refectiõem corporalem, & in hac non sit adeò commune & necessarium, aquam vino misceri, quin aliquando contrarium fiat; neque propterea censeatur quis diuersum essentialiter potum ab aliis bibere, congruum fuit neque in ipso Eucharistiæ conuiuio, tamquam de necessitate Sacramenti aquæ misionem institui. Quarta denique ratio desumi potest ex aquæ significationibus, quæ non sunt essentielles huic Sacramento, vt notat S. Thomas in 4. dist. 11. qu. 3. & 3. p. q. 74. art. 8. nam plurimum spectant ad effectum eius, ad vnionem scilicet Christi cum Ecclesia, vel ad effusionem aquæ de latere, quæ non fuit causa nostræ redemptionis, cùm post Christi mortem, quando ampliùs mereri non poterat, contigerit.

At, inquit Suarez, distinctio de materia sufficienti & necessaria inaudita est in aliis Sacramentis, præterquàm Pœnitentiæ, in quo fuit specialis ratio in natura rei fundata. Cæterùm replicari faciliè poterit, si fuit specialis ratio in

Q

Sa.

Sacramento Pœnitentiæ, cur non poterit etiam esse in Sacramento Eucharistiæ? Adde, quòd in Sacramento Confirmationis à graui-
bus Theologis idem prorsus asseritur: dicunt enim multi, oleum esse materiam necessariam Confirmationis, balsamum autem congruam tantum, non verò necessariam, vt refert idem Suarez disp. 33 in 3. p. sect. 1. & Henriquez li. 8. c. 12. quam sententiam licet multi impugnent, nemo tamen quod viderim, eam reprehendit, quòd materiam sufficientem statuerit diuersam à necessaria: non igitur hoc debet haberi pro inconuenienti in hac nostra sententia.

Nota tamen, non rectè dici aquam esse materiam sufficientem huius Sacramenti, quia sequeretur posse Eucharistiam confici in aqua tantum, quod est hæreticum: potiùs ergo dici debet esse pars materiæ ad perfectionem accidentalem spectans; sicuti capilli, & dentes in homine; quamuis sint partes substantiales, spectant tamen ad perfectionem accidentalem ipsius hominis, non ad essentialem. Similiter quòd panis sit azymus, quòd quis accedat ad Sacramentum Pœnitentiæ contritus, sunt quædam perfectiones accidentales materiæ, quamuis magis, vel minùs necessariae pro conditione ipsarum, & voluntate Christi instituentis, & idem ferè non erit difficile in alijs Sacramentis inuenire, quamuis cum huic Sacramento
sum-

summa debeatur reuerentia, mirum non est, aliquam perfectionē accidentalem illi conuenire de iure diuino, quam fortè non facile in aliis Sacramentis reperiās.

Ostenſum eſt igitur, antecedens illud, Chriſtus non præcepit aquam apponi, vel falſum, vel incertum eſſe; quare ſicut Aduerſarij argumentabantur, aquam non eſſe materiam, quia Chriſtus non præcepit apponi, longè melius argumentari nos poſſumus, materiam eſſe, quia ipſe apponi præcepit. Sed dato etiam, quòd non præcepiſſet, non tamen valeret illatio, ergo non eſt materia; nam neque præcepit, nos confiteri peccata venialia, & tamen eſſe poſſunt materia Sacramenti Pœnitentiæ; neque præcepit, in pane fermentato conficiendum eſſe hoc Sacramentum, & tamen ſi conficiatur, verè panis fermentatus eſt materia. Multò minùs præcepit, commiſceri hordeum tritico, & tamen parum hordei multo tritico commiſtum, panem efficit, qui totus eſt materia corporis Chriſti.

Adde, Eccleſiam non poſſe quidem inſtituere nouam materiã Sacramentorum, poſſe tamen quoad uſum determinare veterem. Exempli cauſa: Poſeſt Euchariftia confici ex uino tum albo, tum rubro, occurrente tamen rationabili cauſa, poſſet Eccleſia præcipere, ut ſacerdotes uino tantùm albo utererentur. quo poſito,

sito, si quis adhiberet rubrum, peccaret quidem, sed conficeret tamen Sacramentum. Ita ergo dici posset, & vinum purum, & etiam mistum esse posse materiam calicis, sed Ecclesiam præcepisse, vt vino tantum misto vtamur: quod non est instituere materiam, sed determinare eam quoad vsum. abundè autem satis ostendit Christus, vinum aqua mistum, siue aquam simul cum vino esse materiam calicis, etiamsi non præceperit eam adhiberi, dum ipse super huiusmodi aquam vino mistam consecrationis formam protulit, vt suprà lect. 3. ostendimus.

Ad sextum, ex aqua, quæ farinæ commiscetur, & non conuertitur in corpus Christi, nisi priùs in panem conuersa fuerit, deductum, Respōdeo, adesse in hac similitudine magnum discrimen: farinæ enim non miscetur aqua à sacerdote, neque ob aliquam significationem, sed tantum, vt inde fiat panis; at verò vino miscetur aqua à sacerdote ex institutione Christi ob significationem sacramentalem. Secundò, ad panem conficiendum necessaria est aqua, quare patet non per se requiri, sed propter panem: vino autem non est necessaria, quare colligitur propter se apponi. Tertiò, aqua non est cibus, consequenter non est apta vt conuertatur in corpus Christi, quod per modum cibi nobis proponitur, est verò potus; & sanguis quoque, in quem dicimus eam verti, per modum

dum potus nobis exhibetur. Quartò, si remaneret in pane aqua in sua substantia, esset contra intentionem Ecclesiæ & sacerdotis, ac propterea non ordinantur verba consecrationis ad illam conuertendam; in vino verò non est contra intentionem sacerdotis, vel Ecclesiæ, quia posset non apponi vino, neque apponitur, vt conuertatur in vinum, quia, etiamsi constet conuerti non posse, vel propter modicum temporis interuallum, vel ob aliam rationem, adhuc calici apponetur. Ad formam igitur argumenti, negamus minorem, ita scilicet, solum vinum esse proximè conuertibile in sanguinè Christi, sicuti solus panis in corpus: nam etiam aqua mista vino est proximè conuertibilis. Ad auctoritatem S. Cypriani iam suprà sect. 6. respondimus, & rursus etiam hinc dicimus, similitudinem illam non esse sumendam in omnibus; alioquin sequeretur, vt, sicut sine aqua impossibile est confici panem, qui sit materia corporis Christi, ita non posse sine aqua vinum consecrari: id enim verba eius multò magis propriè demonstrare videntur. Sensus igitur S. Cypriani est, sicuti ex farina & aqua fit vnū tertium mistum, quod conuertitur in corpus Christi, ita ex aqua & vino fieri vnum tertium mistum accidentale, quod conuertitur in sanguinem. quare non inquit, aquam conuertendam in vinum, sed vino miscendam, neque

com-

comparat ex vna parte aquam & panem cum aqua & vino ex altera, sed farinæ contraponit vinum, & aquam aquæ; oporteret autem ex sententia Aduersariorū contraponi vinum pani, si ita vellet S. Cyprianus, vinum esse materiam calicis, sicuti panis est materia corporis.

Ad septimū, quòd aqua sola consecrari posset, si esset ex æquo materia cum vino, Respondeo, non dicere nos ex æquo aquam esse materiam cum vino, sed vinum esse principalem & essentialē materiam, aquam verò minùs principalem, & accidentalem, ita vt ratio materiæ analogicè illi conueniat: nam conuenit primò vino, & ratione illius, aquæ quæ cum illo mista est. Hinc efficitur, vt vinum possit esse solum, tamquam substantia; quæ per se existit, aqua verò tamquam accidens non possit, sed tantum simul cum vino. Cur autē ita se habeant, est: primò voluntas Christi per Ecclesiam & traditiones nobis manifestata. Secundò, adest etiam conuenientia, vt, sicuti ens physicum habet perfectionē essentialē, sine qua non esset, & habet accidentalem, sine qua esset quidem, sed non perfectum; ita etiam hoc Sacramentū habet essentialē materiam, quæ est vinum, & habet accidentalem, quæ est aqua, sine qua fieret quidem Sacramentum, sed non tam perfectum accidentaliter, vt doctè notauit Alexander Alensis, quia deesset illi aliqua significatio.

Dices,

Dices, Ergo etiam in pane idem deberet reperiri. Respondeo, aliquo pacto in pane quoque idem videri, quia perfectio eius accidentalis est, quod sit in azymo & in tritico maxime puro, quamuis, quia hæc non tam claram habent significationem, nec tam certò ex Christi institutione pendent, non tam necessaria existimentur. Præterea Christus in huius Sacramenti institutione maxime attendit usum hominum, pani autem nihil solet addi, quod fiat vnum cum ipso; vino verò solet addi aqua, tamquam additamentum quoddam accidentale. quare non mirum si circa vinum potius voluit hanc perfectionem accidentalem attendi. Dices, Accidentia non conuertuntur, ergo si aqua est accidens, neque debet conuerti. Respondeo, accidentia physica non conuerti, conuerti tamen accidentia logicalia, quæ entitatiuè sunt substantiæ; sicut cōuertitur etiam fermentum in corpus Christi, si sit in pane, quamuis non sit de eius essentia.

Ad octauum, in quo tamquam inconueniens inferebatur, posse consecrari mistum, in quo maior pars aquæ adesset, Respondeo, dummodò hoc mistum ex vino & aqua communi usu appellari soleat vinum, absolutè & aqua mista saporem vini retineat, vt dicebat Innocentius à nobis suprà sect. 4. relatus, totum verti posse in sanguinem; quia totum sub vini nomine.

me-

meritò comprehenditur. Quocirca, quamvis legamus esse reprehensos, qui magnam aquæ quantitatem in calice ponebant, non tamen legimus declarata irrita illorum Sacramenta. Dico tamen longè satius esse, modicam aquam apponi, Primò ob variâs significationes, de quibus suprà. Secundò, quia quo minùs est aqua vino apposita, eo veriùs & absolutiùs solet illud appellari vinum: nam si maior sit quantitas aquæ quàm vini, refugiunt sæpè homines illud appellare vinum, & dicunt potiùs esse aquam, sed vino permistam, quàm vinum aqua dilutum. Quanta verò debeat esse quantitas aquæ, quæ hanc denominationem tollat, non potest certò statui, vt contingere solet in his rebus moralibus, præcipuè cum non parum pendeat ex varia conditione & natura vini.

Obijcies, Si aqua conuertitur in sanguinem, quia nomine vini etiam aqua comprehenditur, ergò apud homines, qui lingua vterentur, in qua sub nomine vini non posset intelligi aqua mista, iam tunc aqua non posset spectare ad materiam. quod est falsum, quia materiæ Sacramentorum debent esse certæ & impermutabiles. Respondeo, non ea tantùm ratione conuerti aquam in sanguinem, quia sub nomine vini comprehenditur, sed etiam, quia scimus à Christo fuisse vino admistam, & simul cum vino consecratam, & ob alias rationes suprà
ad-

adductas. præterea quoad illam rationem respondeo , etiamſi in aliqua lingua (quod non eſt tamen veriſimile) hoc contingeret, non inde ſequeretur, mutandam eſſe Eucharistiæ materiam , tum quia id non mutaretur in lingua Latina & Græca, quibus Eccleſia vtitur, tum etiam magis, quia debemus reſpicere conſuetudinem loquendi, qua vtebatur Chriſtus Dominus : ex qua accepta regula non debet per aliam linguæ conſuetudinem immutari, ſed potiùs quælibet alia lingua deberet illi accommodari. Adde, idem argumentum fieri poſſe de materia corporis Domini: nam ex vſu & communi modo loquendi ſolent Theologi determinare, qualis panis ſit triticeus, & conſequenter apta materia corporis Chriſti.

Ad nonum, in quo deducebatur ex noſtra ſententia poſſe aquam ſolam vini accidentibus affectam conſecrari, Reſpondeo, negandam eſſe conſequentiam: quia, vt aqua conuertatur in ſanguinem, debet eſſe admixta vino, & non accidentibus vini: & ſicuti quando accidentia tantum vini ſunt in calice, non poteſt dici quòd ibi adſit vinum; ita neque quòd aqua mixta accidentibus, vel totum illud miſtum ex accidentibus vini & aquæ ſubſtantia, ſit vinum.

Dices, At cenſeretur vinum moraliter, ergo poſſet conuerti. Reſpondeo, falſò cenſeretur,

R ſiue

siue physicè, siue moraliter. Neque verò huic falsitati medetur particula (*moraliter*) quia hæc non suffragatur neque innititur falsitati, sed veritati, & explicat, quomodo verè sunt intelligenda multa quæ communiter asseruntur. Alioqui si hoc argumentum concluderet, probaret etiam, quòd lapis, si esset sub accidentibus panis, posset conuerti in corpus Christi, quia eodem pacto censeretur moraliter panis, & id quòd censetur moraliter panis, dicunt Theologi in corpus Christi conuerti.

Ad decimum, inferens ex sententia nostra posse consecrari mistum, licet non esset vinum, quod est alienum à sana doctrina, Respondeo, alienum planè hoc esse à sana doctrina, id est, à doctrina nostra, quia secundum nos est impossibilis hic casus naturaliter, ob rationes in nostris disputation. philosophicis allatas, quibus probauimus, aquam corrumpi non posse à vino. Præterea etiam si hoc contingeret, neque in ordine ad communem potum censeretur illud mistum vinum, quia & quando vinum corrumpitur, non appellatur simpliciter vinum, sed vinum corruptum, vel acetum, & hoc tertium in colore, & omnibus accidentibus quàm maximè à vero vino differret, consequenter non esset apta materia calicis: Auctores verò contrariæ sententiæ eo magis hac difficultate premuntur, quo faciliùs censent, aquam & vinum

vinum mutuo corrumpi posse. Nam fateri tenentur ex ipsis corruptis gigni tertium mistum, quod ex ipsorum principijs à vino lymphato in accidentibus non differret, cum neque differat vinum, quod habet aquam in propria substantia admistam, ab eo quod iam in se eam transmutauit, & hoc mistum esset materia calicis, cum plura Concilia mistum ex vino & aqua dicant esse materiam huius Sacramenti, vt lect. 3. & 4. retulimus.

Ad vndecimum, quod etiam aqua rosacea admista vino verteretur in sanguinem; Respōdeo, Alanum lib. 1. de Eucharistia cap. 13. admittere consequentiam. Immo est, inquit, hoc ipsum de totius liquoris conuersione tam receptum, vt, si aqua rosacea, vel quicumque alius exoticus succus in ea quantitate admisceretur, qua nunc aqua, non minus conficeretur Sacramentum, quàm si nihil tale esset admistum. Quod immeritò pro magno absurdo habet Suarez: nam si granum hordei mistum triticeo pani vertitur in corpus Christi; quid mirum si idem dicatur de aqua rosacea respectu vini? modicum enim quodammodo absumitur à plurimo, vt dicebat D. Thomas. Sed quidquid sit de hoc, neganda est consequentia, Primò, quia aqua rosacea non admisceretur ex institutione Christi, sicut aqua naturalis. Secundò, quia cum vino mista non facit vnum mistum, quod sit vinum vsuale:

numquam enim moris fuit miscere aquam rosaceam vino . quamuis igitur aqua naturalis per se sumpta non sit magis materia, quàm aqua rosacea, tamen est apta simul cum vino efficere mistum, quod est simpliciter vinum vsuale, quali vsus est Christus, ad quod non est apta aqua rosacea.

Ad duodecimum, quòd etiam vino corrupto posset sub aquæ speciebus conseruari sanguis Christi, Respondeo, iam sæpius dictum esse, aquam non esse per se materiam, sed quatenus cum vino conficit vnum compositum, quod totum dicitur vinum. & idem dicendum de conseruatione, dummodo species aquæ non sint à vini speciebus penitus separatæ; quia tunc vt pars integrans considerari possent, sicuti in responsione ad 14. dicemus . quando igitur sunt simul cum speciebus vini corruptis, & ipse tamquam vinum corruptum se habent, & eius imitantur naturam, sicuti cum vino integro, vini nomine insignitur aqua, consequenter si desinat sanguis Christi esse sub vini speciebus, desinet etiam esse sub accidentibus aquæ illis commistis.

Ad decimumtertium, in quo argumentabantur, fore totum sanguinem Christi sub speciebus aquæ, si in hanc vini speccies conuerteretur, Respondeo, aquam conuertere in se species vini sequi posse ex ipsorum sententia, non

ex nostra : nam in nostra , cùm vinum & aqua
 mutuò se non corrumpant , nisi valdè per ac-
 cidens. quod ipsi dicunt de conuersi one vini in
 aquam , contingere ferè non potest ; & si con-
 tingeret , desineret ibi adesse sanguis Christi,
 q̄b rationem in responsione ad superius argu-
 mentum allatam ; at in ipsorum opinione id e-
 uenire facilè posset , si tempore consecrationis
 adesset vinum & aqua in propria substantia,
 & deinde aqua conuerteret in se vinum , siue
 eius species . quod iuxta ipsorum principia vi-
 detur facile contingere posse , absque eo quòd
 in accidentibus vllum signum appareat , quia
 nullo signo de nouo existente , volunt , posse,
 vinum in se aquam conuertere . Item conuersa
 aqua , remanere volunt accidentia eius , quibus
 afficitur vinum : ergo etiam conuerso vino ,
 poterunt remanere accidentia vini , quibus
 afficiatur aqua , quare apparebunt species vi-
 ni , & ibi non erit sanguis Christi , sed sub-
 stantia aquæ . quod est contra omnem sensum
 Ecclesiæ .

Ad decimumquartum , quòd sanguis Chri-
 sti conseruari posset sub aquæ speciebus etiam
 à vino separatis , Respondeo , & consequen-
 tiam negari posse , & consequentis absurdita-
 tem . Negatur consequentia , quia cùm , vt sæpè
 dictum est , eatenus aqua sit materia sanguinis
 Christi , quatenus vnũ efficit cum vino ; non

mirum, si ab hoc, siue ab eius speciebus separata, non amplius ipsum contineat. Obijcies, hoc esse contra Concilium Tridentinum, à quo dicitur sess. 13. can. 3. *Sub singulis cuiusque speciei partibus separatione facta totum Christum contineri*: species enim aquæ sunt partes specierum Sacramenti Eucharistiæ. Respondeo, dictum Concilij debere intelligi de parte specierum, quæ retineat omnia accidentia propria vini, nam si separaretur à reliquis accidentibus vinum, aut alterum accidens tantum, v. g. color, vel sapor, non sub eo esset sanguis Christi, quando enim illæ species acescunt, non corrumpuntur omnia accidentia, sed fere tantum sapor, & nihilominus desinit ibi esse sanguis Christi; quanto magis igitur non erit sub accidentibus aquæ separatis, in quibus nec sapor, nec color, nec vllum est accidens proprium vini? consulto enim dixit Concilium, sub qualibet parte, non sub quolibet accidente, non potest autem separari aqua, nisi etiam simul separantur accidentia. vel, quod in idem recidit, de parte integrante loquitur Concilium, non autem de componente; sicut enim quando mistum resoluitur in elementa, ex quibus componebatur, non debent elementa retinere formam misti, quando verò diuiditur idem mistum in partes integrantes, quælibet pars retinet formam totius: ita quando mistum ex vino & aqua

qua resoluitur in suas partes componentes, non
 est necesse, vt partes ipsius retineant formam
 misti, siue naturalem, siue supernaturalem;
 id est sanguinem Christi; est autem necesse;
 quando resoluitur in partes integrantes, quæ
 sunt partes & ipsæ permistæ ex aqua & vino:
 quòd si vini species etiam ab aqua separatæ,
 sanguinem Christi conseruant, est, quia vinum
 independenter ab aqua, & ab eius mitione
 est materia sanguinis. sicut igitur illa proposi-
 tio, quælibet pars misti est mista, intelligitur de
 parte integrante, non de componente, ita et-
 iam dictum Concilij, quòd quælibet pars spe-
 cierum contineat sanguinem Christi, de parte
 integrante est intelligendum, non autem de
 componente, qualis est aqua. Confirmatur re-
 sponsio exemplo panis: nam si panis consecra-
 tus resolueretur in farinam & aquam, vel na-
 turaliter, vel saltem per potentiam diuinam,
 quis diceret, sub illa aqua vel farina esse corpus
 Christi? Nemo sanè; ergo idem dicendum de
 aqua respectu vini, quia, vt dicebat S. Cypria-
 nus, aqua ad vinum in calice se habet, sicuti a-
 qua ad farinam in pane. Cæterum, si pro in-
 conuenienti habent Aduersarij, quòd separa-
 tione aquæ à vino facta, non sit sanguis Chri-
 sti sub accidentibus aquæ; quanto magis in-
 conueniens existimandum erit, quod absque
 separatione detur aliqua pars specierum sacra-

mentalium, sub qua non adfit idem sanguis; hoc autem ex ipsorum sententia sequitur: nam aqua mista vino est verè pars illius potus, & illius misti, quod totum dicitur consecrari à Patribus, & à Concilijs: & tamen affirmant illi, sub eius accidentibus non esse sanguinem Christi.

Negari quoque potest absurditas consequentis cum Ægidio Coninck, qui tamquam probabile affirmat in hoc casu etiam sub aquæ speciebus permansurum sanguinem Christi, quamuis sub ipsis poni primò non possit: plura enim requiruntur ad generationem, quàm ad conseruationem, & affert instantiam de caractere, qui in anima separata imprimi non potest, sed semel impressus conseruatur. Verùm huic instantiæ occurrere quis posset, dicens, characterem per se primò in anima imprimi, quamuis requiratur tamquam conditio, quòd sit corpori vnita: at verò vinum non tantum videtur conditio, vt aqua sit materia sanguinis, sed etiam causa, & vino per se & primò conuenit, conuerti in sanguinem, non verò aquæ.

Aptius exemplum fortassis esset idem Christi sanguis ad vnionem hypostaticam relatus, Nam eatenus est assumptus, quatenus in Christi corpore erat, & tamen effusus eandem vnionem retinuit, vt docet S. Thomas quodlib.

lib. 5. art. 5. & definitum fuisse à Clem. VI. refertur in Direct. Inquisit. 2. p. quæst. 10. & pluribus probat Franc. Suarez tom. 2. in 3. part. disp 47. sect. 3.

Vtrum autem horum sit verius, scilicet, vel fore Christi sanguinem sub aquæ speciebus in hoc euentu, vel non fore, pro certo affirmare non ausim: crediderim tamen ex hac altera quæstione pendere, an scilicet aqua tamquam compars materiæ in sanguinem transeat, vel ratione tantum vini, cui est adiuncta. si enim illud prius dicatur, non defuturum sub eius speciebus sanguinem probabilius censuerim; si verò hoc posterius, contrarium affirmauerim. Cum autem à Domino nostro adhibita fuerit aqua, & ipsa quoque sacramentali significatione non sit destituta, in illam priorem partem me propendere fateor.

Confirmatur, quia si gutta sanguinis super linteam cadat, species aquæ circumfundentur accidentibus vini: si ergo sub aquæ speciebus seorsum sumptis conseruari Christi sanguis non posset, sequeretur, ibi non adesse. quod non parum negotij nobis exhiberet, cum non posset satis discerni, ubi desinerent species vini, & inciperent aquæ; neque Ecclesia de hoc nos admonet, & totum illum liquorem pro vero Sacramento habere videtur.

Sed subtilis obiectio occurrit, videlicet, vel

R 5 aqua

aqua est pars materiæ integrans, vel componens; si integrans, ergo potuit consecrari sola, sicuti & quælibet pars integralis panis; si componens, ergo non poterit sub eius accidentibus conseruari sanguis Christi, sicuti neque corpus sub farina, si per diuinam potentiam à pane separaretur.

Respondeo, aquam & componentem, & integram materiam partem dici posse. Ratio est, quia mistum ex aqua & vino, non est perfecte & substantialiter mistum; quia ad hoc requiritur, vt miscibilia corrumpantur: sed est mistum ad sensum; consequenter & misti appellationem subire potest, & non misti, sed per accidens aggregati; misti scilicet quoad sensum, & aggregati quoad substantiam & veritatem. quatenus autem mistum appellatur, eius pars componens erit aqua; quatenus vero aggregatum per accidens, eius pars integrans eadem dicetur. quod comprobatur, quia quælibet pars misti debet esse mista ex Aristotele 1. de Gener. tex. 86. at huius potus ex aqua & vino conflati, quælibet pars per se sensibilis est quidem mista, at non quælibet pars simpliciter: quia, cum in omnes suas partes non sit aqua diuisa (continuum enim non potest in omnem sui partem diuidi) necessario fatendum est, dari minimam aliquam partem aquæ, quæ nullo vino sit admista, consequenter ipsum totum erit

erit mistum sensibilibus, sed non simpliciter & verè. sicuti etiam videre est in alijs similibus mistis, vt in farina, quæ ex hordeo & tritico sit confecta: in veste ex lino & lana contexta: in metallo, ex auro & argento conflato: in aceruo ex lapidibus & cæmentis aggesto. quæ omnia mista sunt ad sensum, non secundum veritatem, cum denuo in partes, suam naturam omnino retinentes, resolui possint.

Hinc ad argumentum dico, aquam in consecratione calicis se habere, vt partem componentem; & idcirco non posse consecrari solam. & ratio est, quoniam, vt sæpè diximus, in materiis Sacramentorum non attenduntur subtilitates physicæ, sed iudicium sensus, & hominum vsus. consecratur igitur calix, vt quoddam mistum ad sensum, & consequenter aqua, vt pars componens hoc mistum. At verò ad cognoscendum, an corpus, siue sanguis Christi adhuc sit præsens, non tam vtimur iudicio sensus, quàm rationis; nec hominum existimationem, sed ipsam rei naturam consideramus. Nam ad hoc, vt non censeatur adesse corpus Christi sub aliqua specie, non sufficit, vt illa species sensibus corrupta videatur, sed oportet, vt ita sit à parte rei, etsi in fragmenta tam minima hostia diuidatur, vt aciem oculorum fugiant; dum tamen sub ipsis possit conseruari substantia panis, verè sub illis erit corpus Christi, quamuis

pri

primò non potuisset sub eis poni, consequenter aqua, quæ in consecratione, in qua attenditur iudicium sensus, se habet vt pars componens, in conseruatione Sacramenti, in qua respicitur ipsa rei veritas, se habet vt pars integrans; ac proinde, licet non possit sola esse materia consecrationis, poterit tamen esse conseruationis.

Sed quoniam diximus contrarium quoque esse probabile, qui parti neganti adherere eligeret, dicere poterit, aquam semper vt partem componentem considerandam esse, & quòd non per se, sed quatenus tantum mista vino, est Sacramenti materia; & id quod dicitur de conseruatione Sacramenti ab integritate specierum dependente, in materia tantum per se locum habere. sed hæc fortasse subtiliora nimis multis videbuntur.

Vt cumque igitur sit, retorquetur argumentum, quia volunt ipsi, posse à vino extrahi quemdam liquorem aqueum, qui nec vinum esse videtur, nec aqua, licet sit aquæ per omnia similis: si igitur ex calice consecrato extrahatur hic humor, vel sub eius speciebus aderit sanguis Christi, & dici poterit esse sub aquæ speciebus, cum ab aqua quoad accidentia non videatur hic humor differre; vel non erit, & separatione facta, desinet esse sanguis Christi sub aliqua parte specierum contra

tra Concilij Tridentini decretum.

Ad decimumquintum, in quo inferbatur, posse sacerdotem consecrare aquam solam, si ad illam suam intentionem referat, Respondeo, nec posse sacerdotem habere hanc intentionem, quia aqua non est sensibilibiter distincta à vino, ut supra sect. 8. argumentabamur, neque si posset, effectum eius verba sortirentur. Et ratio est, quia aqua neque mista vino est per se materia calicis, sed tantum quatenus pars componens illud mistum ex aqua & vino. est autem discrimen semper mente retinendum inter partem componentem, & integrantem, quod hæc potest per se sola consecrari, non autem illa: alioqui sequeretur posse sacerdotem consecrare farinam tantum in pane, vel materiam tantum, siue formam substantialem in vino. quod absque errore dici non potest.

Obiicies, Si aqua est materia per accidens, non autem per se, scilicet quatenus tantum admiscetur vino; ergo non magis, quam quilibet alius liquor, qui vino admisceretur, dici potest materia sanguinis. Respondeo, dupliciter aliquid posse dici per accidens, Primò, ut per accidens cōtraponitur essentiæ; Secundò, ut non distinguitur à re, quæ est præter intentionem: aqua igitur est materia per accidens priorimodo, non autem posteriori, quia est ex institutione Christi. quare potius dicerem, esse materiam

riam accidentalem , quàm per accidens. Alius autem liquor, qui vino admisceretur, esset per accidens vtroque modo . quare non mirum si aqua dicitur materia, siue commateria sanguinis, non autem alius liquor.



APPEN-

N O V A
A D
DISPUTATIONEM
PRÆCEDENTEM
APPENDIX.

ALL OTHERS
WILL BE
THINKING

LECTORI S.



LECTORES vt pueros, aptos
 pellendæ siti gregi præ-
 beret Isaac, voluit præ-
 altas scrobes & puteos
 fodi, quorum ex venis munus op-
 tatissimæ lymphæ saliens, ab æstu
 sedaret balantûm anhelitus. Non
 tamen ab Isaachirecens effossi pu-
 tei, non primam ab eo accepere
 lacunam; sed oppletos inertî con-
 gerie lapidum, & emortui soli ma-
 terie, denuò effossos & ignauâ ex-
 purgatos struere ad vitales ipse &
 pristinos reuocauit vsus, viuo &
 emicante reperto gurgite. Non e-
 go dissimilis magno illi Patri gen-
 tium, quamquam in dissimili ope-
 re: aperuit ille obstructos puteos
 ingrata obfitos humo, vt salubres

excauaret riuos. Opusego de Trá-
substantiatione aquæ quod olim
effoderá, nonnullorú subtilis, non
inficior, & accurata sedulitas si
non oppleuerat ad os, multo cer-
tè limo contentionum turbarat.
ligonem propterea huius Appen-
dicis denuò admoui, vt effosso di-
ligenter opere, non solùm primo-
ribus labijs commendetur aquæ
nostræ explorata veritas, sed aui-
dissimo probata palato bonitatem
vbique suam testetur & prædicet.
Hanc lector humanissime ad sa-
tietatem degusta, & hauri.

A.P.

APPENDIX

Ad disputationem de Aquę trans-
mutatione in sacrificio Missę.

CAPVT I. ad SECT. III.

*Quibusnam principijs, philosophicis ne, an
theologicis, sententia nostra innitatur.*



SENTENTIAM nostram recentio-
res nonnulli referentes, eius fun-
damentum dicunt esse princi-
pium illud physicum, quod a-
qua naturę viribus in vinũ num-
quam verti queat, totumque theologicum
nostrum ædificium super hoc fundamēto con-
strui: ex hoc enim clarè deducitur aquam vel
immediatè in sanguinem verti, quod nos vo-
lumus; vel simul cum sanguine mistam perma-
nere, quod apud nos absurdum haberi autu-
mant, eò quod fideli populo idololatrię causa
exinde præberetur. Quo in dicto tripliciter de
nostra sententia malè merentur. Primò, quod
physicum fundamentum falsò ei subiiciunt;
Secundò, quod vera & solida eius fundamen-
ta prætereunt; Tertiò, quod hoc ipsum ab eis
relatum, non probè ac perfectè explicant. sin-
gula probemus.

Quo

Quo ad primum, est quidem principium illud philosophicum verissimum, nostræque sententiæ mirum in modum opitulatur, at non est eius fundamentum: sine fundamento enim non potest ædificium stabile construi: at sine hoc etiam principio nostra theologica sententia optimè se habet, & inconcussa permanet; complures enim illud principium non admittunt, qui tamen nostræ sententiæ adhærent, & inter alios Card. Alanus ab ipsis-met recentioribus allatus, à quo non videtur dissentire Card. Toletus, cùm dicat aquam siue veram in vinum, siue non, semper esse materiam calicis, & alij multi.

Dices, At vos, qui principium illud pro competentissimo habetis, cur pro fundamento vestræ sententiæ ipsum agnoscere dedignamini?

Resp. Quoniam etsi verissimum re vera est, non tamen ab omnibus recipitur, & eis quoque qui illud inficiantur, nostram sententiam probari percupimus. Præterea, quia aliud pro fundamento habemus ex Philosophia, quod à nemine in dubium vertitur, & ab ipsis etiam Aduersariis admittitur. Tertiò, quoniam absque ullo fidei detrimento philosophicum illud principium negari potest. Nos autem ex fidei principiis malumus deduci sententiā nostram.

Quænam igitur sunt nostræ sententiæ vera fundamenta? quod erat secundo loco proban-

bandum. Ex parte quidem Philosophiæ, quòd aliquando saltem, aquam in vinum non conuersam consecrationis tempore in calice adesse necessario fatendum est: licet enim demus vinum posse aquam in sui substantiam vertere, adhuc tamen vel ex vini debilitate & exiguitate, vel parua temporis inter aquæ infusionē & consecrationem intercapedine, eandem nondum eo tempore in vinum transmutatam interdum saltem fateri oportet, vt sect. 3. nostrę disputationis probauimus, & nostri Aduersarij admittunt.

Dices, Atqui in scopulum adhuc, quem vitæ, inciditis, scilicet in physicū fundamentum.

Resp. hoc adeò esse euidentis & certum, vt meritò theologica sententia super ipso construi possit: ex altera enim philosophica propositione euidenti, & ex altera de fide, conclusio sequitur, vel de fide, vel theologica, & extra aleam dubitationis posita. Afferere quoque possumus, hoc principium philosophicum non tam esse fundamentū nostrę sententię, quàm suppositum: posito enim quòd aqua remaneat, quærimus quid de ea fiat. quòd si hoc suppositum non detur, non quidem falsitatis arguetur sententia nostra, sed locus ei non dabitur, omnisque controuersię, & disputandi aditus obstruetur. Ad veriora igitur & theologica fundamenta transeamus, quæ plurima
S qui-

quidem sunt, vt ex nostra disputatione liquet; sed vnum tantum ego ex præcipuis eligam. Est autem hoc, verba Sacramentorū quotiescumque super materiam ab Ecclesia præscriptam proferuntur, id efficiunt quod significant: sed ex Ecclesiæ præcepto super aquam in vinum non conuerſam, illi tamen mixtam, proferuntur, & vtrumque, id est, vinum & aquam, significant esse sanguinem: ergo non solum vinum, sed etiam aquam, in sanguinem vertunt. Maior huius argumenti est certissima; est enim certissimum effatum apud Theologos, formas Sacramentorum nouæ legis id efficere quod significant, cum Sacramenta veteris legis significarent tantum, & non efficerent. Addidimus autem nos, quotiescumque super materiam ab Ecclesia præscriptam proferuntur: quia si super aliam materiam, clarum est nihil efficere; non enim verba calicis super oleum prolata ipsum in sanguinem verterent, sed in quamcumque ab Ecclesia præscriptam hanc vim effectiuam habent. non quod Ecclesia nouas possit Sacramentorum materias instituere, sed quia in præscribenda materia non potest errare; & cum sacrilegum sit formam Sacramenti super ineptam materiam proferre, id præcipi ab Ecclesia, impium esset asserere. Maior igitur huius nostri argumenti certissima est, & ab ea Aduersariorum euasio præcluditur, qua ad in-

frin-

fringendam huius argumenti vim vtuntur, dicentes verba consecrationis super olei quoque guttam vino admistam prolata, ipsam in sanguinem non vertere. præcluditur inquã: nam olei gutta non est ibi ex Ecclesiæ præcepto, sicuti gutta aquæ.

Minor etiam nostri syllogismi in certitudine non est minor. Nam ex Ecclesiæ præscripto post aquæ in calice infusionem, statim aliquando consecrationis verba proferuntur, cum scilicet sacerdos ipsam apponere ante offertoriũ oblitus fuit: tunc autem clarum est, & in confesso apud omnes, proferri verba consecrationis super vinum & aquam nondum in vinum cõuersam. Neque verò dicas super vinum tantum proferri, tum quia materia debet esse determinata & distincta, vinum autem non est ibi ab aqua distinctum; tum quia aqua sub calicis nomine intelligitur, sumitur enim continens pro toto contento: cumque de contraria intentione non admoneatur sacerdos, utique debet eam cõformare verbis à se iuxta S.R.E. ritum prolatis. cum igitur per verba consecrationis totum quod est in calice, ex Ecclesiæ præscripto significetur esse sanguis, ibique Ecclesia iubente adsit aqua, & ipsam in sanguinem verti, meritò ambigere nemo potest. Mitto alias rationes & auctoritates pro nostra sententia, quas in nostra disputatione prosecuti

sumus, & in sequentibus etiam capitibus attingemus.

Denique illud ipsum fundamentum, quod nostræ sententiæ Aduersarij ascribunt, non probè explicant. dicunt enim, quia alioqui occasio idololatriæ populo Christiano præberetur: at cur non dicunt totū quod est in calice, post consecrationem ab Ecclesia pro Christi sanguine haberi, vt nos sect. 4. & sect. 8. ex auctoritate præcipuè Concilij Trident. probauimus? cur etiam D. Thomæ auctoritatem non afferunt, qui 3. p. q. 78. art. 8. asserit aquam non posse in calice consecrato permanere, alioquin non totum adoraretur veneratione latriæ? verba eius sunt: *Quidam dicunt, quod aqua adiuncta vino perse manet, vino conuerso in sanguinem. sed hæc opinio stare non potest, quia in Sacramento altaris nihil est nisi corpus & sanguis Christi: sicut enim Ambrosius dicit, ante benedictionem illa species nominatur, post benedictionem corpus significatur, alioquin non totum adoraretur adoratione latriæ. Est igitur hoc argumentum non nostrum, sed S. Thom. cuius auctoritatem ab eo nunquam nos seiuungimus, sed Aduersarij ipsam ubique supprimunt, vel dissimulant: adeo enim clarè nostræ sententiæ patrocinatur, vt eam Aduersarij eludere possent, vt multas SS. PP., desperarent, & aperte eandem refutare non ausi sint.*

CAP. II. ad eamdem SECT. III.

De physico contraria sententia fundamento.

AVino propriis naturæ suæ viribus posse aquam in se ipsum verti tamquam certum Aduersarij supponunt. An, hoc autem eorum sententiæ fundamentum appellari debeat, adhuc animi pendeo. Ratio est, quoniā ad veri fundamenti rationem duo requiruntur, alterum, vt ita dicam, positium, alterum negatiuum. Positium est, vt fulciat & sustineat, superque eo tamquam in propria sede ædificiū collocetur secureque consistat. Negatiuum, vt eo ablato, domus tota consistere nequeat, sed concidat. Quare illud propriissimè erit alicuius sententiæ fundamentum, quo posito & ipsa ponitur, & ablato ipsa quoque aufertur, Porro erga Aduersariorum sententiam dogma illud philosophicum, altero tantum ex his muneribus fungitur. Non enim eo posito & ipsa ponitur. Nam, vt vidimus cap. præcedenti, multi qui illud principium admittunt, hanc sententiam non complectuntur. Eo tamen ablato, & ipsa corrui. quod cum sit maximè notandum, erit à nobis hîc perspicuè declarandum, & firmiter constituendum.

In primis igitur non differunt Aduersarij,

PP. omnes in ea sententia esse, vt aqua in sanguinem conuertatur: hoc enim clarissimis verbis asserunt, vt patet ex nostra sect. 5. Idem etiam affirmat Innocentius, idem S. Thomas, & reliqui omnes antiqui Scholastici: Ecclesiam quoque ea intentione aquam admittere, vt in sanguinem vertatur, ijdem asserunt, atque vt Card. Baron. testatur, aquam simul cum vino in sanguinem transubstantiari, semper Ecclesia Romana credidit, & custodiuit. Cum igitur certum sit aquam in sanguinem transmutari debere, si dogma illud philosophicum, quod aqua in vinum vertitur, neges; aquam non mediatè, vt Aduersarij volunt, sed immediatè, vt nos existimamus, in sanguinem verti planè cōsequetur. Non potest igitur eorum sententia absque illo philosophico dogmate consistere.

Confirmatur, quia eq ablato, si palinodiam canere nolint, oportet eos asserere, aquam numquam in sanguinem verti: quia neque immediatè, hoc enim non admittunt; neque mediatè, quia in vinum non transmutatur. At opinio illa, quod aqua in propria substantia simul cum sanguine maneat, tamquam improbabilis ab Innocentio relictæ fuit; à S. Thoma deinde reiecta, & à sequentibus Theologis temeritatis notâ iniusta; est quæ apertè contra Ecclesie sensum, & contra omnes Doctores. ergo, ne in hæc absurditates incidant, oportet Aduersarios

mor-

mordicus dogma illud philosophicum de aquæ in vinum conuersione retinere, & eo ablato necesse est totum illorum ædificiū corruere.

Præterea cū à Christo Domino nostro aquam calici consecrando immissam fuisse constet, nisi dicatur ante consecrationis verba in vinum fuisse naturaliter transmutatam; oportebit vel sine vlllo fundamento miracula confingere, vel asserere, & ipsam secundum suam substantiam formæ consecrationis fuisse subiectam, & immediatè in sanguinem commutatam. quo nihil potest dici ad nostram sententiam confirmandam accommodatius, vel validius.

Patet igitur, eo dogmate de aquæ in vinum conuersione posito, nihil quidem contra nostram sententiam consequi (quoniam adhuc ob varias circumstantias poterit aqua non in vinum verti) sed eo ablato totam Aduersariorum sententiam corruere, propeque in nihilum redigi.

Hinc autem nonnulla consecraria valdè notatu digna deduco. Primum est, quàm falsò & inaniter auctores contra quos disputamus, vt simpliciores terreant, classicum contra nos canant, fidemq; Catholicam, Patres, Concilia, Scholasticos Theologos, vniuersumq; orbem contra nos aduocent. Numquid enim aquam in vinum naturaliter verti Catholica fides docet?

cet? Numquid ad hoc philosophicum dogma confirmandum ex omnibus terræ partibus ad sacros conuentus Episcopi conuocati fuerunt? Numquid Patres in vini viribus perscrutandis adeò diligentes extiterunt, vt omnes vnâ voce tamquã certissimum posse aquam ab eo vinci, & in se ipsum verti affirmarint? Numquid Ecclesia Catholica, vt à suis fidelibus aquam in vinum verti crederetur, adeò fuit sollicita, vt propterea Concilia congregaret, sanctionesque plurimas, & firmissima decreta promulgaret? Quis non videat, quàm inaniter hæc dicantur? Cùm igitur absque vlllo fidei periculo dogma illud philosophicum de aquæ in vinum conuersione negari possit, eoque negato tota Aduersariorum sententia corruat; planè consequitur, non magis, quàm sit illud philosophicum placitum, esse eam certam. Conclusio enim, vt aiunt Dialectici, deteriorem partem sequitur: at eorum sententia ex duabus propositionibus emanat, quarum altera quidem est certissima de fide, nimirum transubstantiari vinum in sanguinem Christi, altera tantùm est physica, & incerta, scilicet aquam in vinum verti: ergo eorum conclusio, quòd scilicet aqua mediatè vertatur in sanguinem, certitudinem physicæ propositionis non excedit: nihil ergo cum fide est ei commune, frustra que Aduersarij de PP. auctoritate, & Conciliorum sanctionibus

nibus sibi blandiuntur, cum nec illis, nec alijs
vmquam in mentem venerit aliquod philoso-
phicum dogma, quod præcipue experientijs,
rationibus, & auctoritatibus præceptorū Phi-
losophorum impugnatur, velle definire.

Secundum confectarium est, optimè cum
nostra sententia cohærere, ei que fauere Philo-
sophiam: vel enim pro ea pugnat, vel ei non
repugnat. Nam si verum est aquam non posse
à vino transmutari; tunc Philosophia pro no-
bis fortissimè dimicat: si autem est falsum, ne-
que nobis Philosophia repugnat, è contra ve-
rò ex his duobus Philosophorum placitis, alte-
rum Aduersariorum sententiam iugulat, alte-
rum verò non satis eam defendit. In Philoso-
phia igitur est longè probabilior nostra sen-
tentia, quàm Aduersariorum: non solum quia
cum veriori sententia philosophica melius co-
hæret, sed etiam quia nulla ei philosophica o-
pinio refragatur; cum Aduersariorum opinio
vt minimum dubia sit. in Philosophia & an-
ceps, eò quòd probabilissima Philosophorum
sententia ei aduersetur.

Hinc tertium confectarium colligo, abso-
lutè & simpliciter præferendam esse nostram
sententiam. Primùm, quoniam Aduersariorum
opinio duplici victoria indiget, ne causâ ca-
dat, altera secundum Philosophiam, secundum
Theologiam altera. Nam licet vrgentissime ra-

tiones theologicæ pro ea pugnarent, si philosophicum fundamentum corruat, etiam ipsam labi, ut suprà ostendimus, necesse est; & quamvis hoc firmum permaneat, si rationibus theologicis destituatur, adhuc eam corruere oportebit. Nostra è contra, si vel in Philosophia, vel in Theologia victoriam obtineat, superiore eua-
dit. Cum enim ea sententia, quæ affirmabat aquam in sua substantia semper sanguini admixtam remanere, tamquam improbabilis & temeraria à Theologis sit reiecta; si aquam in vinum conuerti non posse Philosophia conuincat, aquam immediatè in sanguinem conuerti, ut nostra opinio fert, necessariò ratendum erit. Et quamuis Philosophia hoc non obtineat, si theologicis rationibus aquam in sanguinem immediatè verti posse ostenderimus; hoc etiam nobis ad victoriā satis erit. Duplicem igitur victoriā, ne succumbant, Aduersarios obtinere oportet, nobis vel alterutra sufficit.

Deniq; inter theologicas sententias illa meritò est præferenda, quæ Philosophorū iaculis, vel, si malueris, etiā criminationibus minùs patet: huiusmodi autem est, quæ minùs à Philosophia depēdet, & cum vnoquoq; Philosophorū placito rectè cohæret. Nam si sacrosancta mysteria nostræ fidei ab incerto Philosophorum principio pendere fateamur, quomodo non deridenda illis Philosophis, qui illud principium

pium non admittunt, ea exponemus?

Tale autem est id, quod Aduersarij comminiscuntur: si enim aqua vertitur in vinum, quod ad Philosophiam spectat, totum liquorem, qui in calice post consecrationem reperitur, sanguinem Christi esse affirmant; si non vertitur, nequaquam, sed solum partem. Ex Philosophorum igitur placitis sanguinis Christi præsentia pendeat; Philosophi ergo aduocandi erunt, ut iudicent an totus liquor in calice existens pro sanguine sit habendus? à Philosophis Theologi discant, an totus ille liquor adoratione patriæ venerandus sit?

Quis non videat quàm sint hæc absurda, quantoque melius, & fidei Catholicæ sinceritati, & theologicæ gravitati, & sanctorum Sacramentorum maiestati congruentius sit, independenter à Philosophia, & quidquid sit, an aqua versa sit in vinum, absolutè totum illum liquorem, qui in calice post consecrationem reperitur, pro sanguine Christi habendum, & venerandum, ut optimè S. Thomas asserbat, affirmare?

CAP. III. ad eandem S E C T. III.

Ab argumento ex Christi institutione frustra Aduersarios se tueri.

TRIA puncta complectebatur hoc argumentum. Primum erat, aquam à Domino
no-

nostro calici consecrando fuisse appositam. Secundum, ante verba consecrationis saltem, ob temporis parvam moram, non fuisse in vinum conuersam. Tertium, per verba consecrationis in sanguinem fuisse transubstantiatam. In secundo autem obicem nobis opponunt quidam recentiores his verbis, *A posteriori, firmissimo scilicet innixi sacrorum Conciliorum fundamento, illud temporis spatium & interuallum inter aquæ appositionem, & consecrationem Christi agnoscimus & docemus, quod conuersioni aquæ in vinum necessarium fuisse naturaliter videamus.* Quomodo autem hoc temporis interuallum ex Conciliis colligitur, non docent, cum reuera nullum verbum de eo in Conciliis habeatur: fortassis inde argumētantur, quod Concilia modicum aquæ vino admisceri præcipiunt, ob hanc, inquit ipsi, potissimum rationem, scilicet necessarij transitus in vinum. Verum hanc rationem ab eis confictam fuisse scēt. 4. nos iam demonstrauimus, & de ead. cap. 5. agemus: sed quamuis eam concederemus, longissima tamen & violenta consecutione opus esset, vt ex ea illud interuallum quod ipsi optant deduceretur: & hoc etiam ex summa indulgentia dato, cum moraliter tantum iudicent illud interuallum sufficiens fuisse ad aquæ conuersionem; poterit sub hoc iudicio eorum morali subesse falsum; ac proinde falsa erit eorum sententia, &

non

non adeò firma & certa, vt ipsi affirmant.

Verùm quoniam nos ad Concilia prouocant, ex iisdem Concilijs, iuxta expositionem ab ipsis quoque allatam, ostendemus nos, aquam minimè fuisse in vinum conuersam, cum Christus Dominus verba cōsecrationis protulit. Nam & Concilium Florentinum in decreto Eugenij, & Carthaginense, & alia simul cum omnibus Patribus docent, in vino aqua mixto hoc Sacramentum fuisse à Christo Domino institutum.

At quando dici debeat vinum aquæ mixtum ipsi Aduersarij interpretentur. Cap. igitur 18. eiusdem opusculi, Aristotelis auctoritate pressi, qui negat aliquid misceri cum eo in quod conuertitur (sicuti, inquit ille, non dicuntur ligna commisceri igni, nec nutrimentum nutrito) confugiunt ad quamdā distinctionem, & affirmant, aquam dici vino admistam, non quatenus in ipsum conuertitur, sed quatenus antequam conuertatur per eius partes diffunditur, & ita esse intelligendos Patres & Doctores. verba eorum sunt, *Verum est quod docet Aristoteles, nimirum id quod alteri miscetur, in ipsum non dicitur conuerti; tamen cum dicimus aquam cum vino misceri, significamus aquam tantum copulari, & diffundi per vinum: quod fit ante conuersionē. & ita bene dicunt omnes SS. PP. & Doctores aquam commisceri vino, quia priusquam conuertatur*

tur diffunditur, & diuiditur per vinum. Hæc illi, ex quibus colligitur ante conuerſionem aquæ in vinum poſſe quidem hoc dici mixtum, non verò poſt conuerſionem. Cùm ergo Concilia & omnes SS. PP. affirmant inſtitutam fuiſſe ſacroſanctam Euchariftiam in vino aqua mixto, idem eſt ac ſi aſſererent fuiſſe vinum conſecratum antequam aqua in ipſum verſa eſſet. quod erat nobis probandum. Et reuera veriſimile non videtur; nec Euangeliftas, nec Concilia, nec Patres huius more vllam mentionem feciſſe, ſi adedò neceſſaria eſſet & tanti ponderis, vt Aduerſarij volunt.

Sed quamuis ſit valdè improbabilis hæc Aduerſariorum reſponſio, improbabilior tamẽ eſt, quæ ſequitur, aliorum quorundam recentiorum. occurrunt hi tertio puncto, & inquirunt, *verba quibus in conſecratione calicis uſus eſt Chriſtus Dominus, non neceſſariò verificanda de toto quod continebatur in calice, ſed tantùm de materia conuertibili, quali non eſt aqua.* Neque ſolùm id de verbis conſecrationis calicis affirmant, ſed etiam de conſecratione corporis Domini dicunt, *verofiſimile eſſe in eo pane, ſub cuius ſpeciebus tradebat Dominus diſcipulis corpus ſuum comedendum, fuiſſe etiam & accidentia, & ſubſtantiam aliorum ſeminum inconuertibilem in corpus Chriſti: quam proinde ſimul cum corpore remanſiſſe ſub ſpeciebus panis autumant.*

Sed

Sed hæc vt noua, vt rationi minimè conformia, vt ab Ecclesiæ sensu aliena, vt Concilij Tridentini decretis repugnantia, vt hæreticis plausibilia, sunt omnino reiicienda. Noua sunt: nam quis vñquam audiuit non totum panem, quem Christus Dominus in manibus habebat, in suum corpus transmutasse? quis illum panem non fuisse perfectè triticeum? quis materiam, super quam Saluator noster verba consecrationis protulit, in suum corpus non fuisse conuertibilem? Rationi quoque consentanea non sunt: nam quis nesciat respectu diuinæ omnipotentiae nihil non esse in quodlibet aliud conuertibile? quis non fateatur, ita potuisse Dominum nostrum panem hordeaceum in suum corpus vertere, sicuti triticeum? Et vndenam colligimus nos panem triticeum in corpus suum vertisse, & non hordeaceum, nisi quia super illum verba consecrationis protulit, & non super hunc? Præterea, si verba illa, *Hoc est corpus meum*, in propria significatione accepta totum panem, quem in manibus Christus Dominus gestabat, significant, quomodo audienti alium sensum ex illis extorquere? Sunt hæc etiam ab Ecclesiæ sensu aliena. nam hæc, vt testatur S. Thom. suprà relatus, post consecrationem nihil prioris substantiæ sub speciebus panis, nihil sub speciebus vini existimat latere; alioqui non totum adoraret adoratione latriæ,

erat conuertibile : ita dicent illi , vel panis materiam, vel totam etiam panis substantiam non fuisse in Christi corpus conuertibilem ; & si verbis Christi, qui dixit illud quod in manibus habebat esse suum corpus, premantur, non esse intelligenda de toto quod manibus gestabat, sicuti & auctores contra quos disputamus asserunt, respondebunt.

Adde, quòd idem hic auctor graui notâ dignos censet Theologos, qui substantiæ existentiam dicunt simul cum accidentibus panis remanere : quid ergo de affirmantibus substantiæ partem non recedere, dicendum erit?

*Basil.
Ponce
9. 17.
pag. 13.*

Dices : Ergo cùm verosimile sit aliquod granum alterius speciei fuisse simul cum pane triticeo à Christo Domino consecrato , idem de eo dicendum erit ac de aqua vino mixta. Resp. nullo pacto esse verosimile , quod de grano alterius speciei dicitur ; caret enim fundamento , & est contra sensum omnium Doctorum , quibus huiusmodi commistio nunquam in mentem venit. Cumque Hebræi in suis ritibus & cærimonijs obseruandis diligentissimi semper fuerint, credibile est tritico maximè perpurgato ad azymos panes conficiendos ipsos vsos fuisse . sed esto aliquod granum alterius speciei simul cum tritico affuerit , dicendum erit, totum illum panem consecratum fuisse, quia moraliter totus erat triticeus,

T. vt

ut cum D. Thoma sect. 7. diximus. Neque verò par adhuc ratio erit de hordeo & aquâ, quia illud non affuisse simul cum tritico longè probabilius est; hanc mixtam vino certò scimus. Deinde illud si afficit, certè præter intentionem, & per accidens afficit: hæc autem datâ operâ, & ob mysterium admixta fuit.

CAPVT IV. ad SECT. IV.

De Concilij Florentini testimonio pro nobis allato.

NON minùs celebre quàm clarum & firmum est Concilij Florentini in Eugenij decreto pro nostra sententia testimonium: inquit enim, *calicis materiam esse vinum de vite, cui modicissima aqua admisceri debet.* De quo sect. 4. nostræ disputationis plurima diximus. nunc nonnullæ aliæ obiectiones, quas Neoterici, ut huius Concilij auctoritatem è nostris manibus extorqueant, adiiciunt, dissoluendæ erunt.

Petron. cap. 4. pag. 14. Primò ergo obijciunt: *Non dicit Concilium, vinum esse partem materiae. sed materiam, ergo contra mentem Concilij est asserere aquam esse aliquo modo materiam, seu partem materiae consecrationis sanguinis. Confirmatur, quia eo ipso, quòd dicit, Cui (scilicet vino) ante consecrationem aqua modicissima admisceri debet, manifestè declarat, aquam esse*

esse extra materiam consecrationis calicis. Respon-
 deo, verbum (*materiam*) referri non solum ad
 vinum, sed etiam ad aquam ei admixtam, quia
 vnico contextu inquit Concilium, materiam
 calicis esse vinum, cui aqua misceri debet. Præ-
 terea etiamsi concederemus materiam referri
 ad solum vinum, nobis non officeret, quia di-
 ceretur vinum materia calicis, quia est materia
 per se, & quod solum ad conficiendum sangui-
 nem sufficit. Aqua autem dici non debuit pars
 materiæ. Primò, quia non est de necessitate
 Sacramenti; Secundò, quia non est per se ma-
 teria sanguinis; Tertiò, quia non est materia
 diuersa à vino, sed quatenus vino incorpora-
 tur, & fit vinum moraliter. Ad confirmationem
 respondeo, eo modo loquendi declarari tan-
 tum aquam esse extra materiam antequam ad-
 misceatur vino, non verò postquam est ei ad-
 mista. sicuti si dicerem, Hodie meus commen-
 salis erit Petrus, cui adiungi debebit Paulus;
 nemo inde colliget excludi à mea mensa Pau-
 lum, sed è contrario & ipsum affore, non ta-
 men vt principalem, sed vt Petri comitem.

Secundò obijcitur, *Si assignetur materia ba-
 ptismi vt in Ecclesia exercetur, dicendo, materia Sa-
 cramenti baptismatis est aqua naturalis, cui sa-
 crum oleum est infundendum & admiscendum; cer-
 tè nullus dicere posset sacrum oleum esse materiam
 baptismatis: ergo quando Concilium dicit, vino,*

quod statuit materiam Sacramenti sanguinis Christi, aquam misceri, non potest intelligi aquam esse aliquo modo materiam, aut partem materiae consecrationis calicis: nam id quod miscetur materiae non est materia, sed aliquid extraneum à materia.

Respondeo, si materia baptismatis modo suprà relato ab aliquo Concilio describeretur, alijs circumstantijs cōcurrentibus prout in casu nostro, rectè ex ea descriptione posset inferri oleum spectare ad baptismi materiam: at neque Concilium illud asseruit, neque aliæ circumstantiæ ad sunt, quia neque Christus oleum aquæ admiscuit, nec dici potest Sacramentum baptismatis in aqua oleo mixta institutum fuisse, neque sub aquæ nomine solet oleum comprehendere. denique in confesso est apud omnes, oleum cærimoniæ tantum causa adhiberi simul cum aqua baptismatis, quod de aqua respectu materiae calicis dici nequit. atque hinc nostra expositio verborum Concilij Florent. magis corroboratur. Cur enim agens de baptismatis materia dixit esse aquam tantum, nulla mentione facta de oleo admiscendo; agens verò de materia calicis esse vinum, cui aqua admisceri debet, si utrobique; quod admiscetur cærimoniæ tantum causâ apponitur? liquidò certè constat non fuisse Concilij mentē cærimonias Sacramentorū explicare, sed puras & simplices eorum materias & formas, ut aliàs diximus.

Ter-

Tertiò obijciunt, *Si voluisset sacrum Concilium* Pag. 15.
mixtionem aqua esse de essentia Sacramenti sanguinis, dixisset utique vinum mixtum aqua esse materiam. Respondeo, non omnino malè hîc ratiocinari Aduersarios, sed extra rem, optimeq; concludere, sed non contra nos aquam non esse de essentia sanguinis, aliàs sine ipsa non posset confici. quod à sana doctrina, & à nostra sententia est perquam alienum. Ne igitur crederemus aquam esse de essentia Sacramenti, non dixit Concilium vinum mixtum aqua esse materiam: & vt feiremus nihilominus aquam ad materiam spectare, dixit vinum esse materiam, sed cui admisceri debet aqua: nec commodiùs poterat paucis verbis explicare modum, quo sanguinis materiam aqua ingreditur. Cæterum, etsi illis verbis vsus non fuit Eugenius in Concilio Florent. non desunt tamen alia Concilia, & Patres, qui vel illis, vel simillimis & æquipollentibus vtuntur, vt ex dicendis patebit, & Rom. Catechismus etiam, vt vidimus sect. 4. eundem ferè loquendi modum vsurpat, nec propterea tamen volunt aquam esse de essentia Sacramenti, sed tantùm comateriam.

Quartò obijciunt, *Ex Concilio Florentino* sub- Pag. 16.
stantia tantùm vini in sanguinem conuertitur, at aqua substantia non est substantia vini, ergo. Respondeo ex Concil. Florent. & vinum, & aqua

verti in sanguinem Christi, cùm vtraque sub nomine materiæ comprehendat. Adde, nomine vini intelligendam quoque aquam adiunctam, vt sect. II. demonstraui.

§. 19.

pag. 15.

Quintò, obijciunt alij, *non dixisse Eugenium vinum esse materiam cui tamen, &c. sed (cui) absolute, indicans aquam non pertinere ad materiam.* Respondeo, Eugenium non apposuisse particulam *tamen*, ne crederemus sine aqua vinum esse non posse materiam sanguinis: quod falsum est. vt omittam tam parum reuera quo ad sensum referre, quòd adsit illa particula *tamen*, vt mirum esset in hoc Aduersarios vim facere nisi melioribus rationibus destituerentur. Non dissimile est, quod subiiciunt: *Rationem enim, inquiunt, reddens Eugenius, cur modicissima aqua sit vino miscenda, vbi locus erat explicandi illam esse vnà cum vino materiam, nequaquam eam rationem reddidit.* Imò hanc ipsam attulit, subijcio ego: dixit enim aquam apponi, quoniam in vino aqua mixto creditur Christus Dominus hoc Sacramentum instituisse. quod idem fuit ac dicere, pro materia vinum & aquam habuisse, nec materiæ nomen eratei amplius usurpandum, quia dixerat iam, & ipsam aquam ad materiam spectare. Meliori ergo iure argumentum retorquebimus nos, quoniam hic erat locus afferendi pro ratione modicitatis aquæ apponendæ, vt in vinum verum possit, si Cōcilium
eam

eam approbasset; atqui nec leuissimè indicauit: sciebat enim eam non esse veram rationem, sed quæ ex mysterijs & causis quibus ea miscetur, colliguntur: sicut enim admiscetur aqua, quia Christus Dominus admiscuit, ita etiam in parua quantitate, quia non in magna ipsum Christum apposuisse creditur; & sicuti aqua admixta populum significat, ita parua eius quantitas: quòd longè maior est maiestas Domini, quàm fragilitas populi, vt inquit Concilium Triburiense. quapropter meritò non fuit Eugenio ad rationem incertam, ne dicam falsam, & ex falsa Philosophia desumptam, recurrendum.

At inquirunt Aduersarij, Si verbum instituenti, quo vsus est Eugenius, expendatur, nihil ex eo colligipotes, quia ibi nil aliud significat, quàm facere, sicut intellexit & expressit Tridentinum Concilium sess. 22. cap. 7. dicens, quia sic Christus fecisse creditur. Respondere possem, verbum Facere sæpè vsurpari pro sacrificare, & in hoc sensu hîc acceptum, sententiam nostram confirmaret: significaret enim aquam fuisse sacrificij materiam. Sed præterea notandum, aliud esse miscere aquam vino, aliud verba consecrationis super vinum & aquam proferre: illud enim est prius, hoc autem posterius. Concilium ergo Tridentinum de priori locutum est, & dixit aquam vino miscendam, quia sic Christus fecit,

cit, idest aquam vino miscuit: at Concilium Florentinum non tantum dixerat aquam vino miscendam, sed etiam spectare ad materiam. quare reddens sui dicti rationem, non solum asseruit Christum aquam apposuisse, sed etiam in vino aqua mixto Sacramentum instituisse, id est consecrassse: non ergo à Concilio Tridentino Florentinum explicatum fuit, sed vnumquodque accommodatè ad rem, de qua agebat, locutum est.

Sextò, *Non licet, inquiunt, alijs materijs ab Eugenio explicatis aliquid addere, ergo neque materia calicis, scilicet vino.* Respondeo nihil nos addere: ipse enim Eugenius aquæ & vini mentionem fecit.

Septimò obijciunt: *Quia dixit Eugenius panem triticeum esse materiam corporis Domini, exclusa intelliguntur alia genera frumentorum, quauis ingredi soleant vsualem panem, & comprehendì sub nomine frumenti, quo Patres vti solent, & nemo dixit per Patrum verba explicandum esse Concilij decretum: ergo cum etiam dixerit materiam calicis esse vinum de vite, debet excludi aqua, & per verba Concilij limitari Patrum verba, non verò Concilium per Patres exponi.* Respond. in multis claudicare hanc similitudinem. Primò enim pani triticeo nihil dixit Eugenius esse addendum; at verò explicans materiam calicis non dixit simpliciter esse vinum, sed cui aqua admisceri debet.

Se-

Secundò, in panem vsualem triticeum non ingrediuntur semina alterius generis nisi per accidens, & præter intentionem, at vero vino apponitur aqua datâ operâ. Tertiò, numquam dixerunt Patres frumêta alterius generis conuerti in corpus Christi, at aquam appositam in sanguinem transmutari asseruerunt. Quartò, tantum abest à vero hæc similitudo, vt potius oppositum dici debeat, quia nec Patres, nec Concilia ita exponi possunt, vt præter panem triticeum aliud admittatur tamquam materia corporis Domini: at è contra aquam in sanguinem verti tam apertè fatentur, vt nulla expositione in contrarium sensum trahi possint, tantumque abest, vt Concil. Florent. verba Patrum limitare aut explicare voluerit, vt eorum se dicta sequi profiteatur. Inquit enim, *iuxta testimonia PP. pridem in disputatione exhibita Christum in vino aqua mixto hoc Sacramentum instituisse.* Cùm ergo fateatur hic auctor limitatione & explicatione dicta Patrum indigere, ne aquam in materia calicis comprehendant, & Concilium Florent. nulla limitatione vel explicatione adhibita se ea sequi profiteatur, planè consequitur ab vtrisque aquam ad calicis materiam spectare diiudicatum.

Denique non obstante, quòd solus panis triticeus sit vera materia corporis Domini, si tamen medicissima farina alterius generis eius

compositionem ingrediatur, fit panis, qui totus vertitur in corpus Christi, vt cum D. Thoma sect. 7. notauimus: ergo idem asserendum est de aqua. Quare arundineis verè baculis, vt aiebat Isaias Propheta, videntur hi auctores inniti, quibus ipsorum manus non sustententur, sed sauciantur.

CAP. V ad SECT. IV.

Cur aqua modicissima sit calici infundenda.

Respondimus huic quæsito sect. 4. nostræ disput. & quinque attulimus rationes, cur aqua modicissima vino admisceatur, quarum nullā agnoscit, vel recipit sæpè citatus auctor: *Cap. 8. hanc autem solam suæ sententiæ subseruiens* ipse assignat, vt aqua faciliùs in vinum verti possit, *pag. 46. Alioqui, inquit ipse, otiosum esset huiusmodi præceptum. Nam licet aqua apponeretur in maiori quantitate, semper tamen ipsa censeretur moraliter vinum.* & paulò pòst; *pag. 147 Ergo tota ratio propter quam precipitur modicam aquam vino admisceri, est, vt faciliùs & celerius priùs in vinum transeat quàm fiat consecratio.* Hæc ille, qui si dixisset vnā ex rationibus hanc esse, falsum fortassis dixisset (si videlicet de physica & reali conuersione locutus fuisset.) quoniam, vt notauimus, neque Concilia, neque Patres hanc

vnquam attulerunt, sed alias: veniâ tamen non fuisset indignus. At asserere hanc esse totam rationem, & alioqui otiosum esse hoc præceptum, hominis certè fuit suam sententiam nimium amantis, & lectoris credulitate abutentis. Nam si hæc est tota ratio, ergo quando præcipit Ecclesia, vt, deprehenso aquæ defectu post consecrationem corporis, aqua simul cum vino apponatur, & statim verba consecrationis proferantur, non esset tunc necesse modicam aquam apponere; quia tunc cessaret ratio conuersionis in vinum, quæ in instanti fieri nequit. Præterea tunc Canonum & Conciliorum dicta videretur contemnere Ecclesia: si enim aquæ conuersionem in vinum tanti faciunt illa, vt ob hoc tantum præcipiant in modicissima quantitate apponi, non minùs ei repugnabit qui aquam eo tempore & modo apponit, quo certò scit non esse in vinum conuertendam, quàm qui in magna quantitate ei infundit: ex vtroque enim idem inconueniens sequetur, ob quod solum vitandum illud præceptum de aquæ modicitate traditum fuit. Atqui non est credibile Ecclesiâ sibi met esse contrariam, & Conciliorum decreta non obseruare: ergo dicendum est, non eam esse rationem illius præcepti.

Præterea etiam in Aduersariorum sententia illud solum præceptum de aqua modicissima

ma

ma apponenda non est sufficiens ad aquæ conuerſionem : nam oportet etiam temporis congruentem moram intercedere, & vinum etiam eſſe generoſum, & non admodum debile, vel nimis craſſum. ſi ergo Concilia aquæ in vinum conuerſionem ſibi propoſuiſſent præſcribendam, etiam illas alias circumſtantias huic conuerſioni neceſſarias præcepiſſent: cùm ergo nec ipſa præceperint, nec Eccleſia obſeruet, ſignum eſt, non in eum ſcopũ decreta ſua Concilia collineaſſe.

Quod etiam ad euertendam noſtram ſententiam ſubdunt, *Nam licet aqua apponeretur in magna quantitate, ſemper tamen ipſa cenſeretur moraliter vinum*; à veritate diſſonat: quoniam niſi vinum ſit valdè generoſum, magis aquæ proprietates ſentientur quàm vini, ac proinde non erit aqua conuerſa in vinum moraliter. Quare etiam in noſtra ſententia ſemper tutius eſt parum aquæ apponere, nec fortè excepto temporis interuallo, minus ad moralem conuerſionẽ requiritur, quàm Aduerſarij ad phyſicam exigant. Tutius eſt inquam modicam aquam apponere, non verò tutior Aduerſario-
Cap. 10
Pag. 53.rum ſententia, quod dictum falſò, & nulla coniectura innixi nobis Aduerſarij impingūt, cùm in tota noſtra diſputatione in id præcipuè incumbamus, vt eorum ſententiam falſam, improbabilem & minùs tutam demonſtre-
Præ-

Prætereunda quoque non est ratio S. Thomæ, quam ipsi tamquam nostram impugnant; est autem, *Quia, si aqua in magna quantitate apponeretur, vini species soluerentur, & sic materia consecrationis calicis non ampliùs remaneret.* Cui hanc censuram supracitati auctores adhibent: *Cap. 9. Hac doctrina omnino falsa est, nec subsistere aliqua ratione potest.* Et in fine illius *cap. 9. Prefata solutio,* inquit, *ab omni sacrorum Conciliorum, SS. Patrum & Scholasticorum sensu, communique Ecclesie vsu prorsus est aliena.* Sed non est cur huiusmodi inanes clamores & vociferationes timeamus, cùm & veritas, & S. Thomæ auctoritas nobiscum adsint: nam S. Thomas quæst. 74. art. 8. hæc habet verba; *Semper tutius est parum de aqua apponere, & præcipuè si vinum sit debile: quia si tanta fieret appositio aquæ, vt soluerentur species vini, non posset perfici Sacramentum.* Non inquit, vt volunt Aduersarij, quia aqua non conuerteretur in vinum, consequenter neque transubstantiaretur in sanguinem, sed quia soluerentur species vini. Neque hanc S. Thomæ doctrinam potuerunt ignorare Aduersarij: nam eundem locum, & eius immediate antecedentia verba de hac ipsa re agentes adduxerunt. Iudicet ergo lector, qua animi pro- *Cap. 11. pag. 62. & c. 8. pag. 48.* pensionem in hanc nostram sententiam Aduersarij ferantur, cùm, vt eam confodiant, suum ipsorum præceptorem & patrem, censurarum gla-

gladijs transfuerberare non vereantur.

Sed S. Thomæ etiam auctoritate seclusâ, quid habet illa responsio à sacra & vera doctrina alienum? an quòd asserat aquam in magna quantitate vini species soluere? At ipsi hoc magis, quàm nos admittere debent: cum enim non nisi inter contraria detur actio, utique, si potest à vino aqua corrumpi, multò magis vinum ab aqua, si hæc in quantitate præualeat, & alioqui primas qualitates intensiores possideat, ad interitum perducì fatendum erit; an solutis speciebus vini non amplius adesse consecrationis materiam? atqui hoc est certa fide tenendum. Quid igitur est in hac responsione, acri illa censura tantaque indignatione dignum?

CAP. VI. ad eamdem SECT. IV.

De Concilij Tridentini testimonio.

Vini dumtaxat accidentia remanere post eius transubstantiationem in sanguinem Christi asseruit Concilium: ex quo sicuti deducimus nos aquæ substantiam simul cum Domini sanguine non permanere, ita Aduersarij eamdem in sanguinem non transmutari colligunt: si enim transmutaretur, inquit, eius utique accidentia simul cum accidentibus vi-

ni

ni superessent: atqui per illam particulam exclusiuam *dumtaxat* omnia accidentia quæ vini non sunt, ablegantur. Nos ergo hîc duo præstabimus: Primum, Concilium Tridentinū per illam particulam (*dumtaxat*) nequaquam nobis aduersari: Alterum, quin ab eo confodiātur, non posse Aduersarios effugere, demonstrabimus.

Quoad primum, aderit nobis in primis ap-
positissima auctoritas Iulij I. Summi Pontificis,
qui dist. 2. de consecrat. cap. *cum omne. simili*
exclusiua dictione vtitur, per quam tamen non
debere aquam excludi ipsemet paulò pòst de-
clarat. Inquit igitur Iulius, *Manifestum & eui-*
dens Evangelica veritatis exemplum illuxit, quòd
præter panem & vinum aliud offerri non licet. En
particulam exclusiuam (*Præter*) numquid ta-
men per eam aquam excludere voluisse Iulium
credendum est? Ipsemet audiatur: paulò pòst
enim inquit, *Calix Dominicus iuxta Canonum*
præcepta vino & aqua permixtus debet offerri. Si
autem ab eo quæsitum fuisset, Cur ergo dixisti
præter panem & vinum aliud offerre non lice-
re: quid aliud respondere potuisset, quàm sub
vini nomine etiam aquam ei admixtam com-
prehendi, vt multis alijs exemplis & auctori-
tatibus, nos quoque sect. 11. ostendimus? Eo-
dem igitur modo erit intelligendum & Con-
cilium Tridentinum: eius enim vini remanere
de-

debent dumtaxat species, quod cōsecratur: at-
qui consecratur vinum aquâ mixtum: ergo &
accidentia ipsius aquæ mixtæ simul cum vini
accidentibus remanebunt. Enimvero de qua-
litate accidentium post consecrationē rema-
nentium non aderat ratio cur admodum soli-
citi essent Concilij Tridentini Patres: quia de
hac nulla erat cum hæreticis concertatio, ne-
que inde aliquid contra veritatem & sinceritatem
Eucharistiæ deduci poterat. Nam etsi
post consecrationem abscedat ab illis acciden-
tibus frigus, & adueniat calor, vel è conuerso
calori succedat frigus, vt sæpè euenire solet;
numquid aliquod inconueniens hinc seque-
tur? numquid erit hoc contra Concilij Tri-
dentini mentem, eò quòd ille calor, vel frigus
adueniens dici nequeat accidens vini, cum ne-
que à vino sit productum, neque eius substan-
tiam vumquam affecerit? Non profectò: ergo
non fuit Concilij mens aliquod accidens ex-
traneum ab accidentibus vini excludere, sed
omnem aliam substantiam à speciebus conse-
cratis arcere; contra nonnullos, qui licet ad-
mitterent præsentiam corporis & sanguinis
Christi in Eucharistia, simul cum ea, vel totam
panis & vini substantiam, vel eorum materiam
permanere asseriebant. non ergo nos, qui acci-
dentia tantum in calice post consecrationem
simul cum sanguine admittimus, Concilio re-
pugna-

pugnamus; sed ipsi Aduersarij nostri, qui substantiam aquæ simul cum vini accidentibus superstitem esse contendunt, Concilij decretis aduersantur; estque in eorum sententia hoc adeò certum, vt datâ quoque aquæ in vinum conuersione, non possint Aduersarij effugere, quin aliqua alia substantia simul cum Christi sanguine supersit. Quod euidenter probatur, quia nulla est tam perfecta in rerum natura conuersio, quin ex ea aliquid reliquiarum non conuersum relinquatur. Vt patet in omnibus conuersionibus, & præcipue in omnium violentissima, qualis est in ignem: quamuis enim pabulum sit minimæ resistantiæ, & eius nature maximè proportionatum, quale est fœnum vel stuppa; aliquid tamen cineris superest, aliquid etiam infumum euanescit, quare non totum vertitur in ignem: similiter si aqua in ignem conijciatur, aliqua pars eius saltem in vaporem & fumum vertitur. Imò si cibus reperiretur qui totus in substantiam aliti nullâ superfluitate relictâ transmutaretur, hominem huiusmodi cibo vtentē à morte naturaliter fore immunē nonnulli credunt. sed de hoc aliàs. Cùm igitur vinum non maiori vi ad aquam in se conuertendam, quàm ignis ad comburendam stuppam, vel ad eandē aquam in se transmutandam, & animal ad cibum concoquendum, præditum sit; perspicuum est, non ita pos-

se aquam à vino in se ipsum transmutari, quin aliquid eius non transmutatum supersit. hoc ergo cum non sit, vinum non transubstantiabitur in sanguinem, ac proinde simul cum accidentibus vini remanebit. quod est apertissime contra Concilium.

Obijciunt alij, In Concilijs numquam reperitur mentio de aquæ conuersione in sanguinē: quod ideo factum esse diuina prouidentia credendum est, ne ob eam ambiguum locutionem existimaret quis, aquam in sanguinem verti. Respon. etsi fortassis hoc verbo conuersionis Concilia non vtantur, alijs tamen verbis æquipollentibus aquæ conuersionem in sanguinem significasse: nam dicunt panē, vinum & aquam esse vnum in Christo, dist. 2. de consecrat. cap. *cum omne*. ex Concilio Bracar. id autem est, vt exponit Glossa, conuerti in Christum. si enim aqua non conuerteretur in sanguinem, non esset cum vino vnum in Christo, imò Christus aquam à vino diuideret, alterum enim in se conuerteret, alteram relinqueret: si etiam prius in vinum verteretur, non esset vnum cum pane; qui in Christum vertitur, neque in Christo esset vnum cum vino, sed antequam adesset Christus. Item affirmant Concilia instituisse Christum sanguinis sui Sacramentum in vino aqua mixto, & panem, vinum & aquam offerri. Quibus & similibus locutionibus

nibus aquæ in sanguinem conuerſionem perſpicuè indicant.

CAP. VII. ad eandem SECT. IV.

De ſenſu verborum Innocenti j tertij Summi Pontificis.

OMnem lapidem, imò feſtucam Aduerſarij mouent, vt Innocentium à nobis ſtantiem ad ſe pertrahant. ſed fruſtra. Adducunt ergo recentiores eius teſtimonium ex cap. 3. de Sacrificio Miſſæ, vbi hæc habet verba: *Quibusdam non abſurdum videtur, quòd aqua cum vino tranſit in ſanguinem, ea videlicet ratione, quia aqua per admixtionem tranſit in vinum, & vinum per conſecrationem tranſit in ſanguinem. Quis enim ambigat aquam in vinum tranſire, cùm multo vino modicum infunditur aqua? alioquin tota vini ſubſtantia propter aqua guttam mutaretur, vt quidam fiat ex illis conſuſum.* Ponderant autem Aduerſarij illa præcipuè verba, *Quibusdam non abſurdum videri, &c.* quaſi dicat, inquiunt, abſurdum eſſe & monſtruolum aſſerere aquam verti in ſanguinè abſque eo quòd priùs tranſcat in vinum. Verùm non æqua lance verba Innocenti j ponderarunt, nec aduerterunt loqui Innocentium de tranſitu aquæ in vinum morali, non autem de phyſico, ac conſequenter noſtram ſententiam probaſſe, non ipſorum.

Colligo hanc eius mentem, Primò, quoniam si aqua in vinum physicè transmutata esset, ea certo certius in sanguinem mutaretur: iubet enim fides, vt totam vini substantiam in Christi sanguinem verti credamus. Cùm ergo non tamquam certum, sed tamquam valdè tantùm probabile, & non absurdum hoc tradat Innocentius, idque non ab omnibus Christi fidelibus fide teneri, vt par erat dicere, si de aqua in vinum physicè versa locutus fuisset, sed tantùm de aliquibus asserat; planè consequitur eum de transitu non physico, sed morali verba fecisse. Dices, non omnibus Christi fidelibus hanc ascripsisse sententiam Innocentium, non quia vinum in sanguinem verti apud omnes pro certo non habeatur, sed quia non omnes hanc aquæ transmutationem in vinum admittunt. Verùm hanc responsionem rejicit ipsemet Innocent. nam subiicit, *Quis enim ambigat, aquam in vinum transire?* &c. Supponit ergo neminem dubitare de transitu aquæ in vinum, & tamen non secundùm omnes ipsam in sanguinem verti: ergo non loquitur de transitu physico, quia hoc posito nemini potest esse dubium in sanguinem ipsam transmutari, sed de morali. quo dato, adhuc non desunt, qui negent eam transubstantiari in sanguinem. Confirmatur ex eius cõsequentibus verbis, nimirum, *Alioquin tota vini substantia propter aquæ guttam*
mu-

mutaretur, vt quoddam fiat ex illis confusum. Hoc enim inconueniens non sequi ex eo, quòd physicè aqua in vinum non transeat, & ipsi Aduersarij fateri cogentur: concedunt enim aliquando in calice aquam in vinum physicè non transire. si ergo tunc, vt inferebat Innocentius, tota vini substantia mutaretur, & fieret quoddam ex illis confusum, non adesset amplius materia transubstantiationis, quæ est substantia vini, irritumque esset Sacramentum. quod esset maximum inconueniens, & contra sensum totius Ecclesiæ. si autè dicamus, absurdum ab Innocentio illatum sequi tantum ex non conuersione morali, nullum inferri poterit incommodum, imò omnia perbellè & veritati, & Sacramenti venerationi, & Ecclesiæ Catholicæ ritibus congruent. Verissimum enim est, quòd, si aqua vino admixta non ita sit apposita, vt censeatur in vinum transisse moraliter, non potest illud quod est in calice, appellari vinum, ac proinde non erit apta materia consecrationis calicis. Est igitur maximè absurdum & monstruosum, quòd aqua, quæ prius in vinum moraliter non transiuit, vertatur in sanguinem; non autem quòd aqua moraliter quidem, non tamen physicè, vini substantiam sit ingressa.

Confirmatur, quia, si negetur transitus aque in vinum physicus, oportet etiam negare actionem

nem inter ipsa corruptiuam : si ergo non corrumpuntur , quomodo inquit Innocentius , non fore amplius illud mixtum ex aqua & vino , nec aquam , nec vinum , sed aliquid ex illis confusum ? Physicè hoc utique dici nequit , quia physicè non sunt corrupta ; ergo de quadam desitione morali hoc erit intelligendum , quia illud totum , neque aquæ , neque vini denominationem subire poterit . Nobiscum igitur sentit Innocent. & hanc nostram tantum sententiam approbavit.

Id ipsum ex aliis verbis eiusdem Innocentij confirmauimus in nostra prima disp. sect. 4. Quærens enim , quid si plus apponatur aquæ quàm vini , erit irritum Sacramentum ? Respondet , *Oportet quidem , quòd tantum vini ibi ponatur , vt aqua commixtum saporem vini retineat* , Quem locum vt eludant Aduersarij , inquirunt ex accidentibus arguere Innocentium substantialem mutationē , & idem fuisse dicere aquam retinere saporem vini , atque in vinum esse cōuerſam . Sed quàm sit hæc expositio absurda facilè demonstratur : sequeretur enim velle Innocentium irritum esse Sacramentum , quotiescumque aqua non est physicè in vinum cōuerſa quod nemo vmquam dixit , nec ipsi Aduersarij concederent . Numquam enim de Sacramenti veritate certi essemus , cùm de aquæ in vinum cōuerſione lis adhuc sub iudice pendeat ,

Basil.
Ponce
§. 14.
pag. 10.

deat, & interdum in ipsum cōuersam non esse certum sit.

Dices, sufficere ex Innocentio, quòd aqua saporem vini retineat, ad hoc, vt non sit irritum Sacramentum, non verò, vt aqua transeat in sanguinem. Sed & hoc facillè reijcitur. Primò, quia, si aqua non esset in sanguinem vertenda, nihil referret, quòd vini saporem retiperet. Secundò, quia ipsemet Innocentius iam pro absurdo se habere declarauerat, aquam simul cum sanguine permanere. Tertiò, quoniam si aqua vini saporem retineat, non poterit à vino discerni, non ergo vinum solum consecrari poterit, cum materia debeat esse determinata. Quartò, quoniam magnum esset absurdum post consecrationē sub vini sapore aliam substantiam, quæ non esset sanguis Christi, delitescere. Apertissimè igitur Innocentius sententiam nostram hīc amplexus est: nam aquam in vinum physicè non transire supposuit dum dixit maiorem quantitatem aquæ adesse quàm vini; transire moraliter, cum affirmauit eandem vini saporem retinere; in sanguinem verti, dum irritum non fore Sacramentum asseruit. Vide igitur lector, quàm falsò nobis ab Aduersarijs imponatur velle nos sententiam nostram ab Innocentio inter minùs probabiles fuisse connumeratam: extremæ enim demeritiæ fuisset sententiā, quam Summus Pontifex

tifex vt probabilissimam cæteris prætulit, consultò relinquere, vt minùs probabilem amplecteremur. sicuti etiam à veritate longissimè abest, quod asserunt nos fateri sententiã nostram esse minùs tutam, Aduersariorum verò tutiorem. Quomodo enim tutiorem fatemur Aduersariorum sententiã, si eam dicimus ex institutione augustissimi Sacramenti reijci, Concilijs & sanctionibus Summorum Pontificum reprobari, Patribus omnibus aduersari, Theologicis rationibus falsitatis coargui, & plurima absurda ex ea consequi? Absit à nobis, vt huiusmodi sententiã tutiorem vniquam existimemus.

CAP. VIII. ad SECT. V.

De Cardinalis Baronij auctoritate.

ET si tam apertè Cardin. Baronij auctoritas nostræ sententiæ patrocinator, vt ex Aduersarijs quoque plerique id ipsum fateantur: non desunt tamen qui eiusdem Cardin. sententiã tamquàm nostræ repugnantem nobis opponere non vereantur, seque hoc lectoribus persuasuros leuibus & fallacibus coniecturis confidant. Harum prima est, *Ecclesia Romana semper credidit & custodiuit, aquam vino appositam in calice priùs in vinum transire, & deinde in sanguinem:*

guinem : ergo credendum est hunc eundem esse sensum Card. Baronij. At non solum à veritate, sed etiam à recta disputandi methodo abhorret hæc coniectura. Primò, enim ordinem pervertunt, cumque auctoritate Baronij Ecclesiæ sensum probare deberent, ipsi è contra ab Ecclesiæ sensu Baronij mentem aucupantur. Quid est enim, de quo vertitur inter nos disputatio? id ipsum quod ipsi supponunt : affirmant ipsi aquam in vinum prius transire, deinde in sanguinem : nos quidquid sit de physico transitu in vinum, semper volumus aquam vino mixtam in sanguinem transubstantiari. uterque autem nostrum S.R.E. sensum sequi se arbitrat : absit enim ut ab ea vel latum etiam vnguem sciens præsertim & prudens discedam. In eruenda igitur Ecclesiæ Romanæ sententia tota nostra disputatio versatur, eamque nos ex dictis Cardin. Baronij argumentamur à nobis stare; Aduersarij è contra sibi adesse contendunt, & cap. 13. hoc titulo prænotant : *Probatur nostra sententia peculiariter auctoritate Baronij.* Cum autem expectet lector Baronij auctoritatem pro illorum sententia, afferunt ipsi suam ipsorum sententiam ad Baronij auctoritatem sibi conciliandam, & qui productus erat in testem illius, testimonio pro quo testificaturus erat, indigens ostenditur. Quid aliud autem hoc est, quam disputationem in-

uertere, principium, vt Dialectici aiunt, petere, circulum texere, ignotum per ignotius, & falsum per falsius velle probare? Falsissimum est enim Ecclesiam Romanam semper credidisse, aquam prius in vinum, quàm in sanguinem transire (nisi hoc de morali transitu, quem ipsi non admittunt, intelligatur.) Cùm enim substantialis aquæ transitus in vinum sit res merè philosophica, non pertinet ad Ecclesiæ Romanæ fidem, cùm sit recenter excogitatus (antiquitas enim omnis, vt infrà dicetur, contrarium sensit) non potuit ei non esse suspectus, cumque sit falsus, non potuit eius certissima fides subesse. Nec Catechismus Romanus, quem citant, illis suffragatur, vt sect. 11. demonstrauimus. Secunda coniectura ipsorum est, *Quia tunc temporis, inquit, quando D. Gaufredi epistola, quam refert Baronius, scripta fuit, solùm erat controuersum an aqua remaneret aqua, vel potius prius in vinum conuersa transubstantiaretur in sanguinem Christi; non, an immediatè aqua in sanguinem transiret, quia de hoc in præfata epistola nulla sit mentio: & alioqui dicere debuisset Gaufredus alios affirmare aquam immediatè transubstantiari in sanguinem Christi.* Sed hæc facillimè refellentur, & ex verbis epistolæ Gaufredi, & ex ipsiusmet auctoris testimonio, qui ea excogitauit. Ex Gaufreddo: nam qui affirmabant aquam verti in sanguinem, tantum abest, vt
vel.

vellent eam priùs verti in vinum, vt Aduersarijs obijciētibus vinum tantùm esse materiam calicis, respondeant, *Quòd non consueuerunt homines micturam vini & aqua, nec si quantitas aqua praualeat, aquam nuncupare, sed vinum.* si enim aquam praualeare vino supponebat; vtique in vinum conuerti non existimabat. Præterea vbiq; loquuntur de aqua mista vino, vel de aqua absolutè, & numquam de aqua conuersa in vinum: ergo pro explorato habebant eam non esse in vinum conuersam.

Sed audiamus ipsos recentiores apertissimè sibi contradicentes. Nam post relatum huiusmodi epistolam subdunt: *Ex quibus verbis patet satis, disputationem tunc minimè fuisse de immediato transitu aqua in sanguinem Domini, sed solum, supposito quòd aqua numquam in vinum conuertatur, querere quid de ea fiat.* At quis non videat, hoc supposito, esse non posse quæstionē, nisi de immediato transitu aquæ in sanguinem? Qui enim supponit aquam non verti in vinū, quomodo deinde affirmare potest aquam mediātè, id est priùs in vinum, & deinde in sanguinem, transmutari?

Rursus paulò pòst idem auctor inquit fuisse Pag. 86
tunc temporis communissimam opinionem, aquam non conuerti in vinum: ex quo infero, ergo erat etiam communissima opinio, aquam immediātè in sanguinem verti, quoniam omnes

nes Patres, imò omnes Doctores, vsque ad illud tempus aquam conuerti in sanguinem pro comperto habuerunt, vt etiam testatur Gaudfredus: atqui hoc non poterat intelligi de conuersione mediata, quia communissima opinio erat non conuerti in vinum: ergo censebant immediatè transmutari in sanguinem. Præterea, si verum esset, quod aiunt recentiores, hos auctores negantes aquam conuerti in vinum, censuisse consequenter aquæ substantiam simul cum sanguine remanere; non dixisset Baronius hæresim negantium aquam verti in sanguinem illo sæculo exortam fuisse: simul enim atque exoritur aliqua opinio, non potest esse communissima: atqui, vt recentiores fatentur, communissima tunc erat opinio, aquam non verti in vinum: ergo vel censebatur verti nihilominus in sanguinem, vel existimabant simul cum sanguine remanere. Hoc posterius dici non potest, quia hæc hæresis, vt eam vocat Baronius, illo sæculo exorta fuit, nec potuit esse communissima; ergo illud prius est asserendum, ac proinde fuisse tunc communissimam opinionem aquam verti immediatè in sanguinem.

Conueniebant igitur omnes in communissima opinione, quod aqua non verteretur in vinum: & multis persistentibus in veteri quoque sententia, quod hæc aqua nihilominus verteretur in sanguinem, exorta fuit aliorum sen-

sententia hoc negantium, vt inquit Baronius. quod etiam clarius asserit post relatum miraculum de quo suprâ egimus: inquit enim, *Hac de transubstantiatione aqua in sanguinem Christi per cōmixtionem corporis diuinitus facta, quod semper fieri in vino, cū mistio intercederet, antiquitas existimauit.* Non inquit, Cū aqua versa esset in vinum, quia tunc esset de fide in sanguinem verti, & non tantū ex antiquorum opinione, sed, Cū mixtio intercederet, quæ simul cum conuerfione esse nequit, vel eam saltem non supponit.

Tandem tanquam hæresim damnat Baronius opinionem negantium aquam vino mixtam in sanguinem verti: ergo non loquitur de aqua in vinum conuersa, quia tunc nemo negabat aquam in vinum conuersam mutari in sanguinem; sed de illis loquitur qui aquam simul cum sanguine remanere volebant. Quare & Aduersarij dicunt ipsum in hoc excessisse, & hæresim non esse, hoc negare. Damnatur igitur Aduersariorum sententiam, qui hoc aliquando saltem contingere asserunt; & è contra dum ait aquam vino mixtam in sanguinem verti, non potest intelligi de aqua in vinum transmutata, quia hoc nunquam, vel non semper euenit, sed de accidentaliter ei tantū mixtâ.

Ad miraculum autem pro nostra sententia à Baronio allatum quid respondent? Nec ei
qui-

*Cap. 17. quidem parcut, sed inquit, Si immediatam
 pag. 32. aqua in sanguinem conuersionem inde liceret argu-
 mentari, possemus etiam dicere, fieri hanc conuersio-
 nem absque verborum virtute, statim ac est aqua
 vino in calice commixta, sicut ibi effecta est sanguis
 miraculosè sine vllis verbis. Respōdeo negandam
 consequentiam. & ratio est, quia nulla tunc vi-
 gebat controuersia circa verborum virtutem,
 neque asserebat quispiam sine verbis aquam
 fieri sanguinem, vt proinde oporteret ad hanc
 dirimendam litem miraculum patrari; multi
 tamen negabant aquam in sanguinem verti,
 volebantque eius substantiam simul cum Au-
 gustissimo Eucharistiæ Sacramento permane-
 re. quod hoc miraculo inconueniens esse of-
 tendit Deus, dum per immissionem Eucharis-
 tiæ in aquam, hæc versa est in sanguinē. quòd
 si per vini admixtionem hoc contigisset, tunc
 vim aliquam haberet. Aduersariorū argumen-
 tum; at si nullum, hic adfuit vinum, quomodo
 inferunt aquam, statim ac vino miscetur, debe-
 re sanguinem fieri, si omnino seruanda est
 proportio?*

CAPVT IX. ad SECT. VII.

*De S. Thoma nostra sententia
patrocinate.*

QVamuis abundè ex dictis sect. 7. S. Thom. nobiscum sentire patere possit, quia tamen necdum Aduersarij acquiescunt, nonnulla addere, ad hoc idem confirmandum, operæ pretium erit. In quarto igitur Sentètiarum distinct. 11. q. 2. a. 4. quæstiunc. 1. idem S. Doctor inquit. *de aqua in Euangelio mentionē non fieri, quia non est principalis materia in hoc Sacramento.* Existimat igitur Angelicus Doctor, esse quidem aquam materiam, sed non principalem.

Respondent Neoterici, nomine materia prin- Cap. 16
cipalis intelligi materiam necessariam de necessitate pag. 105
Sacramenti: dato igitur aquam esse materiam minùs principalem, erit tantum de necessitate præcepti, & priùs in vinum transire debet, ut possit in sanguinem verti. Omnia perbellè, nisi hanc ultimam particulam addidissent, quæ & falsa est, & prioribus verbis non cohæret. Libenter igitur accipimus aquam esse materiam minùs principalem, hoc est de necessitate præcepti, non Sacramenti: hoc ipsum enim est quod nos volumus; at priùs eam debere transire in vinum, non cum præcedentibus conuenit. Nam
fi

si eatenus tantum est materia quatenus transit in vinum: ergo vel materia principalis, vel nullatenus materia dici debet. Si enim consideratur, ut transmutatur in vinum, iam est materia principalis, quia est vinum; si non transmutatur, ergo nullatenus materia, quia non potest verti in sanguinem. Confirmatur, quia nec farina, nec aqua dicuntur materia corporis Christi minus principalis, eo quod possint in panem verti, qui est principalis materia. Præterea frustra distingueretur à vino, tamquam à materia principali, si eatenus tantum esset materia, quatenus idem & vnum fit eum eo. Quartò, eadē ratione quilibet alius liquor dici posset materia minus principalis: si enim trāseat in vinum, proculdubio fiet sanguis, at aliquid peculiare de aqua significauit hic S. Thomas. Quintò, argumentantur alibi iidem auctores aquam non conuerti in sanguinem immediatè, quia non erat materia sanguinis: ergo cum hic fateantur eam esse materiam, conuerti negare non possunt. Denique quotiescumque aqua calici infunditur, semper est dicenda materia minus principalis, quia & significationem sacramentalē participat, & eadem intentione semper admiscetur: at non semper in vinum conuertitur, ut sæpius dictum est: ergo non dependenter à conuersione in vinum est materia.

Præterea 3. p. quæst. 74. art. 6. ad secundum, quod

quod erat huiusmodi, Diuersorum Sacramen-
torum diuersæ sunt materiæ : sed aqua est ma-
teria Sacramenti Baptismi, ergo non debet as-
sumi ad materiam huius Sacramenti ; Respon-
det S. Thomas, quòd aqua assumitur in Bapti-
smo ad vsum ablutionis, in hoc autem Sacra-
mento assumitur ad vsum refectionis, iuxta
illud Psalmi, *Super aquam refectionis educauit
me.* Existimat igitur S. Thomas aquam esse
materiam Eucharistiæ, sicuti etiam est materia
Baptismi, quamuis alio modo. Respondent pag. 112
Aduersarij non dicere S. Thomam, aquam esse
materiam refectionis, sed assumi ad vsum re-
fectionis. Tunc autem aquam assumi ad vsum
refectionis quando est in vinum conuersa :
tunc enim solum constat aquam reficere, cum
ex seipsa naturaliter ad reficiendum apta non
sit, secundum suam substantiam scilicet spe-
ctata. Sed hæc ne hilum quidem vim argumen-
ti nostri obtundunt, imò potius roborant.
Quod enim Primò inquirunt, *non dici aquam
materiam refectionis, sed assumi ad vsum refectionis,*
non obstat, quia & de aqua Baptismi dixe-
rat S. Thom. assumi ad vsum ablutionis. sicuti
ergo per hunc modum loquendi non excludi-
tur aqua à materia Baptismi, ita neque debet
excludi à materia Eucharistiæ. Quod aiunt a-
quam non reficere secundum suam substan-
tiam, verum est : at non est hic sermo de refe-
ctione

ctione naturali, sed de supernaturali, quam præstat dum fit sanguis Christi; cumque alioqui non reficiat, ut verum sit Prophetæ & S. Thomæ dictum, fateri oportet eam in sanguinem conuerti.

24. 139 Libentissimè etiam amplector, quod ait hic auctor, aquam non reficere, & rursus c. 18. aquam non nutrire, quia hoc mirum in modum confirmat sententiam nostram de non conuersione aquæ in vinum: nam si aqua non reficit, nec nutrit, ergo non in sanguinem, nec in ipsam animalis substantiam conuertitur: at si ab animali, à quo plurima alia conuertuntur, non potest in propriam substantiam aqua verti, quomodo à vino, quod longè minori vi præditum est, in suammet substantiam transmutari poterit? Neque tantum ex his eius verbis pars philosophica comprobatur, sed etiam theologia confirmatur. Nam negare nequeunt Aduersarij aquam reficere & nutrire mediatè, cum per ipsos in vinum conuertatur, vinum autem aliquo pacto nutrire & reficere nulli dubium est; nam & in sanguinem vertitur, & spiritus gignit, qui exhilarant, & robur addunt, ut meritò Siba fugienti David inter alia munera vinum offerens dixerit: *Vinum autem, ut bibat si quis defecerit in deserto.* 2. Reg. 16. 2. Hoc tamen non obstante, simpliciter aqua dicitur non nutrire, nec reficere, quia non reficit, nec

nec nutrit immediatè, sed priùs in vinum conuerfa: ergo, si eatenus tantum aqua verteretur in sanguinem, quatenus in vinum priùs vertitur, non diceretur à Patribus simpliciter in sanguinem verti: Patres autem absolutè, & absque vlla limitatione hoc asserunt, neque vñquam aliquis ipsorum dixit non conuersti: ergo optimè concluditur intellexisse eos de conuersione immediata, non mediata. Nam & ipsi Aduersarij nostri dum sincerè, animoque affectibus non præoccupato res considerant, hunc dicendi modum auersantur, nec admittunt aquam nutrire, vel reficere, quamuis eodem pacto mediatè reficiat & nutriat. Confirmatur; quoniam tolerabilius esset hoc affirmare de nutritione aquæ, quàm de eiusdem conuersione in sanguinem: tum quia, dum explicantur dogmata fidei, æquiuationes, amphibologiæ & figuræ, ne detur erroris occasio, vitari debent: tum etiam quia, cùm ad aquæ refectionem duæ conuersiones naturales concurrant, faciliùs ac si vna tantum esset reputari possunt; cùm verò ad conuersionē eiusdem in sanguinē altera naturalis requiratur, & altera supernaturalis, difficiliùs vnius conuersionis nomine comprehenduntur.

Sed vt ad D. Thomā reuertamur, obijciunt nobis Aduersarij eiusdem responsionem ad 2. in 4. dist. 11. qu. 2. art. 4. quæstiunc. 1. vbi post-

X 2

quam

quam opposuerat sibi hoc argumentū : *Vinum & aqua sunt alterius speciei : si ergo aqua admiscetur vino, erit triplex materia huius Sacramenti; sed hoc est absurdum, &c.* Respondet, quòd de aqua apposita est duplex opinio: quidam enim dicunt, quòd aqua manet in sua natura, & solum vinum transubstantiatur, vnde aqua non apponitur ibi nisi ad significationem: alij verò dicunt, quòd aqua apposita in vinum conuertitur, & sic totum in sanguinem Christi transubstantiatur. Quæcumque autem harum opinionum sit vera, aqua non erit materia huius Sacramenti. Nullo pacto igitur, inquiunt, S. Thomas pro materia sanguinis Christi agnoscit aquam. Sed facilis est responsio ex eodem S. Thoma, qui ibidem in Corpore, vbi clariùs explicari solet auctoris mens, quàm in responsionibus ad argumenta, quæ non ad explicandam veritatem, sed ad satisfaciendum obiectis diriguntur, & doctrinam in Corpore traditam supponunt; in Corpore igitur illius articuli inquit S. Thom. aquam non esse materiam principalem: cùm ergo in responsionibus negat aquam esse materiam, intelligit non esse principalem, referens se ad illud quod in Corpore dixerat: alioqui esset sibi met contrarius. & hoc etiam sufficiebat ad argumenti solutionem: ex eo enim quòd aqua non est materia à vino diuersa, sequitur non esse triplicem materiam.

Quod

Quod autem ait S. Thomas, duplicem tantum esse opinionem circa aquæ conuersionem, nostræ quoque sententiæ fauet. Nam cum doceret ipse Parisiis, & in Gallia agitata fuisset quæstio illa de qua Gaufridus in epistola superius allata loquitur, non est credibile eam ignorasse D. Thomam: cum ergo in illa supponeretur aquam in vinum non conuerti substantialiter, vt ex ipsius epistolæ contextu, & testimonijs etiam Aduersariorum comprobauimus, & S. Thomas dicat esse tantum duplicem opinionem, alteram asserentem aquam conuerti in vinum, & deinde in sanguinem; alteram verò vtramque conuersionem negantem; credibile est de conuersione morali eum fuisse locutum, vel (vt aliquid Aduersarijs demus) de conuersione generatim sumptâ, siue hæc physica sit, siue moralis: cum ex vtraque idem colligeretur, scilicet aquæ in sanguinem transubstantiatio.

Ex ijs quoque, quæ de pane triticeo, cui modicum hordei fuerit admixtum, ex S. Thoma in nostra sect. 7. retulimus ipsum nostram sententiam amplecti, perspicuè patet. cui tamē *Cap. 16*
argumento ne manus dent recentiores, non ve- *pa. 107.*
rentur asserere modicam farinam hordeaceam multæ triticeæ admistam in ipsam conuerti. quod adeò improbabile est, & à communi omnium sensu remotum, vt confutatione ferè

non indigeat. Quis enim non videat nullam alterationem nullamque actionem corruptiuam inter farinam hordeaceam & triticeam intercedere? Quis autem nesciat sine præuia alteratione generationem non fieri? Præterea quisnam affirmaret grana hordei, & grana tritici inuicem agere & corrumpi, vel farinam triticeam, si terræ mandetur, fructum allaturam? Quis modicum puluerem farinæ triticeæ admixtum in ipsam conuerti? Quis peccati non damnet admiscentem farinam hordeaceam cum triticea, & vtramque pro triticea vendentem? Hæc autem, & alia absurda ex illo principio consequuntur. Nam si inuicem agere possunt farina triticea & hordeacea, cur non etiam grana ipsa, cum virtus vnita sit fortior, & similiter inuicem permisceri possint? Numquid scintillæ ignis comburent, & non ardentæ prunæ? Nōne videmus tritici grana in aceruo inuicem calefieri? Maiori igitur vi integra grana prædita sunt, quàm farina. Nec obijcias, piper in puluerem redactum magis calefacere; quoniam piper nec integrum, nec contritum, nisi à calore naturali calidum formaliter reddatur, calefacit; contritum tamen faciliùs quàm integrum actuatur. ad patiendum igitur magis adiuuat contritio quàm ad agendum. Si ergo farina hordeacea granis tritici admisceretur, faciliùs triticea euaderet. quod est

est apertè falsum, & falsissimum ergo erit triticeam fieri, si farinæ triticeæ admisceretur. quòd si etiam daremus farinam faciliùs agere, non deberemus aliqualem saltem actionem granis ipsis triticeis in hordeacea denegare: experientia autem omnem omnino negat.

Secundum etiam absurdum clarè sequitur: quoniam, si grana triticea terræ mandata fecunda sunt, cur non etiam farina idem præstabit, quæ per Aduersarios vi maiori ad generandum pollet, cum aliam farinam etiam supra terram generet, quod nequeunt efficere grana?

Nec minùs apertè sequitur tertium absurdum: nam pulvis subtilior est quàm farina hordeacea, & faciliùs permiscetur, ergo etiam faciliùs transmutabitur. non enim obstare potest ipsum esse elementū purum, quod verti nequeat in mixtum, quoniam etiam aqua est elementū purum, quàm tamen in vinum commutari hi auctores asserunt.

Quartum quoque absurdum perspicuum est, quoniam reuera illa tota farina triticea esset. Denique omnia, quæ contra conuersionem aquæ in vinum aliàs attulimus, potiori iure contra hanc alteram fabulosam metamorphosim militant. Et quamuis S. Thomas in 4. distinct. 11. qu. 2. art. 2. quæstiunc. 2. visus sit ei fauere, in tertia tamen parte doctior factus sententiam nostram amplexus est, vt ostendimus.

Cap. 16
pa. 116.

Nec solum est amplexus, sed etiam argumentis confirmavit. Horum autem primum est, quod si aqua simul cum sanguine Christi in calice consecrato remaneret, ut Aduersarijs placet, non totum adoraretur veneratione latriæ; cui ne succumbere videantur Aduersarij, quamuis se discipulos esse D. Thomæ profiteantur, veluti indignabundi occurrunt dicentes, *Quis, obsecro, fidelium vniquam docuit, aut arbitratus est, quidquid est in calice esse eodem modo adorandum?* Ergo S. Thom. è cœtu fidelium ablegandus erit, qui hoc apertissimè docuit, suumque præceptorem optimè de eis meritum ab Ecclesia potius, quam aquam è calice consecrato exturbabunt. atqui, dicunt, si palea sit in calice, non erit adoranda; & verè dicunt, sed non ad causam: palea enim non est ex Ecclesiæ instituto, & commodè distingui potest, non ita verò aqua, à sanguine. Denique argumentum est D. Thomæ, quo ipsorum sententiam impugnat: vel igitur ab hac, vel ab illo est eis discedendum, & nisi Angelici Doctoris auctoritatem negligant, ipsius argumenti vim parui pendere non possunt.

Alterum argumentum habemus etiam ex D. Thom. ad nostram sententiam confirmandam: est autem in 4. dist. 11. quæst. 2. art. 4. q. 1. ad 2. ubi Aduersariorum sententiam impugnans, hæc habet verba: *Si aqua in propria natura re-*
mane-

maneret, sic calix consecratus non esset tantum potus spiritualis, sed etiam corporalis, & ita non liceret post primam sumptionem sanguinis iterum sumere.

Cuius etiam argumenti vim infringere conantur, consecutionem eius negantes, quoniam, Cap. 16.
 inquit, sumitur illa aqua per viam Sacra- pa. 114.
 menti. Quid est autem sumi per viam Sacramē-
 ti? an simul sumi cum Sacramento? si hoc vo-
 lunt, censebitur ieiunus sacerdos, etiam si fari-
 nam, vel aliquod obsonium simul cum sangui-
 ne Christi assumat: quod est absurdum. potius
 ergo, vt etiam ipsa verba magis indicant, sumi
 per viam Sacramenti, erit sumi per modum
 Sacramenti, ita vt eius sumptio quodammodo
 sacramentalis censeatur. At quomodo id quod
 non est Sacramentum per viam Sacramenti,
 & tamquam si esset Sacramētum sumi potest?
 Profectò, si tamquam Sacramentum sumi po-
 test, ergo etiam tamquam Sacramentum ado-
 rari: quod tamen pro magno inconuenienti
 meritò reputabat S. Thom. nec ipsi Aduersarij
 admittebant. quoniam si adesset, aiebant, gut-
 ta olei, vel festuca in calice, simul cum sangui- Cap. 16.
 ne, non propterea adoratione latriæ eas vene- pag. 116
 raretur Ecclesia: ergo in adoratione non habe-
 tur pro Sacramento, neque in sumptione pro
 eo reputari debet. Deinde quid est sumi per
 viam Sacramenti, quamuis Sacramentum non
 sit, nisi physicè non esse Sacramentum, mora-

liter tamen cenſeri tale, quia eſt Sacramento adiuncta? quàm potiori ergo iure dicimus nos aquam eſſe vinum moraliter, cùm ipſi vino coniuncta ſit & incorporata?

Denique auctoritati D. Thomæ nihil reſpōdent, ſed hīc quoque eam diſſimulant, erga Præceptorem ſanctiſſimum meritò modeſti & officioſi, cuius auctoritatem ignoraffe potiùs quàm contempſiſſe, aut in aliū ſenſum nimis violenter contorſiſſe videri voluerunt.

CAP. X. ad SECT. VIII.

Theologica rationes pro noſtra ſententia corroborantur.

NON ab auctoritate tantum, ſed etiam à ratione firmiſſima habet præſidia noſtra ſententia. Retulimus autem hæc ſect. noſtra octaua, variaſque Aduerſariorum euasiones obſtruximus; addenda tamen ſunt adhuc nonnulla propter quosdam recentiſſimos auctores qui eadem diluere conati ſunt.

Ad primam ergo rationem ex formæ veritate deductam, vt omittam quæiam alibi impugnata ſunt, Reſpondent pronomen relatiuum, *Hic, quod in calicis conſecratione proferitur, non aliud demonſtrare quàm ſanguinem ſub ſpeciebus vera & idonea materia contentum (vini ſcilicet) licet aqua particulam admixtam habeat.* Verum hæc

hæc non explicatio, sed ipsius formæ calicis euerfio & corruptio dici meretur: nam si pronomen *hic* demonstrat sanguinem, ergo supponit sanguinem adesse: si sanguis iam adest, ergo à forma consecrationis non pendet, sed antequam ipsa proferatur, est præsens: nihil igitur ipsa forma efficit, sed tantum significat adesse iam sanguinem. Præterea esset forma consecrationis nugatoria: si enim pronomen *hic* sanguinem demonstrat, ergo supponit præ sanguine. erit igitur sensus huius propositionis Sanguis meus, est sanguis meus. qua ratione etiam S. Thomas hanc eandem explicationem iam refutauerat.

Ad secundam nostram rationem ad illud inconueniens deducentem, quòd verba consecrationis super materiam incertam, & sæpè etiam ineptam proferrentur; omnino nihil Adversarij respondent: non enim hoc pro inconuenienti videntur agnoscere, cùm verè sit maximum. Non omittunt tamen recentissimii auctores probationem illam ex Ecclesiæ præcepto deductam, quo iubemur aliquando vinum & aquam apponere, & statim verba consecrationis proferre. Huic inquam occurrunt, dicentes: *Quia semper Ecclesia attendit ad integritatem sacrificij, cùm sit in vino sufficiens materia ad veritatem verborum, & quia aqua additur tantum ratione significationis ex præcepto solum Ecclesiæ;* Basil.
Ponce
S. 44.
Pag. 45.
ideo

ideo iubet statim sine mora consecrari. Sed hæ omnes rationes falsæ sunt, & ad argumēti vim enervandam prorsus inefficaces. Quod enim primo loco dicitur, quia Ecclesia attendit ad integritatem sacrificij, nisi velint aquam spectare ad sacrificij integritatem, non est ad rem: si enim spectare affirmant, iam negare non poterunt, esse partem integrantem materiæ sacrificij, & consequenter in sanguinem verti, non verò cærimonix tantum causa apponi. Item si est pars integrans, ergo debet in propria substantia adesse; alioqui parte aliqua integrante careret sacrificium, sicuti careret homo, cuius brachium humerum ingrederetur, & vnum cum illo fieret, ut argumentatur S. Paulus, *Si totum corpus oculus, ubi ergo manus?* Si negant autem aquam spectare ad integritatem sacrificij, falsò asserūt Ecclesiam apponere aquam, quia sacrificij integritatem attendit. Quod secundo loco dicunt, esse in vino sufficientem materiam ad veritatem verborum, si vinum sit solum in calice, verum est. Sed hinc deducitur potius non esse apponendam aquam, ut verba consecrationis sint vera; si verò adsit in calice cum vino etiam aqua, falsum est vinum esse sufficientem materiam ad veritatem verborum, quia verba significant totum liquorem qui est in calice, esse Christi sanguinem. non ergo vera erunt, si vinum tantum, & non etiam aqua
in

in sanguinem transubstantietur. Sed esto hoc sit verum, non propterea esset aqua apponenda, sed potius nihil referret ipsam apponi. Quod etiam subiiciebatur aquam addi tantum ratione significationis, & ex præcepto Ecclesiæ, probat potius aquæ appositionem esse prætermittendam, eò quòd necessaria non sit, quam rationem explicet cur Ecclesia apponat, & statim consecret. Denique addunt curare etiam Ecclesiam, vt quoad fieri possit euitetur scandalum populi ex defectibus qui in celebratione accidunt. Sed huic quoque scandalo melius occurreret aquam non apponendo: cur igitur Ecclesia apponat, & statim consecret, alia ratio reddi non potest congruentior, quam spectare aquam ad materiam calicis, non quidem necessariam, sed debitam, nihilque referre quòd in vinum sit versa, cum nihilominus in sanguinem vertatur. Nolle enim Ecclesiam eius substantiam simul cum sanguine adesse, clarè demonstrat, cum præcipit non apponendam aquam, si eius defectus post consecrationem calicis deprehendatur: quasi diceret, cum iam verti non posset in sanguinem, non decet eam apponi: alioqui enim, si verba consecrationis eam non comprehendunt, nihilq; circa eam operantur, quid refert ante ipsa vel post apponi, cum in vtroque euentu eodem modo maneat cum sanguine? Ad tertiam nostram ratio-

nem,

nem, quæ ex necessaria determinatione materiæ desumebatur, nihil Aduersarij respondent, sed nos ex ipsorum dictis eam cōfirmabimus. Nouissimè ergo recentiores, vt sententiam no-

Cap. II. stram euertant, ita argumentantur: Ponamus

pag. 58. casum, quòd sacerdos ante consecrationem aliquo superno lumine ita illustretur, vt illas minimas aquæ portiones distinctè intueatur; tunc quaro, an talis sacerdos possit habere intentionem consecrandi? si affirmatiuè respondeant, hinc infero, Ergo aqua pura consecrari poterit; quod est hæreticum. si negent, igitur sola humana existimatio habet vim materiam consecrationi ineptam, & non veram, aptam, idoneam ac veram reddendi. quod plusquam falsum est. Hæc illi. atqui, percunctor ego, cur lumen supernaturale requirunt, vt sacerdos intentionem suam dirigere possit ad minimas aquæ particulas consecrandas, nisi quia alioqui, cum non sint à vino distinctæ, non possunt sine ipso consecrari? Eadem autem est ratio de vino ac de aqua: si enim hæc non est ab illo distincta, neque illud ab hac distinguetur, consequenter sine lumine supernaturali non poterit absque ea consecrari.

• Confirmatur alio exemplo. si sacerdos decem hostias præsenteshabens quinque tantum consecrare intendat, quas Titius designauit se ipso inscio, nullam consecrabit: quia materia quamuis ab altero sit determinata, tamen re-
spectu.

spectu ipsius sacerdotis non est sensibilibiter designata, nec ipse potest intentionem suam dirigere in indeterminatam materiam. ita Suarez disp. 43. sect. 6. & Mart. Bonac. disp. 4. q. 2. p. 4. n. 7. Ergo subinfero ego, licet ab aqua sit verè vinum distinctum, & ita ab Angelo cognoscatur, quia tamen à sacerdote non potest sensibilibiter determinari ac designari sine aqua admixta, neque consecrationi aptum erit.

Cæterum argumentum contra nos suprà allatum nullius est roboris: quia aqua quocumque modo cognoscatur à vino distincta, nunquam absque eo consecrari poterit: quia eatenus tantum consecrationi est apta, quatenus vnum efficit cum vino, & illi admixta censetur moraliter vinum. neque hinc fit existimationem humanam reddere aptam vel ineptam materiam, sed intentionem ministri: si enim intendat consecrare aquam simul cum vino, Sacramentum conficiet; si solam, nequaquam: ab intentione autem ministri pendere Sacramentorum confectionem, nemini dubium esse potest.

Ad quartam nostram rationem nihil Adversarij opponunt.

De quinta iam cap. præcedenti verba fecimus: est enim secundum S. Thomæ argumentum.

De sexta quoque nihil deprehendi ab eis dictum.

CAP. XI. ad SECT. IX.

Ex recentiorū contra nos pugnantium verbia nostra sententia confirmatur.

Veritatem impugnare, & non sibi in-terdum contradicere, ipsamque veritatem velinuitum non proderere per arduum est. Hunc igitur scopulum Aduersarij nostri vitare nequiverunt. quod sicut sect. 9. de ijs qui ad manus nostras tunc peruenerant ostendimus, ita nunc de recentioribus, qui nouissimè contra hanc eandem nostram sententiam calamos direxerunt, demonstrabimus.

Reuerendissimus Pater Hyacinthus Petronius, qui totis viribus conatus est hanc nostram sententiam euertere, illi tamen multum impri-mis fauit: & omisissis his quæ diximus suprà c. 7. ubi ostendimus, & philosophicam, & theolo-gicam nostræ sententiæ partem, dum negat a-quam reficere & nutrire, ab ipso comprobari, notanda sunt verba, quæ cap. 13. sui opusculi de Necessitate præconuersionis aquæ in vinum in confectioe sanguinis Christi, habet: miram enim auctoritatem sententię nostrę conciliant, sunt autem hæc:

Et quidem verum est vsque ad illa tempora, (anno scilicet ab incarnatione Domini 1138.) talem quæ:

*questionem non fuisse agitatam, & ita inauditum fuisse in Ecclesia aquam nullo modo verti in sanguinem, è quòd aliqui ex falsis principijs Philosophia arbitrabantur aquam numquam in vinum conuer-
ti.* Hæc ille. ex quibus colligitur ipso teste, per mille & ampliùs annos ita in Ecclesia floruisse sententiam nostram, vt contraria nec verbo tenus fuerit ab aliquo vsurpata. Quid enim volumus nos? aquam semper in sanguinem Christi verti, numquàmve simul cum eo permanere; quid, inquit P. Petronius, contrarium inauditum fuisse? nobiscum igitur sentit tota antiquitas. & ne quis diceret hoc sensisse totam antiquitatem, quia censebant verti priùs in vinum, excludit ipse hanc euasione, & inquit *Pag. 36.* non defuisse qui crederent aquam numquam in vinum verti; imò paulò suprà dixerat, hanc fuisse tunc temporis communissimam opinionem. Communissima ergo erat etiam opinio aquam verti immediatè in sanguinem, imò hoc à nemine vocabatur in dubium: nam si qui erant, qui censerent aquam in vinum verti; hi tamen numquam obiecerunt contraria sentientibus, quòd ex eorum opinione sequeretur, aquam simul cum sanguine Christi in calice remanere. quod utique obiecissent, nisi credidissent aquam posse immediatè in sanguinem verti, cùm semper illud pro absurdo sit habitum. non obiecisse autem patet, quia

Y tunc

tunc non fuisset inauditum in Ecclesia aquam nullo modo in sanguinem conuerti.

Confirmatur, quia ante hæc tempora, scilicet anno Domini 895. in Concilio Triburienſi can. 19. decretum fuit, vt duæ partes in calice eſſent vini, & tertia aquæ, vt notat etiam idem auctor cap. 15. quo in caſu, nec ipſi Aduerſarij audent aſſerere, potuiſſe ante conſecrationem in vinum aquam verti: ergo de hac conuerſione non erant tunc PP. ſoliciti. atqui ego quæro, vel credebant hi Patres aquam tunc verti in ſanguinem, vel non verti exiſtimabant. hoc poſterius dici non poteſt, quia, vt illi aſſerunt, inauditum fuit in Eccleſia uſque ad annum 1188. aquam non conuerti in ſanguinem: dicendum eſt ergo, ſenſiſſe illos omnes Patres aquam immediatè in ſanguinem verti; non ergo, vt inquiunt, recens eſt & inaudita noſtra ſententia, ſed antiquiſſima, credibileque eſt tunc fuiſſe comuniſſimam, cùm eo tempore nemo contrarium ſcripſerit, nemo illis Patribus contradixerit, nemo de minori quantitate aquæ vino admiscenda mentionem fecerit.

At inquiunt, illud Conciliū per ſubſequens Florentinum correctum fuit. Reſp. Florentinum Concilium id quidem docuiſſe, quod eſt melius & congruentius, non tamen Patres Concilij Triburienſis reprehendiſſe: neque credibile eſt Eccleſiam Romanam, & Summos

Pon-

Pontifices tot annorum centuriis filuisse, erroremque prouinciæ non correxisse, si errasse illos Patres credidisset. Sed demus, illud Concilium errasse in aquæ quantitate decernenda: (nam etiam iuxta nostram sententiam tutius est aquam modicissimam apponere) sufficit nobis ex eo probari tunc temporis viguisse nostram sententiam, cum de contraria nullum vestigium extet. Cumque Patres, qui circa illa tempora floruerunt, dixerint aquam simul cum vino in sanguinem verti, non possunt de mediata conuersione intelligi, cum eo tempore aquæ in vinum transmutationem vel impossibilem crederent, vel non curarent.

Neque verò inferas, si Concilij Triburiensis decretum correctum fuit, etiam nostram sententiam fuisse reiectam: non enim habent hæc duo necessariam connexionem; sed illud quidē decretum supponit sententiam nostram, at nostra sententia etiam sine illo decreto consistere potest, imò, vt dicebam, & ipsi Concilio Florentino magis adhæret. cum ergo PP. illius Triburiensis Concilij in nostra sententia fuerint, & hæc nullibi reprehensa reperiatur, cum tamen decretum eiusdem Concilij, vt Aduersarij existimant, correctum fuerit, consequitur utique nostram sententiam approbatam fuisse. Nam, vt aiunt Iuris periti, exceptio firmat regulam, & exclusio vnius est inclusio alterius.

Cùm igitur decreto tantùm derogatum fuerit, & non sententiæ, hanc confirmatam fuisse inferri potest. Frustra igitur conatur hic auctor antiquitatem & Baronium in suam sententiam pertrahere, cùm ipse potiùs nolens, inuitus, & reluctans nostram sententiam fateri cogatur: similis nauigantibus, qui funibus ad litus religatis, ipsum ad se trahere conari videntur, cùm ipsi potiùs ad ipsum in contrarium nitentes trahantur: instar enim montis firmissima & immobilis sententiæ nostræ veritas persistit.

Non prætereundus est etiã P. Basilius Pontius Legionensis, qui & ipse disputationem de aquæ in vinum conuersione in sacrificio Missæ contexuit, & à sententia nostra alienus est. his autem verbis suum exorditur opusculũ: *Quæstionem hanc, quæ isto tempore celebris est, & à nonnullis annis defendi in hac nostra academia cœpit, licet auditorum animis ab ea longè abhorrentibus, dictaui hoc anno auditoribus meis.* Ex quibus verbis colligi in primis potest non insudasse auctorem in hac quæstione dictanda, nec magno studio illi intendisse; alioqui non tam impropriè in ipso quæstionis vestibulo locutus fuisset, inquit enim quæstionem hanc defendi cœptam. at quis vnquam audiuit quæstionem defendi? Quæstio disputatur, definitur: at non defenditur, quoniam indifferens est ad vtramque sententiam, & per eam dubium proponitur,

tur, nihilque in ea affirmatur aut negatur: non indiget ergo defensione, nisi fortè contra aliquem, qui diceret non esse illam quæstionem proponendam, & tamquam inutilem, superuacaneam & perniciosam, à scholis ablegandam. quæ in hac nostra quæstione locum non habet. Nomine igitur quæstionis intelligit hic auctor responsionem, siue sententiam, siue definitionem, in qua aquam in vinum prius verti asseritur, quàm in sanguinem; & alioqui cum sanguine permixtam remanere, nisi prius conuertatur in vinum. De hac autem sententia duo hic affirmat: primum, nouam esse in illa Academia, nam inquit à nonnullis annis tantum defendi in ea coeptam. Antiquiores igitur, quibus est maior adhibenda fides, nostræ sententiæ adhærebant; non enim dici potest in ea theologica Academia incognitâ fuisse hanc quæstionem, cum & Innocent. III. & S. Thomas de ea verba fecerint. Deinde asserit auditorum animos longè ab eius sententia abhorruisse. Sed qualesnam erant hi auditores, doctine, an indocti? Si docti, ut par est credere, non est contemnendus eorum sensus, maleque de ea sententia, à qua doctorum animi longè abhorrent, est sentiendum. si indocti, quis eorum animos, ut ab ea sententia longè abhorrerent, impellere potuit, nisi eius improbabilitas & absurditas? quæ adeò magna est, ut vix auribus

percepta horrorem animo incutiat : horrent enim reuera fidelium aures, cum audiunt aque substantiam simul cum Christi sanguine in calice adesse, simulque cum eo adorari, & tamquam Sacramentum sumi, ut ex illa opinione habetur. Quod si multis hodie arridet, sophismatibus, & falsis auctoritatibus, quibus tamquam pigmentis, fucis & calamistris ipsius deformitas ab eiusdem sectatoribus obtegatur, est referendum acceptum.

CAP. XII. ad SECT. X.

De aqua in vinum conuersione moraliter intelligenda.

NIHIL est, quod magis Aduersarios nostros torqueat, quam hæc moralis aquæ in vinum conuersio, per quam dicimus nomine solius vini etiam aquam intelligi: eâ enim omnes neruos sibi præcidi vident, omnia iacula extorqueri, omnia tela eripi. Quapropter ipsam nos firmissimè multis auctoritatibus & exemplis sect. nostra II. communiuimus: sed alia nonnulla, quibus eadem magis magisque roborabitur, addere libet, lectori, ut spero, non iniucunda, & nostræ sententiæ, imò veritati, proficua.

S. Ioannes Chrysostomus, in S. Scripturis
inter-

interpretandis litteræ tenacissimus, homil. 66. in Genes. somnium Ioseph, & eius interpreta-
tionem expendens, quærit, quomodo verum
fuerit Ioseph à matre, quæ sub lunæ nomine
significabatur, adoratum fuisse, cum ante ipsius
venditionem & profectiorem in Ægyptum
ipsa iam obiisset? & respondet: *Perpetuus Scri-
ptura mos est, à magis principali totum significare:*
quia igitur caput mulieris vir est, cum adorauerit
caput Iacob, manifestum est, quod corpus totum ca-
put sequatur; si enim pater hoc fecit, multò magis
illa (Rachel) nisi ex hac vita præcepta fuisset, hoc
fecisset. Nota lector illa verba, *Perpetuus Scri-*
ptura mos est à magis principali totum significare:
cum igitur magis principale in calice Domini
sit vinum, sub eius nomine & aqua minùs prin-
cipalis pars intelligi debet.

S. Ambrosius lib. de Noë cap. 16. explicans
verba illa cap. 8. Genes. *Recordatus autem Deus*
Noë cunctorumq; animantium, & omnium iumen-
torum quæ erant cum eo in arca; hæc habet, Mo-
uentur pleriq; quæ de causa non dixerit Scriptura,
Quod & vxoris Noë, & filiorum memor fuit Domi-
nus, cum bestiarum & iumentorum fuerit memor.
Cui dubitationi deinde respondens, inquit,
Cum dixerit quod Noë memor fuerit, in auctore &
præsule domus, necessitates eius reliquas comprehen-
dit. Cum igitur, & in calice vinum præualeat,
& aqua ei tanquam viro suo copuletur (signi-

ficat enim Ecclesiam, quæ sponso suo Christo vnitur) ipsius etiam nomine intelligetur.

Sed & in hac materia Sacramentorum, ad hunc sensum moralem sæpè Theologi recurrunt: exempli causa, materiâ & formâ, id est re & verbis, constant Sacramenta; debentque res & verba esse simul & vniri, vt compositum sacramentale conficiant. at hæc vnio quænam erit? physicane, vel moralis? Vtique moralis: neque enim est necesse, vt eodem prorsus instanti incipiant & desinant, sed licet altera præcedat, & altera sequatur, dummodo tamen moraliter dici possint simul, sufficit. Ita S. Thomas quæst. 60. art. 6. ad 2. Suarez disp. 2. de Sacramentis sect. 2. & alij. Et in hoc eodem Augustissimo Eucharistiæ Sacramento, etsi requiritur præsentia materiæ transubstantiandæ, & super eam verba consecrationis proferri debeant; hæc omnia tamen morali modo intelligenda sunt: neque enim requiritur, vt sonus verborum materiam consecrandam attingat, vel necesse est vt manibustangatur; sed satis est, vt morali modo dici possit materia præsens, & de ea pronomé *hoc*, siue *hic* verificetur, vt declarat Suarez disp. 45. sect. 5. Vasquez 3. part. disp. 71. c. 4. & alij cõmuniter.

Non mirum igitur, si neque physica conuersio aquæ in vinum exigitur, sed moralis sufficere asseritur.

Deni-

Denique P. Hyacinthus Petron. respondens cap. 15. Patribus qui dicunt vinum aqua mixtum consecrari, & verti in sanguinem Christi, inquit, *sensum eorum esse, vinum aqua mixtum, id est, quod iam in se aquam transmutauit, & quod vinum aqua mistum nominari consuevit, in sanguinem verti.* & cap. 17. idem repetens inquit, *illud vinum, in quod aqua versa est, dici communi modo vinum mistum.* Si ergo proprietate verborum relicta ad loquendi consuetudinem illi recurrere licet, cur à nobis idem præstari indignatur? præcipuè cùm plures habeamus nos hac in re duces & patronos, ipse verò multos aduersarios, & in primis Aristotelē, qui negat id quod in alterum vertitur, dici posse illi commisceri. nec illi cōmunis loquendi vsus astipulatur, vt nobis, sed potiùs refragatur: quoniam, vt etiam Aristoteles notat, non dicuntur ligna commisceri igni, nec alimentum nutrito.

Præterea dum opusculum suum hoc titulo, *De necessitate praconuersionis aqua in vinū in confectiōe Sacramenti sanguinis Christi*, insigniuit, non video, quo in sensu, nisi intelligat de morali conuersione, rectè accipi possit. Cùm enim duplex occurrere possit necessitas in Sacramentorum confectiōe; altera, quæ Sacramenti dicitur; altera, quæ præcepti; quæro de quam necessitate ipse loquatur. De necessitate Sacramenti? atqui si aqua ipsa non est simplici-

ter necessaria, quomodo erit eius conuersio? Præterea si hoc admittatur, dicendum quoque erit irritum esse Sacramentum, quotiescumque aqua non est in vinum conuersa, quod esset magnum absurdum: semper enim de Sacramenti veritate incerti essemus, cum de antecedenti aquæ in vinum conuersione constare nobis nequeat.

Dicet fortè, se loqui de necessitate præcepti? At vbi reperitur hoc præceptum? cumque hoc ex vini qualitate & viribus pendeat, quomodo id nobis præcipitur quod in nostra non est potestate? Dices, præcipi, vt ea quantitate & modo aqua apponatur, vt verti possit in vinum. sed & hoc falsò dicitur; de quantitate enim adest quidem præceptum, sed de alijs circumstantiis non minùs ad hanc conuersionem necessarijs, ne verbum quidem: imò Ecclesia præcipit, vt aqua interdum apponatur, & statim consecrationis verba proferantur. tunc autem certum est non posse aquam in vinum præconuerti; vbi est ergo hæc necessitas? Denique ipsemet, vt argumentorum nostrorum vim effugiat, nonne fatetur nullum esse inconueniens aquam in calice remanere aquam?

PA. 121 Verba eius sunt cap. 17. *Absque vllò scrupulo concedendum est, in talibus casibus aquam remanere aquam: ex quo nullum sequitur inconueniens. Si nullum ergo sequitur inconueniens, ex eo quòd aqua*

qua non sit præcōuerſa in vinum, vt quid adeò neceſſariam hanc præconuerſionem clamat?

Verùm intelligatur hæc præconuerſio moraliter, & omnia præclare cum veritate & ritibus S.R.E. conuenient: hæc enim conuerſio tempore non indiget, ſed ſtatim atque aqua eſt vino commiſta, dummodo ſit in parua quantitate, in ipſum conuerſa cenſetur. quòd ſi in tanta quantitate apponatur, vt in ipſum conuerſa dici nequeat, iam nec aqua nec vinum erunt apta conſecrationis materia: non aqua, quia non moraliter vinum; non vinum, quia ab aqua non diſtinctum, & moraliter corruptum. Quare optimè Innocent. lib. 4. de Sacrificio Miſſæ, aliàs etiam citatus, aſſerebat oportere vt aqua ſaporem vini retineat, vt non ſit irritum Sacramentum. quod eſt idem, ac dicere, oportere vt aqua ſit in vinum conuerſa moraliter.

Adhuc tamen alij conſurgunt contra hanc noſtram conuerſionem moralem, dicentes: *Magis propriè nomine vini vinum merum ſignificatur, quàm lymphatum: imò cùm Concilia vini §. 18. tantum meminerint, dum aſſignant materiam eccleſiæ, intelligenda ſunt de vino in magis conſueta & propria ſignificatione, & non de vino vſuali. Sed facilis eſt reſponſio. Primò enim falſum eſt, vini tantum Concilia meminiffe, & non aquæ, vt noſtra ſect. 4. oſtendimus. Præterea quamuis*

uis hoc verum esset, tamen ob auctoritates Patrum, quibus non est credendum voluisse contradicere Concilia, de vino aqua misto essent intelligenda. At inquiunt, PP. intelligi possunt de conuersione aquæ mediata. Sed & nos in nostra disput. sect. 6. ostendimus hoc pacto intelligi non posse. & esto ita intelligi possint, negare nequeunt, sensum magis proprium esse, si de immediata conuersione intelligatur: sicuti cum dicitur Dauid genuisse Salomonem, sensus proprius & verus est genuisse eum immediate, & non mediate. & nisi in contrarium adfit ratio conuincens, ita intelligendum erit. Aduersariorum igitur argumentum retorquentes, cum simpliciter Patres & Concilia dicant. aquam verti in sanguinem, consecrari & offerri, rectè colligimus hæc in sensu immediato debere intelligi, & non mediato. At inquiunt de humano corpore dixit Deus, *Terra es, & in terram ibis*: cum tamen non sit immediate terra, sed ex terra formatus. Resp. hominem dici terram, quia & ex terra corpus eius fuit immediate formatum, & ex elementis terra in ipso prædominatur: & in terram reuersurum dicitur, quia reuera corpus humanum in terram resoluetur, & non in aliquid aliud, saltem manifestè, & quoad omnes partes. quare hæc auctoritas nobis potius fauet.

Præterea obijciunt, Vera est hæc propositio,
Hu-

*Basil.
Ponce
§. 42.
pag. 43.*

*questionem non fuisse agitatam, & ita inauditum fuisse in Ecclesia aquam nullo modo verti in sanguinem, eò quòd aliqui ex falsis principijs Philosophia arbitrabantur aquam numquam in vinum conuer-
 ti. Hæc ille. ex quibus colligitur ipso teste, per mille & ampliùs annos ita in Ecclesia floruisse sententiam nostram, vt contraria nec verbo tenus fuerit ab aliquo vsurpata. Quid enim volumus nos? aquam semper in sanguinem Christi verti, numquàmve simul cum eo permanere; quid, inquit P. Petronius, contrarium inauditum fuisse? nobiscum igitur sentit tota antiquitas. & ne quis diceret hoc sensisse totam antiquitatem, quia censebant verti priùs in vinum, excludit ipse hanc euasione, & inquit Pag. 36.
 non defuisse qui crederent aquam numquam in vinum verti; imò paulò suprà dixerat, hanc fuisse tunc temporis communissimam opinionem. Communissima ergo erat etiam opinio aquam verti immediatè in sanguinem, imò hoc à nemine vocabatur in dubium: nam si qui erant, qui censerent aquam in vinum verti; hi tamen numquam obiecerunt contraria sentientibus, quòd ex eorum opinione sequeretur, aquam simul cum sanguine Christi in calice remanere. quod utique obiecissent, nisi credidissent aquam posse immediatè in sanguinem verti, cùm semper illud pro absurdo sit habitum. non obiecisse autem patet, quia
Y
tunc*

cum vino incorporari, & efficere cum eo vinum. quæ indicant potiùs conuerſionem moralem, quàm phyſicam & ſubſtantialem.

Doctores quoque Conimbricenſes inter Aduerſarios noſtros à Neotericis recensentur, qui tamen apertis verbis eorum ſententiam auerſantur: inquit enim primo de Gen.ca.10. quæſt. 2. art. 3. *Quòd verò admittendum non ſit, conuerſo vino in ſanguinem manere nihilominus aquam in calice, cõuincit tum communis Scholaſtica Theologia Profeſſorum auctõritas, tum quia, vt argumentantur S.Thomas & Sotus, ſequeretur non eſſe adorandum quidquid latet ſub ſpeciebus in calice contentis. Quare qui expreſſè Aduerſariorum ſententiam docuerint, admodum pauci ſunt, & hi ex recentioribus, & ex iſtis qui aliorum dicta referentes, alterius potiùs iudicio acquieſcunt quàm ſuo.*

CAP. XIV. ad SECT. XII.

*Aduerſariorum rationes nullius roboris
oſtenduntur.*

EX dictis ſect. 12. noſtræ diſp.omnia Aduerſariorum argumenta contra noſtram ſententiam, vel attrita ſunt, vel atteri facilè poſſunt: clarioris tamen doctrinæ gratia, quæ recentiores verbis diuerſa, licet ſenſu eadem ac illa

illa quæ ibidem soluta sunt, hîc proponunt, denuo diluentur.

Cap. 3.
pag. 9. Potissima ergo, vt ipsi inquirunt, & fundamentalis ratio eorum sententiæ, hæc est: *Illud tantum immediatè conuertitur in sanguinem Christi, quod est propria & idonea materia ab ipso Christo ad confectionem huius Sacramenti sanguinis statuta, & ab ipso in vltima cæna tradita & consecrata: sed aqua nullo modo est materia in tali confectione, ergo non potest aqua immediatè in sanguinem Christi conuertere. Sed nullo negotio soluitur hæc ratio, quam recentiores demonstratiuam appellant: dicimus enim aquam à vino seiunctam vtique non esse sanguinis materiam, sed vino mistam, & eidem incorporatam, materiam esse: nam & Christus, vt inquit Concilium Florent. in vino aqua misto Sacramentum sanguinis sui constituit.*

Secundò argumentantur, *Si aqua mista vino vsic, esset tota vera materia confectionis sanguinis Christi, & transubstantiaretur vt sic immediatè in sanguinem, sequeretur triplicem fore materiam Sacramenti Eucharistiæ, panem scilicet, vinum & aquam.* Resp. vt sæpius dictum est, aquam non esse materiam distinctam à vino, quia non conuertitur in sanguinem, nisi vt mista vino, & vnum quid cum eo faciens.

Petron.
pag. 36. Tertiò, *illa est materia, quæ est de necessitate Sacramenti: sed aqua non est de necessitate Sacramenti,*

menti, igitur. Resp. falsam esse maiorem. Nam, & in Sacramento Pœnitentię peccata venialia esse possunt eius materia, neque tamen sunt de necessitate Sacramenti. Præterea si vera esset illa maior, vana esset distinctio, quam & ipsi recentiores approbant, de duplici necessitate; Sacramenti & præcepti: quia quod non est de necessitate Sacramenti, nullo modo spectaret ad materiam, & tota necessitas præcepti versaretur tantum circa circumstantias, non verò circa materiam.

*Quartò, Illa est materia, quam potuerunt Apo- Pag. 37
stoli potestate à Christo Domino accepta transubstantiare in sanguinem eius. Sed Christus Dominus non dedit potestatem transubstantiandi aquam in suum sanguinem: ergo, &c. Probant minorem; Christus Dominus solum dedit potestatem consecrandi id quod præcepit apponi. Cùm ergo verum sit Christum Dominum non præcepisse aquam tamquam materiam apponi, non dedit etiam potestatem eam conuertendi. Resp. non solum non esse certum, non fuisse hoc à Christo Domino præceptum, sed contrarium etiam esse probabilius, ut ex nostra sect. 12. constat. sed dato etiam non præcepisse, negatur consequentia; quia potest aliquid esse materia congrua, & non necessaria, & talis est aqua vino mista.*

*Quintò, Demus casum, quod parum ac modicum pag. 41.
panis hordeacei sit admixtum pani triticeo, adeò ut*

Z

talis

talis panis hordeaceus maneat in sua specie: talis panis numquam transubstantiatur in corpus Christi: ergo idem dicendum de aqua. Resp. claudicare similitudinem, Primò, quia panis hordeaceus non admiscetur ex institutione Christi. Secundò, quia panis hordeaceus supponitur clarè cognosci ut distinctus à triticeo. quod de aqua mista vino dici nequit. sed de hoc argumento vide plura in nostra sect. 7.

Petron. cap 8. pag. 43. Sextò, Aqua quæ moraliter est vinum, est physice aqua: sed hanc esse calicis materiam est contra Concilia, præcipuè Tridentinum, ergo, &c. Resp. sæpè iam dictum & probatum à nobis fuisse, ut vertatur aqua in sanguinem, satis esse quòd sit moraliter vinum, quidquid sit de eius physica substantia; Concilium autem Tridentinum, sicuti & Florentinum, nobis favere supra ostendimus: quare non est hîc opus alia responsione.

Pag. 44. Septimò, Panis hordeaceus, qui moraliter triticeus esset, non posset verti in Christi corpus, ergo nec aqua quæ sit moraliter vinum. Resp. & antecedens, & consequentiam esse falsam, ut ex iis, quæ supra cit. sect. 7. diximus, constat.

Pag. 45. Octauò, Si sumatur phiala aqua plena, eisque exiguum quid generosi vini superinfundatur, iam ille liquor consecrari posset, secundum oppositam opinionem. Resp. patere ad hoc responsionem ex Innocent. Sum. Pont. qui, ut supra retulimus, inquit,

inquit, dummodo aqua saporem vini retineat, etiam si in quantitate præualeat, non esse irritum Sacramentum: si tamen in multò maiori quantitate esset aqua quàm vinum, non est credibile ipsam vini saporem retenturam, nec appellandam vinum moraliter.

Nonò, *Otiosum esset præceptum de modicissima* Pag. 46.
aqua, si non esset hac conuertenda substantialiter in
vinum. Sed quàm otiosum, siue potiùs vitiosum sit hoc argumentum, patet ex ijs quæ diximus cap. 4. & lect. 4.

Decimò, nonnulla etiam absurda conantur Cap. 11.
 ex nostra sentent. deducere. sed quoniam nullo pacto ab his, quæ nos in nostra disp. iam retulimus & diluimus, differunt, ne lectorem tædio sine causa afficiamus, omitto.

Vndecimò, alij quidem Neoterici ex Ecclesiæ ritibus ita contra nos argumentantur:

Si quis omiserit per obliuionem infusionem aquæ in Basil.
calicem, etiam si ante sumptionem calicis huius omis- Ponce
sionis recordetur, non iubetur ante sumptionem re- §. 25.
petere, & apponere alias species, & illas consecrare, pag. 23.
ut suppleatur defectus aquæ, sicut præcipitur fieri in
aliis defectibus occurrentibus: ergo signum est num-
quam Ecclesiam iudicasse aquæ infusionem cum vi-
no ad materiam spectare. cum enim in alicuius Sa-
cramenti confectione defuit aliqua materia, etiam
integralis, suppleri iussit quod omissum fuerat: sic e-
nim in cap. 1. de Sacramentis non iterandis, cum in

unctione, quæ est materia proxima Confirmationis defuisset balsamum, & solum facta esset cum oleo, iussit Pontifex suppleri cautè, quod incautè fuerat prætermissum. Resp. frustra huius Ecclesiastici ritus rationem venari Aduersarios, cum ex ipsa Ritualis rubrica clarè habeatur: est autem, non quia ad materiam non spectet aqua; imò in capite de materiæ defectibus ponitur hæc aquæ omissio. sed quoniam, inquit, non est de necessitate Sacramenti; sicuti infra agens de formæ defectibus inquit, Si aliqua verba ex his quæ in consecratione communiter dicuntur, omisit, si non sint de necessitate Sacramenti, non resumat. Quare tantum abest, ut hinc aliquid contra nostram sententiam colligatur, ut inde potius non parum roboris acquirat. Notandum est enim duo rerum genera esse, quæ si omissa fuerint in Sacramentorum confectioe, repeti iubentur: alterum est cærimoniarum quæ neque ad materiam, neque ad formam spectant; sic in Baptismo; si absque solemnitate, & Ecclesiasticis cærimonijs sit collatus, iubentur suppleri cærimoniarum omissæ. Alterum genus est earum rerum, quæ sunt de necessitate Sacramenti: hæc enim si omittantur, præcipitur denuo Sacramentum confici, quia prius irritum fuit. Aquæ autem appositio medio modo se habet inter hæc duo extrema, quia non est simplex cærimonia, nec est de necessitate Sacramenti: & ideo

non

non præcipitur suppleri, si omissa fuit, post consecrationem, sed tantum ante, quia adhuc fungi potest munere materiæ: si autem cærimoniæ tantum causa adhiberetur, nullumque esset inconueniens simul cum sanguine in propria substantia permanere, vt Aduersarij arbitrantur, nulla esset ratio cur etiam post consecrationem non apponeretur.

Exemplum autem de balsamo non est ad rem: quia vel est de Sacramenti necessitate, vt multi existimant, & sic nil mirum repeti, & Sacramentum iterari, quia prius collatum irritum fuit: vel est tantum cærimonia, & ita suppletur, sicuti etiam suppleantur cærimoniæ quæ in Baptismo adhiberi solent.

Duodecimò obiiciunt: *Eadem ratio est de aqua qua in dolio sit vino mista, & de ea qua calici apponitur: sed illa non vertitur in sanguinem; est enim necessaria conditio à vobis requisita, vt calici iniiciatur, ergo nulla conuertitur.* Resp. ex nostræ sententiæ sectatoribus, quod ego sciam, neminem vmquam affirmasse aquam in dolio vino admistam in sanguinem non verti: si enim & ipsa sit vinum moraliter, nulla est ratio cur conuertere non debeat, & multæ ex nostris rationibus id etiam conuincunt; quamuis de aqua calici infusa sit maior ratio, eò quòd non est ibi præter intentionem Ecclesiæ & sacerdotis, sicut ea quæ admiscetur in dolio. sed non est

*Basil.
cap 133
pag. 32.*

nouum Aduersarios id nobis tribuere, quod numquam somniauimus.

CAP. XV. ad eandem S E C T.

Nostra ne, an Aduersariorum sententia sit in praxi adhaerendum.

PRacticè omnino obseruandam eorum doctrinam, tamquam Ecclesiæ Catholicæ regulam infallibilem, ex Aduersariis nostris nonnulli præcipiunt, fasque non esse sine magno conscientiæ, & si eis liceat, etiam capitis periculo ab ea discedere docent. Qua in re, sicut etiam in cæteris, magnopere falluntur, cum Ecclesiæ Romanæ praxis nostræ sententiæ, non autem ipsorum placitis sit maximè consentanea. Quod vt clariùs constet, Notandum est, duplex tempus quoad praxim tum in nostra, tum illorum sententia deduci posse; alterum est ante consecrationem, alterum verò post.

Quo ad tempus ante consecrationem, differunt nostra & Aduersariorum sententia, non in quantitate aquæ apponenda: quia hanc modicissimam esse debere, & illi & nos arbitramur, quamuis ob diuersas rationes, illi non ob aliam, quàm, vt in vinum conuertatur, nos vt veriùs ac perfectiùs absorbeatur à vino moraliter, & ob significationes mysticas. in quo ergo differimus? in eo quòd ipsi volunt aquam ita apponendam, vt physicè in vinum conuertatur,

nos

nos de hac conuerſione ſoliciti non ſumus. Si ergo conſtabit Eccleſiam Romanam aquam apponere, quam certò ſciat non eſſe in vinum ante conſecrationem phyſicè conuertendam, neque de hac præconuerſione eſſe vllò pacto ſolicitam, noſtram ſententiam ſequi nulli dubium eſſe poterit. Eſt autem illud clariffimum: nam, vt ſæpiùs iam notauiſus, iubet Eccleſia apponi interdum aquam, & ſtatim conſecrationis verba proferri. quo in caſu aquam in vinum non conuerſi, & ipſi Aduerſarij fatentur. cui ergo non pateat, Eccleſiæ praxim noſtræ ſententiæ eſſe conſentaneam, qui aquam non neceſſariò in vinum præconuerſi aſſerimus; non verò Aduerſariorum, qui pro huius præconuerſionis neceſſitate tamquam pro aris & focis depugnant? Præterea ſi Eccleſiæ cordi eſſet hæc aquæ præconuerſio, præciperet quoque reliqua quæ ad eam iuxta Aduerſariorum ſententiam ſunt neceſſaria, nimirum, vt vinum eſſet generoſum, vt in magna quantitate apponeretur, vt ab ambiente frigidiffimo cuſtodiretur, vt poſt aquæ appoſitionem tamdiu conſecratio differretur quoad in vinum aqua eſſet conuerſa. & id genus alia; quorum nihil præcipit Eccleſia: ergo non iuxta oppoſitam nobis ſententiam operatur, ſed ac ſi in mundo non eſſet, eam non attendit, nec de ea vllam rationem habet.

Cap. 17
pag. 123

Hinc patet, quàm falsò dixerint iidem recentiores nullam aliam rationem afferri posse, cur magis ponatur in calice vinum aqua mistum tempore offertorii potius quàm introitus, vel ante consecrationem, nisi, vt commodè conuersio aquæ in vinum fieri posset, cum de hac conuersione ne cogitet quidem Ecclesia. Præterea, numquid, quia & panis in patena ante Missam apponitur, est aliquid in ipsum conuertendum? Numquid si ante introitum calici infunderentur vinum & aqua, sicuti in patena collocatur hostia, non commodiùs aqua verteretur in vinum? Somniarunt igitur ipsi hanc rationem, veramque non viderunt, quam nos attulimus sect. 11. vt scilicet per quãdam extrinsecam sanctificationem & benedictionem ytraque materiæ pars prepararetur, & hoc modo ad tam magnum quo fungi debet, munus disponderetur: sicuti etiam, & calix cum patena consecrantur, & vestes sacerdotales quæ in eodem sacrificio deservire debent, benedicuntur.

Sed ad tempus post consecrationem transferamus, in quo non minùs iuxta nostram sententiam se gerit Ecclesia, pro nihilo ducens Aduersariorum figmenta. Quid enim comminiscuntur Aduersarij? aquam, si tempore consecrationis non sit versa in vinum, remanere in sua substantia simul cum sanguine. Quid nos?
cum

cum Patribus, & omni antiquitate sentimus, totum quod est in calice, post consecrationem esse Christi sanguinem. Quomodo autem se gerit Ecclesia? teste S. Thoma, totum quod est in calice tamquam Christi sanguinem adoratione patriæ veneratur, censetque post illius sumptionem sacerdotem esse ieiunum, & posse denuo, si aliunde non impediatur, consecrare; ac, si è calice gutta effluat, eam diligentiam, quæ sanguinem Christi decet, circa eam adhiberi præcipit. Quæ omnia in sent. Aduersariorum magnam habent difficultatem, & qui iuxta eius principia vellet se gerere, in multis oporteret eum ritibus Ecclesiæ aduersari. Nostra igitur sententia sola est ab Ecclesia approbata, & in praxi vsurpata; altera autem Aduersariorum reiecta, nihilique habita. ac proinde Catechismus & Sacerdotale Romanum, quæ videntur approbare, vel requirere conuersionem aquæ in vinum in sacrificio Missæ, de morali conuersione intelligi debent; alioqui etiam contra Aduersarios militarent, qui aliquando non esse substantialiter aquam in vinum conuersam fateri coguntur. Quamquam Neote-rici, vt suam positionem quoquo modo tueantur, dicere non verentur nullum esse inconueniens, nihilque referre quòd aquæ substantia simul cum sanguine remaneat: sed Pro-
tecum, qui, vt è manibus se tenentium elabere-

tur, in varias se vertebat formas, imitari mihi videntur. vt enim argumentorum nostrorum vim effugiant, multiplices diuersasque assument facies: modò enim clamitant pernecessarium esse, Conciliaque & Ecclesiam in eam maximè curam incubuisse, vt aqua in vinum ante consecrationem vertatur; modò, quòd eadem in vinum transmutetur, nihil referre asseuerant; modò inauditum fuisse in Ecclesia aquam in sanguinem non verti, omnesq; Patres simul cum Ecclesia Romana docere ipsam in sanguinem transubstantiari fatentur; modò Ecclesiam id præcipere, ex quo aquam in sanguinem non verti sit necesse, neque de hoc ipsam esse sollicitam affirmant; modò intelligi aliquid moraliter pro magno absurdo habent; modò ad eundem sensum moralem ipsi confugiunt: nunc S. Thomam pro se allegant; nunc eiusdem dicta & rationes impugnant: modò accidentia aquæ simul cum accidentibus vini post consecrationem remanere pati nequeunt; modò non solum aquæ accidentia, sed & ipsius substantiam simul cum vini accidentibus permanere iubent: modò aquam simul cum sanguine adorari contra religionem esse volunt; modò ipsam cum sanguine sumi, contra ieiunium esse volunt: modò eandem aquam simul cum sanguine Sacramenti rationem inducere, & per viam Sacramenti sumi asse-

afferunt; modò simul cum Sacramenti materia rationem materiæ inducere, & per modum vini simul cum eo in sanguinem transmutari pernegant: denique nunc sententiam, quæ aquam simul cum sanguine remanere attulerit, vt temerariam damnant; nunc in eandem ipsi relabentes nihil absurdi continere dicunt.

CAP. XVI. ad SECT. XI.

*Non posse à vino in suam ipsius substantiam
aquam verti auctoritate comprobatur.*

HAnc eandem conclusionem theologicis rationibus sect. 10. nostræ disputationis communiuimus, & philosophicis argumentis ab auctoritate, ab experientia, & à ratione deductis lib. 1. de Gen. disp. 5. corroborauimus. Nunc summam hæc posteriora erunt hic perstringenda & Aduersariorum responsiones profligandæ.

In primis autem Aristotelis auctoritate ex multis eius locis collecta vti sumus. Primus locus est cap. 23. suæ poëticæ, vbi inquit mistum ex aqua & vino improprie à Poëtis vocari vinum, sed excusandos in hoc Poëtas, quia communem loquendi consuetudinem sequuntur. Censet igitur Aristoteles, & aquam vino mistam non esse in vinum conuersam (quia tunc pro-

propriè totum mistum diceretur vinum) & adhuc moraliter appellari vinum. quod vtrumque mirum in modum nostræ sententiæ congruit.

Respondent Aduersarij Aristotelem loqui manifestè de vino temperato, quod magnam quantitatem aquæ in se continet. Verùm hoc ex nullis Aristot. verbis colligunt: nisi ergo cor eius intròspexerint, non potuit illis hoc esse manifestum. Præterea falsam esse huiusmodi interpretationem probatur: quoniam illud mistum solet vinum simpliciter appellari, in quo aqua non præualet, sed remanet vini qualitatibus affecta, & eius saporem & colorem induit. si ergo vinum posset aquam in se conuertere, hanc vtique conuerteret: atqui supponit Aristot. adhuc remanere aquam, ergo censet non esse vinum hac virtute præditum. Ad hæc varij sunt hominum mores, nec omnes eandem aquæ quantitatem vino infundunt, sed alij maiorem, alij minorem; & tamen indefinite loquitur Aristoteles, & vinum temperatum inquit non esse simpliciter vinum; ergo verè sentit aquam in vinum nūquam verti. Denique eodē pacto loquuntur Patres, præsertim Græci, dum dicunt mistum ex aqua & vino esse materiam sanguinis Christi, & nonnulli etiam eodem verbo quo vsus est Aristoteles vtuntur, vt sect. I r. notauimus. Ergo idem de Aristot. misto,

misto, & SS. PP. est dicendum; cumque in eo de quo loquitur Aristot. non sit aqua in vinum versa, neque de eo de quo Patres loquuntur, id erit affirmandum.

Secundus locus efficacissimè sententiā nostram probans, est in 2. de Gen. tex. 50. & cap 5. de Sensu & sensili, vbi negat aquam nutrire, quia omnia ijs nutriuntur, ex quibus constant. Loquitur autem de nutritione latissimè sumpta, quia inquit ex corporibus simplicibus solum ignem nutrirī qualis esset conuersio aquæ in vinum, si daretur. & eius ratio æquè de vino, ac de viuentibus probat, quia & vinum ex quatuor elementis constat. Huic argumento ita respondent Aduersarij: *Verum quidem est Petron. puram aquam non nutrire, Aristotelémque sumere* cap. 18.
nutritionem latissimè, cū loquitur de nutritione Pa. 179
plantarum: nutritio verò latissimè accepta est nutritio cuiuscumque rei viuentis; nutritio autem stricte accepta, est solum nutritio rei viuentis sensibilis: at res non viuentes, cū conuertunt alias res in se, non dicuntur, neque latissimè nutrire: sicut v. g. aër conuertit aquam in se, & è conuerso, & tamen aër siue aqua nullo modo, neque latissimè dicitur nutrirī. Aristot. autem non potest ita intelligi, quòd aqua nullam rem non viuentem nutriat, si nutritio sumatur improprie pro conuersione vnius rei non viuentis in aliam rem non viuentem; quia pura aqua, vt experientia constat, conuertitur in aërem. Sed hæc
nullo

nullo negotio refellentur. Quod enim primo loco inquit nutritionem latissimè sumptam plantis & viuentibus competere, strictè verò rei viuenti sensibili, si Aristot. verba & nutritio- nis naturam considerassent, numquam certè protulissent. Nam Aristoteles ibidem expres- sis verbis inquit ignem nutriri, non ergo in nu- tritione latissimè sumpta viuentia tantùm cō- prehendit. Præterea nutritio primò & per se viuentibus conuenit, & eatenus tantùm sen- tientibus, quatenus sunt viuentia: magis igitur propriè conuenit nutritio viuentibus, quàm sentientibus. neque est distinguendum inter nutritionem viuentium & sentientium, cùm in vtrisque sit eiusdem animæ vegetantis pro- prietas. Sicut ergo ineptè quis diceret, sensus latissimè conuenire animantibus, & strictè ho- minibus, cùm hominibus, vt animalia sunt, con- ueniant: ita prorsus inconsideratè dictum est, nutritionem magis strictè sentientibus tribui, quàm viuentibus. Cùm ergo fateantur Aristo- telem de nutritione latissimè sumpta locutum, non possunt ab ea aquæ conuersionem in vi- num excludere. Præterea ratio Aristotelis id ipsum probat: inquit enim omnia nutriri ex quibus constant: si ergo non potest elementum simplex in viuens verti, quia viuens ex qua- tuor elementis constat; eadem ratione, neque in vinum, quod æquè ex iisdem quatuor ele-
men-

mentis conflatum est, verti poterit. Confirmatur Primò, quia si vinum ex aqua tantum fieret, iam ex quatuor elementis non constaret, non esset ergo mistum. quod à veritate, ratione & experientia est alienissimum. Confirmatur Secundò, quia nutritio est quædam partialis generatio: si ergo per nutritionem non potest ex puro elemento aliquod mistum gigni, neque per generationem poterit produci. Denique vitis non potest aquam in suam substantiam, vel succum conuertere: ergo multò minus vinum, quod ab aqua remotius, & minori vi præditum est. Occurrunt hinc Aduersarij aquam in vinum verti, quatenus sunt liquida miscibilia, in quibus quod minimum est, vertitur in aliud maius: vitis autem non est liquida, nec habet vim conuertendi aquam puram. Sed hæc ratio facile excluditur. Nam quoties liquor peruadit corpus solidum, longè facilius ab eo vertitur, quàm ab alio liquido. Et ratio est, tum quia solidum maiori pollet vi ad agendum, & cum liquido maiorem habet contrarietatem: tum quia liquor ipse, & in minimas particulas diuiditur, & minus in illud potest agere. Aqua igitur, quæ vitis lignum permeat, facilius in eius succum permutabitur, quàm in vinum. Quòd etiam hanc virtutem omnibus liquoribus qui inuicem permiscentur, largiuntur, nimia liberalitas est: sequeretur enim, vt alia o-

mittam,

mittam, liquidum plumbum aut stannum auro liquido infusum in ipsum verti. quod nec artis chymicæ professores promittere audent. Nec occurrant, hæc metalla non ita inuicem permisceri, vt vinum & aqua, quoniam experientia oppositum ostendit, cum ex huiusmodi permissionibus nummi conflentur, in quibus nulla diuersitas metallorum apparet.

Exemplum quod Aduersarij afferunt de aëre in aquam conuerso, & è contra, non est ad rem; quia huiusmodi conuersio, nec latissime est nutritio, & elementum simplex ex simplici fit, non autem mistum ex simplici. Si quæras autem cur hæc conuersio aquæ in aërem non dicatur nutritio; Resp. quia non est aër qui propria virtute aquam in se vertat, sed sol, vel calor ignis, qui vapores ab aqua eleuat. & in aërem transmutat; neque aër inde sensibilibiter apparet fieri maior, aut huiusmodi transmutatione ad sui conseruationem indigere. & idem dici potest de aqua: alioqui enim non se mutuo interimere aërem & aquam, ex eo patet. quia in phiala aquæ & aëris plena nulla huiusmodi transmutatio intercedit.

Tertius locus est in 1. de Gen. tex. 34. vbi quærens quid sit illud quod augetur, an scilicet cui additur aliquid, an verò illud quod additur, inter alia, inquit: *Quare igitur non ambo aucta sunt? maius enim, & quod, & cui, quemadmodum*
quar-

quando miscemus aqua vinum, similiter enim plus vtrumque. An quoniam huius quidem manet substantia, huius autem non? ut ea qua nutriuntur, quando, & ibi, quod euincit & superat in ipsa mixtione augeri dicitur scilicet vinum: nam vniuersa mixtura vini non aqua functionem exercet.

Ex quibus multipliciter colligitur aqua non conuerteri in vinum. Primò, quoniã alioqui non esset aptum exemplum: si enim aqua in vinum verè mutaretur, omnino eadem esset ratio de aqua & de nutrimento, quare declararetur, vel probaretur, idem per idem; si autem non conuertitur, rectè ex vno declaratur alterum. Secundò, non inquit Aristoteles vinum augere, sed ait augeri dicitur: sciebat enim verè non augeri, licet secundum communem loquendi modum augeri dicatur. Tertiò, quoniam inquit vniuersam mixturam vini functionem exercere; non appellaretur autem mixtura, nec diceretur vini functionem exercere, si totum esset vinum: non enim dicitur quis exercere functionem sui ipsius, sed suam. At opponunt Adversarij, ait Aristoteles vinum superare & vincere aquam, ergo in se eam conuertit. Imò subijcio ego, Ergo non corrumpit, quia diceretur iugulare vel corrumpere, non vincere: dicitur ergo vinum vincere, quia eius accidentia magis sentiuntur, quàm aquæ, cum & hæc adsint.

addunt appellari misturam, non quia ex duobus liquoribus constet, sed quia ex duobus genitum est. Sed facile hoc refellitur, quia sic verum esset omne vinū dici posse misturam, cum ex elementis omnibus sit productum. Præterea non sine ratione dixit Aristoteles *vinivram*, ut & aquam includeret. Tertiò, negat hic Aristoteles, ut etiam supra notauimus, quod in aliud vertitur illi commisceri: non ergo in eodem capite sibi met contrarium esse credendum est: maluit quoque dicere misturam potius, quam mistum, ut clarius aquam remanere cum vino mistam indicaret.

Quartus locus est 4. Meteororum sum. 2. cap. 3. vbi ait aquam coctioni & nutritioni ineptam esse, quia crassescere nequit, ergo neque in vinum conueri potest: tum quia maiori vi præditum est viuens, quam vinum: quare si illud non potest aquam in se conuertere, multò minus istud; tum etiam quia, cum vinum sit aqua crassius, oporteret eam crassescere contra Aristotelē. Respondent Aduersarij non oportere aquam crassescere, ut in vinum transeat, cum hoc non fiat media nutritione: vinum enim neque strictè, neque latissimè nutritur. Verum si vinum (quod negare non audent) est aqua crassius, & hæc in illud vertitur, quomodo non crassescit? Numquid potest aliquid fieri crassius absque eo quod crasselcat? posset ergo,

ergo, & absque accretione fieri maius, absque alteratione alterum, absque motu mutare locum. falsum est etiam aquæ conuersionem in vinum, si daretur, appellari non posse nutritionem; & quamuis hoc nomen non mereretur, posset tamen iure optimo ex vna fieri ad alteram argumentum, cum in multis conueniant, ex quibus illa conclusio deducitur.

Hæc igitur de Aristotelis auctoritate. Quo ad alios Philosophos, fuisse apud eos hanc nostram sententiam sua tempestate communem testatur Innocent. III. c. *Cum Martha.* de celebrat. Missarum, idemque eius expositores asserunt, vt sect. 4. docuimus. Tempore quoque Gaudredi Galli, id est anno Domini 1088. communissimam fuisse, ex eius epistola ad Cardin. Albanensem, quam sect. 5. retulimus, facile colligi potest; & id ipsum fatetur P. Petronius, vt supra vidimus. Flaminius quoque Nobilius nobilis auctor omnibus ferè Latinis eandem tribuit. Eidem Alexander Aphrodisæus, & Philoponus subscribunt, sicuti & omnes illi qui de agricultura loquuntur, cum doceant aquam à vino cui mixta fuerat, posse separari. Recentiores quoque ferè omnes eandem comprobant. Iacobus Zabarella in Gymnasio Patauino celeberrimus Philosophus in tex. 39. lib. x. de Gen, hoc de ea testimonium profert: *In missione aqua cum vino penetrant. quidem partes aquæ*

ad minimas vini particulas, sed non conuertitur in vinum, licet ita vulgaribus hominibus videatur: seruatur enim aqua cum vino coinmixta, quia vinum non habet vim mutandi aquam in vinum. Idem sentiunt Iulius Cæsar Scaliger exerc. 101. contra Cardanum. Francisc. Picolom. in tex. 74. lib. 1. de Gen. Bonainicus 70. de Motu cap. 24. & 3. de Alim. ca. 3. Fortun. lib. 2. de his qui diu viuunt sine alimento cap. 41. Hieron. Dandinus ex Societ. Iesu digress. 25. in libr. 2. de An. Franciscus Aguillonius libr. 5. Opticor. proposit. 18. & alij. Sed è Gymnasio Ticinensi non possum præclarum doctissimi viri Nicolai Sacchi præterire testimonium, ex eius epistola ad me data, quam non sine rubore non ad laudem, sed ad defensionem hîc adnectendam duxi.

Reuerendissimo Paulo Aresio Derthonensi Episcopo sapientissimo Nicolau Saccus faustum, felix æternumque precatur imperium. Dum Aristotelem de rerum natura sua dialecto loquentem interpretor, nihil mihi iucundius accidere posse arbitror (Reuerendissime ac Spectatissime Prasul) quàm viros aliquos eximios tui similes meæ sententia plausores inuenire. Multis tunc me nominibus beo; multis idētidem mihi ipsi plaudo, cū aliquos video eruditissimos Philosophos ei doctrinæ, quam profiteor, fidem adstruere, eaque firmamenta addere, quibus nulla sæculorum periodo sit eluenda. Ego omnibus his die-
bus

bus dicto muneri destinatis, in eo totus fui, vt publice pro secunda schola interpretarer quid Aristoteles in secessu haberet cum de ortu agit & interitu rerum naturalium. Perueneram ad tex. 88. lib. 1. arripui statim occasionem examinandi quaestionem illam non facile dissolubilem, de mutua aqua & vini conuersione. Vidi omnia quae in scholis doctorum virorum delitescunt: vt te quoque virum extra iudiciorum aleam positum sententia, quam eximij mei praecipites Rouidius & Ferrarius totis viribus sequebantur, vidi subscriptorem; & gestire statim, & alacriter eam denuo profiteri incepti, vt ex eo suggestu nil liberius, nil libentius predicarem, prater grauiissimam tuam auctoritatem. solidissima quaecumque tua argumeta innumeris penè auditoribus quam diligentissime explicauit: quibus ostendi nihil validius posse excogitari ad exturbandam è iudiciis multorum barbariem, qui cum plausoribus diobolariis continuè versati, veriora & sapientiora sibi persuaderi posse desperabant. Collegam equidem habebam propemodum auersantem, qui pro contraria garrere semper (rectius dixerim nugari) audiebatur, libello tamen tuo planè aureo ab omnibus tergiuersationū strophis facile fuit auertere: is enim accuratè docuit id quod res est, is omnia exactissime profligauit, & eum qui Stentor erat, reddidit Harpocratem. Vniuersa hac academia, illique omnes qui à vero sensu iudicant, coeperunt statim mecum iureiurando affirmare, nil pulchrius, nil doctius, in toto physico studio

audiuisse, quàm quæ Reuerendissimus docuit Aresius. Ego præcipuè multa ex te didici quæ cupiebam, multa vidi quæ querebam, pro ea confirmanda opinione, in quam etiam præceptorum meorum propendebat animus: omnes nunc omnium gratias in te mirè collocatas admiror. faxit qui corda scrutatur & renes, vt aliquid ab animi tui candore consequi valeam, quo dignus iudicer cur me aures: hoc enim nihil gloriosius, aut honorificentius mihi accidere posse putabo. Tu interim vale flos litteratorum, viue æternum. Ticini die sacro D. Laurentio dicato 1622.

Sed & Patres huic veritati adstipulantur, vt D. Nemefius lib. de Anima c. 3. teste Collegio Conimb. in lib. 1. de Gener. & Iacobus à Vitriaco Cardin. qui tempore Innocent. III. floruit, in historia rerum Occidentalium. S. Bernardus tract. de Diligendo Deo eandem supponit, dum inquit, *Quomodo stilla aquæ modica multo infusa vino deficere à se tota videtur, dum & saporem vini induit, & colorem, & quomodo ferrum ignitum candens igni simillimum fit, &c.* Vbi notandum loqui ipsum de aqua modicissima (nam stillam appellat) multo vino infusa, & hanc asserere, non quidem deficere, sed videri deficere, & accidentiâ vini induere, non verò in vinum transmutari; sicuti neque transmutatur ferrum in ignem, quod est ipsius alterum exemplum. Prudenter etiam non dixit, aquam induere qualitates primas vini, sed secundas, quæ

quæ corruptivæ non sunt, & in quibus sciebat antea quoque aquam esse vino similem.

S. Augustinus ab eadem non se alienum ostendit, dum serm. 41. de verbis Domini, de primo nostri Redemptoris signo loquens, hæc habet verba: *Quid in ipsis nuptiis fecit? de aqua vinum; quid potentius? qui fecit de aqua vinum, potuit facere & de lapidibus panem.* Non minorem igitur potentiam requiri ad convertendam aquam in vinum, quam lapidem in panem, sensit S. Augustinus: ac proinde sicut viribus naturæ hoc est impossibile, ita & illud.

Denique S. Ambrosius, S. Ioan. Damasce-nus, & alij Patres, qui dicunt aquam adesse in calice ante consecrationem, vt lect. 5. notauimus, omnes hanc sententiam supponunt, cum è contrâ oppositæ ne minimum quidem vestigium apud ipsos, vel alios Patres reperiri possit.

C A P V T XVII.

*Validissimis rationibus eadem sententia
communitur.*

PLurimæ adsunt pro hac nostra sententia rationes, adeò efficaces, vt optimo iure demonstrationum nomine decorari possint.

Harum prima est. Nulla datur actio corruptiva, nisi inter habentia primas qualitates con-

trarias : sed vinum & aqua in primis qualitatibus sunt similia : ergo non possunt inuicem corrumpi : si autem aqua à vino non corrumpitur, euidens est nec in se conuerti. Maior huius syllogismi est effatum in Philosophia celeberrimum & certissimum. minor est sensu euidens : ex quatuor enim primis qualitatibus humiditas, & frigiditas in vino & aqua reperiuntur ; calor verò & siccitas, vel omnino absunt, vel non sentiuntur : calor enim vini virtualis, cum non sit actuatus, est ac si non esset. Non habent igitur primas qualitates quibus se oppugnent aqua & vinum. Huic argumento conantur obniti recentiores, & aiunt, *Accidentia corruptiua aqua esse in vino formaliter : huiusmodi autem, inquit, accidentia, seu qualitates non sunt frigiditas & humiditas utcumque ; sed sunt hæc eadem accidentia, secundum speciales conditiones & virtutes, quæ sunt propria forma vini, conseruatiua illius, & corruptiua contrariorum, sicuti calor ignis non compatitur secum calorem hominis ; & hinc est, quòd vinum potatum calefacit stomachum, aqua verò frigefacit. Addunt, esse in vino calorem tenuem quidem, sed ab illo non ut sic accepto, verum ut coniuncto cum aliis propriis vini accidentibus, aquam destrui. & dato, quòd calor aqua sit maior, non sequitur, quòd calor remissus vini non sit corruptiuius aqua, quia, ut dictum est, huiusmodi calores sunt diuersi. Hæc illi aliquanto fusiùs, quibus non tam*

tam argumenti nostri vim infringunt, quàm totam Philosophiam, quantum in ipsis est, evertunt. In primis enim hæc non nisi 4. primas qualitates actiuas & corruptiuas agnoscit; hi autem absque numero eas multiplicant: quot enim species rerum sunt, tot esse volunt & primarum qualitatum; nam aliam dicunt esse humiditatem vini, aliam aquæ; consequenter alia erit olei, alia mellis, & cuiuscumque alterius liquoris. & idem de frigiditate, & alijs primis qualitatibus asserunt. At si plures quàm quatuor sunt primæ qualitates, plura etiam quàm quatuor erunt prima corpora, scilicet elementa, ex primarum enim qualitatum numero ea venatus est Aristoteles. si dicant esse tantum quatuor primas qualitates genere, plures autem specie; plures etiam reperientur primæ qualitates, quæ primis corporibus, scilicet elementis, non competent, nec ab eis originem trahent, vel plures etiam erunt primorum corporum species.

Humiditatem præterea agere volunt in humiditatem, & vnā alteram corrumpere. quo quid à ratione, & ab experientia magis alienum dici poterat? Primò enim falsum est plures humiditates, aut frigoris species reperiri, vt cum D. Thom. & alijs Philosophis, 2. de Gen. q. 12. & 13. ostendimus. Deinde illud tritum proloquium, quod simile non agit in simile,

corrueret: frigidum enim ageret in frigidum, imò & in frigidum, & in calidum simul. & alia sexcenta sequerentur absurda. frustra etiam vinum æstiuo tempore aqua vel glacie circumdaremus, vt illius frigus intenderemus: nam cum sint frigora diuersa, vnũ non posset ab alio intendi: imò secundũ Aduersariorum principia vnũ ab altero destrueretur, & vinum in aqua frigida calefieret.

Ad hæc volunt calorem remissum vincere, & frigus & calorem magis intensum, atque ad hanc victoriam ab humiditate, & alijs similibus qualitatibus adiuuari, & vinum calore simul & frigore agere in aquam: hæc igitur simul calefiet & frigesiet, contrariis motibus mouebitur, humiditas quæ caloris vim hebetare solet, eius actionem adiuuabit, & ab infirmo fortius superabitur.

Denique plura sunt in hac responsione absurda, quàm verba, quæ nimis longum esset sigillatim refellere. Nec eos exemplum de calore ignis, quem dicunt simul cum naturali calore degere non posse, iuuat: hoc enim falsum est, si de calore moderato agatur, nam hoc calore ignis non parum calor naturalis adiuuatur & fouetur, sed si calor ignis nimius sit, tunc destruit subiectum caloris naturalis: quo destructo, & ipse interit. Stomachum quoque à vino calefieri, vt ipsi testantur, nostram positionem con-

confirmat: si enim essent diuersi specie calores, vnus non intenderetur ab altero, sed potius, vt ipse inquit, destrueretur. & quamuis diuersos effectus calores diuersi videantur habere, non prouenit hoc ex diuersa ipsorum naturâ, sed ex virtute viuientium cui coniungitur calor naturalis, vt quæst. 12. 2. de Gen. sect. 3. explicauimus.

Secunda principalis ratio est. Per aquæ conuersionem nihil sibi acquirit vinum, non ergo est concedenda. Antecedens probatur, quia licet videatur fieri maius, eadem tamen proportionem fit debilius. omnibus ergo pensatis, nihil acquirit: sicuti nihil acquireret ille vir qui plura quidem terræ iugera adipisceretur, sed amitteret pinguiora, ita vt non plus frumenti ex illis pluribus colligeret, quàm ex paucioribus colligebat: ita autem se habet in vino, quia quo maius fit per aquæ admistionem, eadem proportionem fit debilius. quare homines nil se lucrari aquam vino admiscendo existimant, imò potius iacturam facere, vt meritò Isaias populo Hebræo exprobraret, *Vinum tuum mistum est aqua*. Consequentia probatur Primò, quoniam natura nihil frustra facit: frustra autem & superuacaneè fieret hæc conuersio, si per eam nihil sibi vinum acquireret.

Secundò, non dicitur vincere qui licet ex vna parte lucretur, ex altera tamen tantumdem
amit-

amittit: atqui dicitur à vino aquam vinci, ergo aliquid sibi lucrari debet vinum. Confirmatur Primò, quia non est credibile, si verum est quod sibi persuadent Aduersarij, vinum scilicet esse aqua longè potentius, eamque corrumpere & in se conuertere, nihil inde sibi acquirere, imò non minùs repati, quàm agere, nec minùs eius hebetari vires, ac si cum aduersario æquo Marte pugnasset. Confirmatur Secundò, aceti exemplo. hoc enim, si vinum ei paulatim admisceatur, quoniam facillè illud vini modicum ab eo vincitur, non tantumdem repatitur ac reagit, & si quid repatitur paulò pòst pristinum robur recuperat: atque hac ratione aceti do-
lium, etiam si frequenter ab eo acetum haurias, numquam tamen exhaurias: cumque longè maior fuerit vini quantitas, quæ aceto superinfusa est, quàm ipsius aceti; quia tamen non tota simul, sed ita paulatim addita est, vt semper facillè ab aceto vinceretur, numquam propterea deficit, aut in vinum versum est acetum, sed in suo robore semper permansit. si ergo, & aquæ particula multo vino admista in ipsum vinum verteretur, plurimum aquæ guttatim posset vino absque eiusdem sensibili mutatione infundi. quod à veritate longissimè abesse experientiâ constat.

Denique eodem prorsus modo liquor ex aqua & vino mistus se habebit, siue vinum vincat,

cat, siue aqua superet, siue aqua vertatur in vinum, siue vinum transmutetur in aquam. quod est absurdissimum. Probatur illatio, quoniam quod de vino dicitur aquam vincente omnibus pensatis nihil sibi acquirere, idem de aqua vinum superante affirmandum erit: contrariorum enim eadem est ratio, & quod vino potentiori negatur, aquæ debiliori non erit concedendum: si ergo aqua vinum vincens nil lucratur, nihilque aqua victrix & ipsa acquires; semper ergo eodem modo se habebunt, & siue vinum, siue aqua superet, eorum accidentia æquè à sensibus percipientur. & sicuti vinum aquam vincens ita eius accidentibus affectum remanet, vt aqua mistum fuisse cognoscatur: ita aqua vinum superans, ita eius accidentibus prædita erit, vt qui illam bibit vinum fuisse ei admistum perfacile agnoscat.

Ad hoc argumentū diluendum multa con- Cap. 18
p. 146
gerunt Aduersarij, quæ tamen parum sunt ad rem, nec eius vim aliquo modo infringunt aut infirmant, sed omnia sigillatim refellere tædio non careret. Illud tantum, quod cæterorum omnium dictorum est fundamentum, notandum mihi videtur, nimirum distinguere hos auctores conuersionē à generatione, & nutritione. Dicunt enim non esse eandem rationē de igne & de vino, quia ille non augetur per missionem aut conuersionem, sed per generationem,

nem . & infra. non esse eamdem rationem de nutritione , & aquæ in vinum conuersione. Tertiam igitur quamdam substantialem productionem adinuenerunt hi auctores, quæ nec generatio nec nutritio dici potest, & Philosophos omnes hucusque latuit. sed nos malumus cum Aristotele, D. Thom. Scoto, & ceteris tum antiquis, tum recentioribus Philosophis ignorantiam profiteri, quàm horum nouam scientiam adipisci. Hæc enim eorum tertia transmutatio, nonne ad substantiam terminatur ? utique, quia gignitur per eam substantia vini ; cur ergo appellari non poterit generatio ? an quia fuit illi prius commista ? sed hoc nihil refert, quia illa mixtio reuera nil aliud fuit, quàm partium minimarum iuxta-positio, quæ etiam in lignis & igne contingere potest, & sæpè contingit ; non dicuntur hæc tamen misceri, ut inquit Aristotel. quia ligna vertuntur in ignem : quare si & aqua vertitur in vinum, ei admisceri non est dicenda ? Præterea augmentum duplici tantum ratione contingere potest, videlicet vel per iuxta-positionem, vel per alimenti in omnem partem distributionem : si priori modo crescit vinum, ergo per generationem, sicut ignis ; si posteriori, ergo per nutritionem, sicut viuentia. Instantia enim, quòd hoc virtute viuentis non contingat, nihil obtinet, quia efficiens non est de essentia actionis, nec differunt

ferunt mutationes, quia ab hoc vel ab illo agente emanant; sed quia in diuersos terminos, vel diuersimodè in eundem tendunt: si ergo aqua verè in vinum vertitur, nutritionis ratio non erit ei deneganda.

Dicamus ergo, quod verè dicendum est, huiusmodi conuerſionem aquæ in vinum, si in rerum natura daretur, aliud non fore quàm generationem: terminaretur enim ad substantiam per se completam, & eodem nomine cum generante gaudentem, & non ad partem tantum: in nutritione enim, v. g. hominis, non producit homo, sed caro aut sanguis, & idcirco non appellatur generatio; vinum autem per hanc conuerſionem generat aliud vinum, ergo per generationem; & consequenter cum generans sibi simile generet, vinum ex aqua genitum erit eiusdem rationis cum generante. Quapropter si aqua vino falerno infundatur, in vinum falernum conuertenda erit: cumque vinum falernum, etsi infimæ notæ, vino Surrentino sit præstantius & potentius, efficietur, vt mistum ex aqua & vino falerno potentius sit, & suauius, & præstantius, quàm mistum ex eodem falerno & Surrentino, vel alio genere vini. quod est absurdum.

Item, quoniam id quod gignitur imitatur generans, non in eo statu in quo reperitur dum generationi operam dedit, sed in eo quo dum
&

& ipsum genitum est potiebatur, (senex enim non gignit senem, sed infantem;) efficietur vt vinum de nouo ex aqua genitum, non vini veteris naturam imitari debeat, sed noui & recenter ex uis expressi; musto igitur non tantum mense Septembri vel Octobri, sed quolibet anni mense, imò & die, frui poterimus.

Nec instantia de nutritione erit hîc ad rem, quoniam hæc conuersio, non est nutritio: quia in nutritione, vt diximus, viuens non generat aliud viuens, nec homo hominem, sed alimentum vertit in aliquam sui partem, exempli gratia, in sanguinem, vel carnem, quæ totius compositi nomine non gaudet: consequenter non oportet, vt quod gignitur ex alimento sit simile in natura viuenti, & ei in perfectione æquale; at verò vinum generat verè per Aduersarios aliud vinum, ergo debet generare sibi simile, vt diximus.

Præterea, quod aiunt calorem naturalem in nutritione hebetari, & vires amittere, longè à vero abest: potius enim roboratur, & nisi alimentum adesset breui deficeret. Sed cur, dicēs, in senibus languet? Respondeo ratione instrumentorum hoc illi contingere: sicuti enim assererat Aristoteles, quòd, si senex oculum iuuenis haberet, videret vt iuuenis: ita dicere possumus nos, quòd, si senex præcordia, & reliqua corporea organa vt iuuenis haberet, calore

lore quoque iuuenili potiretur. quod in homine clarè patet, quia cùm eius apina sit immortalis, & calor ab ea dimanet, si aliunde non impediretur, parem calorem semper effunderet: cur verò hæc instrumenta labefactentur, non est ex actione contrarij, sed ob eam rationem, quam 1. de Generatione quæst. 35. sect. 5. tetigimus, & alibi (si Deus annuerit) copiosius erit explicandum, hîc enim non est ampliùs euagandum.

Tertia principalis ratio. Remanent accidentia aquæ vino mistæ, ergo etiam eiusdem substantia. Antecedens quoad primas qualitates euidens est, quia neque calefit, neque exsiccat, dum vino miscetur, remanent ergo eius frigus & humiditas: quoad secundas, scilicet colorem & saporem, non est tam clarum; facilè tamen probatur, quia huiusmodi qualitates non sunt actiuæ, non igitur se destruunt color vini & aquæ, sed commiscentur & temperantur. Experientia quoque suffragatur, tum quia potest aqua denuo cum suis accidentibus separari, tum etiam quoniam iuxta proportionem aquæ admistæ videmus vinum ipsius qualitates participare. Confirmatur, quia si aquæ qualitates corrumparentur, multo minus postquam diu fuit aqua mista vino sentirentur, quàm immediatè post: sicuti aqua igni apposita non statim calida percipitur, neque

continuò frigiditatem amittit, sed transactio non modico tempore: atqui huiusmodi discrimen in aqua vino mista non cernitur; eius enim accidentia ita sentiuntur, postquam diu fuit admista vino, atque in principio: ergo neque corrumpuntur, neque vlla actio corruptiua inter accidentia aquæ & vini intercedit. Firmum igitur, & inconcussum est antecedens; consequentia verò est euidens, quoniam nisi corrumpantur accidentia, numquam substantia perit. Confugiunt hîc Aduersarij ad celebrem illam resolutionem vsque ad materiam primam, quæ in ipsorum tantum scholis viget, & inquirunt non esse illa accidentia aquæ, cuius substantia est corrupta, sed vini. Atqui argumentor ego, Prius est accidentia corrumpi, quàm aquæ substantiam, & huius corruptio non nisi per accidentium corruptionem innotescere nobis potest: nisi ergo aliunde ostendant eius accidentia esse corrupta, non possunt hoc ex aquæ corruptione arguere, sed potius huius conseruationem ex illorum conseruatione colligi æquum erit. Præterea fatentur ipsi permanere non quidem aquæ qualitates, sed alias illis persimiles naturam corruptarum imitantes. Verùm vndenam, quæso, colligitur esse has nouas qualitates, & non priores? dicunt, Quia aquæ substantia est corrupta: atqui hoc est petere principium, & ignotum per ignotius

tius demonstrare, cum aquæ corruptionē non nisi ex accidētibus corruptis inuestigare liceat.

Quarta ratio. Ab extremo ad extremum non fit transitus nisi per medium: sed aqua & vinum sunt veluti duo extrema; nam aqua est elementum simplex & imperfectum, vinum verò est mistum perfectissimum: ergo non immediate vertetur in vinum, sed prius in aliquē liquorē medium. Sed hoc est absurdum, quoniam nemo hunc liquorem medium à vino productum umquā somniauit: ergo aqua non conuertitur in vinum. Respondent Aduersarij non fieri transitum ab extremo ad extremum sine medio, quia fit media præuia alteratione. Verum non loquimur nos de medio accidentali, sed de substantiali: sicuti cum vinum in sanguinem vertitur prius fit chylus, & liquor alterius generis, & tandem post multas transmutationes in sanguinem vertitur: humor etiam quem è terra vitis exsugit, non immediate substantialiter vertitur in vinum, sed post multas transmutationes: ergo idem dicendum erit de aqua vino mista. Confirmatur, quoniam longè facilius est introducere in aquam dispositiones eius formæ substantiali repugnantes, quàm perfectè in materiam ad vini formam recipiendam disponentes. Tum quia plus requiritur ad productionem misti, quàm ad destructionem elementi; tum etiam, quia aqua facilius

in alias res verti potest, quàm in vinum. Ponamus ergo in aquæ materiam introductas esse dispositiones formæ aquæ incompatibiles, sed nondum formæ vini consentaneas; tunc oportebit aquam corrumpi, quia supponimus non posse cum illis accidentibus permanere, neque in eam materiam vini forma introducetur, quia nondum est ad eam perfectè disposita, neque sine vlla forma substantiali permanere poterit: ergo tunc generabitur aliquod mediū substantiale inter aquam & vinum. Dicent fortassis illum casum esse impossibilem: sed immeritò; non enim accidentia, quæ sufficiunt ad expellendam aquæ formam, sufficiunt etiam ad vini formam introducendam, alioquin nunquam aqua in aliud verteretur, quàm in vinum. Poterunt igitur aliqua accidentia illam expellere, & hanc non introducere, ut supra nos dicebamus. Præterea sunt alij liquores, qui minores dispositiones requirunt, quàm vinum; hi igitur faciliùs ex aqua corrupta producentur quàm vinum: sicut ergo ignis faciliùs aquam sibi appositam in aërem vertit quàm in seipsum, quia cum aqua habet aër maiorem similitudinem quàm ignis; ita etiam vinum priùs aquam in aliquem liquorem illi magis similem permutabit, quàm in se.

Quintò In omnibus conuersionibus aliquid non conuersum remanet: nam etsi ignis maxima

ma vi sit præditus, & stipula ad eius formam recipiendam sit maximè disposita, adhuc non tota in ignem vertitur; nam & remanet cinis, & aliquid etiam in fumum resoluitur. & idem dicendum de qualibet alia conuersione. ergo neque tota aqua vertetur in vinum. Sed quodnam erit hoc residuum non conuersum in vinum, & vbinam reperietur? illius certè nullum vestigium apparet, ergo aqua in vinum non vertitur. Et hoc eodem argumento vtitur Aristoteles cap. 5. de sensu & sensu supra citato, ad probandum elementum simplex non nutrire; recentiores tamen nullam ei adhibent responsionem, nec eius meminerunt, sicuti nec sequentium, licet à nobis eodem loco cum cæteris ab ipsis relatis adducta sint.

Sextò. Vel animæ vegetantis virtute aquam in se conuertit vinum, vel alia virtute: si prius, ergo vinum verè nutritur, ac proinde maiores sibi vires per huiusmodi nutritionem acquireret; si posterius, ergo illa virtus erit insufficiens: cum enim vinum secundum naturalem suam generationem sit opus animæ vegetantis, non poterit hac virtute ordinis inferioris produci.

Septimò. Conuersio aquæ in vinum tunc solum contingit, quando à virtute vini aquæ vires non modicè superantur; quando igitur non superantur, cum nihilominus hostiliter inuicem agant, miscebuntur, & fiet ex illis

Bb 3 quod-

quoddam tertium, quod nec vinum erit, nec aqua. at quidnam hoc erit? omnes siquidem, etsi vinum maximè dilutum bibant, nihil tamen aliud bibere se putant, quàm vinum & aquam. Dicent fortè neutrum corrumpi. Sed hoc facilè reijcitur, quoniam si qualitates contrarias possident, vt Aduersarij volunt, non possunt non inuicem agere, & mutuò corrumpi: alioquin mistio de medio tolletur, quæ, vt Aristoteles docet, non alio pacto contingit, quàm ex contrarijs æquis viribus, vel non admodum imparibus, inter se pugnantibus.

Octauò. Vel daretur vinum non mistum, vel mistum absque vlla mistione præcedente: nam hoc vinum quod ex aqua gignitur, reuera non esset mistum, quia ex vnico tantum elemento constaret. vel si contendas esse mistum, tale erit sine mistione præcedente, quia ex aqua simplici genitum fuit.

Nonò. Vinum non est opus solius naturæ, sed etiam artis: ergo non potest nec aliud vinum producere, nec ab alio vino produci. Antecedens patet, quoniam nisi homines vinum ab vuis exprimerent, illo proculdubio carerent. Consequentia est euidens, quoniam, quatenus artificiale non est productiuum, & quatenus naturale non potest effectum nisi quoad naturalia sibi similia producere: sicut ergo granum sine cortice non gignit granum simplex

&

& nudum, sed simul cum cortice, quia nuditas non est illi naturalis; ita vinum, si vim producendi possideret, uvam siue vitem gigneret, & non aliud vinum.

Denique plurimas experientias ad nostram sententiam confirmandam in nostra Philosophica questione asserimus, quas poterit ibidem lector videre: nec enim noua confirmatione, aut defensione indigent,

C A P V T XVIII.

Fundamenta contraria sententia euertuntur.

PRæcipuum Aduersariorum fundamentum est quædam Aristot. auctoritas falsò à pluribus allegata, & malè ab alijs intellecta. Verba Aristot. 1. de Gen. c. 10. sunt: *Eorum verò actiuorum & passiuorum, quæ faciliè diuisibilia sunt, multa quidem paucis, & magna parus composita missionem non faciunt, sed augmentationem dominantis; nam alterum in id quod euincit, verti solet, ut gutta vini decies millenis aqua mensuris non miscetur: etenim forma vini perit, atque vinum in totam aquam vertitur.* Hinc nonnulli Aristotelis verba memoriâ perfectè non retinentes, ipsum allegant, veluti dicentem aquæ guttam vino infusam in ipsum conuerteri. quod ipse nunquam somniauit. Alij autem consecutiue

Cap. 18
pa. 136

ex hoc loco sententiam suam colligunt. Dicunt enim, hinc Primò haberi, aquam & vinum esse mutuò actiua & passiuā, & ita vnum ab altera vinci posse; Secundò colligi, etiam aquæ guttam in vinum conuerti, quia eadem prorsus est ratio, imò maior de gutta aquæ respectu vini in magna quantitate, & generosi, præcipuè cum vinum habeat magis de actiuitate, quàm aqua. Sed hæc faciliè refellentur.

Quoad primum enim, nunquam dixit Aristoteles vinum & aquam esse mutuò actiua & passiuā; sed cum dixisset, quod euenire solet inter mutuò actiua & passiuā, & tunc non fieri mixturem cum vnum miscibilem in alterum vertitur, ad hoc secundum explicandū attulit exemplum vini guttæ, quæ millenis aquæ mensuris non miscetur, sed in ipsam vertitur. hoc ergo sufficit Aristotelicæ doctrinæ declarandæ, quòd vini gutta in aquam vertatur: an autem etiam aqua in vinum, nihil eius refert. Nota præterea lector, Aristotelem tamquam impossibilia hæc duo ponere, nimirum misceri & conuerti: quod enim, inquit, conuertitur non miscetur vt gutta vini, &c. Si ergo hinc colligunt Aduersarij aquam in vinum verti, colligere etiam debent ei non admisceri, quia non admisceri & conuerti habet hic pro eodem Aristoteles; at si aqua vino non admiscetur, cum in ipsum debeat verti, & PP. omnes fatean-

teantur aquam in calice admisceri vino, ergo in ipsum non vertitur. quod enim inquirunt prius misceri, & deinde verti, Aristoteli aperte repugnat, qui negat omnino multa paucis, & magna paruis misceri, cum tamen non subito vnum conuertatur in aliud. ad hoc igitur, vt mistio negetur, sufficit in ea proportione aliqua misceri, ad quam vnus in alterum conuersio consequitur.

Quod etiam secundo loco dicebant, eandem esse rationem de vino plurimæ aquæ misto, & de aqua multo vino apposita, & vinum maiori pollere virtute ad aquam in se conuertendam, falsissimum est: vinum enim cum sit mistum in quo prædominatur aqua, facile in aquam resoluitur; at aqua non est ex vino composita, vt proinde verti possit in vinum. Deinde ex perfecto non mirum gigni imperfectius: at ex imperfecto gigni perfectius est multò difficilius; vinum autem est aqua longè perfectius. In elementis qualitates primæ sunt in summo gradu, in mistis refractæ; & in gradu remisso: ergo ad agendum validius erit elementum aquæ, quàm vinum. Quartò, quo aliquid est nobilius, eo facilius labefactatur; quæ autem ignobiliora sunt pertinacius resistunt, minoribus enim dispositionibus indigent ad sui conseruationem: v. c. in homine sensus tactus ignobilissimus est, & difficillimè amittitur, vi-

fus est nobilissimus, sed & minimi roboris ad resistendum: cum igitur vinum sit aqua multò nobilius, longè etià facilius aqua ipsa destruetur. Deinde tantum abest, vt ex eo quòd vinum in aquam vertitur, colligi debeat & aquam in vinum transmutari, vt totum oppositum sit inde potiùs colligendum, vt inductione in cæteris ferè omnibus conuersionibus constat: ignis enim, qui omnia depascitur, in cinerem vertitur, nihilque est quod magis resistat, & à conuersione in ipsum sit magis remotum, quàm ipse idem cinis: vinum in acetum vertitur, at acetum in quodlibet aliud potiùs quàm in vinum: bos maceratus apes procreat, ex apibus fieri bouem est omnino inauditum: ex hominum cadaueribus serpentes aliquàdo oriuntur, ex serpentibus homines numquam: fructus & alia ciborū genera quibus homo vescitur, in ipsius substantiam vertuntur, at eius substantia in illa numquam transmutatur: solū inter elementa simplicia dari videtur huiusmodi regressus aut circulus. Quod inde oritur, quia, cum ex simplici elemento non possit constitui mistum dum elementum corrumpitur, & non per admissionem cum alio simplici corpore, oportet vt in aliud elementum conuertatur: quare in vinum, & quia mistum, & quia resoluitur aliquando in aquam, non potest ipsa aqua immediate transmutari.

Præ-

Præterea argumentantur, Diuiditur aqua dum vino miscetur, in partes quæ sunt minores minimo naturali, ergo corrumpitur, & in vinum vertitur: nam nec aqua conseruari potest sub minori quantitate, quàm sit minimum, nec fingi potest in quid aliud vertatur quàm in vinū. Resp. in multis deficere hoc argumentum. Primo enim falsum est dari in elementis minimū sub quo minori naturaliter existere nequeant, vt 1. de Gen. q. 35. sect. 4. probauimus. si enim, vt cætera omittam, aurum in minutissimum puluerem redactum formam suam non amittit, quomodo credibile est aquam aut aliud elementum determinatam sibi poscere quantitatem, sub qua minori existere nequeat? Secundo, esto elementa habeant minimum, vnde colligunt diuidi aquam in minores partes, quàm sit minimum ipsius? suam vtique conseruationem omnia appetunt: non est igitur credibile aquam ita ex se diuidi, vt inde eius corruptio consequatur. Præterea dum in pari quantitate vinum & aqua admiscentur, diuidentur ambo in partes minimo minores, amboque corrumpentur, sed quidnam inde gignatur ne somnare quidem poterunt. Ad hæc si album vinum rubeo admisceatur, non minùs eius partes permeat quàm aqua, ergo & ipsum corrumpitur. quod esse falsum experimento constat. Denique cum vinum & aqua in qualitatibus primis,

scili-

scilicet frigore & humiditate, conueniant, ex ipsis mistis fit ynum, cuius partes magis conseruantur, quàm si separatæ existerent, mutuò enim se tuentur, & à contrarijs se defendunt. Non magis ergo per huiusmodi mitionem aqua in vinum vertitur, quàm æs aut argentum vertatur in aurum, dum ambo liquefacta simul admiscantur, vt in nostra quæst. 12. sect. 1. de Gen. notauimus,

Atque hæc habui denique quæ super dignissima quæstione differerem. Finem facio, Lector candide, si amicum iudicium doctissimi viri Ioannis Ghijsmaers Hedichusij, Belgæ, è Societ. Iesv S. Theologiæ Doctoris, nec non eiusdem in alma Cæsareâ Regiâque Pragensi Academia Ordinarij Professoris, tui etiam iuris fecero; cuius quidem accuratione typis Belgicis hunc meum laborem habes. Accipe adeò loquentes literas:

Illustrissime ac Reuerendissime Domine.

AD ignotum Te, sed à vultu tantum, non ab animo ac sapientia venire audeo, ac sacram exosculari fimbriam, cuius sublimem mentem veneratus sum in aureo illo, *De Aqua in sacrificio Missæ immediata in sanguinē transmutatione*, libello. Legendum cum mihi nuper obtulerat


tulerat Perillustis ac Admodum R. Dominus Iosephus de Curtis, Illustrissimi Cardinalis ab Harrach Archiepiscopi Pragensis Aulæ Præfectus, Tuus consanguineus, illo etiã beneficio Patronus meus. Placuit is vehementer vel ipsa statim fronte, hoc est, argumento suo: quo in spem veni fore, vt, quam à R. P. Ægidio de Coninck sapientissimo magistro meo in Scholis olim didiceram sententiam, ac sæpiùs deinde ipse in celeberrimis Louanienſi ac Pragensi Academijs propositis thesibus docuiſſem; ea ab Illustrissima D. V. ita illustrata, nouam etiam meo ac aliorum animis lucem afferat. Neque spem fefellit ipsa argumenti luculentissima pertractatio: si enim inspicerem quæ è Christi Seruatoris, aquam in suprema cœna miscentis, factò; è Pontificum Conciliorumque decretis; è Sanctorum Patrum placitis; ex Angelicis D. Thomæ commentationibus; è primi nominis Scholasticorum doctrina; ipsa denique aquæ & vini natura, in Disputatione olim typis edita, atque in recens illi pariter aureo attexto Syrmate (vindice inquam contra nonnullorum prioris dissertationis impugnationes Appendice) eruditissimè disseruisti, omnia, mihi iuxta ac iis, quos tuam hanc lucem celare non potui, oculos implerunt ac mentē. Vnum illud sæpiùs indolui, atque non tam libello Tuo quàm ipsi naturæ rerum moli-

trici

trici propè succensui, quòd iis Italiam Tuam à nostro Septemtrione Alpium difficillimis claustris disiunxerit, quæ ab annis iam plus quinq; à D. V. Illustrissima editam Dissertationem à nobis excluderint. Neque parum dolorem hunc atque indignationem meam illæ auxerunt paginæ, quibus legebam fecisse Te etiam publici iuris in Peripateticam de Ortu & interitu doctrinam alteram commentationem, inque ea multis illam probasse sententiam quæ naturæ viribus negat aquam in vinum posse conuerti, quam ipse quoque ante annos duodecim meos in Philosophia docueram Auditores. Tum verò cogitare cœpi, num qua ratione meo ac communi multorum dolori mederi possem: & occurrit, si, quam ad alteram editionem destinari sciebam Tuam illam Theologicam cum noua Appendice disputationem, iis committeretur typis, à quibus ad commune totius Europæ ius vsumque facilè perueniret. Suggesti consilium Perillustri ac Admodum R. Domino consanguineo Tuo, atque cogitatione meâ ab illo Illustrissimæ Domin. Tuæ communicatâ, ab eaque approbatâ, citissimè rem conficiendam Antuerpiæ suscepit D. Martinus Nutius, ibidem ciuis, bibliopola ac typographus, vnus istic magni Plantini heredibus industriâ ac famâ vix secundus. Ego verò Tuo nomine vt meum ad Illustrissimam D. T. de hoc opere qua-

qualecumque consignarem iudicium, *animum*
 illud iure meritoque, quod suprà faciebam,
 rursus inscribo. ac vt plurima huiusmodi alia
 à sapientissima Tua mente ac manu videre
 nobis liceat, publicum hñc meum atque alio-
 rum multorum, apud benignissimum IESVM
 prolongæua Illustrissimæ Vestræ Domin. vita
 votum pono, idem, qui sacram illius

venerabundus



exosculor dexteram

humillimus seruus Ioannes
 Ghijsmaers Hedichusus,
 è Societate IESV.

Dat. Pragæ Bohemorum
 30. Nouembris, an. 1627.

1000



5-3-5-2

